







10508

Patrol LYM-216



ŒUVRES
DE PLUTARQUE.

TOME CINQUIÈME.

5

VIES DES HOMMES ILLUSTRÉS
contenues dans le cinquième Volume.

CIMON.	} comparés.
LUCULLUS.	
NICIAS.	} comparés.
MARCUS CRASSUS. . .	
SERTORIUS.	} comparés.
EUMENES.	

DE L'IMPRIMERIE DE PH.-D. PIERRES,
Imprimeur Ordinaire du Roi, &c.

598777

26N

LES VIES
DES
HOMMES ILLUSTRÉS
DE PLUTARQUE,

*Traduites du Grec par JACQUES AMYOT,
Grand-Aumônier de France;*

Avec des Notes & des Observations de M. VAUVILLIERS,
Lecteur du Roi, Professeur de Langue grecque au Collège
Royal, de l'Académie Royale des Inscriptions & Belles-
Lettres.

TOME CINQUIÈME.




A P A R I S,

Chez JEAN-BAPTISTE CUSSAC, Libraire,
rue & carrefour S. Benoît, vis-à-vis la rue Taranne.

M. DCC. LXXXV.

AVEC APPROBATION, ET PRIVILÈGE DU ROI.





*EXPLICATION des deux Figures
contenues dans ce cinquieme Volume.*

LA PREMIERE représente l'appartement des femmes & des sœurs de Mithridate. Le bandeau royal déchiré, étendu aux pieds de la princesse déjà morte, & dont on voit la tête renversée, indique assez Monime, que la mere de Bérénice soutient d'une main, tandis que de l'autre elle boit le poison. Bérénice est encore debout, & paroît bien plus occupée de Monime que d'elle-même. A côté d'elle le misérable Bacchide semble attendre avec une impatience féroce l'exécution des ordres dignes d'un tel maître & d'un tel esclave. Des deux autres figures, celle qui a le visage caché dans ses mains, & qui paroît déjà morte, représente Statira, & l'autre Roxane, qui maudit avec désespoir la cruauté de son frere. *Vie de Lucullus*, p. 116.

LA SECONDE représente la place publique de Rome, On y voit le peuple

assemblé en foule. Plusieurs mains élevées semblent ordonner aux deux consuls de se réconcilier. Pompée demeure assis sur sa chaise curule avec un air d'indifférence. Crassus au contraire paroît debout, tenant la main de Pompée, & tourné du côté du peuple, à qui il fait sentir la raison & la noblesse de sa démarche. *Vie de Crassus*, p. 318.

SOMMAIRE

SOMMAIRE

DE LA VIE DE CIMON.

LE devin *Péripoltas* s'établit à *Chéronée*. II. *Damon* conjure contre le capitaine d'une garnison Romaine dans *Chéronée*, & le tue. III. Il est tué lui-même en trahison. IV. Les *Orchoménien*s accusent ceux de *Chéronée* devant le préfet de *Macédoine* du meurtre commis par *Damon*; ils sont absous sur le témoignage de *Lucullus*, & lui élèvent une statue. V. *Plutarque* écrit la *Vie* de *Lucullus*, comme partageant la reconnoissance de ses concitoyens pour un si grand service. VI. Il a cru ne pouvoir mieux le comparer qu'avec *Cimon*. Divers traits de ressemblance entre le Grec & le Romain. VII. Naissance, jeunesse & caractère de *Cimon*. VIII. Mauvaise conduite de *Cimon* & de sa sœur; mariage de celle-ci. IX. Belles qualités de *Cimon*. Il est le premier à applaudir au conseil que *Thémistocle* donnoit aux *Athéniens* de quitter leur ville, à l'approche de *Xerxès*, pour s'embarquer. Gloire que *Cimon* acquiert à la journée de *Salamine*. X. Entrée de *Cimon* dans l'administration. Il attire aux *Athéniens* les confédérés dégoûtés des *Lacédémoniens* par l'insolence de *Pausanias*. XI. Histoire de *Pausanias* & de *Cléonice*, *Cimon* assiège *Pau-*

Tome V.

A

sanias dans Byfance. XII. Il chasse les Perfes d'Eioné, & s'empare de tout le canton. XIII. Il se rend maître de l'île de Scyros. XIV. Il rapporte les os de Théfée à Athènes. XV. Comment Cimon fit le partage du butin après la prise de Sestos & de Byfance. XVI. Libéralité de Cimon. XVII. Elle étoit absolument défintéreffée. XVIII. Politique de Cimon vis-à-vis des confédérés des Athéniens. Elle rend infensiblement les Athéniens leurs maîtres. XIX. Il continue la guerre contre les Perfes. XX. Il remporte fur eux une victoire navale auprès du fleuve Eurymédon. XXI. Une feconde contre l'armée de terre. XXII. Une troisieme contre la flotte Phénicienne qui venoit au fecours des Perfes. XXIII. Traité de paix entre le roi de Perse & les Athéniens. XXIV. La ville d'Athènes enrichie du butin des Perfes. Embelliffemens que Cimon lui procure. XXV. Il s'empare de la Chersonèse de Thrace, & de l'île de Thafos. XXVI. Accufation, défenfe & abfolution de Cimon. XXVII. Le peuple s'élève au-deffus des nobles en l'abfence de Cimon. Il eft décrié à fon retour. XXVIII. Bienveillance des Lacédémoniens pour Cimon. Eftime & attachement de Cimon pour eux. XXIX. Tremblement de terre à Sparte. Guerre des Hélotés. Les Spartiates envoient demander du fecours aux Athéniens. XXX. Cimon va à leur fecours. XXXI. Il eft banni du ban de l'oſtraciſme. XXXII. Il eft rap-

S O M M A I R E.

3

pellé. XXXIII. Il se prépare pour porter la guerre dans l'île de Cypre & dans l'Égypte. XXXIV. Il remporte la victoire sur la flotte des Perses. XXXV. Sa mort. XXXVI. Ses cendres rapportées dans l'Attique. Les habitans de Citium honorent son cénotaphe.

Depuis l'an 500 , jusqu'à l'an 449 avant Jesus-Christ.

LES VIES

LE'S VIES
DES
HOMMES ILLUSTRÉS
GRECS ET ROMAINS,
COMPARÉES L'UNE AVEC L'AUTRE
PAR PLUTARQUE DE CHÆRONNÉE.

C I M O N.

LE devin Peripoltas, celui qui amena de Thessalie au païs de la Bœœce, le roy Opheltas¹, avec les peuples qui estoient sous son obeïssance, laissa une posterité qui depuis a flory long temps au païs, la plus part de laquelle s'habitua en la ville de Chæronée, pource que ce fut la première par eulx conquise sur les Barbares qu'ils en déchassèrent. Mais ceulx de ceste race estans ordinairement gens de grand cueur, & naturellement enclins aux armes, se hazarderent tant à tous

¹ Voyez les Observations sur les délais de la justice divine, au Tome XVI, ch. xxvii, p. 542.

dangers de la guerre ès courfes des Medois par la Grece & batailles des Gaulois , qu'ilz y demourerent presque tous , & n'en eschappa qu'un petit enfant orphelin de pere & de mere , nommé Damon , & surnommé Peripoltas , lequel surpassa grandement tous les autres jeunes hommes de son temps tant en beaulté de corps qu'en grandeur de courage , combien qu'il fust au demourant homme dur , rude & austere de sa nature.

II. Or advint il qu'au sortir de son enfance , un Romain capitaine d'une enseigne de gens de pied , laquelle estoit en garnison dedans la ville de Charonée pour y passer l'hyver , devint amoureux de luy , & pource qu'il ne le pouvoit gagner ny par prieres , ny par dons , il y avoit grande apparence qu'il essayeroit & tascheroit à en jouir par force , pourautant mesmement que la ville de Charonée , qui est le lieu de ma naissance , estoit pour lors bien peu de chose , & dont pour sa foiblesse & pauvreté on faisoit adonc bien peu de compte. Ce que Damon craignant , & aussi prenant à cueur qu'il fust ainsi villainement sollicité de son deshonneur , se delibera de luy dresser embusche , & feit tant qu'il attira aucuns de ses compagnons , non en grand nombre , à fin que l'entreprise se peust conduire plus secretement , à conjurer avec luy contre ce capitaine. Si furent seize conjurez en tout , qui une nuit

se barbouillerent le visage de suye , & le matin après avoir beu ensemble , au point du jour coururent sus à ce Romain qui faisoit un sacrifice sur la place , & le tuerent avec bon nombre de ses gens : puis cela fait s'enfouyrent hors de la ville , laquelle se trouva grandement troublée pour ce meurtre , & fut assemblé le conseil là dessus , qui condamna sur le champ Damon & ses complices à mourir , à fin que cela leur servist de descharge & de justification envers les Romains : mais le soir mesme , ainsi que tous les magistrats & officiers de la ville souppoyent ensemble dedans le palais selon la coustume , Damon & ses adherens entrerent d'emblée au lieu où ilz estoient , qui les occirent tous , & puis s'en refouyrent une autre fois hors de la ville.

III. Or advint qu'environ ce temps là Lucius Lucullus allant en quelque expedition , passa avec son armée par la ville de Charonée : & pource que le cas estoit lors freschement advenu , s'y arresta quelques jours pour informer du faict & en sçavoir la verité : si trouva que la communaulté de la ville n'en estoit aucune-ment coupable , ains que plus tost elle mesme avoit aussi esté outragée : parquoy il prit les souldards qui estoient demourez de la garnison , & les emmena quand & luy. Ce pendant Damon couroit & pilloit tout le plat pais , & rodoit

tousjours à l'entour de la ville , tellement que les habitans à la fin furent contraincts d'envoyer devers luy , & par doulces paroles & decrets favorables , feirent tant qu'ilz l'attirerent en la ville : là où retourné qu'il fut , ilz l'eleurent Gymnasiarche , c'est à dire , maistre des exercices de la jeunesse : mais peu après , ainsi qu'il se faisoit un jour frotter d'huyle tout nud dedans l'estuve , ilz le tuerent en trahison : & pourautant qu'il fut longuement qu'en ce lieu là apparoissoient des esprits , & que lon y entendoit des gemissemens & souspirs , ainsi que le comptoyent noz petes , on feit condamner & murer la porte de l'estuve : toutefois encore jusques aujourd'huy ceulx qui se tiennent là auprès , disent qu'ilz y voyent des visions , & y entendent des voix & cris espouvantables. Mais ceulx qui sont descendus de ce Damon (car il y en a encore de sa race au país de la Phocide près la ville de Stiris , qui fut tous les autres retienent les façons de faire & le langage des *Æoliens*) sont appelez *Asbolomeni* , comme qui diroit , les barbouillez de fuye , pourautant que Damon & ses consors se souillerent les visages de fuye quand ils coururent sus au capitaine Romain.

IV. Mais estans les *Orchomeniens* voisins de ceulx de *Chæronée* , & ennemis à cause du voisinage , ilz loerent un calumniateur advocat

Romain , lequel accusa tout le corps de la ville , ne plus ne moins que si c'eust esté une seule personne privée , du meurtre commis es personnes des Romains , que Damon & ses complices avoyent tuez. Si fut le procès intenté ; & la cause plaidée devant le gouverneur de la Macedoine , pource que les Romains n'envoyoyent point encore alors de gouverneurs en la Grece , & les advocats qui plaidoyent pour ceux de Chronée appellerent à tesmoing Lucius Lucullus , alleguans qu'il sçavoit très bien la verité du faict : parquoy le gouverneur luy en escrivit , & Lucullus en sa responce luy tesmoigna au vray ce qui en estoit : au moyen dequoy nostre ville gaigna sa cause , qui autrement estoit en danger de sa ruine. Parquoy les habitans qui pour lors estoient , se sentans eschapper d'un si grand peril par le tesmoignage de Lucullus , luy feirent faire une image de pierre qu'ilz dresferent en son honneur sur la place , joignant celle de Bacchus.

V. Et nous , encore que par plusieurs aages & siecles² nous soyons ja esloignez de ce temps là , si estimons nous que son bienfaict s'estende jusques à nous qui sommes de present : & pour-
autant que nous avons opinion que l'image &

² Siècles n'est pas dans le grec ; entre la mort de Lucullus & la naissance de Plutarque il n'y a pas 200 ans.

le portraict qui donne à cognoistre les meurs & conditions des personnes , est trop plus excellent , que celuy qui ne represente que le corps & le visage seulement , nous comprendrons en cest œuvre des Vies des Hommes illustres que nous comparons l'un à l'autre , ses gestes & ses faicts , en escrivant la verité simplement : car il suffit que nous monstrions avoir souvenance de son benefice , & croyons que luy-mesme ne voudroit pas que pour loyer d'un tesmoignage veritable on luy payast une narration faulse & controuvée en sa faveur. Mais tout ainsi comme quand nous faisons peindre & portraire après le vif , quelques beaux visages , & qui ont fort bonne grace , si d'aventure il s'y treuve quelque imperfection & quelque chose de laid , nous ne voulons pas ny qu'on la laisse du tout , ny qu'on s'estudie aussi trop à la représenter , pource que l'un rendroit la portraiture difforme , & l'autre dissemblable : aussi pourautant qu'il est mal aisé , ou pour mieulx dire , peult estre , impossible de monstrer un personnage duquel la vie soit entierement innocente & irreprehensible il se fault arrester à écrire pleinement les choses qui auront esté vertueusement faites , & en cela tascher à représenter parfaitement la verité , ne plus ne moins que le vif. Mais où il se trouve quelques fautes & erreurs parmy leurs actions

procedées , ou de quelque passion humaine ; ou de la contrainte des temps de la chose publique , il les fault plus tost estimer defaults & imperfections de vertu non du tout accomplie , que meschancetez expresses procedentes de vice formé , ny de certaine malice : & ne fera ja besoing de s'amuser à les exprimer trop diligemment & par le menu en nostre histoire , ains plus tost les passer legerement , comme par une reverentiale honte de la pauvre nature humaine , laquelle ne peult produire un homme si parfaict ne si bien composé à la vertu , qu'il n'y ait tousjours quelque chose à redire.

VI. En pensant doncques à qui je pourroye comparer Lucullus , il m'a semblé que je le devoye conferer avec Cimon , pource qu'ilz ont tous deux esté vaillans & bellicieux contre les ennemis , ayans tous deux fait de beaux & grands exploits d'armes à l'encontre des Barbares , tous deux ont esté doux & gracieux envers leurs citoyens , tous deux ayans esté les principaux moyens de pacifier les guerres & dissensions civiles en leurs pais , & l'un & l'autre ayant gaigné de très glorieuses victoires sur les Barbares : car jamais capitaine Grec , avant Cimon , ny Romain avant Lucullus n'avoit esté si loing faire la guerre , mettant à part les faicts de Bacchus & de Hercules , & les gestes aussi de

Perseus contre les Æthiopiens, les Medois & les Armeniens, & ceulx d'Iafon, si d'aventure il peult avoir duré depuis leur temps jusques au nostre aucun monument qui merite que l'on y adjouste foy. Davantage ilz ont encore cela commun entre eulx, qu'ilz n'ont point conduit à fin leurs entreprises, ayant bien l'un & l'autre battu & miné leurs adversaires, mais non pas entierement ruiné ne desfait : & si peult on encore remarquer une grande conformiré de nature entre eulx par l'honesteté & courtoisie & humanité, dont ilz usoyent à recueillir & traiter les estrangers en leurs maisons, & par la magnificence, sumptuosité & opulence de leur vie & despenfe ordinaire. Nous omettons à l'aventure encore quelques autres similitudes : mais elles seront aisées à remarquer par le discours de leur histoire.

VII. Cimon doncques estoit filz de Miltiades & de Hegesipyle Thraciene de nation & fille du roy Olorus, comme lon treuve en certaines compositions poëtiques que Melanthius & Archelaus ont escriptes de Cimon. Le pere mesme de l'historien Thucydides, qui estoit aussi de la parenté de Cimon, s'appelloit semblablement Olorus, montrant par ceste conformité de nom que ce roy Olorus estoit un de ses ancestres, & si possédoit des mines d'or au pais de la Thrace,

joinct que lon tient qu'il y mourut en un certain lieu, qui se nomme la forest fossoyée, là où il fut tué : mais ses cendres & ses os furent rap-portez au païs de l'Attique, & se voit encore son tumbeau entre les sepultures de la famille de Cimon auprès de celle de Helpinice sœur dudit Cimon : toutefois Thucydides estoit du bourg de Alimus, & Miltiades de celui de Lacia. Miltiades donques, son pere, ayant esté condamné envers la chose publique en l'amende de ¹ cinquante talens, à faute de payement fut mis en prison, là où il mourut, & laissa Cimon orphelin en fort grande jeunesse, avec sa sœur, qui estoit aussi encore jeune fille à marier. Si fut Cimon ès premiers ans de sa jeunesse fort mal nommé, & eut un très mauvais bruit par la ville, étant tenu pour jeune homme dissolu, grand beuveur, & ressemblant entierement de façons de faire à son ayeul, qui avoit eu nom Cimon comme luy, mais pour sa bestise avoit esté surnommé Coalemos, qui vault autant à dire comme, le sot. Stesimbrotus mesme le Thasien, qui fut environ le temps de Cimon, escrit que jamais il n'apprit ny la musique, ny autre art quelconque de celles que lon avoit accoustumé de faire apprendre aux enfans de

¹ Ce sont environ trente mille escus. Amyot. 233,437 livres 10 sols de notre monnoie.

bonne maison en la Grece, & qu'il ne tenoit du tout rien ny de celle vivacité d'esprit, ny de celle grace de parler, qui est propre aux enfans nez au païs d'Attique : mais nonobstant qu'il estoit d'une nature genereuse, magnanime, & où il n'y avoit rien de simulé ny de feinct, tellement que ses façons de faire sentoient plus tost son Peloponesien, que son Athenien : car il estoit tel que le poëte Euripides a descrit Hercules,

De peu de monstre & sans nul parement,
Homme de bien au reste entierement.

VIII. Cela se peult adjouster bien à propos, à ce que Stefimbrotus a escrit de luy : toutefois en sa premiere jeunesse il fut soupçonné d'avoir affaire charnellement avec sa sœur, laquelle autrement n'avoit pas gueres bon bruit : car elle forfeit à son honneur avec le peintre Polygnotus, qui en peignant les dames Troyennes captives contre les parois du Portique, que lon appelloit alors Plesianaction, & qui se nomme maintenant Pœcile, c'est à dire, enrichy de diverses peintures, il tira, comme lon dit, le visage de Laodice sur le vif de Helpinice. Si n'estoit point ce peintre Polygnotus homme mechanique ny mercenaire, qui peignist ce portique pour gagner de l'argent, ains fait liberalement ceste honesteté à la chose publique,

ainsi que tous les historiens de ce temps là le tesmoignent, & que le poëte mesme Melanthius le dit en ces vers :

A ses despens, sans loyer mechanique ,
Il a orné nostre place publique ,
Et decoré les saincts temples des dieux ,
En y peignant les faiçts des demi-dieux .

Toutefois il y en a qui disent que Helpinice n'habitoit point clandestinement, ains publiquement avec son frere Cimon , comme sa femme legitimement espousée¹, à cause qu'elle ne peut trouver mary d'aussi noble maison comme elle pour sa pauvreté : mais que depuis un nommé Callias , qui estoit l'un des plus riches & des plus opulents de la ville, la demanda en mariage , offrant de payer du sien l'amende , en laquelle son pere Miltiades avoit esté condamné envers la chose publique , si lon la luy vouloit bailler à femme : à quoy Cimon se consentit , & soubz ceste condition la luy bailla en mariage. Ce neanmoins il est tout certain que Cimon a esté un peu subjeçt à l'amour & aux femmes : Car le poëte Melanthius en certaines elegies , en jouant fait mention d'une Asteria native de Salamine , & d'une autre appelée Mnestra , comme si Cimon en eust esté amoureux : &

¹ Voyez les Observations.

si est tout certain qu'il estoit fort affectionné envers sa femme legitime Isodice , fille d'Euryptolemus , filz de Megacles , & qu'il porta sa mort très impatiemment , à ce que lon peut juger par les elegies qui luy en furent escrites pour le reconforter en son dueil. Le philosophe Panætius estime qu'Archelaus le physicien fut celuy qui composa lesdictes elegies , en quoy il y a bien quelque apparence à considerer la raison du temps.

IX. Mais au demourant les meurs & la nature de Cimon estoient en tout & par tout grandement à louer : car il ne cedit , ny à Miltiades en hardiesse , ny à Themistocles en bon sens & sagesse , & si est sans doubte , qu'il estoit plus juste & plus homme de bien que tous les deux : car n'estant de rien moindre qu'eulx , ès parties d'homme de guerre , & vertus de bon capitaine , il les surpassoit grandement tous deux ès qualitez de bon gouverneur , & en l'administration des affaires de ville , du temps qu'il estoit encore jeune & non experimenté en la guerre. Car quand Themistocles à l'arrivée des Medois , conseilla au peuple Athenien de sortir de la ville , & abandonner ses terres & son país pour s'embarquer sur les galeres , & combattre les Barbares par mer dedans le destroit de Salamine , cõme tout le monde se trouva estonné d'un conseil

Conseil si hardy & si aventureux, Cimon fut le premier qui avec une joyeuse chere s'en alla tout le long de la rue du Ceramique, avec d'autres jeunes hommes ses familiers & amis, vers le chasteau, portant en sa main un mors de bride pour le consacrer & offrir à la deesse Minerve, voulant par là signifier, que la ville pour lors n'avoit que faire de gens de cheval, ains de gens de marine : & après avoir fait son offrande il prit l'un des boucliers qui estoient attachez & pendus aux parois du temple, puis ayant fait sa priere à Minerve, il descendit sur le port, & fut le premier qui donna cueur & hardiesse à la plus grande partie des citoyens, de laisser la terre & de monter sur mer. Oultre cela il estoit beau personnage, comme tesmoigne le poëte Ion, & de belle taille, ayant les cheveux crespes & espez, & se porta si bien & si vaillamment en l'affaire au jour de la bataille, qu'il en acquit incontinent reputation grande avec l'amour & bienvueillance d'un chascun, tellement que plusieurs estoient ordinairement après luy à le prescher & enhorter de prendre courage, & penser deslors à faire choses respondentes à la gloire que son pere avoit acquise en la journée de Marathon.

..X. Et depuis, aussi tost qu'il commença de s'entremettre du gouvernement des affaires, le

Tome V.

B

peuple le reçut & recueillit à grande joye, estant desja las & ennuyé de Themistocles, à l'occasion dequoy Cimon fut incontinent élevé & avancé aux plus grandes charges & aux plus grands honneurs de la ville, estant agreable à la commune à cause de sa douceur & de sa simplicité : joint aussi qu'Aristides luy servit de beaucoup à son advancement, tant pource qu'il voyoit en luy une addroite & gentille nature, que pource qu'il en vouloit faire un contrepoids à l'encontre de la ruze & hardiesse de Themistocles. Parquoy, après que les Medois s'en furent fous de la Grece, estant envoyé par les Atheniens pour capitaine de la marine, lors que la ville d'Athenes n'avoit encore point de principauté ny d'empire, ains suyvoit Pausanias & les Lacedæmoniens, il teint tousjours ses citoyens en tous les voyages, en merveilleusement bon ordre & bon equippage, plus prompts à bien faire que nulle autre nation qui fust en toute l'armée. Et depuis comme Pausanias eust intelligence avec les Barbares pour trahir la Grece, & en eust escript au roy de Perse, traittant ce pendant rudement & fierement les allies & confederez de son pais, & faisant beaucoup d'insolences pour l'autorité grande qu'il avoit, & pour la folle arrogance dont il estoit plein : Cimon au contraire recueilloit

doulcement ceulx à qui Pausanias faisoit outrage , & en les escoutant humainement , & parlant gracieusement à eulx , on ne se donna garde qu'il osta la principauté de la Grece d'entre les mains des Lacedæmoniens , & la mit entre celles des Atheniens , non point par force d'armes , mais par son doulx parler & par sa courtoise façon de faire & sa gracieuseté : car la plus part des alliez ne pouvant plus supporter l'orgueil & le mauvais traitement de Pausanias , se renegerent volontairement sous la charge de Cimon & d'Aristides , qui non seulement les receurent , mais davantage escrivirent aux seigneurs du conseil des Lacedæmoniens , qu'ils rappellassent Pausanias , à cause qu'il faisoit deshonneur à Sparte , & mettoit toute la Grece en trouble & en combustion.

XI. Suyvant lequel propos on compte que Pausanias un jour en la ville de Byzance envoya querir une jeune fille nommée Cleonice de bonne maison , & de noble parenté , pour en faire son plaisir. Les parents ne la luy oferent refuser pour la fierté qui estoit en luy , & la laisserent enlever. La jeune fille pria ses valets de chambre d'oster toute lumiere , mais en se cuidant approcher du liét de Pausanias qui estoit desja endormy , comme elle alloit en tenebres , sans faire bruit quelconque , elle rencontra d'ad-

venture la lampe , qu'elle renversa. Le bruit que fait la lampe en tombant , l'esveilla en sursault , & pensa soudainement que ce fust quelqu'un de ses malvueillans qui le vint surprendre en trahison. Si mit incontinent la main à son poignard qui estoit sous le chever de son liét , & en frappa & blecea la jeune fille de telle sorte , que bien tost après elle en mourut : mais onques puis elle ne laissa reposer en paix Pausanias , pource que son esprit revenoit toutes les nuits , & luy apparoissoit ainsi comme il cuidoit dormir , luy disant en courroux un carme hetoïque , dont la substance est telle ,

Chemine droit & revere justice :

Mal & meschef à qui fait injustice.

Cest outrage irrita tellement & enflamma de courroux tous les alliez à l'encontre de luy , qu'ilz l'assiégerent sous la conduite de Cimon dedans la ville de Byzance , dont toutefois il eschappa , & se sauva secrettement. Et pour-
autant que l'esprit de la fille ne le laissoit point en paix , ains le travailloit continuellement , il s'enfuit en la ville de Heraclée , là où il y avoit un temple où lon conjuroit les ames des trespassez , & y conjura celle de Cleonice pour la prier d'appaier son courroux. Elle s'apparut incontinent à luy , & luy dit , que si tost qu'il

seroit arrivé à Sparte , il seroit delivré de ses maux : signifiant couvertelement , à mon advis , la mort qu'il y devoit souffrir : plusieurs historiens le racomptent ainsi.

XII. Cimon donques accompagné des Grecs alliez & confederez , qui ja s'estoyent retirez par devers luy , fut adverty , comme quelques Persiens gros personnages & parents du roy mesme , qui tenoyent la ville de Eione assise sur la riviere de Strymon au pais de la Thrace , faisoient beaucoup d'ennuy & de dommage aux Grecs habitans à l'environ ¹. Si monta sur mer avec son armée , & s'y en alla , où d'arrivée il vainquit & desfeit les Barbares en bataille , & les ayant desfaits chassa le demourant jusques dedans la ville : puis alla courir sus aux Thraciens qui habitent delà la riviere de Strymon , qui fournissoient des vivres à ceux d'Eione ; & leur ayant fait abandonner le pais , le teint & le garda tout entierement : au moyen dequoy il rengea les assiegez à telle necessité , que Butes lieutenant pour le roy de Perse desesperant de ses affaires meit le feu dedans la ville , & se brussa luy mesme avec ses amis & ses biens. Ainsi ne fut il pas fait grand butin à la prise de celle ville , à cause que les Barbares bruslerent quant & eulx le plus beau & le meilleur qui

¹ Olympiade 77^e, avant J. C. 470 ans.

y fust : mais il conquît & bailla à peupler & habiter aux Atheniens le pais d'alentour, qui est fort plaissant & fort fertile : en memoire dequoy le peuple luy permet de faire dresser en public, & consacrer trois Hermes de pierre, qui sont coulomnes quarrées, au dessus desquelles on met des testes de Mercure, & sur la premiere d'icelles y a une inscription engravée, dont la substance est telle :

Bien furent gens de magnanime race,
Ceux qui dedans Eione, seante
Le long des eaux du Strymon en la Thrace,
Feirent souffrir famine noircissante
Aux fiers Medois, & par force effroyante
De Mars sanglant aussi les desconfirent
Par tant de fois, qu'à la fin concluante
En desespoir eulx mesmes se desfeirent.

Sur la seconde y en avoit une autre telle :

Les citoyens de la ville d'Athenes
Ont fait dresser ces trois images cy,
Pour honorer leurs vaillans capitaines,
Et guerdonner leurs services aussi.
Ceux qui viendront après, voyans qu'ainsi
Le prix d'honneur aux gens de bien s'applique,
Plus volontiers en prendront le soucy
De bien servir à la chose publique.

Et sur la troisieme aussi une telle :

Menestheus conduisoit l'exercice
De ceste ville en la guerre troyenne,

Lequel estoit, comme Homere recite,
 Sur tous les Grecs excellent capitaine
 Pour mettre un ost en bataille. Ancienne
 Donques vous est, non nouvelle ou estrange,
 Atheniens, ceste noble louange,
 D'estre tenus pour sages conducteurs
 D'un faict de guerre où tout à poinct se renge,
 Et de la main hardis executeurs.

XIII. Or combien que le nom de Cimon ne soit point compris en ces inscriptions, si estimoit on pour lors que ce luy estoit un honneur singulier, pource que ne Miltiades ne Themistocles n'en eurent onques de pareil. Ains comme Miltiades requist un jour au peuple, qu'il luy fust permis de porter sur sa teste un chapeau d'olive, il y eut un nommé Sochares¹ natif du bourg de Decelie, qui se dressa en piedz, au milieu de l'assemblée, & s'y opposa disant une parole, qui fut bien agreable au peuple, quoy qu'elle fust ingrate & mal recognoissante le bon service qu'il avoit fait à la chose publique: « Quand tu » auras, dit il, Miltiades vaincu tout seul les » Barbares en bataille, alors demande que lon » t'honore tout seul aussi ». Mais pour quelle cause donques estoit le service de Cimon tant

¹ Palmerius veut avec vraisemblance qu'on lise ici Sophandès, illustre Athénien du bourg de Décélie, dont Hérodote parle avantageusement au L. IX, ch. 73 & suiv.

aggreable aux Atheniens ? C'estoit à mon advis , pourautant que sous les autres capitaines ils avoyent combatu pour se defendre eulx, & leur païs seulement , & sous la conduite de Cimon ils avoyent assailly & battu leurs ennemis jusques chez eulx , là où ils conquirent les villes d'Eione & de Amphipolis , qu'ils peuplerent depuis de leurs propres citoyens , & y gaignerent aussi l'isle de Scyros ¹ , que Cimon prit par une telle occasion : Les Dolopiens la tenoyent , qui estoient hommes nonchalans de labourer & cultiver la terre , mais de toute ancieneté grands coursaïres , qui vivoient de ce qu'ilz escumoyent en la mer , de maniere qu'à la fin ilz n'espargnerent pas les marchands mesmes & passagers qui abordoyent en leurs ports , ains en destrousserent quelques uns Thessaliens , qui y estoient allez pour y cuider traffiquer : & après avoir pillé leurs biens , encore meirent ils les personnes en prison : mais les prisonniers trouverent moyen d'en eschapper , & sauvez qu'ilz se furent , eurent recours au parlement des amphiçtyons , qui est une assemblée generale de tous les peuples & estats de la Grece. Les amphiçtyons , le faict entendu , condamnerent toute la communauté des Scyriens en une grosse amende : la commune ne voulut

¹ 470 ans avant J. C. Scyros est une île de la mer Égée , entre l'Eubée & Lesbos.

rien contribuer au payement de ceste amende, ains respondit que ceulx qui avoyent destrouffé les marchands; & qui en avoyent le pillage entre leurs mains, la payassent s'ils vouloyent: & pource qu'il y avoit en cela quelque apparence; les particuliers larrons craignans qu'ils ne fussent contraincts à ce faire, escrivirent des lettres à Cimon, par lesquelles ilz luy manderent qu'il s'approchast avec son armée, & qu'ilz luy livre-royent leur ville entre ses mains: ce qui fut fait. Ainsi ayant Cimon conquis ceste isle, en chassa les Dolopiens, & delivra en ce faisant la mer *Ægée* de courfaires.

XIV. Cela faict, il luy souvint que l'ancien Theseus filz d'*Ægeus*, s'en fuyant d'Athenes; estoit venu en ceste isle de Scyros, là où le roy *Lycomedes*, pour quelque souspeçon qu'il avoit eu de luy, l'avoit fait occire en trahison: si meit peine d'en trouver la sepulture, pource que les Atheniens avoyent un oracle & prophetie, par laquelle il leur estoit mandé de rapporter ses cendres & ses os à Athenes, & luy faire honneur comme à un demi-dieu: mais ilz ne sçavoyent où il estoit inhumé, pource que les habitans de l'isle au paravant n'en vouloyent rien dire, ny permettre que lon la cherchast. Toutefois Cimon feit alors telle diligence de la chercher, que finablement il en trouva

le tumbeau à toute peine, & meit les ossemens sur la galere capitaineſſe parée & accouſtrée magnifiquement, & ainſi les reporta en ſon païs quatre cents ans après que Theſeus¹ en eſtoit party : dequoy le peuple luy ſeut merveillement bon gré, & en acquit grande bienveillance des Atheniens, qui, en memoire de ce, feirent un jugement des poëtes tragiques qui fut fort notable : car comme le poëte Sophocles, qui eſtoit encore jeune, euſt fait jouer, ſa premiere tragedie, Aphepſion² le prevoſt, voyant qu'il y avoit de grandes brigues & partialitez de faveurs entre les ſpectateurs, il ne voulut point tirer au ſort ceulx qui devroyent eſtre juges de ce jeu, pour adjudger le prix à celuy des poëtes qui l'auroit mieulx merité : mais quand Cimon & les autres capitaines entrèrent au theatre pour voir l'eſbatement, après qu'ilz eurent fait les oblations ordinaires & accouſtumées au dieu, en l'honneur duquel ſe font les jeux, il les arreſta, & leur feit preſter le ſerment de juger ſelon le droit & l'equité, à dix qu'ilz eſtoient de chaſque lignée du peuple un : & le ſerment preſté les feit ſeoir comme juges pour donner leur ſentence, lequel

¹ 469 ans avant J. C. Je ne ſçais comment le pere Pétau place cet événement avant la guerre de Xerxès, d'après l'autorité de Plutarque dans la Vie de Cimon, dit-il.

² Ou Apſéphion, archonte éponyme.

des poëtes devoit emporter le prix. Si s'efforcèrent tous de faire le mieulx qu'ilz peurent pour la dignité des juges : mais Sophocles par sentence d'iceux fut déclaré le vainqueur : dequoy *Æschylus*, à ce que lon dit, fut si dolent & si marry, qu'il ne demoura gueres depuis à *Athenes*, ains s'en alla par despit en *Sicile*, là où il mourut, & fut inhumé près la ville de *Gele*.

XV. *Ion* escrit, qu'estant encore jeune garçon nouvellement venu de *Chio* à *Athenes*, il souppa un jour avec *Cimon* au logis de *Laomedon*, & qu'à la fin du soupper, après que lon eut fait les effusions accoustumées aux dieux, *Cimon* fut prié par la compagnie de vouloir chanter : ce qu'il feit de bien bonne grace, tellement que tous les assistans l'en louerent grandement, disans qu'il estoit plus civil & plus gentil que *Themistocles*, lequel en une pareille assemblée où lon le pria de vouloir jouer de la cithre, respondit qu'il n'avoit point appris à chanter ny à jouer de la cithre, mais qu'il sçavoit bien faire d'une petite & pauvre ville une riche & puissante cité. Après cela les propos & devis de la compagnie estans, comme il advient, coulez à parler des faicts & gestes de *Cimon*, & ayans les principaux esté recitez, luy mesme en racompta un qu'il estimoit le plus advisé, & faict de plus grand sens que nul de tous autres qu'il

eust onques faictz. Car comme les Atheniens & leurs alliez ensemble eussent pris grand nombre de prisonniers Barbares ès villes de Sestos & de Byzance, les alliez par honneur luy defererent la preeminence de departir entre eulx le butin : ce qu'il feist, & meit en un lot les corps tous nuds des Barbares, & en l'autre tous leurs accoustremens & toutes leurs despouilles. Les alliez trouverent ce partage fort inegal : mais neantmoins Cimon leur donna l'option de choisir lequel ilz voudroyent des deux, & que les Atheniens se contenteroyent de l'autre qu'ilz laisseroyent. Si y eut un capitaine Samien nommé Herophytus, qui conseilla aux alliez de prendre plus tost les bagues & despouilles des Perfes ; que les Perfes mesmes : ce qu'ils feirent : car ilz prirent les hardes & accoustremens des prisonniers, & laisserent les personnes aux Atheniens. A l'occasion dequoy Cimon pour lors fut au jugement de la commune estimé mauvais partageur, pource que les alliez emportoient force chaines, carquans & bracelets d'or, force beaux & riches accoustremens de pourpre à la Persienne : & les Atheniens emmenoyent des corps tous nuds d'hommes mols & mal accoustumez au travail & à la peine : mais peu de temps après les parents & amis de ces prisonniers vindrent de la Phrygie & de la Lydie, qui les rache-

ptèrent d'une grosse somme de deniers chascun, tellement que Cimon en amassa tant d'argent, qu'il en soudoya & entreteint toutes ses galeres l'espace de quatre mois, & si en demoura encore une bonne quantité à l'espargne d'Athenes de la rançon qu'ilz payerent.

XVI. Estant donques Cimon devenu riche, il despendit les biens qu'il avoit honorablement gaignez sur les Barbares, encore plus honorablement à en survenir aux necessitez de ses pauvres citoyens : car il feit oster toutes les clostures de ses terres & heritages, à fin que les estrangers passans, & ses citoyens qui en auroient affaire, y peussent prendre du fruiçt qui y seroit, tant comme ilz en voudroyent sans danger, & tenoit tous les jours en sa maison une table, non friande, mais où il y avoit à manger pour beaucoup de personnes, & où ses pauvres bourgeois qui y vouloyent venir estoient receuz & repeuz, sans qu'ils eussent besoing de travailler de leur mestier pour vivre, à fin qu'ilz eussent plus grand loisir de vacquer aux affaires de la chose publique : toutefois le philosophe Aristote escrit, que ce n'estoit pas à tous Atheniens indifferemment qu'il tenoit maison, ains à ceulx qui estoient du bourg de Lacia seulement, dont luy mesme estoit natif. Davantage il avoit tousjours à l'entour de luy quelques jeunes hommes

de ses domestiques, bien vestus, & si d'aventure, en allant par la ville, il rencontroit quelque vieil citoyen, qui fust pauvrement vestu, il faisoit despouiller un de ces jeunes gens, & changer d'accoustrement à luy, & cela n'estoit point pris en mauvaise part, ains sembloit à tous chose venerable : qui plus est, ces mesmes jeunes hommes portoyent tousjours sur eulx bonne somme d'argent, & quand ils trouvoient sur la place ou par les rues quelque honeste citoyen qu'ilz cogneussent estre souffreteux, ilz luy mettoient secretement, sans mot dire, quelque piece d'argent en la main. Dequoy il semble que le poëte mesme Cratinus parle en une siene comedie intitulée, les Archiloches :

Metrobius scribe suis, qui m'estoye
Trop tost venté, & qui me promettoye
De bien traiter ma vieillesse à la table
Du bon Cimon, aux pauvres charitable,
Et achever le reste de mon aage
Avec ce grand & divin personnage,
Premier des Grecs en route honesté,
Et mesmement en hospitalité.

Davantage Gorgias Leontin disoit, que Cimon acqueroit des biens pour en user, & qu'il en usoit pour estre honoré : & Critias, celui qui fut l'un des trente tyrans d'Athenes, en ses elegies souhaitte & demande aux dieux

Des heritiers de Scopas l'opulence,
Le noble cuer, & la magnificence
Du preux Cimon, & d'Agésilas
Les glorieux trophées qu'il a euz.

XVII. Le nom de Lichas Spartiate a esté fort renommé & célébré entre les Grecs : & toutefois nous n'en sçavons autre cause pourquoy, sinon qu'à un jour de feste solennelle, où les jeunes gens s'exercitoient & dansoient tous nuds en la ville de Sparte, il avoit accoustumé de festoyer les estrangers qui y venoient pour voir l'esbarement. Mais la magnificence de Cimon surpassoit la liberalité, humanité & hospitalité ancienne des Atheniens : car ilz ont les premiers enseigné aux hommes par toute la Grece, comment il falloit semer le bled & en user pour se nourrir, & ont aussi montré l'usage des eaux des fontaines, & comment il falloit allumer & entretenir le feu. Là où Cimon faisant de sa propre maison un hospital, où tous ses pauvres citoyens estoient nourriz & alimentez, & laissant aux estrangers passans cueillir les fruiçts qui croissoient à chaque saison en ses terres, ramenoit par maniere de dire, une autrefois au monde celle communauté de biens que les poëtes disent avoir anciennement esté sous le regne de Saturne. Et quant aux objections de ceulx qui calumnioient ceste honeste liberalité, disans que c'es-

toit pour flatter la commune , & gagner la bonne grace du menu populaire , ilz estoient refutez & convaincus par la maniere de vivre qu'il suyvoit au demourant : car il tenoit le party de la noblesse , & vivoit à la guise des Lacedæmoniens : ce qui appert , par ce qu'il fut tousjours contraire à Themistocles , lequel augmentoit & elevoit oultre mesure l'autorité & puissance du peuple , & pour cest effect se joignit avec Aristides , & s'attacha à Ephialtes , lequel en faveur du peuple vouloit oster & abolir la cour d'Areopage. Et là où rous les autres gouverneurs de son temps , excepté Aristides & Ephialtes , estoient concussionnaires & tous attaincts de corruptions : luy au contraire se mainteint toute sa vie incorrompable au faict du gouvernement de la chose publique , & eut tousjours les mains nettes , faisant , disant & conseillant toutes choses purement & nettement en l'administration des affaires publiques , sans jamais pour ce faire , prendre argent de personne quelconque. Auquel propos on treuve escrit , qu'un seigneur Persien nommé Rœsaces traistre à son maistre le roy de Perse , s'en fouir un jour à Athenes , là où comme il fust tous les jours harassé & desiré par les crieries ordinaires des calumniateurs qui l'accusoyent envers le peuple , il eut à la fin recours à Cimon & luy porta jusques en sa salle deux coupes toutes

toutes pleines , l'une de dariques d'or , & l'autre de dariques d'argent (* qui sont pieces de monnoye ainsi appellées , à cause que le nom de Darius y estoit escrit) : ce que voyant Cimon s'en prit à rire , & luy demanda lequel des deux il aimoit mieulx qu'il fust , ou son amy , ou son mercenaire. Le Barbare luy respondit qu'il amoit trop mieulx l'avoir pour amy. « Remporte donc , luy repliqua » Cimon , ton or & ton argent , & t'en va : car » si je suis ton amy , il sera tousjours à mon » commandement , pour en user toutes & quantes fois que j'en auray affaire.

XVIII. Environ ce temps là commencerent les alliez & confederez des Atheniens à se lasser de la guerre contre les Barbares , desirans vivre désormais en repos , & vacquer au labourage & à leur trafic & mesnage , attendu qu'ilz avoyent chassé les ennemis de leur pais , & qu'ilz ne leur faisoient plus d'ennuy : au moyen dequoy ils payoyent bien l'argent , à quoy ilz avoyent esté cottizez , mais ilz ne vouloyent plus fournir d'hommes ny de vaisseaux comme au paravant ; à quoy faire les autres capitaines Atheniens les contraignoient par toutes voyes , & faisoient le procès à ceulx qui y failloyent les condannans en grosses amendes , si rudement , qu'ilz en rendoyent la principauté & seigneurie des Athe-

* Ceci n'est point dans le grec.

niens odieuse à leurs alliez. Mais Cimon prenoit un chemin tout contraire à cela : car il ne forceoit ny ne contraignoit personne , ains se contentoit de prendre de l'argent & des vaisseaux vuides de ceulx qui ne vouloyent ou ne pouvoient servir de leurs personnes , estant bien aise de les laisser abastardir & apparessir en leurs maisons par les attraiçts du repos , & devenir , au lieu qu'ilz fouloyent estre bonnes gens de guerre , laboureurs , marchands & mesnagers , du tout alienez des armes par leur bestise , & par l'envie qu'ilz avoyent de vivre à leur aise en delices : & , au contraire , faisant tousjours monter sur ses galeres bon nombre des Atheniens les uns après les autres , & les endurecissant au travail par continuelz voyages , il feit qu'en peu de temps ilz devindrent seigneurs & maistres de ceulx mesmes qui les soudoyoyent & entretenoyent , pource qu'ilz s'accoustumerent petit à petit à flatter & à craindre iceulx Atheniens , lesquelz ilz voyoyent estre continuellement à la guerre , ayans tousjours le harnois sur le dos & les armes en la main , s'aguerrissans à leurs despens , & par le moyen de la soude & de l'argent qu'ilz leur fournissoient : tellement qu'à la fin ilz se trouverent subjects & tributaires , au lieu qu'ilz estoient compagnons & alliez au commencement.

XIX. Aussi n'y eut il jamais capitaine Grec qui r'abaisast & refrenast plus la fierté ny la puissance du grand roy de Perse, que feit Cimon : car après l'avoir dechassé hors de toute la Grece, il ne le laissa pas en repos, ains le poursuyvant au pied levé, comme lon dit communement, avant que les Barbares peussent reprendre leur haleine, ou donner de sens rassis ordre à leurs affaires, il usa de telle diligence, qu'il prit aucunes de leurs villes par force, & d'autres par pratiques, qu'il feit rebeller à l'encontre du roy, & se tourner du costé des Grecs : tellement, qu'il ne demoura pas un homme de guerre pour le roy de Perse en toute l'Asie depuis le país d'Ionie jusques en la Pamphylie : qui plus est, estant adverty que les capitaines du roy estoient en la coste de la Pamphylie avec une grosse armée de mer, & grande flotte de vaisseaux, voulant les espouventer, de sorte qu'ilz n'ozassent plus se monstrier ne comparoir en toute la mer qui est audeçà des isles Chelidonienes, il se partit de l'isle de Gnidos, & de la ville de Triopium avec deux cents galeres, lesquelles avoyent esté dès le commencement très bien faites & devisées par Themistocles, tant pour cingler legement, que pour tournoyer facilement : mais Cimon les feit alors eslargir & tirer le planché d'un costé jusques à l'autre, à fin qu'elles peus-

sent porter plus grand nombre de gens de guerre en bataille pour assaillir les ennemis. Si dressa son cours premierement à l'encontre des Phaselites, qui estoient Grecs de nation, & neantmoins ne vouloyent ny se tourner du costé des Grecs, ny recevoir leur armée en leurs ports : si courut d'arrivée & pillà tout leur plat païs : puis approcha son armée de leurs murailles : mais ceux de Chio anciens amis des Phaselites estans à ce voyage en l'armée de Cimon, addoulcissent un peu son courroux, & feirent sçavoir de leurs nouvelles à ceux de dedans la ville, par des lettres qu'ilz attachoyent à des fiesches, & les tiroient par dessus les murailles, tant qu'à la fin ilz moyenerent leur appointment, soubz condition que les Phaselites payeroyent pour l'amende dix talents, ¹ qui sont environ six mille escus : & au demourant, qu'ilz suyvroient l'armée des Grecs, & combatroyent de là en avant avec eux & pour eux à l'encontre des Barbarés.

XX. Or dit Ephorus, que le capitaine Persien qui avoit charge de l'armée de mer, s'appelloit Tithraustes, & de celle de terre Pherendares. Mais Callisthenes ² escrit qu'Aryomandes

¹ 46,687 livres 10 sous de notre monnoie.

² Philosophe, cousin & disciple d'Aristote. Il suivit Alexandre dans ses expéditions ; se rendit odieux par son insolence & ses épiigrammes. Aristote disoit de lui, qu'il avoit des talens, mais point de jugement. Il fut accusé d'avoir excité la conspiration d'Hermocle.

filz de Gobrias estoit lieutenant du roy, ayant l'autorité principale sur toute l'armée, laquelle estoit à l'ancre auprès du fleuve d'Eurymedon², n'ayant aucune volonté de combattre, à cause qu'ilz attendoyent un renfort de quatre-vingt voiles Phœnicienes, qui leur devoient venir de Cypre³. Mais Cimon au contraire cherchant à les combattre avant que les galeres Phœnicienes se peussent joindre à eulx, mit les siennes en bataille, délibéré de les assaillir pour les contraindre de venir au combat, si d'eulx mesmes ilz n'y vouloyent venir. Quoy voyans les Barbares, se retirerent premierement au dedans de la bouche du fleuve Eurymedon, à fin qu'on ne les peust environner par derriere, ny forcer de venir à la bataille malgré eulx: toutefois quand ilz veirent que les Atheniens les venoyent chercher jusques là, ilz leur voguerent à l'encontre avec une flotte de six cents voiles, comme le met Phanodemus, ou comme escrit Ephorus, avec trois cents cinquante seulement: mais ilz ne feirent rien digne d'une telle & si grosse puissance, au moins quant au combat de mer, ains tournerent in-

lais; & Alexandre fut bien aise de trouver cette occasion de se venger du refus qu'il avoit fait de l'adorer. Voyez Plut. in Alex.

² Rivière de la Pamphylie vis-à-vis l'île de Cypre. Cornelius Nepos a confondu en plaçant cet événement auprès de Mycale, promontoire & ville de la Carie.

³ 468 ans avant J. C.

continent les prouës vers le rivage, là où ceulx qui le peurent gagner à temps se sauverent de viffesse dedans l'armée de terre, qui n'estoit pas loing de là en ordonnance de bataille, mais les autres que lon peut attrapper en chemin, furent occis, & leurs galeres mises à fond ou prises, à quoy lon peult cognoistre qu'il y en avoit un grand nombre: car il s'en sauva beaucoup, comme il est vraysemblable, & y en eut aussi beaucoup de brisées, & neantmoins encore en prirent les Atheniens deux cents prisonnieres.

XXI. Cependant leur armée de terre s'approcha du bord de la mer, parquoy Cimon fut un peu en doute, s'il devoit faire sortir ses gens en terre, ou non, pource qu'il luy sembloit chose bien mal aisée & dangereuse de prendre terre malgré les ennemis, & d'exposer les Grecs, qui estoient travaillez & lassez du premier combat, aux Barbares qui estoient entiers, frais & reposez, & en nombre plusieurs contre un: toutefois voyant que ses gens se confioient en leurs forces, oultre le courage que leur donnoit la premiere victoire, & qu'ilz ne demandoient autre chose que d'aller charger les ennemis, il les feit descendre en terre encore tous bouillans de l'ardeur de la premiere bataille. Si coururent incontinent de grande roideur & avec haults cris à l'encontre des Barbares, qui les attendirent de pied ferme,

& sousteindrent le premier choc vaillamment : au moyen dequoy la meſlée fut fort aſpre & fort cruelle, & y moururent tous les plus gens de bien & les plus gros perſonnages de l'armée des Atheniens : mais les autres combattirent ſi vertueuſement, qu'à la fin le champ leur demoura ; & à toute peine tournerent les Barbares en fuite, dont ilz occirent une bonne partie ſur la place, & prirent les autres priſonniers avec toutes leurs tentes & pavillons qui eſtoient pleins de toute ſorte de biens & de richesses.

XXII. Ainſi Cimon, comme un vaillant champion des jeux ſacrez, ayant en un meſme jour emporté deux victoires, & ayant ſurmonté la navale que les Grecs avoyent gagnée dedans le canal de Salamine, par celle qu'il gagna lors ſur la terre¹, & celle que les Grecs gagnèrent par terre devant la ville de Plataës, par celle qu'il gagna ce jour meſme en la mer, ne ſe contenta pas encore de cela : car après deux ſi belles & ſi glorieuſes victoires gagnées, il combattit encore pour l'honneur² du trophée, eſtant adverty que les quatre-vingts voiles Phœniciennes, trop tard venues pour ſe trouver en la premiere

¹ Voyez les Observations.

² Le grec ſignifie en effet cela. Mais quel ſens en réſulte-t-il ? Des ſçavans conjecturent avec raiſon qu'il faut ſubſtituer un mot qui ſignifie, pour la troiſieme fois.

bataille navale, estoient arrivées au chef de Hydre, il cingla en toute diligence celle part. Or ne sçavoient encore les capitaines de celle flotte rien de certain de la desfaitte de leur armée principale, ains en estoient en doubte, ne pouvans se persuader qu'elle eust ainsi esté desconfite : au moyen dequoy ilz furent de tant plus effroyez quand ilz apperceurent de loing l'armée victorieuse de Cimon : & en conclusion ilz perdirent tous leurs vaisseaux, & la plus grande partie de leurs gens, qui furent tous ou noyez, ou occis.

XXIII. Cest exploit d'armes rabaisa & dompta tellement l'orgueil du roy de Perse, qu'il en feit ce traité de paix qui est tant mentionné ès anciennes histoires, par lequel il promet & jura, que de là en avant ses armes n'approcheroient point plus près de la mer de Grece, que de la carriere d'un cheval, & ne navigueroit point plus avant que les isles Chelidonienes ¹ & Cyanées ², avec galeres ny autres vaisseaux de guerre. Toutefois l'historien Callisthenes escrit, que cela ne fut point couché dedans le traité, mais que le roy l'observoit pour l'effroy qu'il eut de ceste grande desfaitte : & que depuis il se teint toujours si loing de la mer de Grece, que Pericles

¹ 1^{re} Iles de la Méditerranée entre Rhodes & Cypre.

² 2^{es} Iles ou rochers dans la mer du Pont à l'entrée du Bosphore de Thrace.

avec cinquante voiles, & Ephialtes avec trente seulement naviguerent jusques pardelà les isles Chelidonienes, sans que jamais il leur vinst à l'encontre flotte quelconque des Barbares. Si est-ce pourtant, qu'entre les actes publics d'Athenes que Craterus a recueilliz, se treuvent les articles de ceste paix couchez tout du long, comme d'une chose qui veritablement a esté : & tient on que pour ceste occasion les Atheniens fonderent un autel de la Paix, & qu'ilz feirent un très grand honneur à Callias, qui avoit esté ambassadeur devers le roy de Perse pour luy faire jurer ce traité.

: XXIV. Après donc que les desponilles des ennemis eurent esté vendues à l'encan, il se trouvant d'or & d'argent es coffres de l'espargne, qu'il suffit à tous autres affaires, & encore en fait on bastir le pan de muraille du chasteau qui regarde vers le midy, tant ce voyage & ceste destrouffe les enrichit. Et dit on que la fabrique des longues murailles qui joignent la ville avec le port que lon appelle les Jambes, fut bien bastie & parachevée depuis, mais que les premiers fondemens en furent faits de l'argent que Cimon fournit & bailla luy mesme : & pource que l'ouvrage se rencontroit en lieux pleins d'eaux & marefcageux, qu'il fallut affermir le mares à force cailloux & gros quartiers que lon jetta au

fond à pierre perdue. Ce fut aussi luy qui embellit & orna le premier la ville d'Athenes de lieux de liberal exercice & d'honeste esbatement, lesquelz peu de temps après furent en très grande recommandation : car il feit planter des platains en la grande place, & de l'Academie qui paravant estoit seche & nuë, il en feit un plaisant verger & boccage bien arrosé de fontaines qu'il y conduisit, & y feit dresser de belles allées couvertes pour se promener, & de belles carrieres longues & nettes pour courir.

XXV. Quelque temps après il eut nouvelles; que certains Persiens qui tenoyent la Cherronese, c'est à dire, demy isle du païs de Thrace, n'en vouloyent point sortir, ains appelloyent à leur aide les peuples de la haute Thrace pour leur aider à la defendre contre luy, duquel ilz ne faisoient point de compte, pource qu'il estoit party d'Athenes avec bien petit nombre de vaisseaux, il leur alla courir sus avec quatre galeres seulement, & en prit treize des leurs. Par ainsi en ayant chassé les Persiens, & subjugué les Thraciens, il conquist à son païs toute la Cherronese de Thrace : & au parrir delà s'en alla contre ceulx de l'isle de Thafos¹, qui s'estoyent

¹ 465. ans avant J. C. La guerre dura trois ans. Voyez les Annales de Thucydide par Dodwell, que j'ai suivi dans toutes ces époques.

rebellez contre les Atheniens, & les ayant desfaits en bataille par mer, où il gagna trente & trois de leurs vaisseaux, il prit d'avantage leur ville par siege, & acquit aux Atheniens les mines d'or qui sont au delà de leur ville, avec toutes les terres qui leur appartenoyent.

XXVI. Ceste conquête luy donnoit grande commodité & moyen de passer en la Macedoine, & d'en occuper dès lors une bonne partie ; mais ne l'ayant pas voulu faire, il fut soupçonné d'en avoir pris de l'argent & de s'estre laissé corrompre par present du roy Alexandre¹ : & de fait il en fut appelé en justice par conspiration de ses malvueillans qui se banderent à l'encontre de luy : mais en se defendant, & deduisant ses justifications devant les juges, il leur dit : « Je n'ay
» point contracté d'amitié ny d'hospitalité avec
» les Ioniens, ou avec les Theffaliens, qui sont
» peuples riches & opulents, ny n'ay point pris
» leurs affaires en main, comme ont fait quelques
» autres pour estre par eulx honorez & en recevoir
» du profit, mais bien ay je pris hospitalité avec
» les Lacedæmoniens, pource que j'aime & veulx
» imiter leur temperance, sobriété & simplicité
» en leur maniere de vivre, laquelle je prefere
» à tous biens & à toute richesse, combien que

¹ Alexandre I qui monta sur le trône 479 ans avant J. C. Voyez la suite des rois de Macédoine au Tome XV.

» je soye bien aise d'enrichir la chose publique
» des despoilles de noz ennemis ». Stefimbrotus
faisant mention de ceste accusation , dit que
Helpinice sa sœur s'en alla au logis de Pericles
qui estoit le plus aspre & le plus vehement de
tous ses accusateurs , pour le prier de ne vou-
loir pas si asprement poursuyvre son frere , &
que Pericles en soubstant luy repondit : « Tu
» es trop vieille , Helpinice , tu es trop vieille
» desormais , pour venir au dessus de telz affaires » :
mais neantmoins quand ce vint à plaider la cause ,
il luy fut plus doulx què nul autre des accusa-
teurs , & ne se leva qu'une seule fois pour parler
contre luy , comme par maniere d'acquit , de
sorte qu'il eschappa , & fut absoubz à pur & à
plein de ceste accusation.

XXVII. Au demourant , tant qu'il fut present
en la ville , il refrena & reteint tousjours l'in-
solence du peuple , qui entreprenoit sur l'autho-
rité des gens de bien , & tiroit à soy toute souve-
raineté de puissance & de commandement : mais
aussi tost qu'il fut party pour s'en aller à la guerre ,
la commune n'ayant plus personne qui luy con-
tredist , renversa sans dessus dessous tout le gou-
vernement de la ville , & confondit toutes les
ancienes loix & coustumes , dont ilz avoyent usé
de tous temps , & ce à l'instigation & par la
menée d'Ephialtes : car ilz osterent la cognoissance

de toutes causes presque à la cour d'Areopage, & mettant toute l'autorité des jugemens entre les mains du peuple, réduisirent l'estat de la cité en pure démocratie, c'est à dire, en gouvernement où le peuple a plein pouvoir & souveraine puissance, étant ja Pericles en grand crédit; lequel favorisoit au party de la commune. Parquoy Cimon à son retour trouvant que l'autorité du senat & du conseil avoit ainsi honteusement esté diminuée, en fut fort marry, & rascha de remettre les jugemens ainsi comme ilz estoient au paravant, & restituer le gouvernement des gens de bien qui avoit esté estably du temps de Clisthenes¹: mais adonc recommencerent ses ennemis à crier contre luy, renouvelans le mauvais bruit qui avoit autrefois couru de luy, qu'il entretenoit sa propre sœur germaine, & oultre cela le calumnians de favoriser aux affaires des Lacedæmoniens, à quoy se rapportent des vers du poëte Eupolis fort divulguez à l'encontre de Cimon:

Meschant n'est il, mais il est negligent,

Aimant le vin plus qu'il ne fait l'argent,

Et quelquefois secrettement s'escarte

Pour s'en aller les nuits coucher à Sparte,

Laisant sa sœur au logis, la pauvrete

Helpinice, dormir toute seulette.

¹ Voyez les Observations.

XXVIII. Et s'il est ainsi, qu'estant paresseux & subiect au vin, il ait pris tant de villes & gaigné tant de batailles, il est certain que s'il eust esté sobre & vigilant, il n'y eust eu ny devant ny après luy capitaine Grec, qui l'eut passé en gloire de faicts d'armes. Bien est il vray, que dès son commencement il aima tousjours les meurs des Lacedæmoniens : car de deux enfans jumeaux qu'il eut d'une femme Clitoriene, il en nomma l'un Lacedæmonius, & l'autre Eleus, ainsi comme Stefimbrotus l'escriit, disant que pour cela Pericles leur reprocha souvent le lignage de leur mere : toutefois Diodorus le geographe escriit, que & ceulx là & un autre troisieme nommé Theffalus, luy estoient nez de Isodice, fille de Euryptolemus filz de Megacles. Comment que ce soit, il est tout certain, que son credit s'augmenta de beaucoup par le port & la faveur que luy faisoient les Lacedæmoniens, lesquels haïssoient desja Themistocles, & en haine de luy estoient bien aises que Cimon, qui estoit encore jeune homme, eust plus de pouvoir & d'autorité que luy à Athenes : dequoy les Atheniens mesmes s'appercevoient bien, & n'en estoient point marris du commencement, pour autant que ceste bienvueillance des Lacedæmoniens en vers luy, leur apportoit de grandes commoditez : car quand ilz commencerent à s'ag-

grandir en puissance , & à pratiquer secrettement que les Grecs alliez laissassent les Lacedæmoniens pour se joindre à eulx , ilz ne s'en fâcherent point, pour l'honneur & l'amour qu'ilz portoyent à Cimon , lequel pour lors manioit seul presque tous les affaires des Grecs , à cause qu'il se portoit humainement & gracieusement envers les alliez , & estoit forr agreable aux Lacedæmoniens : mais depuis quand ceulx d'Athenes furent devenus grands & puissans , & qu'ilz veirent que Cimon n'adheroit pas pour un peu aux Lacedæmoniens , ains les aimoit trop à leur gré , ilz en eurent despit , pource qu'à tout propos , il les magnifioit & hault louoit devant eulx : & mesmement quand il les vouloit reprendre de quelque faulte qu'ilz avoyent commise , ou bien qu'il les vouloit induire à faire quelque chose : « Les Lacedæmoniens , ce leur disoit-il , n'ont » garde de faire ainsi ». Cela , comme dit Stefimbrotus , luy suscitoit grandement l'envie & la haine de ses citoyens.

XXIX. Mais la principale charge que lon luy meit sus , & celle qui plus luy porta de nuisance , advint par une telle occasion : la quatrieme année du règne d'Archidamus filz de Zeuxidamus roy de Sparte , il advint le plus grand & le plus espouventable tremblement de terre en la ville de Lacedæmone & aux environs , dont il soit memoire

au paravant : car la terre en plusieurs endroits de la contrée s'ouvrit & se baissa comme en abyfme : la montagne de Taygete en branla si terriblement, qu'il y en eut des pointes de rochers qui tomberent en bas : toute la ville entierement en fut brisée & conquassée, exceptées cinq maisons : car toutes les autres furent ruinées. Et dit on qu'un peu devant qu'il commenceast, les jeunes hommes de la ville avec les jeunes garçons s'esbatoyent aux exercices du corps, tous nudz, dedans un portique & galerie couverte : & comme ilz se jouoyent ensemble, il se leva auprès d'eulx un lievre. Les jeunes hommes l'ayans apperceu se meirent à courir après, & à le pourfuyvre tout ainsi nudz & huylez qu'ilz estoient, avec grande risée. Ilz ne furent pas plus tost partis, que le comble de la galerie tumba sur les garçons qui estoient demourez deffoubz, & les accabla tous. En memoire dequoy le tumbeau où ilz furent depuis inhumez, s'appelle jusques aujourd'huy Sifmatias, comme qui diroit : la sepulture de ceulx que le tremblement de terre a tuez. Mais le roy Archidamus s'advisant soudainement par le danger present de celuy qui estoit prest à advenir, & voyant que ses citoyens ne taschoyent qu'à sauver leurs plus precieux meubles, & les tirer hors de leurs maisons, fait viftement sonner aux trompettes une chaude alarme, comme si
les

les ennemis fussent venus leur courir sus en surprise, à fin que les habitans de la ville, toute autre œuvre laissée, accourussent en diligence avec leurs armes devers luy. Cela sans point de doute sauva pour lors la ville de Sparte, pource que les Heilots qui sont leurs païsans, & ceulx des petites villes d'alentour, accoururent de toutes parts en armes pour surprendre au desproueu, & saccager ceulx qui seroyent eschappez de ce tremblement : mais quand ilz les trouverent bien armez en ordonnance de bataille, ilz s'en retournerent comme ilz estoient venus, & depuis commencerent à leur faire la guerre ouvertement, ayans attiré aucuns de leurs voisins à leur ligue, mesmement les Messeniens¹ qui avec eulx feirent à bon esciant la guerre aux Spartiates : parquoy les Lacedæmoniens envoyerent Periclydas à Athenes pour demander secours, duquel le poëte Aristophanes se mocquant dit,

Palle, seant sur les autelz tousjours,
En robe rouge il demande secours.

A quoy Ephialtes resistoit fort & ferme, criant & protestant que lon ne devoit point secourir, ny relever une cité ennemie de celle d'Athenes, ains plus tost la laisser gifante par terre, & souffrir fouler aux piedz l'orgueil & l'arrogance de Sparte.

¹ Voyez les Observations.

XXX. Mais Cimon, ainsi que dit Critias, préférant le bien de Sparte à l'accroissement de son pays, feit tant qu'à sa persuasion le peuple l'envoya avec bon nombre de gens de guerre à leur secours : qui plus est, Ion met les paroles mesmes, dont il usa pour emouvoir le peuple à luy ottroyer sa demande : car il les pria de ne vouloir pas permettre que la Grece clochast, comme si Lacedæmone eust esté l'un de ses pieds, & Athenes l'autre, ny souffrir que leur cité fust privée de sa compagne au joug de la defense de la Grece. Ayant doncques obtenu secours pour mener aux Lacedæmoniens, il passa son armée par les terres des Corinthiens, dequoy Lachartus capitaine de Corinthe se courroucea à luy ; disant qu'il ne devoit point estre ainsi entré dedans leur pays en armes, sans premierement en avoir demandé congé à ceulx de la ville : pource, disoit il, que quand on bat à la porte d'une maison privée, encore n'entre lon pas dedans, que premierement le maistre de la maison ne le commande. « Adonc luy repliqua Cimon : » mais vous autres Corinthiens n'avez pas heurté » aux portes des Cleonciens ny des Megariens » pour y entrer dedans, ains les avez rompues » & y estes entrez par force d'armes, estimans » que tout devoit estre ouvert à ceulx qui estoient les plus forts ». Ainsi respondit Cimon

audacieusement à ce capitaine Corinthien, pource qu'il en estoit besoing, & passa avec son armée à travers le país de Corinthe.

XXXI. Depuis ceulx de Lacedæmone envoyèrent une autre fois requerir secours aux Atheniens à l'encontre des Messeniens & des Ilotes, qui sont leurs laboureurs & esclaves, lesquels avoyent saisy la ville de Ithome : mais quand ilz furent arrivez, les Lacedæmoniens eurent peur de la grande puissance qu'ilz avoyent amenée & de leur hardiesse : à l'occasion de quoy ilz les renvoyerent sans rien faire eulx seuls de tous les alliez, qui estoient venus à leur secours, comme gens prompts à entreprendre toutes nouvelles. Les Atheniens s'en retournerent fort malcontents de ce renvoy, & tousjours depuis voulurent grand mal à ceulx qui favorisoient aux affaires des Lacedæmoniens : au moyen dequoy pour la moindre occasion qu'ilz peurent avoir à l'encontre de Cimon, ilz le bannirent de leur país pour dix ans : car c'estoit le terme prefix à ceulx qui estoient releguez & bannis par le ban de l'Ostracisme, durant lesquels dix ans les Lacedæmoniens entreprirent de delivrer la ville de Delphes de la servitude des Phociens, & de leur oster la garde & superintendence du temple d'Apollo, qui est en ladicte ville, pour à quoy parvenir ilz vindrent planter leur camp près la

ville de Tanagre en la Phocide, là où les Athéniens les allerent trouver pour les combattre.

XXXII. Ce qu'entendant Cimon, encore qu'il fust en exil, se rendit au camp d'Athenes avec ses armes, en intention de faire son devoir de bien combattre avec ses citoyens à l'encontre des Lacedæmoniens, & se rengea ès bandes de la lignée Oeneide¹, dont il estoit : mais ses malvueillans commencerent à crier contre luy, qu'il n'estoit venu pour autre chose que pour troubler l'ordonnance de leur bataille, à fin d'amener puis après les Lacedæmoniens à la ville mesme d'Athenes. Dequoy le grand conseil des cinq cents hommes eut peur, & envoya faire defense aux capitaines qu'ilz n'eussent à le recevoir en la bataille, de maniere qu'il fut contrainct de se retirer : mais avant que partir il pria Euthippus Anaphlystien², & ses autres amis qui estoient notez & soufpeçonnez comme luy, de favoriser aux affaires des Lacedæmoniens, qu'ilz feissent tout devoir de vaillamment combattre à l'encontre des ennemis, à fin que celle journée leur servist de descharge & de justification de leur innocence envers leurs citoyens : ce qu'ilz feirent. Car retenans ses

¹ Tribu des Athéniens qu'il ne faut pas confondre avec Oenot, bourg ou dème de l'Attique.

² Anaphlyste est un des bourgs ou dèmes de l'Attique. Chaque tribu comprenoit un certain nombre de ces dèmes.

armes, ilz dresserent un petit squadron d'entre eulx, & combatirent si courageusement & si obstinément, qu'ilz y moururent tous sur le champ, cent qu'ilz estoient, laissant un grand regret & grievé repentance aux Atheniens, de ce qu'ilz les avoyent ainsi faullement & à tort mescreuz de desloyauté envers leurs païs, à l'occasion dequoy ilz ne garderent pas long temps leur courroux à l'encontre de Cimon, en partie, comme je croy, pource qu'ilz eurent souvenance des bons services qu'il leur avoit faicts par le passé, & en partie aussi, pource que la qualité du temps y aida. Car ayans esté desfaiçts en une grosse bataille devant Tanagre, ilz s'attendoient que sur le temps nouveau les Peloponesiens ne faudroyent pas de leur venir courir sus avec une grosse puissance : au moyen dequoy ilz revocquerent le bannissement de Cimon par un decret, duquel Pericles luy mesme fut autheur, tant estoient les inimitiez des hommes, civiles & modérées en ce temps là, & leurs courroux aisez à appaiser, là où il estoit question du bien public, & tant l'ambition, qui est la plus vehemente & la plus forte passion de toutes celles dont les esprits des hommes sont travaillez, cedit & s'accommodoit aux affaires & aux necessitez de la chose publique.

XXXIII. Aussi tost doncques que Cimon fut

D 3

de retour, il assopit la guerre & appointa les deux citez ensemble : mais voyant que les Atheniens ne pouvoient demourer en repos, ains vouloyent estre en perpetuel mouvement, & s'enrichir & aggrandir par les guerres, de peur qu'ilz ne s'attachassent à aucun peuple Grec, ou qu'en rodant à l'entour du Peloponese & des isles de la Grece, avec une si grosse flotte de vaisseaux qu'estoit la leur, ilz ne fuscitassent quelque occasion de guerre civile entre les Grecs, ou de plaintes à leurs confederez à l'encontre d'eulx, il arma & equippa deux cents galeres pour aller une autre fois faire la guerre en Cypre & en Ægypte, voulant accoustumer les Atheniens à la guerre contre les Barbares, & quand & quand les enrichir justement des despouilles de ceulx qui leur estoient naturellement ennemis : mais sur le poinct que toutes choses furent en ordre pour partir, & l'armée prestte à s'embarquer pour faire voile, il eut une telle vision la nuit en dormant : Il luy fut advis qu'une lyce asprement courroucée abbayoit contre luy, & que parmy son abboy elle jettoit une parolle humaine en disant,

Vien hardiment, car mes petits & moy,
Si tu y viens, aurons plaisir de toy.

Ceste vision estant mal aisée à souldre & à in-

terpreter, Aftyphilus natif de la ville de Posidonie¹, homme bien exercité en telles conjectures, & familier amy de Cimon, luy declara que ceste vision luy predisoit sa mort, l'exposant en telle sorte : Le chien est ordinairement ennemy & veut mal à celuy à qui il abbaye. Or ne sçauroit on faire plus grand plaisir à son ennemy que de se laisser mourir : davantage la meslange d'une parole humaine avec l'abboy d'une chiene ne signifie autre chose qu'un ennemy Medois, pource que l'armée des Medois est meslée de Barbares & de Grecs. Oultre ceste vision, ainsi comme il sacrifioit au dieu Bacchus, le devin ouvrit l'hostie après qu'elle eust esté immolée, & à l'entour du sang qui en decoula jusques en terre, il s'assembla une multitude grande de fourmis, qui emportèrent petit à petit ce qui en estoit figé, & en enduirent le gros ortueil du pied de Cimon tout à l'entour, sans que de long temps personne s'en donnast garde : à la fin toutefois Cimon d'aventure s'en advisa, & ainsi comme il les regardoit faire, le ministre du sacrifice luy apporta monstrier le foye de la beste immolée, à qui le gros bout, qu'on ap-

¹ C'est le nom grec que Paterculus a rendu en latin par *Nepunia*. On l'appelle autrement *Pæstum*, elle est dans la Lucanie sur la mer de Toscane, au fond du golfe appellé de son nom *Pæstanus*.

pelle la teste, defailloit, & l'estimoit un très mauvais & sinistre presage.

XXXIV. Toutefois, pource que toutes choses estoient si prestes, qu'il ne pouvoit reculer à ce voyage, il monta sur mer & fit voile, & envoyant soixante de ses galeres en *Ægypte*, il alla avec le demourant rengier de rechef la coste de la Pamphylie, là où il desfeit en bataille navale l'armée du roy de Perse, qui estoit de galeres Phœnicienes & Cilicienes, & conquist les villes d'alenviron, espiant tousjours les moyens de penetrer au dedans de l'*Ægypte*: car il ne mettoit point de petites entreprises en son entendement, ains desseignoit de destruire tout l'empire entierement du grand roy de Perse, pour autant mesmement qu'il estoit adverty que Themistocles estoit en grand honneur & en grand credit entre les Barbares, à cause qu'il avoit promis à leur roy de luy conduire son armée, & luy faire de grands services, toutes & quantesfois qu'il voudroit faire la guerre aux Grecs. Et dit on que ce fut la principale cause, pour laquelle Themistocles se fit volontairement mourir, qu'il desespéroit de pouvoir conduire les affaires de la Grece au poinct qu'il avoit promis, sentant bien qu'il n'estoit pas facile de vaincre la vertu & felicité de Cimon, lequel pour lors tenoit son armée au long de l'isle de Cypre;

projetant en soy mesme de bien grandes entreprises : mais en ces entrefaictes il envoya quelques uns de ses gens à l'oracle du Jupiter Hammon, pour l'enquerir de quelque chose secrette : car nul ne sceut jamais, ny lors ny depuis, pour quelle cause il les y avoit envoyez : aussi n'en rapportèrent ilz aucune response, car ilz ne furent pas plus tost arrivez, que l'oracle leur commanda qu'ilz s'en retournassent : pour autant (leur dit il) que Cimon estoit desja pardevers luy. Ceste response ouye, les envoyez reprirent incontinent leur chemin devers la mer : & quand ilz furent de retour au camp des Grecs qui pour lors estoit en Ægypte, ilz entendirent que Cimon estoit decedé, & en rapportant le nombre des jours qui estoient passez depuis sa mort, au temps que Jupiter leur avoit respondu que Cimon estoit desja par devers luy, ilz cogneurent que couvertement il leur avoit signifié son trespas, & que deslors il estoit avec les dieux.

XXXV. Il mourut au siege de la ville de Citium en Cypre, comme aucuns disent, ou bien d'un coup qu'il receut en une rencontre, comme disent les autres : & en mourant, il commanda à ceulx qui estoient soubz sa charge, qu'ilz s'en retournassent au pais sans eventer ny publier sa mort : ce qui fut fait si sagement & si dextrement, qu'ilz s'en retournerent tous à sauveté, sans

que personne des ennemis, ny des alliez mesmes s'en apperceust. Ainsi fut l'armée des Grecs gouvernée & conduite par Cimon, encore qu'il fust mort, l'espace de trente jours, comme escrit Pharnodemus, & depuis sa mort n'y a eu aucun capitaine Grec qui ait fait chose digne de memoire contre les Barbares, pource que les harengueurs & gouverneurs des principales citez de la Grece les irritèrent les unes contre les autres, & ne se trouva personne qui se jettast entre deux pour les departir. Ainsi se ruinerent les Grecs les uns les autres par guerres civiles, qui fut un grand respit pour les affaires du roy de Perse, & au contraire, ruine de la puissance des Grecs, si grande que lon ne scauroit bien exprimer.

XXXVI. Il est bien vray, que long temps depuis, Agésilas feit voir les armes Grecques en Asie, & y commença un peu de guerre contre les lieutenans du roy, gouverneurs des basses provinces de l'Asie: mais avant qu'il peust faire aucun exploit memorable, il fut rappelé par nouveaux troubles & guerres civiles qui se resusciterent de rechef entre les Grecs, & fut contraint de s'en retourner au pais, laissant les tresoriers & financiers du roy de Perse, levans tailles & subsides sur les citez Grecques de l'Asie, quoy quelles fussent alliées & confederées de Lacedaemone. Là où du temps que Cimon gouverna,

lon ne veit onques commissaire ne sergent royal qui apportast aucunes lettres parentes, ou mandemens du roy, ny homme d'armes qui ozaſt approcher de la mer plus près de vingt & quatre ou vingt & cinq lieuës. Les ſepultures que lon appelle juſques aujourdhuy Cimonia, teſmoignent que ſes cendres & ſes os furent rapportez en Attique. Toutefois ceulx de la ville de Citium honorent encore une certaine ſepulture, qu'ilz diſent eſtre la tombe de Cimon, par ce qu'en une famine & grande ſterilité de la terre, ilz eurent un oracle qui leur commanda de ne mettre pas Cimon en nonchaloir, ainſi comme l'orateur Naulocrates a laiſſé par eſcript, ains le reuerer & honorer comme un dieu. Telle doncques a eſté la vie du capitaine Grec.

S O M M A I R E

DE LA VIE DE LUCULLUS.

FAMILLE de Lucullus. Il accuse l'augure Servilius. II. Eloquence & habileté de Lucullus dans les langues grecque & latine. III. Son amitié pour son frere. IV. Sylla s'attache à lui, & l'emploie en diverses circonstances. V. Il va en Egypte. Honneurs qu'il reçoit de Ptolémée. VI. Par quelle ruse il échappe aux ennemis qui l'attendoient en embuscade. VII. Fimbria lui propose d'attaquer Mithridate par mer. VIII. Deux victoires remportées par Lucullus sur les flottes de Mithridate. IX. Il surprend les habitans de Mitylène, & les défait entierement X. Sylla l'institue par testament tuteur de son fils. XI. Il est nommé consul. XII. Il est chargé de la guerre contre Mithridate. XIII. Il rétablit la discipline parmi ses troupes. XIV. Mithridate fait de nouveaux préparatifs de guerre. XV. Il bat le consul Cotta sur terre & sur mer. XVI. Lucullus range son armée en bataille devant celle de Mithridate. Un prodige empêche le combat. XVII. Il prend le parti de gagner du tems sans hasarder d'affaire. XVIII. Mithridate va mettre le siège devant Cyzique. XIX. Inquiétudes des Cyziceniens. XX. Divers prodiges qui les rassurent.

XXI. *Avantage considérable remporté par Lucullus sur les troupes de Mithridate.* XXII. *Nouvelle victoire de Lucullus.* XXIII. *Il s'empare de quinze galères de Mithridate , à Lemnos.* XXIV. *Il poursuit Mithridate , dont la flotte est détruite par une tempête.* XXV. *Plaintes des soldats de Lucullus.* XXVI. *Raisons que Lucullus donne de sa conduite.* XXVII. *Lucullus va se camper vis-à-vis de Mithridate.* XXVIII. *Escarmouche dans laquelle Lucullus a enfin l'avantage.* XXIX. *Un Dandarien entreprend d'assassiner Lucullus. Il ne peut y réussir.* XXX. *Divers avantages remportés par les officiers de Lucullus sur ceux de Mithridate.* XXXI. *Mithridate prend la fuite.* XXXII. *Il fait mourir ses femmes & ses sœurs.* XXXIII. *Lucullus prend la ville d'Amisus.* XXXIV. *Il est affligé de la voir détruite par le feu , & la répare autant qu'il le peut.* XXXV. *Il visite les villes de l'Asie , & réprime la licence des officiers Romains.* XXXVI. *Il règle l'intérêt de l'argent.* XXXVII. *Appius Clodius détache Zerbienus de l'obéissance de Tigrane.* XXXVIII. *Aggrandissement & insolence de Tigrane.* XXXIX. *Appius demande à Tigrane de lui livrer Mithridate.* XL. *Entreyue de Mithridate & de Tigrane.* XLI. *Lucullus s'empare de la ville de Sinope.* XLII. *Il reçoit avis de l'approche de Tigrane & de Mithridate.* XLIII. *Il se met en marche pour aller au devant d'eux.* XLIV. *Il passe*

l'Euphrate. XLV. Il entre en Arménie. XLVI. Comment Tigrane reçoit les nouvelles de son approche. XLVII. Sextilius bat les troupes de Tigrane commandées par Mithrobarzane qui est tué. XLVIII. Lucullus assiège Tigranocerta. XLIX. Tigrane s'avance dans la résolution de combattre. L. Plaisanteries de Tigrane & de ses courtisans sur le petit nombre des Romains. LI. Réponse de Taxile à Tigrane qui prétendoit que les Romains se retiroient. LII. Lucullus donne le signal de traverser la rivière. LIII. Il marche aux ennemis. LIV. Victoire complète de Lucullus. LV. Réflexions sur la conduite de Lucullus. LVI. Mithridate recueille Tigrane dans sa fuite. LVII. Lucullus prend la ville de Tigranocerta. LVIII. Diverses nations se soumettent à Lucullus. LIX. Propos séditieux des troupes de Lucullus. LX. Il bat les Arméniens en plusieurs rencontres. LXI. Il va mettre le siège devant la ville d'Artaxata. LXII. Victoire remportée par Lucullus. LXIII. Sédition dans l'armée de Lucullus. LXIV. Il entre dans la Migdonie, & prend Nyfibus. LXV. Réflexions sur le changement de fortune que Lucullus éprouve depuis ce moment, & les défauts par lesquels il y donna lieu. LXVI. Discours répandus à Rome contre Lucullus. LXVII. Clodius amène l'armée contre Lucullus. LXVIII. Triarius est battu par Mithridate. LXIX. Les soldats de Lucullus refusent de le suivre. LXX. Insultes qu'ils

lui font. LXXI. Entrevue de Lucullus & de Pompée. LXXII. Ils se séparent de très mauvaise intelligence. LXXIII. Digression sur l'expédition postérieure de Crassus contre les Parthes. LXXIV. Lucullus obtient avec peine l'honneur du triomphe. LXXV. Description de son triomphe. LXXVI. Il répudie Clodia, pour épouser Servilia, qu'il répudie ensuite. LXXVII. Il abandonne les affaires pour vivre dans le repos. LXXVIII. Réflexions sur la magnificence & les délices dans lesquelles il passa la fin de sa vie. LXXXI. Bons mots de Lucullus sur la dépense de sa table. LXXXII. Il donne à souper à Cicéron & à Pompée dans la salle d'Apollon. LXXXIII. Bibliothèque de Lucullus. LXXXIV. Attachement de Lucullus à l'ancienne secte des Académiciens. LXXXV. Pompée se réunit avec Crassus & César pour chasser de la place publique Caton & Lucullus. LXXXVI. On suborne un coquin pour déclarer que Lucullus l'avoit engagé à assassiner Pompée. LXXXVII. Mort de Lucullus.

Comparaison de Cimon avec Lucullus.

Depuis l'an 630 environ, jusque vers l'an 700 de Rome, avant Jésus-Christ 54.

L U C U L L U S.

Q UANT à Lucullus , il eut bien un ayeul personnage de dignité consulaire , & estoit son oncle maternel Metellus , celuy qui fut surnommé Numidicus , pour autant qu'il avoit conquis & subjugué la province de Numidie : mais son pere fut atteint & convaincu de larcin au manient des finances de la chose publique : & Cecilia sa mere eut le bruit de ne se gouverner pas honestement. Mais quant à luy , avant qu'il eust eu aucun office , & qu'il se fust aucunement entrepris des affaires de la chose publique , le premier acte qu'il feist à son arrivée , fut , qu'il accusa & meit en justice Servilius augur l'accusateur de son pere , d'avoir pareillement mal versé en son estat , & forfait contre la chose publique : ce que les Romains trouverent un gentil acte , & fut quelque temps que lon ne parla d'autre chose à Rome , ne plus ne moins que si c'eust esté quelque exploit de grande vaillance : car autrement encore estimoyent ilz , que c'estoit chose genereuse & magnanime d'accuser les meschans , sans estre poulxé d'aucune occasion privée , & prenoient grand plaisir de voir les jeunes hommes s'attacher à poursuyvre en justice ceulx qui avoyent

avoyent forfait , ne plus ne moins que de gentilz levriers acharnez après les bestes sauvages. Toutefois les brigues & poursuittes furent si grandes en ce procès là , qu'il y eut des hommes blecez ; & aucuns tuez sur la place , tant que finablement Servilius fut absouls.

II. Si estoit Lucullus eloquent , & exercité à bien dire , tant en langue grecque que romaine , de maniere que Sylla luy adressa l'abbregé de ses gestes qu'il avoit recueillis , comme à celuy qui sçauroit mieulx en composer une histoire entiere , & la coucher plus elegamment par escrit : car il n'avoit pas seulement le langage à main & propre pour parler d'affaires ; & pour deduire disertement un plaidoyer , comme lon en voit d'autres , qui en matiete de procès , ou quand ilz ont audience publique ,

Semblent un thun , qui par grande roideur ,
De l'Ocean perce la profondeur :

mais puis après quand on les tire hors des termes de la pratique & des harengues publiques ,

Ils sont à sec , & sans grace ou science
Demeuré à plat morte leur eloquence :

Car Lucullus avoit dès son jeune aage appris par honesteté les lettres humaines , que lon appelle , & les sciences liberales : & quand il vint

sur sa vieillesse, alors il laissa son entendement se reposer & refreschir, après beaucoup de travaux, en l'estude de la philosophie, en reveillant la partie contemplative de son ame, & amortissant, ou à tout le moins refrenant de bonne heure la partie ambitieuse & active, après le different qu'il eut à l'encontre de Pompeius. Mais pour faire encore plus ample foy de son sçavoir, oultre ce que nous en avons recité, on dit qu'estant encore fort jeune, il feit une gageure à l'encontre de l'orateur Hortensius, & de l'historiographe Sisenna, ne pensant que se jouer du commencement, & à la fin ce fut à bon esciant, qu'il escriroit un sommaire de la guerre Marisque¹ en vers ou en prose latine ou grecque, selon qu'il escherroit par le sort : & luy escheut la prose grecque à mon advis, pource que jusques aujourd'huy, lon treuve une petite histoire en langue grecque de la guerre que les Romains feirent à l'encontre des Marses.

III. Il porta grande amitié à son frere Marcus Lucullus, comme il monstra par plusieurs indices dont le plus notable, & qui se treuve plus mentionné par les Romains, fut tel : Lucius

¹ La guerre sociale, appelée aussi Marisque, parce que les Marses, peuple très brave, entre les Sabins à l'orient, & le lac Fucin à l'occident, furent les premiers qui prirent les armes. Elle commença après la mort de Drusus, l'an de Rome 664, avant Jesus-Christ 90.

estoit plus vieil que luy , & toutefois jamais ne voulut demander ny accepter office de la chose publique avant luy , ains attendit le temps de son frere , & laissa passer le sien , pour laquelle debonnaireté il gaigna tant la bonne grace du peuple , qu'estant absent il fut eleu *Ædile* , & son frere aussi tout ensemble pour l'amour de luy.

IV. La fleur de sa jeunesse se rencontra au temps de la guerre *Marisque* , en laquelle il feit plusieurs actes de bon sens & de grande hardiesse : mais toutefois la cause pour laquelle *Sylla* le tira à sa part , fust plustost sa constance , sa douceur & debonnaireté , qu'autre chose : & depuis qu'il l'eut une fois choisi , il l'employa tousjours depuis le commencement jusques à la fin , aux principaux & plus importants de ses affaires : comme fut la commission qu'il luy bailla de faire battre de la monnoye : car la plus grande partie de l'argent qui fut despendu en la guerre contre *Mithridates* fut monnoyé dedans le *Peloponese* par son commandement : à raison dequoy on appella les pieces *Lucullienes* , lesquelles eurent long temps cours entre les gens de guerre , qui en acheptoyent ce qui leur faisoit besoing , sans qu'on feist difficulté de les prendre. Depuis estant *Sylla* à *Athenes* le plus fort par terre , mais le plus foible par mer , de manière que ses ennemis

luy coupoyent les vivres , il envoya Lucullus en Ægypte & en Libye , pour luy amener les vaisseaux qu'il trouveroit en ces quartiers là. Or estoit il au cueur de l'hyver quand il fut despesché , & neantmoins il ne laissa point de se mettre à la voile avec trois brigantins de la Grece & autant de galiottes Rhodienes , s'exposant non seulement au danger de la mer en si longue navigation, mais aussi des ennemis, lesquelz se sentans les plus forts alloyent rodans par tout , & toujours en bonne flotte : mais nonobstant toutes ces difficultez il descendit premierement en l'isle de Candie , laquelle il tira à sa devotion , & de là s'en alla en la ville de Cyrene , où il trouva les habitans travaillez de guerres civiles & de continues oppressions de tyrans , desquelz travaux il les garentit , & leur establir une forme de gouvernement , en leur ramenant en memoire un propos que Platon autre fois, comme en esprit de prophetie , avoit dit à leurs ancestres. Car comme ilz le priaissent de leur vouloir escrire des loix , & leur ordonner quelque bonne forme de regir & gouverner leur chose publique , il leur respondit qu'il estoit bien malaisé de donner loy à gens si riches , si heureux & si opulents qu'ilz estoient , pource qu'à la verité il n'est rien si malaisé à tenir sous bride , que l'homme qui se sent avoir la fortune à commandement : aussi n'y a

il au contraite rien si prest à recevoir conseil & reglement , que celui à qui fortune a couru sus. Cest admonestement rendit les Cyreniens pour lors plus souples & plus obeïssans aux ordonnances que Lucullus leur establir.

V. Au partir de là il tira vers *Ægypte* , là où il perdit bonne partie des vaisseaux qu'il avoit amassez par une surprise de corsaires : mais quant à sa personne il se sauva , & fut magnifiquement receu en la ville d'*Alexandrie* : car toute l'armée royale de mer luy alla au devant en bonne ordonnance & en très bel equippage , ne plus ne moins qu'elle avoit accoustumé de faire au roy quand il retournoit de quelque voyage par mer. Le roy mesme *Ptolomæus* ¹ , qui lors estoit fort jeune , luy fit le meilleur recueil qui luy fut possible : car entre autres caresses , il luy fit apprester son logis & son manger dedans son chasteau royal , là où jamais au paravant capitaine estrangier n'avoit esté logé , & n'ordonna pas autant de despense seulement pour le festoyer , comme il avoit accoustumé de faire aux autres , ains en commanda quatre fois autant : toutefois Lucullus n'en usa sinon autant qu'il en eut de besoing pour sa personne , & au demourant ne voulut accepter present quelconque , combien que le roy luy en feist presenter

¹ Voyez les Observations.

jusques à la valeur de quatre vingt talents : qui plus est , il ne voulut pas seulement monter jusques à la ville de Memphis , ny visiter pas une des autres singularitez & merveilles tant renommées qui sont en Égypte , disant que cela estoit à faire à homme de loisir qui va par le monde pour voir seulement , & prendre son plaisir , non pas à luy qui avoit laissé son capitaine aux champs , tenant siege devant les murailles de ses ennemis : mais après tout , ce jeune roy Ptolomæus en somme ne voulut onques entrer en ligue avec Sylla , craignant de se jeter en la guerre : bien luy bailla il gens & vaisseaux pour le conduire jusques en Cypre. Et ainsi qu'il se voulut embarquer , le roy luy disant adieu , & l'embrassant , luy presenta une fort belle & precieuse emeraulde enchassée en or , laquelle Lucullus refusa du commencement , jusques à ce que le roy luy monstra son image qui y estoit engravée : car adonc il eut crainte de la rebouter , de peur que le roy , estimant qu'il s'en fust allé du tout mal content de luy , ne luy feist dresser en mer quelque embusche.

VI. Si assembla quelque nombre de vaisseaux des villes maritimes qui sont là entour , excepté de celles qui receloient les pirates & escumeurs de mer , & qui estoient participantes de leurs larcins , & avec ceste flotte passa en Cypre , là

où il fut adverty, que ses ennemis s'estans cachez à l'abry de quelques poinctes de terre le guettoient pour le surprendre au passage : à l'occasion dequoy il feit tirer ses vaisseaux en terre, & manda aux villes d'alentour qu'il estoit resolu d'huyverner là, & pource qu'elles eussent à luy faire provision de vivres & de toute autre munition necessaire pour y passer l'huyver, & attendre la saison nouvelle : mais ce pendant incontinent qu'il veit le temps propre pour faire voile, il feit à grande haste redevaller ses vaisseaux en mer, & tout aussi tost se partit, cinglant le jour à voiles avalées & baissées, & la nuit haussées, si bien que par le moyen de ceste ruze il gaigna Rhodes, sans faire perte d'un seul vaisseau. Les Rhodiens luy en baillerent encore d'autres, & oultre ceulx là il feit si bien envers les Gnidiens & envers ceulx de l'isle de Co, qu'ilz abandonnerent le party du roy Mithridates, & allerent quant & luy faire la guerre à ceulx de Samos : mais luy seul chassa de Chio les gens du roy, & remeit en liberté les Colophonien, ayant pris prisonnier Epigonus le tyran, qui les tenoit en servitude.

VII. Or environ ce temps là avoir desja Mithridates esté contrainct d'abandonner la ville de Pergame, & se retirer en celle de Pirane, dedans laquelle Fimbria le tenoit bien estroit-

tement assiégé par terre : au moyen dequoy ayant son recours à la mer, il envoya querir ses forces navales & maritimes de tous costez, n'ozant s'attacher ny hazarder la bataille par terre contre Fimbria, qui estoit homme hardy & aventureux de nature, & davantage victorieux pour lors : dequoy Fimbria s'appercevoit fort bien, mais il n'avoit aucunes forces par mer, qui fut cause qu'il envoya devers Lucullus, le prier de s'en aller celle part avec sa flotte, pour luy aider à desfaire ce roy, qui estoit le plus grand & le plus aspre ennemy qu'eust le peuple Romain, à fin qu'une si belle & si riche proye que lon poursuivoit avec tant de perils & tant de travaux, n'eschappast aux Romains lors qu'ilz la tenoyent entre leurs mains, & que d'elle mesme elle s'estoit venue jetter dedans leurs retz, à quoy d'autant plus devoit il entendre, que s'il advenoit que Mithridates fust pris, n'y auroit personne qui rapportast plus d'honneur & de gloire de sa prise, que luy qui se seroit mis au devant de sa fuite, & qui luy auroit mis sus la main lors qu'il se seroit pensé sauver de vifesse, tellement que la louange de ce grand exploit viendrait à estre commune entre eulx deux, l'un pource qu'il l'auroit chassé de la terre, & l'autre pource qu'il l'auroit forclos de la mer : au demourant ;

que les Romains ne feroient compte de toutes les prouesses & haults faicts d'armes que Sylla auroit faits en la Grece, devant les villes de Charonée & d'Orchomene, à comparaison de ceste prise.

VIII. Voilà les propos que Fimbria luy mandoit, enquoy il n'y avoit rien, où il n'y eust grande apparence : car il n'y a personne qui puisse doubter, que si Lucullus alors l'eust voulu croire, & qu'il fust allé avec ses vaisseaux clorre l'emboucheure du port de la ville, en laquelle Mithridates estoit assiégué, attendu mesmement qu'il n'en estoit pas gueres loing, que ceste guerre n'eust là pris sa fin, & que cela n'eust delivré le monde de maux infiniz, qui depuis en sont advenus : mais, soit ou que Lucullus preferast la consideration de ce qu'il devoit à Sylla, de qui il estoit lieutenant, à tout autre regard & profit & privé & public, ou qu'il eust en haine & abomination Fimbria, comme personne damnée, & qui peu avant avoit par sa malheureuse ambition souillé ses mains du sang de son amy & de son capitaine, ou que par quelque providence & permission divine, il espargnast alors Mithridates, à fin que ce luy fust puis après un adverfaire digne, contre lequel il monstrest sa valeur : comment que ce fust, tant y a qu'il ne voulut onques entendre à ce

que luy mandoit Fimbria , ains donna à Mithridates espace & loisir de s'en fouir , & consequemment de se mocquer de tout l'effort de Fimbria : mais luy seul depuis desfeit l'armée navale du roy une fois auprès du chef de Lectum , qui est en la coste de la Troade , & l'autre fois près l'isle de Tenedos , ou Neoptolemus lieutenant de Mithridates en la marine l'espioit avec beaucoup plus grand nombre de vaisseaux qu'il n'en avoit , & neantmoins aussi tost que Lucullus l'eust descouvert , il se jetta bien loing devant sa flotte dessus sa galere capitainesse qui estoit une galere Rhodiene à cinq rames pour banc , que conduisoit un pilote nommé Demagoras , homme fort affectionné au service des Romains , & bien exercité aux combats de la marine. Et comme Neoptolemus de l'autre costé luy vogaist de grande roideur à l'encontre , commandant à son pilote qu'il dressast sa galere pour chocquer droit de front , Demagoras craignant le choc de ceste galere royale , qui estoit forte & massive , & davantage bien armée de poinctes & esperons de cuyvre par le devant , n'osa pas choquer de la prouë , ains fit habilement donner le tour à la siene , & fier en arriere vers la pouppe. Ainsi la galere estant en cest endroit là baissée , vint à recevoir le coup du heurt sans dommage quelconque ; attendu qu'il donna aux œuvres mortes & aux

parties qui sont tousjours deffous l'eau. Ce pendant ses gens approcherent , & adonc Lucullus commandant à son pilote qu'il retournaſt la prouë de ſa galere , feit pluſieurs actes dignes de memoire , ſi bien qu'il meit en route ſes ennemis & chaffa Neoptolemus.

IX. Au partir de là , il ſ'en alla trouver Sylla ſur le poinct qu'il eſtoit preſt de traverser la mer à l'endroit de la Cherroneſe : ſi luy aida à paſſer ſon armée , & luy aſſeura le paſſage : puis quand la paix fut accordée , & que le roy Mithridatès ſe fut retiré en ſes païs & royaumes qui ſont au long de la mer Majour , Sylla condamna la province de l'Asie , pour l'amende de ſa rebellion , en la ſomme de vingt mille talents qui montent juſques à la raiſon de douze millions d'or. Et pour lever ceſte groſſe raille fut par luy commis Lucullus avec pouvoir de faire battre de la monnoye , qui fut un grand reconfort & grand ſoulagement pour les villes de l'Asie , en la rigueur dont Sylla avoit uſé envers elles : car en une commiſſion ſi ruineuſe & ſi odieuſe à tout le monde , comme eſtoit celle là , il ſe porta non ſeulement en homme droit , entier & net , mais auſſi doulx & humain : car quant aux Mitylèniens , qui tout ouvertement ſ'eſtoient rebellez contre luy , il deſiroit bien qu'ilz recogneuſſent leur faulte , & qu'en ſatisfaction de l'erreur qu'ilz

avoient commis en adherant à Marius , ilz souffrirent quelque punition legere : mais voyant qu'ilz estoient furieusement obstinez en leur malheur , il alla adonc contre eux , & les ayant desfaits en bataille , les contraignit de s'enfermer dedans leurs murailles , puis meit le siege devant leur ville , là où il leur joua d'un telle ruze : c'est qu'en plein jour il monta sur mer à la veüe de ceulx de la ville , & cingla vers la ville d'Elea : mais la nuit secrettement il s'en retourna , & sans faire bruit se meit en embusche au plus près de la ville. Les Mityleniens qui ne se doubtoient de rien , sortirent le lendemain matin temerairement sans ordre , & sans se tenir sur leurs gardes pour aller piller & saccager le camp des Romains , cuidans qu'ilz n'y trouveroyent personne : mais Lucullus saillant soudainement sur eulx , en prit un grand nombre de prisonniers , & en tua bien environ cinquents de ceulx qui se voulurent mettre en defense , & y gaigna bien six mille esclaves , avec une quantité infinie de tort autre butin.

X. Au demourant les dieux le preserverent , qu'il ne s'entremeit onques de tant de maulx & miseres de toutes sortes , que Sylla & Marius en ce temps là feirent porter & souffrir à la pauvre Italie , estant cependant occupé aux affaires de l'Asie : & neantmoins pour estre absent , il n'eut

pas moins de faveur & de credit envers Sylla, que ses autres amis : car, comme nous avons desja dit, il luy adressa & dedia ses Commentaires pour l'affection qu'il luy portoit, & par son testament l'institua tuteur de son filz, laissant Pompeius en arriere, ce qui semble avoir esté la premiere occasion du différent & de la jalousie qui sourdit depuis entre eulx, par ce qu'ilz estoient tous deux jeunes & ardents de cupidité d'honneur.

XI. Un peu après la mort de Sylla, Lucullus fut élu consul avec M. Cotta, environ la cent soixantieme olympiade¹, & lors recommença lon à mettre en avant qu'il estoit besoing de reprendre la guerre contre Mithridates, mesmement Marcus Cotta, lequel alloit disant partout, qu'elle n'estoit point esteincte ny amortie, ains seulement endormie : parquoy quand les consuls vindrent à tirer au sort les provinces dont ilz devoient avoir le gouvernement, Lucullus fut fort marry, de ce que la Gaule d'entre les Alpes & l'Italie luy escheut à son sort, par ce qu'il luy sembloit que ce n'estoit pas province où il y eust matiere de faire rien de grand, & ce qui plus l'aiguillonnoit à le desirer,

¹ Le grec dit, cent soixante-seizieme. Ce fut la troisieme année, un an avant le commencement de la guerre de Spartacus, & la mort de Sertorius.

estoit la gloire que Pompeius alloit tous les jours acquerant par les grands exploits d'armes qu'il faisoit en Hespagne : tellement que c'estoit chose toute certaine , qu'on l'eust eleu capitaine pour faire la guerre à Mithridates incontinent qu'il eust achevé celle de l'Hespagne : à l'occasion dequoy quand Pompeius envoya demander à grande instance de l'argent pour la soude de ses gens escrivant au Senat , que si on ne luy en envoyoit promptement il laisseroit là Sertorius & l'Hespagne , & qu'il remeneroit toute son armée en Italie , Lucullus employa tout son pouvoir , à ce que bien tost il luy en fust envoyé , de peur qu'il ne retournast en Italie , pour occasion quelle qu'elle fust , en l'an de son consulat : car il pensoit bien que s'il y retournoit avec une si puissante armée , il feroit & obtiendrait facilement à Rome tout ce qu'il vouldroit , attendu mesmement que Cethegus , qui avoit pour lors tout le credit & la vogue au gouvernement des affaires dedans Rome ; à cause qu'il disoit & faisoit entierement tout ce qu'il sentoit estre plaisant & agreable au commun peuple , estoit en picque à l'encontre de luy , qui haïssoit ses meurs & sa maniere de vivre , comme de personne abandonnée à tout vice & à toute dissolution : au moyen dequoy il faisoit la guerre tout ouvertement à ce Cethegus là. Mais il y avoit

un autre hârengueur de peuple nommé Lucius Quintius, lequel vouloit faire casser, rescinder & annuler toutes les ordonnances & tous les actes de Sylla, ce qui estoit remuer tout l'estat de la chose publique, & remettre la ville de Rome en trouble & en combustion, laquelle se trouvoit pour lors en paix & en repos. Lucullus admonesta celuy là doucement en privé, & en public le tensa & reprit tellement de paroles, qu'il le destourna de ceste mauvaise entreprise, & ramena à la raison l'ambition temeraire de cest homme là, en maniant le plus sagement & le plus dextrement qu'il estoit possible, pour le salut de la chose publique, le commencement d'une maladie, de laquelle infinis maux estoient pour advenir.

XII. En ces entrefaittes les nouvelles vindrent, que le gouverneur de la Cilicie, Octavius, estoit decedé. Si y eut incontinent plusieurs prochassans qui se meirent à briguer & pourfuyvre ce gouvernement, & à faire la cour à Cethegus, comme à celuy, qui plus que nul autre avoit moyen de le faire tumber entre les mains de qui il vouldroit. Quant à Lucullus il ne faisoit pas grand compte de ce gouvernement de la Cilicie pour le regard de la province, mais considerant que la Cappadocie estoit tout joignant, & se persuadant, que s'il en pouvoit obtenir le gou-

vernement : jamais on ne bailleroit à autre qu'à luy la commission de faire la guerre à Mithridates, il resolut de faire tout son effort, & essayer tous moyens de parvenir à ce, qu'autre ne l'eust que luy : & après avoir tenté tout autre expedient, il fut contraint à la fin, contre son naturel, de recourir à un moyen qui n'estoit ny beau ny honeste, mais bien le plus expedient qu'il eust scëu avoir pour parvenir à la fin qu'il desiroit. Il y avoit en ce temps là une femme à Rome qui s'appelloit Præcia, fort renommée ; tant pour sa beauré, que pour sa bonne grace à plaisamment deviser, au demourant aussi peu honeste, que celles qui publiquement font marchandise de leurs corps : mais pour autant qu'elle employoit le credit & la faveur de ceulx qui la hantoyent, & qui alloient deviser avec elle, pour servir au bien des affaires & des brigues de ceulx qu'elle aimoit, elle en acquit le bruit oultre ses autres graces & parties louables qui estoient en elle, d'estre femme de bonne amour, & de menée, pour conduire à chef une bonne entreprise, ce qui luy donna très grande reputation. Mais encore depuis qu'elle eut gagné Cethegus, qui avoit pour lors la vogue, & manioit à son plaisir tous les affaires de la chose publique, estant devenu si amoureux de ceste femme, qu'il ne la pouvoit esloigner de veüë : adonc toute la
puissance

puissance & l'autorité de la ville de Rome se trouva entre ses mains, pource qu'il ne se despeschoit rien par le peuple, que Cethegus n'en fust le pourfuyvant, & Cethegus ne pourfuyvoit rien, que Præcia ne luy commandast. Parquoy Lucullus se meit à la gagner & à s'insinuer en sa bonne grace, par presens & toute autre maniere de caresses, dont il se peut adviser; outre ce que c'estoit desja un très grand salaire à une femme ambitieuse & superbe, comme estoit celle là, que lon la veist requise & recherchée d'un tel personnage que Lucullus, lequel par ce moyen vint à avoir incontinent Cethegus à son commandement: car il ne fit plus que le louer en toutes assemblées du peuple, & à luy prochasser & procurer le gouvernement de la Cilicie, & depuis que cela luy leut une fois esté ottroyé, il n'eut plus besoing de l'aide de Præcia ny de Cethegus: car tout le peuple de luy mesme luy defera unanimement la charge de faire la guerre à Mithridates, comme à celuy seul qui le sçauroit mieulx desfaire que nul autre capitaine; pour aiant que Pompeius estoit encore après Sertorius en Hespagne, & que Metellus estoit desja trop vieil, qui estoient les deux seuls qui eussent peu contendre & combattre du merite de ceste charge à l'encontre de luy: toutefois son compagnon au consulat Marcus Cotta

supplia tant le senat, que lon l'y envoya aussi avec une armée de mer pour garder les costes de la Propontide, & defendre le país de la Bithynie.

XIII. Lucullus doncques ayant ceste commission, passa en Asie avec une seule legion qu'il leva de nouveau à Rome, & quand il fut arrivé là, il prit le reste des forces qu'il y trouva, qui estoient de gens corrompus & gastez de longue main par les delices du país & par avarice : car entre autres y estoient les bendes que lon appelloit les bendes Fimbrianes, d'hommes desbauchez & malaisez à tenir en discipline militaire, à cause que de long temps ilz estoient accoustumez de vivre à discretion sans obeïr à personne. Ce furent ceulx qui avec Fimbria tuèrent leur capitaine Flaccus, consul du peuple Romain, & qui depuis trahirent Fimbria mesme & l'abandonnerent à Sylla, hommes mutins, traistres & meschans, mais au demourant bons combatans, bien aguerriz & exercitez à porter les travaux de la guerre. Ce neantmoins en peu de temps Lucullus retrencha bien leur audace, & reforma les autres pareillement, qui jamais au paravant n'avoient, à mon advis, expérimenté que c'estoit que d'un bon capitaine & d'un chef qui sceust commander, ains avoient accoustumé d'estre tousjours soubz des conduc-

teurs qui les flattoient, & ne leur commandoyent sinon autant qu'il leur plaisoit.

XIV. Au reste, quand aux affaires des ennemis, ilz estoient en tel estat : Mithridates qui avoit esté du commencement audacieux & brave, comme le sont ordinairement les sophistes¹, jusques à ozer entreprendre la guerre contre les Romains, avec une armée inutile & vaine à l'effect, mais bien pompeuse & magnifique à l'œil, depuis qu'il eut une fois esté batu & chastié avec non moins de honte que de perte, quand ce vint à la seconde guerre il reseca toute pompe superflue de son armée, & la restraignit en vray appareil & utile equippage de guerre pour bien servir au besoing : car il osta la multitude confuse de toutes sortes de nations, les fieres menaces des Barbares en tant de langues différentes, & les armes entichies de broderie, d'orfaverie & de pierres precieuses, comme choses qui enrichissoient plus ceulx qui les gaignoyent, qu'ilz ne donnoient de force ny de courage à ceulx

¹ Grec, qui d'abord fier & présomptueux étoit venu attaquer les Romains avec un appareil dénué de forces réelles, mais imposant par son éclat, comme les déclamations de la plupart des sophistes. La sophistique, dit Philostrate au premier livre des Vies des sophistes, étoit la rhétorique appliquée aux objets de la philosophie. Dans la suite l'usage & l'exercice des subtilités de l'école ayant fait regarder ces philosophes orateurs comme trop dangereux, on leur interdit le barreau, & le nom de sophiste commença à être pris dans la mauvaise acception où on le trouve ici.

qui les portoyent : & au contraire fêit forger des espées longues & fortes à la Romaine, des boucliers pesans & massifz, & fait amas de chevaux mieulx faicts & plus addroicts que richement parez, puis meit ensemble six vingts mille combatans à pied, ordonnez & equippez ne plus ne moins qu'une bataille de Romains, avec seize mille chevaux de combat, sans ceulx qui trainoyent les chariots de guerre armez de faulx tout à l'entour, qui estoyent jusques au nombre de cent : & oultre tout cela encore assembla il grand nombre de navires & de galeres, qui n'estoyent point parées de beaux pavillons dorez, comme la premiere fois, ny de baings & estuves, ny de chambres & cabinets delicieusement acoustrez pour les damoiselles, ains pleines d'armes, de flesches & de traicts, & d'argent pour la soude des gens de guerre, avec tout lequel appareil il alla premierement envahir la Bithynie², de laquelle les villes le receurent volontiers encore une autre fois, non seulement celles là, mais aussi toutes celles de l'Asie entierement, lesquelles retumboient en leurs premieres maladies & miseres par la cruaulté des fermiers & usuriers Romains, qui en levant les tailles & impos sur elles, leur faisoient endurer des choses intolerables. Vray est que Lucullus les en chassa

² A l'occident de l'Asie vis-à-vis la Thrace sur le Pont-Euxin.

depuis, comme des Harpyes, qui ostoyent la nourriture de la bouche à ces pauvres gens là : mais pour lors il ne feit autre chose que tâcher à les rendre plus raisonnables par remonstrances dont il leur usa, & appaisa un peu les inclinations des peuples à rebellion : car il n'y en avoit pas un, en maniere de dire, qui n'eust bien bonne envie de ce faire.

XV. Or pendant que Lucullus entendoit à telz affaires, Marcus Cotta estimant que ceste absence de son compagnon luy estoit une occasion fort à propos pour bien faire ses besongnes ; se prepara pour combattre Mithridates : & combien que de plusieurs endroicts on luy apportast nouvelles, que Lucullus avec son armée estoit desja en la Phrygie, & qu'il s'en venoit vers luy, ce neantmoins cuidant desja tenir entre ses mains l'honneur du triomphe, comme chose toute certaine, de peur que Lucullus n'y participast ; il s'avancea de donner la bataille, où il fut batuz luy mesme tant par mer que par terre, si bien qu'il y perdit en mer soixante de ses vaisseaux avec toutes les personnes qui estoient dedans ; & quatre mille hommes de pied en terre, & puis fut enclos & assiégué dedans la ville de Chalcédoiné,¹ dont il n'eut autre esperance d'eschapper, que par le moyen du secours de Lucullus : tou-

¹ Ville de Bithynie sur le Bosphore.

tefois il y en avoit au camp de Lucullus, qui le sollicitoyent & le pressoyent de laisser là Cotta, & poulser outre, l'asseurans qu'il trouveroit le royaume de Mithridates tout vuide de gens de guerre & sans defense quelconque, de sorte qu'il s'en faisiroit facilement, & estoyent les propos & paroles des soudards qui avoyent despit de ce que Cotta par sa folle temerité & oultre-cuidance, non seulement avoit perdu & mené à la boucherie ceux qui estoyent deffoubs sa charge, mais encore les empeschoit de vaincre & venir à bout de ceste guerre sans coup ferir, par ce qu'il le falloit aller secourir : mais Lucullus en la harangue qu'il leur feit sur ce propos, leur respondit « Qu'il avoit plus cher sauver un seul » citoyen Romain, que gagner tout ce qui estoit en la puissance des ennemis ». Et comme Archelaus qui avoit esté en la premiere guerre lieutenant de Mithridates, & depuis en ceste seconde s'estoit tourné du costé des Romains, l'asseurast que si tost qu'on le verroit au royaume de Pont, tout se rebelleroit contre Mithridates, & se rendroit à luy, il luy feit responce « Qu'il ne se monstreroit » ja plus couard que les bons veneurs, lesquels » ne laissent jamais la beste pour aller à son giste ». En disant cela, il feit marcher son armée droit là où estoit Mithridates, ayant en tout son camp trente mille hommes de pied, & deux mille cinq

cents chevaux : quand il fut approché si près des ennemis qu'il pouvoit à l'œil aisément voir tout leur ost, il s'esmerveilla de la multitude grande de combatans qui y estoit, & fut en volonté de ne donner point de bataille, pensant qu'il estoit plus expedient de prolonger le temps, & tirer ceste guerre en longueur : mais un Marius capitaine Romain, que Sertorius avoit envoyé d'Hespagne à Mithridates avec quelque nombre de gens de guerre, luy alla au devant, & le provoqua à venir au combat.

XVI. Lucullus de son costé meit aussi ses gens en ordonnance pour combattre : mais sur le point que les deux batailles estoient prestes à s'entrechocquer, l'air se fendit soudainement, sans que lon eust au paravant apperceu aucune sensible mutation de temps, & en veit on evidemment descendre entre les deux batailles un grand corps enflammé, dont la forme & figure estoit comme d'une tonne, & avoit couleur d'argent fondu. Ce signe & presage celeste estonna tellement les deux armées, qu'elles se retirerent toutes deux sans combattre : & advint ce merveilleux signe, ainsi que lon dit, au lieu de la Phrygie, qui s'appelle Ottyes.

XVII. Mais depuis Lucullus discourant en luy mesme, qu'il n'y avoit si grandes provisions ne si grandes richesses au monde, qu'elles peussent

longuement fournir à nourrir tant de milliers d'hommes ensemble, comme en avoit Mithridates en son camp, ayans mesmement les ennemis campez devant eulx, il commanda qu'on luy amenast un des prisonniers en sa tente, & l'interroqua premierement combien ilz estoient logez ensemble par chasque chambrée, & puis combien il avoit laissé de bled en leur logis : après que le prisonnier luy eut rendu responce à tout ce qu'il luy voulut demander, il le feit remener, & commanda qu'on luy en amenast un autre, & puis un troisieme, ausquelz il feit de semblables interrogatoires qu'il avoit faites au premier : puis en comparant la quantité du bled & d'autres vivres qu'ilz avoyent avec le nombre des hommes qu'il leur falloit nourrir, il trouva que dedans trois ou quatre jours les vivres leur faudroyent, au moyen de quoy il s'arresta & se confirma en sa premiere deliberation de laisser couler le temps sans hazarder la bataille. Si feit amasser de toutes parts, & apporter grande quantité de bledz en son camp, à fin qu'ayant abondance de tous vivres en son armée, il peust à son aise espier, & attendre les occasions que les necessitez des ennemis luy presenteroyent.

· XVIII. Ce pendant Mithridates alloit espiant les moyens de surprendre la ville¹ des Cyzice-

¹ Cyzique, ville située sur la Propontide.

niens, qui avoyent esté batus en la bataille de devant Chalcedoine avec Cotta, là où ilz avoyent perdu trois mille hommes de guerre & dix de leurs vaisseaux : & à fin que Lucullus ne sceust rien de son entreprise, il se partit un soir incontinent après soupper, prenant l'occasion d'une nuit obscure & pluvieuse, & feit si bonne diligence, que le matin au poinct du jour il se trouva devant la ville, & planta son camp à l'endroit où est assis le temple de la deesse ³ Adrastia qui est la fatale destinée, dequoy Lucullus ayant esté adverty, se meit aussi tost à le suyvre à la trace, & se contentant de n'avoir point esté rencontré en desordre par ses ennemis, alla loger son armée en un bourg, qui s'appelloit Thracia, en lieu avantageux pour luy, & commodement assis pour les chemins & advenues des lieux circonvoisins, dont il falloit necessairement que les vivres vinssent au camp de Mithridates : parquoy prevoyant en son entendement ce qui en adviendrait, ne le voulut point cacher ny celer à ses gens, ains après que son camp fut logé & bien fortifié de trenchées, les feit assembler en conseil, où il leur feit une haren-

³ Il y a dans le grec seulement la montagne d'Adraſtie. Il y avoit là, dit Strabon, une ville de ce nom, d'où le canton avoit tiré sa dénomination, Adraſtie ou Adraſtée est un surnom de la déesse Némésis.

gue , & leur dit publiquement avec grande demonstration de toute confiance , que dedans peu de jours il leur bailleroit la victoire entre leurs mains , sans qu'il leur coustast une seule goutte de leur sang.

XIX. Ce pendant Mithridates environna de toutes parts les Cyziceniens par terre , ayant divisé son armée en dix camps , & par mer ayant bouché d'un costé & d'autre avec ses vaisseaux , l'entrée du bras de mer qui separe la ville d'avec la terre ferme. Si avoyent les Cyziceniens bon courage au demourant , & estoient bien deliberez de soutenir & endurer toutes extremitez pour l'amour des Romains : mais une chose seule les tenoit en peine , qu'ilz ne sçavoyent où estoit Lucullus , & n'en pouvoyent ouir nouvelles , combien que son camp fust fort apparent & assis en lieu que lon le pouvoit aiseement voir de la ville : mais les gens de Mithridates les abusoient , car en leur monstrant les Romains qui estoient campez au dessus d'eulx , assez près , « Voyez vous , disoyent » ilz , ce camp là ? ce sont les Medois & les » Armeniens , que le roy Tigranes a envoyez au » secours de Mithridates ». Ces paroles effroyoyent les Cyziceniens , voyants tant d'ennemis esendus à l'entour d'eulx , en si grand nombre , que quand Lucullus viendrait pour les secourir , il ne sçaurait par où passer : toutefois à la fin ilz entendirent

la venue de Lucullus par un nommé Demonax que Archelaus leur envoya, auquel du commencement ilz n'adjousterent point de foy, estimans que ce fussent choses feintes & controuvées qu'il leur disoit, à fin de leur donner meilleur courage de supporter constamment les travaux du siege, jusques à ce qu'il arriva un petit garson qui avoit esté pris des ennemis, & puis leur estoit eschappé; & s'en estoit retourné en la ville: si luy demanderent, où lon disoit que Lucullus estoit: le garson se mocqua d'eulx, pensant qu'eulx mesmes ne feissent que se jouer, de luy demander cela: mais quand il veit qu'ilz parloyent à certes, il leur monstra du doigt le camp des Romains, & adonc ilz le creurent & s'en assurerent.

XX. Or y a il assez près de la ville de Cyzique, un lac qui s'appelle Dascyllitide, & est navigable d'assez grands bateaux. Lucullus en feit tirer en terre celuy qui estoit le plus capable, & le feit trainner sur un chariot jusques dedans la mer, puis y embarqua dessus autant de souldards comme il y en peut tenir, lesquelz entrerent la nuict dedans la ville, sans estre apperceuz du guet des ennemis. Ce peu de secours reconforta grandement les assiegez: & si semble que les dieux, prenans plaisir de voir qu'ilz eussent si bon courage, les voulurent encores assseurer & confirmer davantage par plusieurs signes très evi-

dents qu'ilz leur envoyèrent divinement , & mesmement par un qui fut tel : le jour de la feste de Proserpine estoit prochain , & n'avoient ceulx de la ville point de vache noire pour immoler ce jour là au sacrifice solennel, comme leurs anciennes cerimonies le requeroient. Si en feirent une de paste, & la porterent auprès de l'autel : car celle qui avoit esté devouée à ce sacrifice , & que lon nourrissoit exprès pour servir à ce jour là , estoit par les champs à l'autre rive du bras de mer , où elle pasturoit avec le reste du bestail de la ville : mais ce jour là elle se separa toute seule d'avec le reste du troupeau , & traversa à nage le bras de mer jusques dedans la ville , là où elle s'alla d'elle mesme presenter au sacrifice. Davantage la deesse mesme Proserpine s'apparut la nuit en dormant à Aristagoras secretaire d'estat de la chose publique des Cyziceniens , qui luy dit , « Je suis icy venue pour amener le flus-
» teur de Libye contre la trompette Pontique ,
» & pourtant dis à tes citoyens de par moy, que
» je leur mande qu'ilz ayent bon courage ». Le lendemain comme le secretaire eust fait entendre sa vision, les Cyziceniens se trouverent fort esbahiz de ces paroles de la deesse, ne pouvans comprendre ce qu'elles vouloyent signifier : mais à l'aube du jour il se leva un vent impetueux qui emeut une tourmente en la mer , & les machines

& engins de batterie du roy, qui estoient desja tout joignant les murailles de la ville pour les battre, ouvrages merveilleux, qu'avoit inventez & dressez un ingenieur Thessalien nommé Niconides, commencerent à crier & esclatter si fort par l'agitation du vent, que lon pouvoit aiseement juger & prévoir ce qui en adviendroit. Puis tout à un coup le vent du midy se r'enforcea si violemment, & par une vehemence si grande, qu'il brisa, abbatit & froissa en un moment tous ces engins, mesmement une tour de bois de la hauteur de cent coudées, laquelle il esbranla si lourdement qu'il la renversa par terre. Encore dit on plus, qu'en la ville d'Ilium, la deesse Minerve s'apparut à plusieurs personnes en dormant, toute trempée de sueur, & montrant une partie de son voile deschirée, comme si elle fust tout frefchement retournée de porter secours aux Cyziceniens : en confirmation dequoy, les habitans d'Ilium monstrent encore aujourd'hy une coulonne, là où cela pour une memoire perpetuelle est escript.

XXI. Si fut Mithridates bien fort desplaisant du bris & de la perte de ses machines, moyennant laquelle les Cyziceniens avoyent eschappé le peril de l'assault & consequemment du siege, jusques à ce, qu'il entendit à la verité, la famine grande qui estoit en son camp, & la necessité

si extreme que les souldards estoient contraincts de manger de la chair d'homme : ce que ses capitaines, en l'abusant, luy avoyent pour un temps celé & desguisé : mais aussi tost comme il le sceut, il ne s'opiniastra plus par vaine ambition à vouloir obstineement demourer en ce siege, pource que Lucullus ne luy faisoit point la guerre de mines ny de bravades, ains (comme lon dit en commun proverbe) il luy saultoit à deux pieds sur le ventre, c'est à dire, qu'il faisoit entierelement ce qui estoit en luy pour luy trencher vivres de tous costez. Et pourtant un jour que Lucullus estoit allé pour forcer quelque chasteau qui luy faisoit ennuy assez près de son camp, Mithridates ne voulant perdre ceste occasion, envoya presque tous ses gens de cheval au recouvrement de vivres en la Bithynie, avec tout son charroy, ses bestes de voiture, & les plus inutiles de ses gens de pied : dequoy Lucullus estant adverty s'en retourna la nuit mesme en son camp, & le lendemain au matin en la saison d'hyver se mit à les suivre à la trace, avec dix enseignes de gens de pied seulement, & toute sa chevalerie : mais les neges estoient si grandes, le froid si aspre, & le temps si rude, que plusieurs des souldards ne le pouvans supporter en moururent par le chemin : toutefois il ne laissa point de tirer oultre, si bien qu'il attaignit ses ennemis près la

riviere de Ryndacus¹, là où il en fit une telle desconfiture, que les femmes mesmes de la ville d'Apollonia sortoyent, & alloyent destrouffer ce qu'ilz avoyent chargé de vivres, & despouiller les morts, dont il y eut un grand nombre, comme lon peut estimer en une telle rouverte : & neantmoins encore fut il pris six mille chevaux de service, un nombre infiny de bestes de voiture, & bien quinze mille personnes : tout lequel butin il ramena en son camp, en le passant par devant celui des ennemis. Mais je m'esbahy fort de l'historien Saluste en cest endroit, qui dit que ce fut là premierement que les Romains veirent des chameaux, & que jamais au paravant ilz n'en avoyent veu : car je treuve estrange, qu'il pensast que ceulx qui long temps devant, sous Scipion, avoyent vaincu le grand Antiochus, ou qui nagueres avoyent combatu contre Archelaus près des villes d'Orchomene & de Charonée, n'eussent point veu de chameaux.

XXII. Mais pour retourner à nostre propos, Mithridates effroyé de ceste desfaite resolut incontinent de s'en fouir le plus tost qu'il luy seroit possible : & pour amuser & retenir quelque temps

¹ Rhyndacus, riviere de la Phrygie qui prend sa source dans le canton appellé Azanite, & coulant du sud-est au nord-ouest, après avoir passé à Apollonie, se jette dans la Propontide auprès de Cyzique.

Lucullus derriere luy, il s'advisa d'envoyer son admiral avec son armée de mer en la mer de la Grece : mais ainſi comme il eſtoit preſt à faire voile, ſes gens meſmes le trahirent, & le livre-
rent entre les mains de Lucullus avec dix mille eſcus qu'il portoit quant & luy, pour taſcher à en corrompre & gagner partie de l'armée des Romains. Cela entendu Mithridates s'en fouit par la mer, & laiffa le reſte de ſon armée de terre entre les mains de ſes capitaines pour la ramener. Lucullus alla après juſques au fleuve de Granicus *, là où il les chargea, & après en avoir tué vingt mille, en prit de prifonniers un nombre infiny. Et dit on qu'en celle guerre il mourut bien, tant de foudards, comme de valets & autres gens fuyvans le camp, juſques au nombre de trois cents mille perſonnes. Cela fait ; Lucullus s'en retourna en la ville de Cyzique, là où après avoir employé quelques jours à jouir de l'honneur qui luy eſtoit deu, & à recevoir le bon recueil que luy feirent les Cyziceniens, il alla viſiter toute la coſte de l'Helleſpont, pour aſſembler vaiſſeaux & drefſer une armée de mer : & en paſſant par la Troade, on luy feit ſon logis dedans le temple de Venus, là où ainſi qu'il dormoit la nuit en ſon liêt, il luy fut advis

* Riviere de la Myſie, qui ſe jette dans la Propontide.

qu'il

qu'il apperceut la deesse devant luy, qui luy dit ces vers,

Comment dors tu, ô lion courageux,
Quand près de toy sont des cerfs umbrageux?

Si se leva du liêt incontinent, & faisant appeller ses amis, leur recita la vision qu'il avoit eüe, estant encore nuit toute noire : & sur ces entre-faittes arriverent quelques uns venans de la ville d'Ilion qui luy apporterent nouvelles, que lon avoit apperceu au port des Acheiens quinze galeres à cinq rames pour banc de celles du roy Mithridates, & qu'elles cingloyent vers l'isle de Lemnos¹.

XXIII. Parquoy il se meit aussi tost à la voile, & les alla toutes prendre : car d'arrivée il occit le capitaine qui se nommoit Isidorus, & puis alla contre les autres mariniers qui estoyent à l'ancre le long de la coste, lesquelz le voyans venir contre eulx, tirerent soudain tous leurs vaisseaux pour leur faire donner en terre, & combatans de dessus le tillac, blecerent plusieurs des soudards de Lucullus, qui ne les pouvoient environner par derriere, à cause du lieu où elles estoyent, ny les forcer par devant, à cause que leurs galeres flottoyent en mer, & les autres

¹ Ile de la mer Egée, à l'occident de la Mysie & de la Phrygie mineure par 41 degrés de latitude.

estoyent appuyées & echouées fermement contre la terre. Toutefois à la fin, Lucullus à toute peine trouva façon de mettre en terre les meilleurs combatans qu'il eust lors autour de luy, par un endroit ou lon pouvoit descendre en l'isle. Ces foudards allerent charger les ennemis par derriere, dont ilz en tuerent aucuns d'arrivée, & contraignirent les autres de couper les chables qui tenoyent les galeres attachées aux rivages: mais quand ilz s'en cuiderent fouir arriere de la terre, les galeres s'entreheurterent & froisserent les unes les autres, & qui pis est, allerent donner dedans les poinctes & esperons de celles de Lucullus: si furent ruez plusieurs de ceulx qui estoyent dessus, & les autres pris prisonniers, entre lesquelz fut amené à Lucullus le capitaine Romain nommé Marius, que Sertorius avoit envoyé d'Hespagne à Mithridates: car il estoit borgne, & Lucullus avoit commandé à ses gens avant la meslée, qu'ilz ne tuassent pas un des ennemis qui fust borgne, à fin qu'il n'eust pas cest heur, que de mourir en combatant, ains que lon le feist honteusement & ignominieusement mourir par justice.

XXIV. Cela faict Lucullus se hasta d'aller luy mesme en personne à la poursuite de Mithridates, pource qu'il s'attendoir de le trouver encore en la coste de la Bithynie, là

où Voconius le luy auroit arresté : car il avoit envoyé devant ce Voconius avec quelque nombre de vaisseaux en la ville de Nicomedie¹ pour l'empescher de fouir : mais il s'amusa tant en l'isle de Samothrace à sacrifier aux dieux d'icelle, & se faire recevoir en la confraire de leur religion, qu'il ne peut pas puis après arriver à temps pour engarder de partir Mithridates, lequel avoit ja fait voile avec toute sa flotte, se hastant à toute diligence de gagner le royaume de Pont, avant que Lucullus retournast de là où il estoit allé : mais en chemin il fut accueilly d'une tourmente si violente, qu'elle emporta partie de ses vaisseaux qui coururent fortune, & partie en brisa & meir à fond, tellement que toutes les costes & rivages d'alenviron par plusieurs jours furent pleins & semez de corps morts & de naufrages que les vagues de la mer y jettèrent. Quant à sa personne il estoit dedans une grosse nave de charge, laquelle ne pouvoit pas pour sa grandeur renger la coste ne cingler au long de la terre, & ne se laissoit pas aiseement gouverner ny manier aux pilotes en une si impetueuse tourmente, que les mariniers y perdoyent toute cognoissance, & si estoit desja si pesante & si remplie de l'eau qu'elle faisoit, qu'ilz ne l'ozoyent plus eslargir en pleine mer, de maniere qu'il fut

¹ Grande ville de Bithynie près les bords de la Propontide.

contrainct de passer en un petit briguantin de coursfaires, & mettre sa personne & sa vie entre les mains de larrons & escumeurs de mer, à l'aide desquelz à la fin non sans extreme danger & contre toute esperance, il se sauva en terre, & feit tant qu'il arriva en la ville de Heraclée au royaume de Pont¹. En quoy faict à noter que la brave vanterie, dont usa Lucullus en cest endroit envers le senat Romain, ne luy tourna point par courroux des dieux, au rebours de sa pensée : car comme le senat eust ordonné, que pour mettre fin à ceste guerre on dressast & equippast une flotte de vaisseaux, & pour ce faire eust donné assignation de dix huit cents mille escus, Lucullus empescha par lettres qu'il ne se feist, & escrivit bravement que sans toute reste despenfe, & ce grand appareil, il se faisoit fort de chasser Mithridates hors de la mer avec les vaisseaux empruntez de leurs alliez & confederez seulement : & le fait de faict avec une speciale grace & aide des dieux, par ce que

¹ Le royaume de Pont, proprement dit, s'étendoit depuis le fleuve Halys qui borne la Paphlagonie à l'orient, jusqu'à la Colchide. La partie la plus occidentale s'appelloit le Pont Galatique qui confinoit à la Galatie; du côté de l'orient, le Pont Cappadozien; & entre deux le Pont Polémoniaque. Il avoit pris sa dénomination générale du Pont-Euxin, le long duquel il est situé au midi. Heraclée étoit dans la Bithynie; mais cette province ayant été subjuguée par les rois de Pont, fut comprise sous le nom général de Pont.

lon dit , que ceste horrible tourmente , qui perdit l'armée de Mithridates , luy fut suscitée par Diane , courroucée de ce que les Pontiques avoyent pillé son temple , qui est en la ville de Priapos ¹, & en avoyent enlevé & transporté son image.

XXV. Or y en avoit il plusieurs qui conseilloyent à Lucullus de differer le demourant de ceste guerre à une autre saison : mais nonobstant toutes leurs remonstrances , il alla par les païs de la Galatie & de la Bithynie , envahir le royaume de Mithridates : auquel voyage il eut du commencement diserte de vivres , tellement qu'il y avoit trente mille hommes de la Galatie , qui suyvoyent son armée , portans chascun un minot de bled sur leurs espauls : mais entrant avant en païs , & y conquerant tout , il vint à avoir si grande abondance de toutes choses , qu'un bœuf ne se vendoit en son camp qu'une drachme d'argent , qui pouvoit valoir environ trois solz & six , & un esclave quatre fois autant , qui sont environ quatorze solz. De tout autre butin il y en avoit une quantité si grande , que ou lon n'en faisoit compte , ou on le consommoit en tout abandon , pource que lon ne trouvoit pas

¹ Ville de la Mysie sur l'Hellepont , près de l'embouchure de l'Ægépe & du Granique. Il ne faut pas la confondre avec une petite île du même nom près des côtes de l'Ionie , à la hauteur d'Éphèse.

à qui le vendre , à cause que chascun en avoit : car ilz ne feirent que courir & chevaucher tout le païs , jusques à la ville de Themiscyra ¹ , & aux campagnes qui sont au long de la riviere de Thermodon , n'arrestans en pas un lieu , sinon autant qu'ilz demouroient à le saccager & piller : à raison dequoy les souldards se plaignoyent de leur capitaine , pource qu'il recevoit à composition toutes les villes , & n'en prenoit pas une à force , ny ne leur donnoit moyen de s'enrichir du pillage. « Encoré à ceste heure , » disoyent ilz , nous feta il passer oultre Amisus ² » cité riche & puissante , que nous prendrions » facilement à force , qui en presseroit un peu » le siege , pour nous mener aux deserts des » Tibarenietis ³ & des Chaldeiens contre Mithridates ».

XXVI. Lucullus ne faisoit compte de toutes ces plaintes & doleances des souldards & ne s'en

¹ C'est le nom d'un canton & d'une ville entre le fleuve Thermodon , si fameux par le voisinage des Amazones , & l'Iris qui vient se décharger dans le Pont-Euxin , à l'occident du Thermodon.

² Ville située sur le Pont-Euxin entre les fleuves Iris & Halys , à l'occident du premier.

³ Les Tibarénien & les Chaldéens sont à l'orient du fleuve Thermodon. Mais il faut bien distinguer ces Chaldéens du peuple habitant la Chaldée , & si fameux par ses connoissances & ses observations astronomiques. Ceux-ci habitoient au midi & au couchant de la Babylonie , vers l'Arabie & le Golphe Persique.

soucioit point, pource qu'il n'eust jamais cuidé qu'ilz deussent venir jusques à telle fureur & à telle mutination, comme ilz feirent depuis : & au contraire, il se justifioit plus soigneusement envers ceulx qui le reprenoyent & blasmoient de ce qu'il s'arrestoit & amusoit si longuement à des villes & villages qui ne valoyent pas beaucoup, & ce pendant donnoir loisir à Mithridates de se refaire, & remettre sus une autre armée nouvelle. « Car c'est le poinct (ce leur disoit il) » auquel je tends, & qui me faict ainsi amuser » & séjourner çà & là, ne demandant autre chose, » sinon qu'il se puisse une autre fois faire fort, » & remettre ensemble une seconde armée, qui » luy donne la hardiesse de se trouver encore » devant nous en bataille, & de ne fouir plus. » Ne voyez vous pas qu'il a à son dos une infinité » de païs deserts où lon ne le pourroit jamais » suyvre à la trace, & tout auprès de luy le » mont de Caucasus ¹, & plusieurs autres inac- » cessibles, qui sont suffisans pour receler & » cacher non luy seulement, mais autres in- » numerables princes & roys qui voudroyent » fouir la lice, & ne venir point au combat ? » Davantage il y a peu de journées de chemin

¹ Longue chaîne de montagnes entre le Pont-Euxin & la mer Caspienne.

» depuis la province des Cabireniens ¹ jusques
 » au royaume d'Arménie ², là où est de séjour
 » Tigranes le roy des roys, qui a la puissance
 » si grande, qui deboute les Parthes de l'Asie,
 » & transporte des villes Grecques toutes entieres
 » jusques au royaume de la Medie ³, qui tient
 » toute la Syrie ⁴ & la Palestine ⁵, qui a occis
 » & exterminé les roys successeurs du grand
 » Seleucus, & a emmené par force leurs femmes
 » & leurs filles en captivité. Ce grand & puissant
 » roy est allié de Mithridates, ayant espousé sa
 » fille, & n'est pas vray-semblable que quand
 » il l'ira humblement requerir de luy donner
 » secours en son extreme necessité, l'autre soit
 » pour l'abandonner : ains est plus tost à croire
 » qu'il prendra la guerre contre nous pour le
 » defendre : ainsi en nous cuidant halter de
 » chasser Mithridates, nous nous mettrons en
 » danger d'attirer & provoquer un nouvel en-
 » nemy Tigranes, qui de long temps ne cherche
 » autre chose que quelque occasion apparente

¹ Au sud-est des Tibaréniens.

² L'Arménie confine aux Cabiréniens.

³ Au sud-est de l'Arménie.

⁴ La Syrie s'étend du nord au midi, depuis les monts Taurus & Amanus qui enferment la Cilicie, le long de la mer Méditerranée.

⁵ La Palestine est située à l'extrémité méridionale de la Syrie, & s'étend le long de la Méditerranée jusqu'à l'Arabie Pétrée, à son orient & à son midi, & l'Égypte à son couchant.

» de nous faire la guerre, & il n'en sçauroit
 » avoir de plus honeste apparence, que de
 » prendre les armes pour defendre d'extreme
 » ruine un roy son voisin & son allié si proche;
 » ayant esté contrainct de se jetter entre ses bras.
 » Quel besoing donques est il que nous mesmes
 » procurions cela, & que nous enseignions à
 » Mithridates ce qu'il n'entend pas, à qui il
 » doit recourir pour luy aider à nous faire la
 » guerre, & que nous le poulfions, ou que,
 » pour mieulx dire, nous le mettions avec nos
 » propres mains en voye d'aller requerir secours
 » à Tigranes? Ce qu'il ne fera jamais de sa
 » vouldté, s'il n'y est necessairement contrainct;
 » estimant que ce luy seroit deshonneur. Ne
 » vault il pas mieulx que nous luy donnons le
 » temps & le loisir de rassembler une autre fois
 » les forces de son royaume, & se remettre sus,
 » à fin que nous combations plus tost contre
 » les Colchiens, Tibareniens, Cappadociens &
 » autres telz peuples, que nous avons desja
 » batus tant de fois, que contre les Medois &
 » Armeniens?

XXVII. En ceste resolution demoura Lucullus
 long temps devant la ville d'Amifus, faisant tout
 expressement durer le siege sans le presser: puis
 quand l'hyver fut passé, il y laissa Murena pour
 le continuer, & s'en alla avec le reste de son

armée trouver Mithridates , lequel avoit planté son camp près la ville de Cabira , delibéré d'y attendre les Romains , ayant remis sus un exercite de quarante mille combatans à pied , & quatre mille chevaulx , ausquelz il se fioit le plus , tellement qu'il passa la riviere de Lycus¹ , & alla presenter la bataille aux Romains en une plaine campagne. Si y eut quelques escarmouches de gens de cheval , èsquelles les Romains eurent du pire , & y fut pris un Romain nommé Pomponius homme bien estimé , lequel fut mené , tout blecé qu'il estoit , devant Mithridates , qui luy demanda si en luy sauvant la vie , & le faisant guarir , il voudroit pas devenir son serviteur & son amy : « Ony bien , luy respondit il promptement , si tu fais paix avec » les Romains : sinon , je te setay tousjours » ennemy ». Le roy estima beaucoup sa vertu , & ne luy fait aucun desplaisir.

XXVIII. Quant à Lucullus il craignoit de descendre en la plaine , pource que son ennemy estoit le plus fort de gens de cheval , & si doubroit aussi d'un autre costé de prendre son chemin par la montagne , pour autant qu'il estoit long , malaisé & plein de bois & de forests : mais ainsi comme il estoit en ceste doubte , on prit d'aventure

¹ Riviere qui prend sa source près la ville de Cabira, & va se jeter dans l'Iris.

quelques Grecs , qui s'en estoient fouiz cacher dedans une caverne là auprès , entre lesquelz y en avoit un vieil nommé Artemidorus , lequel promeit à Lucullus , s'il le vouloit croire & suyvre , qu'il le rendroit en un lieu fort & seur pour y loger son camp , & où il y avoit un chasteau au dessus de la cité de Cabira. Lucullus adjousta foy à son dire , & si tost que la nuit fut venue , feit allumer force feuz en son camp , & s'en partit : & après avoir passé quelques pas de montagnes & destroiets dangereux , il se trouva le matin au lieu qu'Artemidorus luy avoit promis : & furent les ennemis bien estonnez quand le jour fut venu , de le voir là au dessus d'eulx , en lieu dont il pouvoit sortir sur eux avec advantage s'il luy plaisoit de combattre , & s'il ne luy plaisoit , & qu'il se voulust tenir coy , il estoit impossible de l'y forcer : car il estoit lors entre deux de hazarder la bataille ou non. Mais sur ces entrefaittes , on dit que quelques uns du camp du roy lancerent d'aventure un cerf : ce que voyans les Romains leur allerent au devant pour leur couper chemin & commencerent par ce moyen à se charger les uns les autres , survenans tousjours d'une part & d'autre , gens de renfort , tant qu'à la fin ceulx du roy y furent les plus forts : mais les Romains voyans de

dessus les rempars de leur camp la fuite de leurs gens, en eurent si grand despit, qu'il s'en coururent tout chauldement à Lucullus, le prier qu'il les menast au combat, & qu'il leur donnast le signe de la bataille. Lucullus leur voulant donner par effect à entendre, combien sert la presence & la veüe d'un bon & sage capitaine en un bon affaire, leur commanda qu'ilz ne bougeassent quant à eulx, & luy mesme en personne descendit en la plaine, où il feit commandement aux premiers de ses gens qu'il rencontra fuyans, qu'ilz eussent à s'arrester, & à retourner au combat quant & luy : ce qu'ilz feirent promptement, & les autres aussi pareillement : & ainsi se r'allians tous ensemble, tournerent facilement leurs ennemis qui les chassoyent en fuite, & les remenerent batans jusques dedans leur fort. Puis quand il fut de retour en son camp, il imposa à ceulx qui avoyent fouy une certaine note d'infamie, dont les Romains ont accoustumé d'user en tel cas : c'est, qu'il leur feit creuser un fossé de douze piedz de long, estans en chemises tous desceints, leurs autres compagnons presens, & les regardans faire.

XXIX. Or y avoit il en l'ost du roy Mithridates, le prince des Dandariens, qui sont

certains peuples barbares habitans au long des marets Mærotiques¹, & s'appelloit ce seigneur Olthacus, gentil chevalier de sa personne, hardy & addroit aux armes, & homme de bon sens pour conduire un grand affaire, autant qu'autre qui fust en toute la troupe, & davantage homme de bonne grace & de bon entretien en compagnie, sachant bien se rendre agreable à tous. Cestuy ayant tousjours quelque contention à l'encontre des autres seigneurs de son païs, & quelque jalousie, à qui auroit le premier lieu d'honneur & de faveur auprès du roy, s'adressa à Mithridates, & luy promeit qu'il luy feroit un grand service, c'est qu'il occiroit Lucullus. Le roy fut fort aise de ceste promesse, & l'en loua grandement en son privé : mais en public il luy fit quelques injures & oultrages, expressement à fin qu'il eust quelque couleur de contrefaire le courroucé, & de s'en aller rendre à Lucullus, comme il feit. Lucullus le receut à grande joye, à cause qu'il estoit fort renommé en son camp, & pour l'esprouver luy donna incontinent quel-

1 Le lac appellé Palus-Mæotides au nord du Pont-Euxin, entre l'Europe & l'Asie, il se réunit au Pont-Euxin par un détroit appelé le Bosphore Cimmérien, resserré entre la Chersonèse Taurique à l'occident, & la pointe orientale de l'Asie. Il ne faut pas confondre ce Bosphore ni cette Chersonèse, avec le Bosphore & la Chersonèse de Thrace, à l'extrémité sud-ouest du Pont-Euxin. Les Dandariens sont à l'orient du Bosphore Cimmérien.

que charge , en laquelle il se porta tellement , que Lucullus estima beaucoup son bon entendement , & loua sa diligence , de maniere qu'il luy faisoit cest honneur de l'appeller quelquefois au conseil , & de le faire manger à sa table. Un jour donques que ce Dandarien pensa avoir trouvé l'occasion opportune pour executer son entreprise , il commanda à ses valets qu'ilz luy teinsent son cheval tout prest hors des trenchées du camp , & en plein jour comme les soudards se reposoyent & dormoyent çà & là emmy le camp , il s'en alla en la tente de Lucullus , pensant n'y trouver personne qui luy en defendist l'entrée , pour la privauté & familiarité qu'il avoit prise avec luy , attendu mesmement , qu'il disoit avoir quelque chose de conséquence à luy communiquer : & de faict y fust entré sans doubte , si le dormir , qui perd tant d'autres capitaines , n'eust alors preservé & sauvé Lucullus qui dormoit : car l'un des valets de chambre nommé Menedemus , qui de bonne aventure gardoit la porte , luy dit qu'il venoit mal à propos , pour autant que Lucullus travaillé d'affaires & de faulte de dormir , ne faisoit que de se mettre à sommeiller. Olthacus , quelque chose que l'autre luy dist , ne s'en vouloit point aller , & dit qu'il y entreroit voulust ou non , pource qu'il avoit à luy parler de chose de grande

importance. Menedemus luy respondit, que ce ne sçauroit estre chose de plus grande importance ny plus necessaïre, que la conservation de la vie & santé de son maistre, lequel avoit necessairement besoïns de repos, & en disant cela le repoulsa avec les deux mains. Olthacus alors eut peur, & se tira secrettement hors des trenchées du camp, monta à cheval & picqua droit au camp de Mithridates sans avoir executé rien de ce qu'il avoit entrepris. Ainsi appert il, que l'occasion & opportunité du temps donne aux grands affaires, ne plus ne moins qu'aux drogues & medicines que lon ordonne aux malades, l'efficace de sauver ou oster la vie aux hommes.

XXX. Quelque temps après, Lucullus envoya l'un de ses capitaines nommé Sornatius, au recouvrement de vivres, avec dix enseignes de gens de pied : dequoy Mithridates estant adverty, despescha à sa queue un de ses capitaines aussi qui s'appelloit Menander, auquel Sornatius donna la bataille, & le desfeit avec grand meurtre de ses gens : & depuis Lucullus y renvoya encore un autre de ses lieutenans, Adrianus, avec une bonne troupe, à fin qu'il y eust des bledz en son camp plus qu'il ne luy en falloit. Mithridates ne le meit pas en nonchaloir, ains envoya après deux de ses capitaines, Menemachus &

Myron, avec grand nombre de gens, tant de pied que de cheval, lesquels furent tous entièrement mis en pièces, excepté deux seulement qui retournerent en porter les nouvelles au camp, lesquelles Mithridates tascha bien à desguiser, disant que la perte estoit beaucoup moindre que lon ne pensoit, & qu'elle estoit advenue par l'ignorance & par la temerité de ses lieutenans : mais Adrianus à son retour passa en grande pompe & magnificence tout au long de son camp, ramenant grand nombre de chariots chargez de bled & de despouilles qu'il avoit gaignées : ce qui mit Mithridates mesme en si grand desespoir, & tous ses gens en tel effroy & en tel trouble, qu'il resolut de ne s'arrester plus là. Parquoy les seigneurs qui avoyent credit autout de luy, commencerent à envoyer devant & faire emporter secrettement leur bagage hors du camp, mais ilz empeschoyent que les autres n'en feissent autant.

XXXI. Les autres gens de guerre voyans ces contenance des mignons du roy, se prirent à poulser & forcer ceulx qui les vouloyent engarder de sortir, & tant s'alluma ceste mutination, qu'ilz vindrent jusques à destrouffer les sommiers qui emportoient leur bagage, & à les tuer eulx mesmes sur le champ : entre lesquels se trouva Doryalus qui estoit l'un des principaulx capitaines de tout leur camp, qui n'avoit rien sur luy qu'une robbe

robbe de pourpre, pour laquelle il fut tué : & Hermæus le maître des sacrifices fut foulé aux piedz, & estouffé à la porte du camp par la multitude des fuyans : & Mithridates même parmy la presse & la foule de ceulx qui s'enfuyoyent en si grand effroy, se jetta hors de son camp sans avoir autour de sa personne une seule garde ny un seul escuyer, ne qu'il peust seulement recouvrer un cheval de son escuyrie, jusques à ce que Ptolomæus l'un de ses valets de chambre, qui l'apperceut en la foule des fuyans, descendit de dessus un cheval qu'il avoit, & le luy bailla, mais ce fut bien tard : pource que desja les Romains estoyent en sa queue qui le poursuyvoyent de bien près, & ne fut point à faulte de vistesse qu'ilz faillirent à le prendre, car ilz en furent assez près pour le faire : mais l'avarice & convoitise des soudards leur feit perdre la proye qu'ilz avoyent si long temps poursuyvy, avec tant de travaux & tant de hazards de batailles, & frustra Lucullus du prix & loyer de toutes ses victoires : car ilz en estoyent approchez de si près, que s'ilz eussent encore poursuyvy le moins du monde, ilz eussent sans point de doubte attainct le cheval qui l'emportoit. Mais un des mulets qui portoyent son or & son argent, fust ou par cas d'aventure, ou bien par ruze propensée de Mithridates, qui l'eust expressement fait jeter au

devant de ceulx qui le pourfuyvoyent, se trouva au beau milieu du chemin, entre luy fuyant, & les Romains pourfuyvans, lesquelz s'amuserent à piller l'or & l'argent, se combatans à qui en auroit : & ce pendant luy gaigna le devant, si bien, que depuis ilz ne le peurent plus r'attaindre. Si ne fut pas cela seul le dommage, que l'avarice des souldards feit à Lucullus, ains ayant d'avantage esté pris l'un des principaux secrettaires du roy nommé Callistratus, il commanda qu'on le menast au camp : mais ceulx qui le conduisoient, advertiz qu'il avoit en un baudrier, dont il estoit ceint, cinq cents escus², le tuerent pour les avoir : & neantmoins encore leur permit Lucullus de faccager & piller le camp des ennemis.

XXXII. Depuis ceste fuite de Mithridates, Lucullus prit la ville de Cabira & plusieurs autres chasteaux & fortes places, là où il trouva de grands trefors, & les prisons pleines de pauvres prisonniers Grecs, & de plusieurs princes parents du roy mesme, qui se tenoyent pour morts longtemps y avoit, & lors se voyans delivrez de celle miserable captivité par la grace & le benefice de Lucullus, ne penserent pas estre tirez de prison, mais estre ressuscitez & retournez en une seconde vie. Là fut aussi prise l'une des sœurs de Mithridates nommée Nyssa, à qui la prise fut salutaire,

² Grec, cinq cens pièces d'or.

là où ses autres femmes & sœurs que lon pensoit avoir reculées plus loing du danger, & mises en pais de plus grande seureté près la ville de Phernacie¹, moururent piteusement & miserablement : car Mithridates envoya devers elles l'un de ses valets de chambre nommé Bacchilides² leur porter nouvelles qu'il leur convenoit à toutes mourir. Il y avoit entre plusieurs autres dames, deux sœurs du roy, Roxane & Statira, qui avoyent bien quarante ans chascune, & toutefois n'avoyent jamais esté mariées, & deux de ses femmes espousées, toutes deux du pais d'Ionie, l'une appelée Berenice, native de l'isle de Chio, & l'autre Monimé de la ville de Milet. Ceste cy estoit fort renommée entre les Grecs, pource que quelques sollicitations que luy sceust faire le roy en estant amoureux, & qu'il luy eust envoyé quinze mille escus³ comptans, jamais ne voulut entendre à toutes ses poursuittes, jusques à ce qu'il y eust accord de mariage passé entre eulx, qu'il luy eust envoyé le diademe ou bandeau royal, & qu'il l'eust appelée royne. La pauvre dame tout le temps auparavant depuis que ce roy Barbare l'eut espousée, avoit vescu en grande desplaisance, ne faisant continuellement autre chose que de plorer la malheureuse beaulté

¹ Phernacie, ville maritime du Pont Polémonien ou Cappadocien.

² Grec, Bacchide.

³ Grec, quinze mille pièces d'or.

de son corps, laquelle au lieu d'un mary luy avoit donné un maistre, & au lieu de compagnie conjugale & que doit avoir une dame d'honneur, luy avoit baillé une garde & garnison d'hommes Barbares, qui la tenoyent comme prisonniere, loing du doulx país de la Grece, en lieu où elle n'avoit qu'un songe & une ombre des biens qu'elle avoit esperez, & au contraire avoit realement perdu les veritables, dont paravant elle jouissoit au país de sa naissance : & quand ce Bacchilides fut arrivé devers elles, & leurs eust fait commandement de par le roy qu'elles eussent à elire la maniere de mourir, qui leur sembleroit à chacune plus aisée & la moins douloureuse, elle s'arracha d'alentour de la teste son bandeau royal, & le se nouant à l'entour du col s'en pendit, mais le bandeau ne fut pas assez fort & se rompit incontinent, & lors elle se prit à dire, « O maudit & » malheureux tissu, ne me serviras tu point au- » moins à ce triste service » ? en disant ces parollés elle le jetta contre terre crachant dessus, & tendit la gorge à Bacchilides pour la luy couper. L'autre, Berenice, prit une coupe pleine de poison, sa mere presente, qui la pria de luy en bailler la moitié : ce qu'elle feit, & le beurent toutes deux ensemble. Si fut la force du poison assez violente pour esteindre la mere qui estoit affoiblie de vieillesse, mais elle n'eut pas l'efficace de




Malheureux tissu ! ne me rendras-tu pas du moins
ce triste service ?

T. F. Reg. scul.

N. Ponce Sculp.

Myrie del.



suffoquer si promptement la fille, pource qu'elle n'en avoit pas pris la quantité qu'il luy en falloit, ains tira longuement aux traicts de la mort, jusques à ce que Bacchilides la hastant d'achever, elle mesme finablement s'estouffa. Quant aux deux sœurs qui n'estoyent point mariées, on dit que l'une beut aussi du poison en maudissant & detestant fort la cruauté de son frere, mais que Statira ne dit jamais une mauvaise parole, ne qui sentist son cueur failly, ou ayant regret à mourir, ains au contraire qu'elle loua & remercia son frere de ce que se voyant en danger de sa personne, il ne les avoit point oubliées, ains avoit eu le soing de les faire mourir avant qu'elles tumbassent esclaves entre les mains des ennemis, & premier qu'ilz peussent faire aucun oultrage à leur honneur.

XXXIII. Ces piteux inconveniens firent grand mal au cueur de Lucullus, qui estoit doux & bening de sa nature : routefois il tira oultre poursuivant tousjours Mithridates à la trace, jusques à la ville de Talaura, là où entendant que quatre jours avant qu'il y arrivast, Mithridates s'en estoit souy devers Tigranes en Armenie, ils'en retourna, ayant premierement subjugué les Chaldeiens, & les Tibareniens, pris Armenie la mineure, & mis les villes, chasteaux & places fortés en son obeissance. Puis envoya Appius devers le roy Tigranes

le sommer qu'il eust à luy rendre Mithridates ; & quant à luy il reprit son chemin devers la ville d'Amisus, qui estoit encore assiegée : & la cause pourquoy ce siege duroit ainsi longuement, estoit la suffisance & grande expérience du capitaine qui la tenoit pour le roy nommé Callimachus, lequel entendoit si bien comme il se fault servir de tous engins de baterie, & estoit si ruzé en toutes les habilitéz que lon sçauroit inventer pour defendre une place assiegée, qu'il fâcha grandement les Romains en ce siege, dont il fut bien payé puis après : mais toutefois si fut il affiné lors par Lucullus, lequel à l'heure qu'il avoit tousjours auparavant accoustumé de faire sonner la retraite, & rappeler ses gens de l'assault pour les refreschir & reposer, il feit un jour au contraire soudainement assaillir la muraille, & de primfault en occupa une petite partie avant que jamais ceulx de dedans peussent venir à temps pour la defendre. Ce que voyant Callimachus, & cognoissant qu'il n'y avoit plus d'ordre de la tenir, abandonna la ville : mais premier que d'en partir, il meit le feu dedans, fust ou pour envie qu'il portast aux Romains, ne voulant point qu'ilz s'enrichissent du sac d'une si puissante ville, ou par une ruze de guerre, à fin qu'il eust plus beau loisir de se sauver & de s'enfuir : car personne ne se soucia de ceulx

qui s'enfuyoyent par mer, à cause qu'incontinent la flamme fut si grande, qu'elle s'espandit de tous costez jusques aux murailles, & les souldards Romains se preparoyent seulement à piller.

XXXIV. Mais Lucullus voyant le feu de dehors en eut pitié, & y voulut remedier, priant les souldards de le vouloir aller estaindre, à quoy personne ne prestoit l'oreille, ains vouloyent tous le pillage; faisans bruire leurs armes avec grands cris, jusques à ce qu'il fut contrainct de leur abandonner la ville à piller, esperant que par ce moyen au moins sauveroit il les edifices du feu: mais les souldards feirent tout le contraire: car en cherchant par tout avec torches & flambeaux allumez pour voir s'il y avoit rien de caché, ilz bruslerent eulx mesmes grand nombre de maisons, tellement que Lucullus y entrant le lendemain, & voyant la desolation que le feu y avoit faite s'en prit à plorer, disant à ses familiers qui estoient autour de luy, que souventefois au paravant il avoit estimé Sylla bienheureux: mais que jamais il n'avoit encore eu son bon-heur en si grande admiration comme ce jour là, en ce que desirant sauver la ville d'Athènes, les dieux luy avoyent fait la grace de le pouvoir faire: « & moy, dit il, qui desiroye » en cela l'ensuyvre, & sauver ceste cy, la fortune » contre mon desir m'a reduict à la reputation

» de Mummius, qui fei**t** brusler Corinthe ». ¹ Trois fois encore s'effor**ça** il en ce qu'il peut alors de remettre sus ceste pauvre ville : car quant au feu, il survint par aventure divine une pluye presque à l'instant qu'elle fut prise qui l'esteignit, & luy mesme avant qu'en partir fei**t** rebastir bonne partie des edifices que le feu avoit consumez, & y receut humainement tous les habitans qui s'en estoient fouiz, oultre lesquels il y logea encore d'autres Grecs, qui y voulurent de quelque part que ce fust aller habiter, & si leur accreut territoire de sept lieues & demie ² de pais qu'il leur donna. La ville estoit colonie des Atheniens qui l'avoient fondée & bastie du temps que leur empire estoit en sa fleur, & qu'ilz dominoient en la mer, au moyen dequoy plusieurs fuyans la tyrannie d'Aristion, s'y en alloient habiter, & y avoient tout droit de bourgeoisie, comme les naturelz habitans : ainsi leur advenoit ce bonheur, qu'en delais**san**t leurs propres biens ilz alloient posseder & jouir ceulx d'autrui : mais quant à ceulx de la ville qui peurent es**ch**apper d'une telle desolation, Lucullus les revestit très bien, & si leur donna ³ deux cents drachmes d'argent à chacun, & les renvoya tous en leurs pais. Le

¹ L'an de Rome 608, époque de la destruction de Carthage.

² Grec, cent vingt stades, qui font cinq lieues.

³ Vingt écus. Amyot. 155 liv. 12 l. 6 den. de notre monnaie.

grammairien Tirannion fut pris alors, que Murena requit & demanda à Lucullus, & luy ayant Lucullus ottroyé, il l'affranchit : en quoy il usa incivilement & illiberalement du don que Lucullus luy avoit fait : car en luy donnant ce prisonnier qui estoit grandement estimé & renommé pour son sçavoir, il n'entendoit pas que pour cela il fust devenu serf, de sorte qu'il fust besoing que Murena l'affranchist : car faire semblant de luy rendre sa liberté en l'affranchissant, n'estoit autre chose que luy oster celle qu'il avoit dès sa naissance. Mais en beaucoup d'autres choses, & non en ceste la seule, monstra bien Murena qu'il n'avoit pas toutes les parties qu'un homme de bien & bon capitaine doit avoir.

XXXV. Au partir de là Lucullus s'en alla visiter les villes de l'Asie, à fin que ce pendant qu'il n'estoit point occupé aux affaires de la guerre, elles eussent quelque soulagement des loix & de la justice : car à faulte que de long temps elle n'y avoit point esté administrée ny exercée, la pauvre province estoit affligée & oppressée de tant de maux & de miseres, qu'il n'est homme qui le peust presque croire, ny langue qui le sceust exprimer, & ce par la cruelle avarice des fermiers, gabelleurs & usuriers Romains, qui la mangeoyent & la tenoyent en telle captivité, que particulièrement & en privé les pauvres peres estoient con-

trains de vendre leurs beaux petits enfans, & leurs jeunes filles à marier, pour payer la taille & l'usure de l'argent qu'ilz avoyent emprunté pour la payer, & publiquement en commun les tableaux dediez aux temples, les statues de leurs dieux & autres joyaux de leurs eglises, encore à la fin estoient ilz eulx mesmes adjugez comme esclaves à leurs creanciers, pour user le demourant de leurs jours en miserable servitude : & pis encore estoit ce qu'on leur faisoit endurer avant qu'ilz fussent ainsi adjugez : car ilz les emprisonnoient, ilz leur donnoient la gehenne, ilz les detiroient sur le cheval, ilz les mettoient aux ceps, & les faisoient tenir à desouvert tout de bout en la plus grande chaleur d'esté au soleil, & en hyver dedans la fange ou dessus la glace, tellement que la servitude leur sembloit un relèvement de miseres & repos de leurs tourmens.

XXXVI. Lucullus trouva les villes de l'Asie pleines de telles oppressions, mais en peu de temps il en delivra ceulx qui à tort en estoient affligez. Car tout premierement il ordonna que lon comptast pour l'usure, qui se payoit tous les mois, la ¹ centieme partie de la debte principale seulement, & non plus. Secondement il retrencha toutes usures qui passoyent le sort principal. Tiercement, qui fut le plus grand poinct, il establi

* C'est à raison de douze pour cent par chacun an. Amyot.

que le creancier & usurier jouiroit de la quatrième partie des fruits & du revenu de son débiteur : & qui joignoit l'usure avec le fort principal, c'est à dire, qui prenoit usure de l'usure, estoit privé du total, tellement que par le moyen de ses ordonnances toutes les dettes furent payées en moins de quatre ans, & les terres & possessions rendues toutes nettes & déchargées de toutes dettes à leurs propriétaires. Ceste surcharge d'usures estoit procédée des vingt mille talents ², qui sont douze millions d'or, en quoy Sylla avoit condamné le pays de l'Asie, laquelle somme ilz avoyent bien payée desja deux fois aux fermiers & gabelleurs Romains, qui l'avoient fait monter en amassant & accumulant tousjours usures sur usures, jusques à la somme de six vingts mille talents, qui sont soixante & douze millions d'or. ³ Parquoy ces gabelleurs & fermiers s'en allerent crier à Rome contre Lucullus, disans qu'il leur faisoit le plus grand tort du monde : & à force d'argent suscitèrent quelques uns des harengueurs ordinaires à l'encontre de luy : ce qui leur estoit aisé à faire, pour autant mesmement qu'ilz tenoyent en leurs papiers plusieurs de ceulx qui s'entremettoient des affaires à Rome : mais Lucullus n'estoit pas seulement aimé des pays, ausquelz

² 93,175,000 liv. de notre monnoie.

³ 560,250,000 liv. de notre monnoie.

il faisoit du bien, ains estoit aussi desiré & souhaité des autres provinces, lesquelles reputoyent bien heureuses celles qui pouvoient avoir un tel gouverneur.

XXXVII. Au demourant, Appius Clodius, celui que Lucullus avoit envoyé devers Tigranes, estant frere de la femme que Lucullus avoit lors espousée, se fit premierement conduire par quelques guides qui estoient hommes du roy mesme, lesquels de propensée malice le conduisoient par le hault país, luy faisans faire un grand circuit & prendre une torse de plusieurs journées, qui n'estoit point necessaire, jusques à ce que l'un de ses serfs affranchis, qui estoit natif de la Syrie, luy enseigna le droit chemin : parquoy il donna congé à ces conducteurs Barbares, & laissant leur fallacieux destour du droit chemin, en peu de jours passa la riviere d'Euphrates, & arriva en la cité d'Antioche surnommée Epidaphne, ¹ là où il luy fut mandé qu'il attendist le retour de Tigranes, qui estoit au país de la Phœnicie, où il subjugoit quelques villes, qui luy restoyent encore à conquerir, & ce pendant il gagna secrette-

¹ Ainsi surnommée à cause d'un bois consacré à Apollon & Daphné, dont l'aventure, disoit-on, étoit arrivée en cet endroit. Cette ville étoit située dans la partie de la Syrie qui porta son nom. C'est là que les Chrétiens prirent pour la première fois ce glorieux nom, qui est tout ensemble, & la règle de leur vie, & le gage de leur bonheur.

ment plusieurs princes & seigneurs qui n'obeïssoyent que par force & malgré eulx à ce roy d'Armenie, entre lesquelz estoit Zarbienus roy de la province Gordiane, & promeit aussi à plusieurs citez de nagueres subjuguées & reduittes en servitude qui envoyoyent devers luy, le secours de Lucullus, leur mandant que pour le present elles ne remuassent rien : car la domination de ces Armeniens n'estoit pas supportable, mais intolerable aux Grecs, mesmement l'orgueil & l'arrogance du roy, lequel pour ses grandes prosperitez estoit devenu si superbe & si presumptueux, que tout ce que les hommes tiennent communement le plus cher, & qu'ilz aiment le plus, non seulement il le vouloit avoir & l'estimoit estre sien, mais luy sembloit qu'il n'eust esté faict en ce monde que pour luy, estant monté en ceste excessive oultre cuidance par les grandes faveurs que fortune luy avoit faictes.

XXXVIII. Car à son commencement c'estoit peu de chose, & neantmoins avec ce peu qu'il avoit, dont on ne faisoit compte, il subjuga plusieurs grandes nations, & rabaisa la puissance des Parthes, autant que homme qui eust jamais esté paravant luy. Il emplit le pais de la Mesopotamie d'habitans Grecs, qu'il tira par force de la Cilicie & de la Cappadocie, les contraignant d'aller habiter là. Il feit aussi changer de maniere

de vivre aux Arabes que lon surnomme Scenites* (comme qui diroit Tenteniers, pource que c'est un peuple vagabond, qui n'a point d'autres maisons que des tentes qu'il porte tousjours quant & soy) les transportant de leur païs naturel, & les faisant demourer fermes auprès de soy pour se servir d'eulx au faict de la marchandise. Il y avoit tousjours plusieurs roys en sa cour qui le servoyent : mais entre les autres, il y en avoit quatre qui estoient continuellement auprès de sa personne comme gardes ou laquais, pource que quand il alloit par les champs à cheval, ilz couroyent à pied à costé de luy en chemises : & quand il estoit assis en son siege à donner audience, ilz estoient tout de bout aïtours de sa chaire les mains entrelacées l'une dedans l'autre, laquelle contenance sembloit estre la plus certaine confession, & le plus grand adveu de servitude qu'ilz eussent sceu luy faire, comme s'ilz eussent par cela déclaré, qu'ilz luy quittoient toute leur liberté, & qu'ilz offroyent leurs corps à leur seigneur, plus prests de souffrir que de faire chose quelconque.

XXXIX. Toutefois Appius Clodius ne s'es-

* Il n'y a pas un mot de tout ceci dans le grec; au surplus Strabon dit que ces Arabes qui habitoient la partie méridionale de la Mésopotamie, pasteurs & brigands, changeoient souvent de demeure.

tonnant ny ne s'effroyant point pour toute ceste pompe tragique, quand il luy fut donné audience, luy dit franchement à son visage, qu'il estoit venu pour emmener quant & luy Mithridates, lequel estoit deu au triumphe de Lucullus, & pource qu'il le sommoit de le luy rendre entre ses mains, autrement qu'il luy denonceoit la guerre. Ceulx qui furent presens à ceste sommation, cogneurent bien aiseement que Tigranes, encore qu'il se perforceast de monstrier une chiere ouverte, avec un ris feinct & contrefait, en oyant ces paroles fut bien emeu en son cueur d'ouir ce jeune homme ainsi bravement & franchement parler : car en vingt & cinq ans qu'il avoit desja regné, ou pour mieulx dire qu'il avoit oultrageusement tyrannisé, il n'avoit jamais ouy parole franche & libre que celle là : ce neantmoins il feit réponse à Appius qu'il n'abandonneroit point Mithridates, & que si les Romains luy faisoient la guerre, il se defendroit : & ayant despit de ce que Lucullus par les lettres qu'il luy escrivoit, l'appelloit roy seulement, & non pas roy des roys, par celles qu'il luy rescrivit ne le daigna aussi appeller capitaine. Au congé prendre, il luy envoya de beaux & riches presens, qu'il refusa : & le roy luy en renvoya d'autres encore davantage, desquelz Appius ne prit qu'une couppe seulement,

de peur qu'il ne semblaſt à ce roy , qu'il les reſuſaſt ainſi obſtineement pour aucune malvueillance particuliere qu'il euſt contre luy , & luy renvoya le demourant , puis ſ'en retourna à grandes journées devers ſon capitaine.

XL. Or n'avoit Tigranes auparavant jamais voulu ſeulement voir Mithridates ſon allié ſi proche , qui par fortune de guerre avoit perdu un ſi grand & ſi puiffant royaume , ains le faiſoit tenir ſuperbement , & ſans honneur , comme ſi c'eũſt eſté un prifonnier , en lieux mareſcageux & mal ſains : mais alors il l'envoya querir honorablement , & le receut avec grandes careſſes. Quand ilz furent enſemble au palais royal , ilz ſe retirerent à part pour parler en ſecret l'un à l'autre , là où ilz ſe juſtifierent & excuſerent des ſouſpeçons qu'ilz avoyent conceus l'un de l'autre , au grand prejudice de leurs ſerviteurs & amis , ſur qui ilz en rejetterent les occaſions , entre leſquelz eſtoit Metrodorus ^r le Scepsien , homme de grand ſçavoir , qui diſoit plaiſamment ce qu'il vouloit , & à qui Mithridates avoit porté ſi grande amitié , que lon l'appelloit le pere du roy. Mithridates au commencement de ſes affaires l'avoit envoyé devers Tigranes , luy requerir

^r Celui-ci eſt poſtérieur de 250 ans au diſciple d'Epicure , qui étoit de Lampſaque. Scepsis étoit une ville de la Myſie près du mont Ida ; Strabon la nomme Paléſcepsis , ou l'ancienne Scepsis.

secours à l'encontre des Romains , & Tigranes luy demanda : « Mais toy mesme, Metrodorus, » que m'en conseillerois tu » ? Metrodorus, soit ou qu'il regardast au profit de Tigranes , ou qu'il ne voulust point que Mithridates eschappast , luy respondit , « Je te conseilleroye , sire , comme » ambassadeur , que tu le feisses , mais comme » conseiller , que tu ne le feisses point ». Tigranes en feit lors le recit à Mithridates , pensant que pour cela il ne luy deust point faire de desplaisir en sa personne , mais au contraire il fut incontinent mis à mort : dequoy Tigranes fut bien marry , & se repentit fort d'en avoir tant dit , combien qu'il ne fust pas entierement la cause totale de son malheur , & qu'il n'eust fait seulement que poulser la malvueillance que Mithridates dès auparavant avoit conceuë encontre luy. Car il y avoit desja long temps qu'il luy en vouloit , ce que lon cogneut quand on surprit ses papyrus & escrittures secretes , entre lesquelles on en trouva une , par laquelle il ordonnoit , que Metrodorus fust tué : mais en recompense Tigranes en inhuma le corps magnifiquement , sans espargner sumptuosité quelconque envers le corps mort de celuy que vivant il avoit trahy. Il mourut aussi en la cour de Tigranes un orateur nommé Amphicrates , si celuy là merite qu'on face mention de luy pour la ville

d'Athenes, dont il estoit natif : car on dit qu'estant banny de son pais, il s'en foyt en la ville de Seleucie, celle qui est assise sur la riviere du Tigris : & comme les habitans de la ville le priaissent d'enseigner l'art d'eloquence en leur pais, il ne daigna, ains leur respondit presumptueusement, que le plat estoit trop petit pour tenir un daulphin, comme s'il eust voulu dire, que c'estoit trop peu de chose que de leur ville, pour l'arrester. De là il se retira devers Cleopatra fille de Mithridates & femme de Tigranes, là où il fut bien tost souspeçonné & deferé, tellement qu'il luy fut defendu de plus hanter ny converser avec les Grecs, dont il eut si grand regret, que luy mesme se feit mourir à faulte de manger. Et fut celuy là honorablement aussi inhumé par la royne Cleopatra auprès d'un lieu qui s'appelle Sapha, comme lon dit en ce pais là.

XLI. Quant à Lucullus, après qu'il eut remis toute l'Asie en bonne paix & bonne tranquillité, & qu'il y eut estably de bonnes ordonnances sur le faict de la justice, il ne meit pas aussi en nonchaloir les choses de passe temps & de plaisir, ains ce pendant qu'il fut de loisir en la cité d'Ephese, feit faire force jeux, festes & combats de lucteurs & escrimeurs à oultrance, pour la jouissance de la victoire, en donnant l'esba-

temment aux villes de la province, lesquelles en recompense instituerent aussi une feste solennelle en son honneur qu'ilz appellerent Lucullia, & la celebrerent à grande joye, monstrans une vraye & non feincte amitié & bienvueillance envers luy, qui luy estoit plus agreable, & luy donnoit plus de contentement, que tout l'honneur qu'ilz luy eussent sceu faire. Mais depuis qu'Appius fut de retour, & qu'il eut arresté & conclud, qu'il falloit aller faire la guerre à Tigranes, il s'en retourna au royaume de Pont, où il prit son armée qu'il y avoit laissée en garnison, & la mena devant la ville de Sinope¹ pour l'assieger; ou plustost pour y assieger quelques Ciliciens, qui s'estoyent jettez dedans en faveur de Mithridates. Mais quand ilz veirent venir Lucullus contre eulx, ilz occirent une bonne partie des naturelz citoyens, & mettans le feu dedans la ville, s'enfouirent une nuit: dequoy Lucullus estant adverty, entra dedans, & y meit à l'espee huit mille de ces Ciliciens qui estoyent encore demouréz, & feit rendre aux naturelz habitans tout ce qui estoit à eulx: mais la cause principale, qui luy feit prendre soing de preserver ceste ville, fut une telle vision: Il luy fut advis la nuit, en

¹ Ville de Paphlagonie, près du fleuve Halys sur le Pont-Euxin.

dormant dedans son liét, que quelqu'un s'approcha de luy, & luy dit, « Marche un peu » plus oultre, Lucullus, car Autolycus vient, » qui desire parler à toy ». Ce songe l'esveilla, mais à son resveil il ne sceut conjecturer que vouloit dire ceste vision. Ce fut le jour mesme qu'il prit la ville de Sinope, là où en pousuyvant les Ciliciens qui se sauvoyent de vîstesse, il trouva une statue gisante par terre sur le bord de la mer, que ces Ciliciens avoyent voulu emporter : mais ilz furent pris & chassés de si près, qu'ilz n'eurent pas loisir de la charger sur leurs vaisseaux. Ceste statue, à ce que lon dit, estoit l'un des plus beaux & des plus nobles chefs d'œuvres du statuaire Sthenis : & y a quelqu'un qui dit, que c'estoit l'image d'Autolycus, celui qui fonda Sinope : car Autolycus fut un des princes qui partirent de Theſſalie, avec Hercules, pour aller contre les Amazones, & fut filz de Demachus. Et se dit, qu'au retour de ce voyage, la navire sur laquelle il s'estoit embarqué avec Demoleon & Phlogius, donna à travers un escueil, qui est en la coste de la Cherroneſe, où elle se perdit : mais que luy s'estant sauvé avec ses armes & ses gens aussi, fit tant qu'il arriva en la ville de Sinope, qu'il osta à quelques Syriens, que lon dit estre descenduz & nommez d'un Syrus filz d'Apollo,

& de la nymphe Sinope fille d'Asopus. Parquoy Lucullus entendant ce propos se souvint d'un advertissement de Sylla, lequel en ses commentaires escrit, qu'il n'est rien que lon ne doyye tenir plus asseuré, ny que lon doyye plus fermement croire, que ce qui nous est signifié par songe.

XLII. Ce pendant il fut adverty que Tigranes & Mithridates estoient tous prests à descendre en la Lycaonie & en la Cilicie, à fin qu'ilz peussent les premiers s'emparer de la province de l'Asie : si s'esmerveilla grandement du conseil de Tigranes, puis qu'il avoit eu intention de courir sus aux Romains, comment il ne s'estoit aidé de Mithridates au faict de ceste guerre, lors que ses forces estoient en leur entier, & qu'il ne joignoit alors sa puissance avec celle de luy, plustost que de le laisser ruiner & destruire, & puis soubz une froide esperance aller maintenant commencer une nouvelle guerre, en se precipitant avec ceulx qui ne pouvoient eulx mesmes se relever.

XLIII. Sur ces entrefaites, Machares filz de Mithridates qui tenoit le royaume du Bosphore, luy envoya une couronne d'or du poix de mille escus, le priant qu'il voulust le nommer & luy donner le tiltre d'amy & allié des Romains ; à l'occasion dequoy Lucullus estima que cela

estoit la fin finale de sa premiere guerre, & laissant Sornatius avec six mille combatans, à la garde du royaume de Pont se partit avec douze mille hommes de pied, & peu moins de trois mille chevaux, pour aller à la seconde: ce que tout le monde estimoit estre grande temerité à luy & le jugeoyent en cela fort mal conseillé, de s'aller avec si petite troupe, jetter entre nations belliqueuses, & s'exposer à tant de milliers de gens de cheval en un país long & large infiniment, environné tout à l'entour de très profondes rivières, & de montagnes couvertes de neges en tout temps, tellement que ses soudards, qui au demourant n'estoyent gueres bien disciplinez ny obeissans à leur capitaine, le suyvoyent envis, & estrivoyent à l'encontre de ses commandemens. D'autre costé les harengueurs à Rome crioyent ordinairement contre luy, & protestoyent devant le peuple; qu'il alloit semant une guerre d'une autre, dont la chose publique n'avoit que faire, & qu'il ne cherchoit autre chose que susciter tousjours occasions de nouvelles guerres, à fin que tousjours il eust des armées à son commandement, & qu'il ne posast jamais les armes, pour avoir tousjours moyen de faire bien ses besongnes particulieres aux despens & au danger public. Ceux là avec le temps executerent leur desseing, qui estoit

de faire rappeler Lucullus, & luy subroger Pompeius.

XLIV. Mais Lucullus, nonobstant cela, ne laissa point d'acheminer & haster son armée le plus tost qu'il luy fut possible, tellement qu'en peu de jours il arriva à la riviere d'Euphrates, laquelle il trouva enflée, troublée & impetueuse, pource que c'estoit en hyver; dont il fut sur l'heure bien fâché, pour autant qu'il pensoit bien que cela le deust arrester tout court un long temps; & luy donner beaucoup de peine & de destourbiér à trouver des bateaux & à faire faire des radeaux pour bastir un pont à passer. Mais sur le soir l'eau commença un petit à s'escouler; & puis se baissa si fort la nuit, que le lendemain la riviere se trouva toute reduitte à son canal ordinaire: qui plus est, les gens du pais voyans de petites islettes qui apparoissoient desjà au milieu du cours de l'eau, & la riviere dormante, comme un maret, à l'entour d'elles, adoroyent Lucullus comme un dieu, pource que c'estoit chose qu'ilz n'avoient gueres jamais au paravant veu advenir; & à son arrivée ce fleuve s'estoit soudainement soubmis à luy, & s'estoit rendu doux & traittable pour luy donner seur & facile passage: parquoy pour ne perdre l'occasion, il passa incontinent son armée, & si tost qu'il fut passé, il trouva sur l'autre rive

une rencontre d'heureux presage, qui fut telle : Sur l'autre rive de la riviere païssoient quelque nombre de vaches sacrées à la deesse Diane surnommée Persiene, que les Barbares habitans delà le fleuve d'Euphrates reverent & honorent sur tous les autres dieux, & ne se servent desdittes vaches à autre usage, qu'à les sacrifier & immoler à ceste deesse, ains vont errant par toute la contrée là où elles veulent, sans estre liées ny empestrées aucunement, ayans seulement la marque de la deesse, qui est une lampe imprimée sur leur corps, & n'est pas aisé d'en prendre quand on en a besoing, ains y a beaucoup à faire. L'une de ces vaches sacrées, après que l'armée fut toute passée, se vint d'elle mesme rendre dessus une roche, que lon estime aussi sacrée à la mesme deesse, en baissant la teste & tendant le col, comme font celles qui sont court atachées, ne plus ne moins que si elle fust venue expressement se presenter à Lucullus pour estre immolée, comme elle fut : mais oultre celle là, il immola aussi un taureau à l'Euphrates, pour luy rendre graces de ce qu'il luy avoit donné si facile passage.

XLV. Si ne fit Lucullus pour ce premier jour là, que camper seulement delà la riviere : mais le lendemain & les autres jours ensuyvans, il entra avant en païs par la contrée de la Sophene,

sans faire mal ne desplaisir aux personnes qui se venoyent rendre à luy, ou qui recevoient volontiers son armée : car mesme comme ses gens voulussent qu'on allast prendre de force un chasteau, dedans lequel on disoit qu'il y avoit force or & argent, il leur monstra de loing la montagne de Taurus, en leur disant : « C'est » celuy là qu'il vous faut plus tost aller prendre : » car quant à ce qui est dedans ce chasteau, » il est en reserve pour ceux qui vaincront » : & tirant oultre à grandes journées, il passa la riviere de Tigris, puis entra à main armée dedans le royaume d'Armenie.

XLVI. Quant à Tigranes, le premier qui luy oza porter la nouvelle de la venue de Lucullus, ne s'en esjouit gueres : car il luy feit trencher la teste : au moyen dequoy personne ne luy en oza plus parler, tellement qu'il estoit desja tout environné de feu, que ses ennemis allumoyent tout à l'entour de luy, qu'il n'en sçavoit encore rien, ains s'esbatoit avec ses mignons à ouir des propos de flatterie, que Lucullus seroit bien grand capitaine, s'il avoit la hardiesse de l'attendre seulement en la ville d'Ephese, & s'il ne s'enfuyoit incontinent de toute l'Asie, si tost qu'il le sentiroit approcher avec une si triumpante armée de tant de milliers d'hommes. Ainsi peult on voir, que comme tous corps

& tous cerveaux ne sont pas assez fermes ny assez forts pour porter beaucoup de vin, aussi ne sont pas tous entendemens assez resolu ne constans, pour ne fortir point hors de foy, ny des bornes de raison en grandes prosperitez. Toutefois à la fin Mithrobarzanes, l'un de ses mignons, fut celuy qui luy oza dire la verité, lequel ne se trouva gueres mieulx de sa franchise de parler qu'avoit fait l'autre, pource que Tigranes l'envoya incontinent avec trois mille chevaux & bon nombre de gens de pied, luy commandant qu'il luy amenast le capitaine vif, & qu'au demourant il passast par dessus le ventre de tous ses gens.

XLVII. Or quant à Lucullus il estoit desja campé avec une partie de son armée, & l'autre venoit après, lors que ses coureurs luy vindrent dire la venue de ce capitaine Barbare: si eut peur de prime face, que si l'ennemy les venoit assaillir ainsi escartez les uns des autres, & non en poinct de combattre, il ne les meist en rouverte & en defarroy. Au moyen dequoy il demoura dedans son camp à le faire fortifier & remparer, & envoya Sextilius l'un de ses lieutenans avec mille six cents chevaux, & un peu plus de gens de pied, tant nuds qu'armez, luy enjoignant qu'il s'allast planter au plus près de l'ennemy sans combattre, pour l'amuser & arrester seulement, jusques à

ce qu'il eust nouvelles que toute l'armée seroit ensemble dedans le camp. Sextilius tascha bien à le faire ainsi qu'il luy estoit commandé, mais il fut contrainct contre sa resolution de venir au combat, tant Mithrobarzanes, l'alla bravement & audacieusement assaillir : si y eut rencontre en laquelle Mithrobarzanes mourut luy mesme en combatant vaillamment, & tout ses gens furent mis en rouverte & presque tous occis, peu exceptez, qui se sauverent de viffesse.

XLVIII. Depuis ceste desfaitte, Tigranes abandonna sa grande cité royale de Tigranocerta, qu'il avoit luy-mesme bastie, & se retira devers le mont de Taurus, là où il assembla gens de tous costez : mais Lucullus ne luy voulant pas donner loysir de se preparer, envoya d'un costé Murena pour couper chemin & rompre ceulx qui s'assembloyent autour de luy, & d'un autre costé envoya Sextilius pour empescher une grosse troupe de Arabes qui luy venoit, lesquelz Sextilius chargea ainsi comme ilz se vouloyent loger, & les desfeir presque tous : & Murena suyvant Tigranes à la trace espia l'occasion qu'il passoit une vallée longue & estroite, au fond de laquelle y avoit mauvais chemin, mesinement pour une armée qui estoit de longue estendue : si luy donna sur la queue usant de l'opportunité, & Tigranes se meit incontinent en fuite, faisant jetter tout le

bagage emmy le chemin au devant de l'ennemy pour le retarder , & y eut grand nombre d'Armeniens occis en ceste rouverte , & plus encore de pris. Ces choses ainsi faites , Lucullus s'achemina devers la cité de Tigranocerta¹ qu'il assiegea tout à l'entour. Il y avoit dedans grand nombre de Grecs , lesquelz y avoyent esté transportez par force de la Cilicie , & beaucoup de Barbares aussi à qui on en avoit autant fait , Adiabeniens² , Assyriens , Gordianiens & Cappadociens , desquelz Tigranes avoit ruiné les villes , & les avoit contraincts de s'en venir habiter là : au moyen dequoy ceste ville estoit pleine d'or & d'argent , de medailles , statues , tableaux & peintures , à cause que tout le monde , autant les hommes privez , que les princes & seigneurs , s'estudioyent pour complaire à ce roy , d'enrichir & embellir ceste cité de toute sorte de paremens & ornemens de ville. A l'occasion dequoy Lucullus pressa le plus qu'il peut le siege , se persuadant que jamais Tigranes ne supporteroit qu'elle fust prise , ains qu'encore qu'il eust autrement deliberé , neant-

¹ Grande ville d'Arménie.

² A l'occident de la Babylonie , selon Strabon. L'Adiabène avoit porté anciennement , selon Ammien Marcellin , le nom d'Assyrie. Les Gordyæniens y confinent , & la Cappadocie est un peu plus loin en tirant vers le Pont.

moins par un courroux il luy viendrait presenter la bataille pour luy faire lever le siege : ce qu'il prenoit très bien , n'eust esté que Mithridates par lettres & par messagers exprès , luy desconseilloit fort de hazarder la bataille , & luy suadoit plus tost de couper vivres de tous costez aux Romains avec sa gendarmerie : autant luy en dit & conseilla Taxiles capitaine que Mithridates luy avoit envoyé , & qui estoit avec luy en son camp , le priant à grande instance de ne vouloir point esprouver les armes des Romains , qui estoient chose invincible.

XLIX. Tigranes escoutoit patiemment leurs raisons du commencement , mais quand les Armeniens avec toutes les forces du païs furent arrivez , & les Gordiæniens , & que les roys des Medois & des Adiabeniens furent aussi venus avec toute leur entiere puissance , & que d'autre costé , luy fut aussi arrivé un grand nombre des Arabes , qui habitent le long de la mer de Babylone , & grand nombre aussi d'Albaniens ¹ , venans de la mer Caspienne , & d'Iberiens ² qui sont leurs proches voisins , outre une autre grosse troupe des peuples francs & vivans sans roy , qui habitent au long

¹ L'Albanie , à l'occident de la mer Caspienne.

² L'Ibérie touche à l'Albanie entre la mer Caspienne & le Pont-Euxin.

de la riviere d'Araxes¹, les uns venus liberalement pour luy faire plaisir, les autres pour les pensions & pour la soute qu'il leur donnoit : alors ne se teint il plus à sa table, ny en ses conseilz, autre propos que de certaine esperance de la victoire, de braveries & de menaces barbaresques, tellement que Taxiles fut en danger de sa personne, pource qu'il contredisoit obliquement à la conclusion qui avoit esté prise au conseil de donner la bataille : & eut on opinion que Mithridates portoit envie à la gloire du roy, & que pour ceste occasion, il luy alloit ainsi dissuadant la bataille : à raison dequoy Tigranes ne le voulut pas seulement attendre, de peur qu'il n'eust part à l'honneur de sa victoire, ains se meit aux champs avec tout ce grand exercite, disant entre ses privez amis, ainsi que lon compte, qu'il n'estoit marry que d'une chose seule, c'estoit qu'il luy falloit combattre contre Lucullus seul, & non contre tous les capitaines Romains ensemble. Et si n'estoit pas ceste braverie si folle, ne si hors de bon sens, qu'il n'y eust quelque apparence, quand il regardoit autour de luy tant de nations diverses, tant de roys qui le suyvoyent, tant de bataillons de gens de pied armez, & tant de

¹ Riviere qui sort du mont Athos, partie du mont Taurus dans l'Arménie, & se jette dans la mer Caspienne.

milliers de gens de cheval : car il avoit en son armée vingt mille hommes de traict & de tireurs de fonde seulement : cinquante & cinq mille hommes de cheval , dont il y en avoit dix sept mille armez de toutes pieces , ainsi que Lucullus mesme l'escrivit au senat : & de gens de pied armez , distribuez par enseignes & squadrons , cent cinquante mille : de pionniers , charpentiers , maçons & autres telles gens de bras pour applanir les chemins , bastir ponts à passer les eaux , curer les rivières , couper des bois & faire autres telles œuvres , jusques au nombre de trente cinq mille , qui suyvoyent à la queue de l'armée ordonnez en gens de guerre , faisans paroître le camp de plus grande monstre , & luy donnans plus de force aussi.

L. Quand il fut au dessus du mont de Taurus^r, & que lon peut de la ville voir à clair toute son armée , & que luy aussi peut choisir de l'œil celle de Lucullus , qui tenoit sa ville de Tigranocerta assiegée , les Barbares qui estoient dedans recueillirent ceste veue avec grands cris de joye , & grands batemens de mains , menaçans de dessus leurs murailles les Romains , en leur monstrant l'armée des Armeniens. Lucullus ce pendant reuint conseil sur ce qu'il avoit à faire , auquel

^r Longue chaîne de montagnes entre la Cilicie & la mer Caspienne.

conseil les uns furent d'advise qu'il levast son siege, & qu'il allast avec son armée toute entiere sans la departir contre Tigranes : les autres ne trouvoient pas bon qu'il laissast à son dos un si grand nombre d'ennemis, ne qu'il levast son siege : adonc leur respondit Lucullus, qu'ilz ne disoyent bien ny les uns ny les autres, mais que tous deux ensemble le conseilloyent très bien. Au moyen dequoy il divisa son armée & laissa au siege devant la ville Murena avec six mille combatans, & luy avec vingt & quatre cohortes, & les autres il n'y avoit pas plus de dix mille hommes de pied armez, & toute sa chevalerie, avec environ mille hommes de trait, & tireurs de frondes, s'en alla au devant de Tigranes, & logea en une grande & spacieuse plaine au long de la riviere. Si sembla le camp des Romains bien peu de chose à Tigranes, de maniere que pour quelque temps il servit de risée & de passetemps aux flatteurs de sa cour : car les uns s'en mocquoyent, les autres tiroient au sort, & jouoyent leur part des despouilles, comme s'ilz eussent desja gaigné la bataille, & chacun des roys & des capitaines s'alloit presenter au roy le requerant bien instamment de luy faire ceste grace : qu'autre ne s'en empeschast que luy, & que le roy se teinst à l'escart assis en quelque part pour voir l'esbatement. Et lors
Tigranes

Tigranes voulant monstrier qu'il sçavoit plaisamment rencontrer , & dire le mot , aussi bien que les autres , dit une parole qui est assez vulgaire , « S'ilz viennent comme ambassadeurs ; » ilz sont beaucoup : mais s'ilz viennent comme ennemis , ilz sont bien peu ». Voilà comment ilz se mocquoient & se gaudissoient pour lors.

LI. Le lendemain au point du jour Lucullus tira ses gens tous armez aux champs en bataille. Or estoit le camp des Barbares de l'autre costé de la riviere vers le soleil levant , & d'aventure le cours de la riviere se destournoit tout court devers le soleil couchant , là où il y avoit meilleur guay pour la passer : au moyen dequoy Lucullus faisant marcher son armée en bataille à val le cours de la riviere pour trouver le guay , & la hastant d'aller , sembla à Tigranes se retirer , tellement qu'il feist appeller Taxiles & luy dit en riant , « Vois tu ces beaux legionaires » Romains , que tu preschois tant estre gens » invincibles , les vois tu maintenant fouir » ? Taxiles adonc luy respondit , « Je voudroye , » syre , que ta bonne fortune feist aujourd'huy » quelque miracle : car à la verité ce seroit chose » bien estrange , que les Romains fouissent : mais » ilz n'ont pas accoustumé de prendre leurs beaux » accoustremens sur leur harnois quand ilz veulent seulement cheminer par les champs , ny

» ne portent pas leurs pavois & escus descouverts ;
» ny leurs armets nuds en la teste , comme ilz les
» ont maintenant , leur ayans osté leurs estuis &
» couvertures de cuyr : mais sans point de doubte ,
» ce bel equippage auquel nous les voyons ainsi
» reluire , est certain signe qu'ilz veulent com-
» battre , & qu'ilz marchent pour nous venir
» trouver ».

LII. Taxiles n'avoit pas encore achevé son propos , que Lucullus , à la veuë de ses ennemis , fait tourner tout court le portenseigie qui portoit la premiere aigle , & que les bandes prirent leur place pour passer la riviere en ordonnance de bataille. Adonc Tigranes se revenant à toute peine , comme d'une yvresse , s'escria tout hault par deux ou trois fois , « Ilz » viennent donc à nous ». Si y eut grand trouble & grand tumulte quand se vint à renger tant de monde en bataille. Le roy Tigranes en prit à conduire le milieu , & en bailla la poincte gauche à mener au roy des Adiabeniens , & la droite au roy des Medois , en laquelle estoit la pluspart des hommes d'armes armiez de toutes pieces , qui faisoient le premier front de toute la bataille.

LIII. Mais ainsi comme Lucullus estoit prest à passer la riviere , il y eut quelques uns de ses capitaines qui le vindrent advertir qu'il se

devoit garder de combattre ce jour là , pource que c'estoit l'un de ceulx que les Romains estiment malencontreux , & les appellent Attri , c'est à dire , noirs , pource que c'estoit celuy auquel un Scipion ¹ avoit esté desfaire en bataille rangée , avec toute son armée , par les Cimbres : & Lucullus leur respondit ceste parole , qui depuis a tant esté celebrée , « Je le rendray » aujourd'hui heureux pour les Romains ». C'estoit le sixieme jour du mois d'octobre. En disant ces mots , & les admonestant d'avoir bon courage , il passa la riviere , & marcha le premier droit vers l'ennemy , armé d'une anme d'acier faite à escailles reluisante au soleil , & par dessus une cotte d'armes frangée tout à l'entour , tenant desja l'espée traitte en la main , pour donner à entendre à ses gens qu'il falloit soudainement aller joindre de près les ennemis , pour combattre à coups de main contre eulx , qui n'avoient accoustumé de combattre que de loing à coups de traict , & qu'il passeroit si viftement & si toidement l'espace de chemin qu'il leur falloit pour tirer qu'ilz n'auroient pas le loisir de descocher : & voyant que le fort de leurs hommes d'armes , dont on faisoit si grand cas , estoit rangé en bataille au dessous

¹ Scipion. Voyez les Apophthegmes des Romains , Tome XV , page 411.

d'un coustau , duquel le dessus estoit plain & uny , & la montée qui duroit environ un quart de lieuë² n'estoit pas fort roide ny couppee , il y envoya quelque nombre de gens de cheval Thraciens & Gaulois qu'il avoit à sa foulde , & leur commanda qu'ilz les allassent charger par les flancs pour les troubler , & qu'ilz essayassent à trancher leurs lances avec leurs espées , pource que tout l'effort de ces hommes d'armes consiste en leur lance , & ne peuvent faire autre chose , ny pour eulx , ny contre leurs ennemis , tant ilz sont pesamment & malaiseement armez , de sorte qu'il semble qu'ilz soyent emmurez dedans leur harnois , comme dedans une prison de fer : & luy quand & quand prenant deux enseignes de gens de pied se perforcea de gagner aussi le hault de ce coustau , ayant ses soudards à son dos qui le suyvoyent de grand courage , pource qu'ilz le voyoyent le premier travaillant à pied , & gravissant contremont la pente du coustau.

LIV. Quand il fut au dessus , il s'arresta un peu au lieu plus eminent , & se prit à crier à haulte voix , « La victoire est nostre , compagnons , la victoire est nostre » : & en disant cela les mena droit contre ces hommes d'armes , leur commandant qu'ilz ne s'amussassent point à lancer leurs javelots , mais qu'ilz prissent leurs

² Grec , quatre stades.

espées en leurs mains , & en frappassent sur les jambes & sur les cuisses de ces hommes d'armes , pource qu'ilz n'ont autres parties de leurs corps qui soyent descouvertes : toutefois il ne fut point de besoing de telle escrime , pource qu'ilz n'attendirent pas les Romains , ains avec grands hurlemens tournerent bride incontinent , & s'allerent ruer très lachement eulx & leurs chevaux , tout ainsi lourds & pesans qu'ilz estoient , à travers les bandes de leurs gens de pied , avant qu'ils eussent donné un seul coup , tellement que si grand nombre de milliers d'hommes fut mis en rouverte sans coup ferir , & sans qu'il y eust personne blecé , ne que lon veist une seule goutte de sang espandu : mais le grand meurtre fut quand ilz prirent la fuitte , ou pour mieux dire , quand ilz cuiderent fouir , car ilz ne le peurent pas faire , s'entremeschans eulx mesmes de fouir pour la longueur & profondeur de leurs bataillons. Tigranes entre autres ne faillit pas à desloger des premiers avec bien petite compagnie , & voyant son filz en pareille fortune que luy fuyant , il s'osta le bandeau royal d'alentour de la teste , & le luy bailla en plorant , luy commandant qu'il se sauvast le mieulx qu'il pourroit par un autre chemin : mais le jeune prince n'osa pas prendre la hardiesse de s'en bender la teste , ains le bailla en garde à l'un de

ses plus feaux serviteurs, lequel d'aventure fut pris & amené à Lucullus, de maniere qu'entre les autres prisonniers, le fut aussi le diademe ou bandeau royal de Tigranes. On tient qu'il mourut en ceste desfaite plus de cent mille hommes de pied, & des gens de cheval qu'il s'en sauva bien fort peu. Du costé des Romains il y en eut environ cent blecez, & cinq tuez.

LV. Le philosophe Antiochus ¹ faisant mention de ceste bataille en un traitté qu'il a composé des dieux, escrit que jamais le soleil n'en veit de pareille, & Strabo un autre philosophe, en quelques histoires abbregee's qu'il a escriptes, dit que les Romains avoyent honte, & se mocquoyent d'eulx mesmes, de ce qu'ilz avoyent employé les armes contre de si lasches esclaves : & Titus Livius tesmoigne que jamais les Romains ne se trouverent en bataille avec si petit nombre de combatans contre si grande multitude d'ennemis : car les vainqueurs n'estoyent en tout que la vingtieme partie, & encore pas, de ceulx qui furent vaincus. Dont les plus vieux & plus experimentez capitaines Romains louoyent grandement Lucullus, en ce qu'il avoit desfait deux des plus grands & des plus puissans princes du monde

¹ Apparemment le philosophe stoïcien, un peu plus ancien que Strabon le géographe. Cicéron dit avoir entendu ses leçons. On le surnommoit le Cygne.

par deux moyens totalement contraires, l'un par tardité, & l'autre par soudaineté : car il mina & consuma Mithridates par reculer & dilayer, lors que ses forces estoient en leur entier : & au contraire il ruina Tigranes par se haster. Ainsi feit il ce que peu de capitaines ont jamais scëu faire, c'est qu'il usa de tardité pour executer, & de hardiesse pour asseurer son affaire.

LVI. Cela fut cause que Mithridates ne se halta pas fort pour estre au jour de la bataille, pensant que Lucullus useroit de sa ruze accoustumée, de dilayer & reculer tousjours, & pourtant s'en venoit il à petites journées au camp de Tigranes : mais rencontrant en son chemin un petit nombre d'Armeniëns du commencement, qui s'en fuyoyent tous effroyez & espouventez, il se doubta incontinent de la desfaitte : puis en trouvant d'autres en plus grand nombre tous nuds & navrez, alors il en fut au vray du tout informé : si se meit à chercher Tigranes, lequel il trouva tout seul abandonné de ses gens en bien pauvre estat, & ne luy rendit pas la pareille en son adversité, de l'arrogance & du mespris, dont Tigranes luy avoit usé en la siene : ains descendit de cheval pour se douloir & plorer avec luy leur commune infelicité, & luy bailla tous ses officiers, & tout le train de maison royale qui le suyvoit, pour le servir, en le recon-

fortant & l'admonestant d'avoir bon courage pour l'advenir : puis se meirent tous deux ensemble à rallier & rassembler gens de guerre de tous costez.

LVII. Cependant il se leva une sedition dedans la ville de Tigranocerta entre les Grecs & les Barbares, pource que les Grecs vouloyent rendre la ville entre les mains de Lucullus, lequel sur cela luy faisant donner un assault, l'emporta, & se saisit des tresors du roy, qui estoient dedans, abandonnant au demourant la ville aux souldards à piller, en laquelle oultre les autres richesses, il se trouva en argent monnoyé bien ¹ huit mille talents. Encore oultre tout cela donna il du butin qui fut lors gaigné sur les ennemis ², huit cents drachmes d'argent à chaque homme de guerre. Et entendant qu'il se trouvoit en celle ville force musiciens, joueurs de comedies, sonneurs d'instruments & autres telz ouvriers qui sont requis à faire festes publiques, que Tigranes avoit fait venir de toutes parts pour dedier le theatre qu'il avoit fait bastir en sa ville, il s'en servit à faire les jeux & festes de sa victoire. Puis cela fait, il renvoya les Grecs en leurs païs, leur donnant argent pour faire leurs despens par les chemins,

¹ Quatre millions huit cents mille escus. *Amyot* 17,350,000 livres de notre monnoie.

² Quatre vingts escus. *Amyot*, 611 liv. 10 s. de notre monnoie.

& les Barbares aussi qui avoyent esté là tirez par force hors des lieux de leur naissance : ainsi advint il que de la desolation & destruction d'une ville desertée, plusieurs furent rebasties & repeuplées : au moyen de ce qu'elles recouvrent leurs naturelz habitans, lesquelz en aimerent & revererent depuis Lucullus comme leur bienfaiteur & leur fondateur. Toutes autres choses luy succedoyent aussi semblablement ainsi que meritoit sa vertu : car il aimoit & desiroit plus les louanges qui procedent de bonté, de justice & de clemence, qu'il ne faisoit celles qui naissent des haults & grands faicts d'armes, pource qu'il disoit que son armée avoit part à celles cy, & que la fortune s'en attribuoit une bonne partie : mais que celles là estoient propres à luy tout seul.

LVIII. En quoy il monstroït bien qu'il avoit une bonne ame, bien composée & bien instruite à la vertu, aussi en receut il le fruit, dont il estoit digne : car par ces qualitez il gaigna les cueurs des Barbares, tellement que les roys des Arabes se vindrent volontairement mettre eulx & leurs biens entre ses mains : aussi se rendit à luy la nation des Sopheniens : & celle des Gordaniens en fut si affectionnée en son endroit, qu'ilz eussent volontiers abandonné villes, maisons & païs, pour le suyvre avec leurs femmes & leurs enfans, pour une telle occasion : Zarbienus

roy de ces Gordieniens, comme nous avons dit au paravant, avoit soubz main secrettement fait alliance avec Lucullus, par le moyen d'Appius Clodius, ne pouvant plus supporter la tyrannie de Tigranes. Cela fut descouvert à Tigranes, qui l'en feit mourir, luy, sa femme & ses enfans, premier que les Romains entrassent à main armée dedans le païs d'Armenie : toutefois Lucullus ne le meit pas en oubly, ains en passant par son royaume luy feit des funerailles royales : car ayant fait dresser un beau buscher, accoustré magnifiquement de drap d'or & d'argent, & autres riches despouilles de Tigranes, il y voulut luy mesme en personne mettre le feu, & luy feit les effusions funerales accoustumées aux enterremens, avec ses amis & parents, luy faisant cest honneur que de l'appeller amy & allié du peuple Romain : & si ordonna une grosse somme de deniers pour luy faire dresser une magnifique sepulture : car on trouva grande quantité d'or & d'argent dedans son chasteau royal, & si y avoit une provision de trois cents mille mines de bled : ce qui enrichit bien les soudards, & feit esmerveiller Lucullus de ce, que n'ayant receu pas une seule drachme d'argent de l'espagne de Rome, il avoit entretenu ceste guerre par elle mesme.

LIX. Environ ce mesme temps aussi le roy

des Parthes luy envoya presenter par ambassadeurs exprès son amitié & son alliance, à quoy Lucullus entendit fort volontiers, & luy envoya aussi des ambassadeurs de son costé, lesquels à leur retour luy feirent rapport, que le roy des Parthes estoit en doubte de se resouldre en quelle part il devoit plus tost incliner, & que secrettement il faisoit demander à Tigranes le royaume de la Mesopotamie ¹ pour loyer de le secourir à l'encontre des Rômains. Dequoy Lucullus s'estant bien au vray informé resolut de laisser là Tigranes & Mithridates, comme deux adversaires las & recreuz, & delibera de sonder & esprouver un petit les forces & la puissance des Parthes en leur allant faire la guerre, estimant que ce luy seroit une grande gloire d'avoir desconfit & desfait tout d'une tire trois si puissans roys, ne plus ne moins qu'un vaillant champion de lûcte, qui auroit tout de renc abbatu trois bons lûcteurs, & d'avoir passé à travers le país de trois les plus grands princes qui fussent soubz le soleil, tousjours victorieux, sans jamais estre vaincu : si escrivit incontinent à Sornatius & aux autres siens capitaines, qu'il avoit laissez à

¹ Voici la position. La Syrie le long de la mer Méditerranée, la Mésopotamie entre l'Euphrate & le Tigre; à l'orient de celui-ci la Médie, la Parthie, & la Bactriane toujours en tirant vers l'est, pres- que sur la même ligne.

la garde du royaume de Pont, qu'ilz luy amenaissent en diligence les forces qu'ilz avoyent sous leur charge, faisant son compte de partir de la province Gordiene pour aller à ce voyage contre les Parthes : mais il en advint bien autrement. Car ses lieutenans qui ja par plusieurs fois au paravant avoyent trouvé leurs soudards mutins, & rebelles à leurs commandemens, alors cogneurent evidemment leur mauvaise volonté & desobeïssance incorrigible : car il ne leur fut onques possible pour quelques remonstrances qu'ilz leur peussent faire, ny pour contrainte dont ilz sceussent user, de les pouvoir tirer de là, ains au contraire ilz crioient & protestoyent qu'ilz ne demoureroient pas mesme là où ilz estoient, ains s'en iroyent en leurs maisons, laissant là le royaume de Pont sans garde ny garnison quelconque. Le pis fut encore, que quand on apporta ces nouvelles au camp de Lucullus, elles donnerent exemple & audace aux autres de se mutiner aussi, avec la bonne envie qu'ilz en avoyent, pource qu'estans pleins de richesses & accoustumés aux delices, ilz en estoient devenus pesans pour plus endurer les travaux de la guerre, & ne vouloyent plus que se reposer : au moyen dequoy quand ilz entendirent les audacieux termes quetenoyent les autres, ilz les appelloient hommes & gens de cuer, disans qu'il falloit suyvre le

chemin qu'ilz leur enseignoyent, & qu'ilz avoyent assez fait de services, qui meritoient bien qu'on leur donnast congé de se retirer à sauveté, & de se reposer desormais.

LX. Lucullus oyant ces propos, & d'autres pires encore & plus seditieux, rompit son entreprise du voyage des Parthes, & s'en alla pour rencontrer de rechef Tigranes estant au cueur de l'esté : mais quand il fut au dessus du mont de Taurus, il fut bien ennuyé de voir les champs & les bleds encore tout verts, tant les saisons sont tardives en ces quartiers là, à cause de la froideur de l'air : toutefois il descendit en la plaine, & desfeit en deux ou trois rencontres les Armeniens qui se hazarderent de l'attendre : & puis courut & pillà tout le plat país sans empeschement quelconque, enlevant les bleds qui avoyent esté apprestez pour la provision du camp de Tigranes, tellement qu'il meit ses ennemis en la nécessité & disette de vivres, que luy mesme craignoit, & ne laissa pas pour cela de les provoquer par tous autres moyens pour les faire venir à la bataille, tantost faisant enclorre leur camp de trenchées tout à l'environ, comme s'il les eust voulu affamer, tantost destruisant & gastant tout le plat país devant leurs yeux : mais pour avoir esté batus tant de fois, jamais ne voulurent plus bouger.

LXI. Ce que voyant Lucullus, à la fin leva son camp, & s'en alla mettre le siege devant Artaxata la ville capitale du royaume d'Armenie, dedans laquelle estoient ses femmes legitimes & ses petits enfans, esperant que Tigranes adventurerait encore une bataille plus tost que de laisser perdre ceste ville. Lon dit que Hannibal de Carthage, après que le roy Antiochus eut esté desfait par les Romains, se retira devers Artaxes, auquel il monstra & enseigna de faire plusieurs choses utiles & profitables à son royaume, & entre autres, que ayant considéré l'un des plus beaux, plus plaisans & plus fertiles endroits de toute la province, qui demouroit inutile sans que lon en feist compte, il y trassa & desfeigna le plan d'une ville, & depuis y amena le roy, & l'enhorta de la faire bastir & peupler. Le roy en fut fort aise, & le pria de prendre luy mesme la charge de conduire l'œuvre : & qu'ainsi fut edifiée ceste belle, grande & triumpante cité, laquelle fut appellée du nom du roy Artaxata, & dès lors faite le siege capital de tout le royaume d'Armenie. Tigranes doncques estant au vray adverty que Lucullus alloit mettre le siege devant, ne le peut endurer, ains se mit à suyvre les Romains avec toute son armée, tant qu'au quatrieme jour il s'alla camper tout auprès d'eulx, de sorte qu'il n'y avoit que la rivièr

de Harfani^as¹ entre deux , laquelle il falloit que les Romains traversassent necessairement , pour aller devant Artaxata.

LXII. Lucullus doncques après avoir sacrifié aux dieux , s'assurant de la victoire , comme de chose qu'il eust desja tenue entre ses mains , feit passer son armée en ordonnance de bataille , mettant douze cohortes de front , & les autres derriere , de peur que les ennemis qui avoyent en teste grande gendarmerie & bonne , ne les enveloppassent , & devant eulx encore avoyent ilz des archers à cheval Mardiens , & des Hiberniens portans lances , ausquelz Tigranes se fioit plus qu'en nuls autres , comme aux plus belliqueux & meilleurs combatans qu'il eust à sa foulde : si ne feirent ilz pas pourtant grandes armes , car ayans escarmouché un petit seulement contre la chevalerie Romaine , ilz n'ozèrent attendre les legionaires qui venoyent derriere , ains s'escarterent en fuyant les uns d'un costé & les autres d'un autre , & attirerent après eulx les gens de cheval Romains , qui se meirent à les poursuivre. Mais adonc les hommes d'armes qui estoient à l'entour de la personne de Tigranes , voyans la chevalerie Romaine ainsi escartée , commencerent à marcher contre les gens de pied , parquoy Lucullus voyant le grand nombre qu'il

¹ Artani^as qui se jette dans l'Euphrate.

y en avoit, & comment ilz estoient bien armez & bien equippez, eut peur, & envoya rappeler ses gens de cheval qui chaffoyent, & ce pendant luy mesme marcha le premier à l'encontre des seigneurs &¹ satrapes, qui se trouvoient en front devant luy, avec tous les plus gens de bien de leur ost, ausquelz il donna un tel effroy, que devant qu'il les peust joindre à coups de main, ilz se tournerent tous en fuite. Il y avoit trois roys en bataille l'un auprès de l'autre : mais celui des trois qui fouit le plus honteusement & le plus lachement, fut Mithridates le roy de Pont, lequel n'eut pas le cueur d'endurer seulement les cris & clameurs des Romains. Si fut la chasse longue : car elle dura toute la nuit, jusques à ce que les Romains furent las de tuer, de prendre prisonniers, & de serrer toute sorte de butin : & dit Titus Livius, qu'il fut bien tué plus d'hommes en la premiere bataille, mais qu'en ceste seconde, il mourut de plus grands personnages, & furent pris les principaux des ennemis.

LXIII. Depuis ceste bataille, Lucullus élevé en courage, & ne craignant plus rien, se delibera de tirer plus avant en pais, pour achever de ruiner & destruire de tout ce roy barbare : mais en la saison de l'Æquinocce Autumnal qui estoit

¹ Autres lisent en cest endroit, contre les Atropateniens, qui sont peuples de la Médie. Amyot.

lors ;

lors, il feit un si aspre temps (ce qu'il n'eust jamais cuidé) & tumba tant de froidures, que le plus du temps il negeoir, & si le ciel se descouvroit, il geloit & estraignoit si rudement, que les chevaux ne pouvoyent boire de l'eau des rivières; tant elle estoit excessivement froide & gelée, & ne les pouvoyent passer à guay, poutce que quand ilz cuidoyent traverser par dessus la glace, elle se rompoit & trenchoit les nerfs de leurs pieds; tant elle estoit forte & dure: davantage le pais estant tout plein d'arbres, de bois & de forests; & les chemins estroicts, ilz ne pouvoyent aller par les champs qu'ilz ne fussent incontinent tous trempés de la nege qui en tumboit sur eulx: & quand ilz arrivoyent au logis, c'estoit encore pis, pource qu'il falloit qu'ilz couchassent en lieux molz & humides. A l'occasion dequoy les soudards n'eurent pas suyvy beaucoup de jours après la bataille, qu'ilz refuserent de passer oultré: si envoyerent ptemierement leurs coulonnez & capitaines, le prier de se deporter de ceste entreprife, & puis s'amasserent par troupes plus audacieusement, & commencerent à murmurer & crier la nuit dedans leurs rentes, qui est un certain signe d'une armée mutinée, & qui a envie de se rebeller contre son chef, combien que Lucullus feist tout son pouvoir de les prier bien instamment, qu'ilz voulussent avoir un peu de

patience & supporter encore ce travail , à tout le moins jusques à ce qu'ilz eussent pris la ville de Carthage en Armenie , à fin qu'ilz peussent ruiner l'ouvrage & la memoire du plus grand ennemy que les Romains eurent onques au monde, entendant de Hannibal.

LXIV. Mais quand il veit que pour tout cela ilz n'en vouloyent rien faire, il les ramena en arriere , & repassa le mont de Taurus par autres passages : puis descendit en la province qui s'appelle Mygdonie, terre fertile & chaulde, où il y a une grosse ville & fort peuplée, que les habitans du païs appellent Nysibis ², & les Grecs Antioche de Mygdonie. Il y avoit dedans, pour l'autorité, Gouras, qui estoit propre frere de Tigranes : mais pour l'experience des engins de batterie, & suffisance en telz affaires, celuy Callimachus, qui paravant avoit donné tant de peine à Lucullus au siege de la ville d'Amisus. Lucullus alla planter son camp devant, & la fait assaillir par tous les moyens que lon peult forcer une ville, si vivement, qu'en peu de temps elle fut prise d'assault : & quant à Gouras, qui se rendit à la mercy de Lucullus, il fut traité gracieusement : mais quant à Callimachus, il ne le voulut point ouir, encore qu'il promeist, si on

² Dans la partie septentrionale de la Mésopotamie près du Tigre.

luy vouloit sauver la vie, qu'il reveleroit des cachettes où il y avoit de grands trefors, que personne ne sçavoit que luy, ains commanda que lon le menast après luy les fers aux pieds, pour luy faire recevoir la punition qu'il meritoit, de ce qu'il avoit mis le feu en la ville d'Amisus, & luy avoit osté le moyen de monstrier aux Grecs sa bonté, son affection & liberalité envers eulx.

LXV. Jusques icy l'on pourroit véritablement dire, que la fortune suyvit & accompagna Lucullus en toutes ses entreprises, & en tous ses affaires: mais d'icy en avant, il semble que le bon vent de la faveur de fortune luy faillit tout court, tant il feir toutes choses à grande peine, & tant toutes choses luy succederent au rebours & mal à propos. Il est vray qu'il montra bien tousjours la vertu, la patience & grandeur de courage que doibt avoir un bon & vaillant chef d'armée: mais ses exploits & ses faicts n'eurent onques puis celle grace de facilité, ny celle splendeur de gloire qu'ilz souloyent avoir auparavant, ains au contraire fut bien près de perdre celle qu'il avoit par le passé acquise, pour les adversitez qui luy advindrent, & pour les querelles & differents qu'il eut sans propos avec ses gens. Et le pis est encore, que de tous ces malheurs on luy en attribua la principale coulpe à luy mesme, pour autant qu'il ne sceut ou ne voulut pas s'entre-

tenir en la bonne grace de la multitude des soudards, estimant que tout ce que fait un capitaine, ou autre personne constituée en dignité, pour complaire à ceulx qui sont soubz sa charge, soit se faire deshonneur à soy mesme, & donner occasion aux subjects de mespriser son autorité: & ce qui plus encore luy porta de nuisance, fut qu'il ne portoit pas tel respect qu'il devoit aux hommes de qualité, & qui en noblesse estoient egaulx à luy, ains les avoit en mespris, & ne les estimoit rien à comparaison de luy: car on dit qu'il avoit ces vices & imperfections là, estant au demourant doué de toutes les vertus, dons de nature & bonnes conditions que lon sçauroit desirer: car il estoit beau personnage & de belle taille, bien parlant, sage & advisé autant en affaires de gouvernement, comme en faict de guerre, & autant pour prescher un peuple en la ville, comme des soudards en un camp.

LXVI. Salustius escrit, que dès l'entrée de ceste guerre les soudards commencerent à se mescontenter de luy, pour autant qu'il leur feit passer deux hyvers tout de reng en campagne, l'un devant la ville de Cyzicus, & l'autre devant celle d'Amisus: autant les fascherent & irritèrent encore les autres hyvers ensuyvans: car où ilz les passerent en terre d'ennemis, ou encore que ce fust en pais d'alliez & amis, il les feit neant.

moins camper soubz les tentes en campagne : car jamais Lucullus n'entra une seule fois avec armée dedans ville Grecque ny confederée. Or si les soudards estoient d'eulx mesmes mal affectionnez envers Lucullus, les harengueurs de Rome qui estoient ses ennemis, & qui portoyent envie à sa prosperité & à sa gloire, leur donnoient encore bien plus grandes occasions de se mutiner à l'encontre de luy, par ce qu'ilz le chargeoyent ordinairement en leurs harengues envers le peuple, qu'il tiroit en longueur & faisoit durer ceste guerte, expressement à fin qu'il eust tousjours moyen de dominer, & tousjours matiere d'amasser, tenant ensemble presque toute la Cilicie, l'Asie, Bithynie, Paphlagonie, Galatie, le royaume de Pont, l'Armenie & toutes les provinces qui sont jusques au fleuve de Phasis¹ : encore avoit il de nagueres pillé les royales maisons de Tigranes, comme si on l'eust envoyé là pour saccager & despouiller seulement, non pas pour desfaire & dompter ces roys là. Et dit on que ce fut l'un des prateurs, Lucius Quintius, qui usa de ces termes là. Aussi fut ce celuy qui plus emeut le peuple à decerner que Lucullus seroit revoqué de sa charge, & qu'on luy envoyeroit des successeurs aux gouvernemens des provinces qu'il tenoit. Par mesme moyen fut aussi ordonné que

¹ Fleuve de la Colchide qui se jette dans le Pont-Euxin.

plusieurs qui estoient soubz sa charge, seroyent dispensés de leurs sermens, & auroyent congé de s'en revenir de la guerre quand bon leur sembleroit.

LXVII. Mais oultre toutes ces telles & si grandes difficultez, encore y avoit il une autre plus dangereuse peste, & qui gastoit plus les affaires de Lucullus que tous les autres maux ensemble, c'estoit Publius Clodius homme insolent, oultrageux & plein de toute temerité. Il estoit frere de la femme que Lucullus avoit espousée, laquelle estoit si deshontée & si abandonnée à son plaisir, que lon chargeoit son propre frere de l'entretenir. Ce Clodius estant lors au camp de Lucullus, n'y tenoit pas le lieu, ne n'y avoit pas l'honneur qu'il pensoit bien meriter: car il s'estimoit digne, & vouloit y estre le premier: & au contraire, il y en avoit beaucoup devant luy, pource qu'il estoit homme ainsi vicieux & si mal conditionné. A l'occasion dequoy il commença par despit à suborner & pratiquer les bendes que lon appelloit Fimbrianes, & à les irriter à l'encontre de Lucullus, semant de doulces & gracieuses paroles entre les soudards, qui vouloyent & avoyent bien accoustumé d'estre flattez: car c'estoyent ceulx que Fimbria avoit induits à tuer le consul Flaccus, & à l'essire pour leur capitaine au lieu de luy, au moyen dequoy

ilz prestoyent volontiers l'oreille aux propos de Clodius, & l'appelloyent gentil capitaine & amateur des souldards, pource qu'en parlant à eulx il faisoit semblant d'avoir compassion d'eulx, « Si » jamais ilz ne feroient à bout de tant de travaux & de tant de guerres, ains useroient » miserablement leurs jours à guerroyer continuellement, tantost une nation, & tantost une » autre, & à aller vagabonds par tous les climats » du monde, sans recevoir aucun digne loyet » d'une si laborieuse & si longue guerre, servans » seulement de garde aux chariots & chameaux » de Lucullus chargez de vaisselle d'or & d'argent » & de pierres precieuses : là où les compagnons » de guerre qui avoyent esté sous la charge de » Pompeius estoient desja de repos en leurs maisons avec leurs femmes & leurs enfans, & » possedoyent de bonnes terres, estant habitez » en de belles villes comme gros & riches bourgeois, & si n'avoyent point chassé Mithridates » & Tigranes hors de leurs royaumes en des » deserts inhabitables & n'avoyent point destruit » & ruiné les royales maisons de l'Asie, ains » avoyent seulement fait un peu de guerre en » Hespagne contre des bannis, & en Italie contre » des serfs fugitifs. Voulons nous doncques, » disoit il, avoir toute nostre vie le harnois sur » le dos? ne vault il pas mieulx que nous refer-

« vions nous autres, qui sommes eschappez jus-
« ques icy, noz corps & noz vies à ce gentil
« capitaine là, qui estime que la plus grande
« gloire qu'il scauroit acquerir, soit, enrichir
« ceux qui vont à la guerre soubz luy » ?

LXVIII. Par telles mutines & seditieuses calum-
nies fut l'armée de Lucullus tellement desbauchée,
que les soudards ne le voulurent plus suyvre, ny
contre Tigranes, ny contre Mithridates, lequel
s'allà incontinent jetter de l'Armenie en son
royaume de Pont, & commença à le recon-
querir, ce pendant que les soudards Romains
mutinez à l'encontre de leur capitaine, estoient
de sejour à ne rien faire en la province Gordienne,
prenans leur excuse sur l'hyver, & s'attendans
que Pompeius ou autre capitaine viendrait bien
tost lever le siege, & succeder à Lucullus : route-
fois quand ilz quirent les nouvelles que Mithri-
dates avoit ja desfait Fabius l'un des lieutenans
de Lucullus, & qu'il s'en alloit contre Sornatius
& contre Triarius, ilz en eurent honte, & se
laisserent mener à Lucullus : mais Triarius, par
une vaine gloire, quand il sentit que Lucullus
approchoit, se hastia de vouloir ravir la victoire,
comme si c'eust esté chose toute assurée, devant
que Lucullus arrivast, & fut luy mesme vaincu
en une grosse bataille, où lon dit qu'il mourut
plus de sept mille hommes Romains, entre les-

quelz y avoit cent cinquante centeniers, & de capitaines de mille hommes vingt & quatre, & si prit Mithridates leur camp d'avantage.

LXIX. Peu de jours après la desfaitte y arriva Lucullus, qui cacha Triarius, que les soudards demandoient à toute force en courroux pour le faire mourir : si essaya Lucullus à son arrivée d'attirer Mithridates à la bataille ; mais Mithridates n'en vouloit point, pour autant qu'il attendoit Tigranes, lequel descendoit avec une grosse puissance. Parquoy il se resolut d'aller une autre fois au devant de Tigranes, pour le combattre premier qu'ilz joignissent leur forces ensemble : mais comme il se fust mis en chemin, les bendes Fimbrianes luy firent encore une nouvelle sedition, & ne voulurent point suivre les enseignes, disans & alleguans que par decret du peuple ilz avoyent congé, & qu'ilz estoient quittes de leur serment : comment que ce fust, que ce n'estoit plus à Lucullus à leur commander, attendu que le gouvernement des provinces qu'il tenoit, estoit ja baillé à d'autres. Ce que voyant Lucullus s'abaisa si fort envers eux, pour les cuider feschir, qu'il n'est sorte d'indignité à laquelle il ne se soubmeist, jusques à les aller prier & supplier dedans leurs tentes les uns après les autres, les larmes aux yeux, en la plus grande humilité qui luy estoit possible, voire jusques

à toucher ès mains de quelques uns : mais eulx reboutoyent fierement toutes ses caresses , & prieres , jettans devant luy leurs bourses vuides , & luy difans felonement qu'il allast combattre luy tout seul les ennemis , puis qu'il avoit sceu si bien s'enrichir tout seul de leurs despouilles : toutefois par l'intercession & la requeste des autres soudards , ces Fimbrians furent contraincts de promettre qu'ilz demoureroyent encore l'esté , par tel si , que si durant ce temps il ne venoit personne leur presenter la bataille , au bout du terme prefix ilz s'en pourroyent aller là où bon leur sembleroit.

LXX. Il estoit force que Lucullus acceptast ceste condition , ou bien qu'il demourast tout seul , & consequemment qu'il abandonnast le pais aux Barbares : ainsi les reteint il ensemble , mais ce fut sans plus ozer essayer de les contraindre ny de les mener à la bataille , se contentant bien qu'ilz voulussent seulement arrester , estant contrainct d'endurer que Tigranes ce pendant courust & pillast la Cappadocie , & que Mithridates de rechef bravast , lequel il avoit escrit paravant au senat avoir esté par luy entierement destruict , tellement qu'il venoit des commissaires & deputez de Rome à sa sollicitation , pour ordonner avec luy des affaires du royaume de Pont , comme d'une province

toute asseurement acquise à l'empire Romain : & quand ilz furent arrivez sur les lieulx , ilz trouverent qu'il n'estoit pas maistre de soymesme , & que ses propres souldards luy faisoient toutes les mocqueries , insolences & injures que lon scauroit dire : car ilz furent si dissolus envers leur capitaine , & l'eurent en si grand mespris , que quand la fin de l'esté fut venue , ilz s'armerent de leurs armes , & desgainnans leurs espées par derision , appellerent au combat les ennemis qui n'estoyent plus en campagne , ains s'estoyent desja retirez : & après avoir jetté les cris qu'ilz ont accoustumé de crier au choc d'une bataille , & fait semblant de combattre , en demenant leurs espées parmy l'air vague , ilz s'en allerent du camp , protestans que le temps estoit expiré qu'ilz avoyent promis à Lucullus de demourer.

LXXI. D'autre costé Pompeius escrivoit aux autres souldards qui estoyent encore au camp , qu'ilz eussent à s'en venir devers luy : car il estoit desja subrogé capitaine au lieu de Lucullus , pour faire la guerre aux roys Mithridates & Tigranes , par la faveur du peuple , & par les menées & flatteries des harengueurs de Rome. Ce qui despleut fort au senat & à tous les gens de bien & d'honneur : pource qu'il leur sembloit que lon faisoit grand tort à Lucullus de luy en-

voyer un successeur, non des travaux & dangers de la guerre, mais de l'honneur & de la gloire du triumphe, & de le contraindre de ceder & quitter à un autre, non tant la charge de capitaine, que le prix & loyer d'honneur qui luy appartenoit pour les services faits en icelle : mais encore sembla cela plus inique & plus indigne à ceulx qui estoient sur les lieux : pource que tout incontinent que Pompeius fut arrivé en Asie, il luy osta toute puissance de punir ou remunerer personne quelconque, pour bons ou mauvais offices que lon eust fait en ceste guerre à la chose publique; & defendit par affiches attachées es lieux publiques, que lon n'allast plus devers luy, & que lon n'obeist point à chose que luy ne les dix commissaires envoyez pour disposer de l'estat des provinces par luy conquises, manderoyent ou ordonneroyent : & si luy estoit Pompeius redoutable : pource qu'il venoit avec une trop plus grosse & plus puissante armée que la siene : tourefois leurs amis furent d'avis qu'ilz s'entreveissent, & s'assemblerent de faict en un bourg de la Galatie, là où d'arrivée ilz s'entrevaluerent amiablement, & s'esjouirent l'un avec l'autre des beaux faicts & glorieuses victoires qu'ilz avoyent tous deux gaignées.

LXXII. Lucullus estoit le plus aagé, mais Pompeius avoit plus de dignité, pource qu'il

avoit esté capitaine general du peuple Romain en plusieurs guerres, & qu'il avoit desja triomphé par deux fois. Les faisceaux de verges que portoyent les sergens devant eulx, estoient entortillez de branches de laurier, pour les victoires qu'ilz avoyent gaignées : mais celles des sergens de Pompeius estoient toutes seiches, pour autant qu'ilz avoyent fait un long chemin par pais secs & arides. Ce que voyans ceulx de Lucullus, leur en donnerent courtoisement des leurs qui estoient toutes vertes & cueillies de frais : ce que les amis de Pompeius prirent à bon signe & heureux presage : car aussi, à dire la verité, les choses que feit Lucullus en sa charge, furent cause de l'honneur que Pompeius acquit depuis en la siene : routefois à la fin ilz ne furent de rien meilleurs amis pour avoir parlé ensemble, ains se partirent l'un d'avec l'autre, encore plus alienez qu'ilz n'estoyent auparavant. Car Pompeius par un edict cassa & annulla toutes les ordonnances de Lucullus, & luy emmenant tous ses autres gens de guerre, ne luy en laissa que seize cents seulement pour accompagner son triumphe, encore ne le suivoient ilz gueres voluntiers : tant estoit Lucullus ou par nature, ou par fortune defectueux en ce qui est le principal en un grand capitaine, c'est de se faire aimer à ses gens : mais s'il eust eu ceste perfection avec tant d'autres excellentes

vertus qu'il avoit , comme la magnanimité, prudence , grand sens , diligence & justice, le fleuve d'Euphrates n'eust point esté la dernière borne de l'empire Romain du costé de l'Asie , ains se fust estendu jusques à la mer d'Hyrcanie ¹ , voire jusques au bout du monde , pourautant que Tigranes avoit desja vaincu les autres nations qui sont au delà , exceptée celle des Parthes laquelle n'estoit pas pour lors si puissante comme elle se monstra depuis du temps de Crassus , ne si bien unie , ains estoit si foible , tant pour les dissensions qu'ilz avoyent au dedans entre eulx , que pour les autres guerres de leurs voisins qui les travailloyent au dehors , qu'ilz ne pouvoyent pas seulement résister aux Armeniens qui les haras-foient.

LXXIII. Mais à bien prendre les choses , ainsi comme elles sont , il m'est advis que Lucullus porta plus de dommage à son païs par des autres , qu'il ne luy feit de profit par soy-mesme : pource que les trophées & victoires qu'il gagna en Arménie si près des Parthes , la ville de Tigranocerta , celle de Nyfibis , qu'il avoit saccagées , & les richesses grandes qui en furent apportées à Rome , le diademe aussi de Tigranes , qui fut mené en triumphe comme captif , incita Crassus

¹ Ou mer Caspienne. Les Caspiens & les Hyrcaniens habitoient à son midi ; ceux-là vers le couchant , ceux-ci vers l'orient.

à vouloir passer en Asie, comme si tous les Barbares ne fussent autre chose que despoilles toutes certaines, & proye exposée à qui premier les vouloit aller prendre : mais au contraire, se trouvant à son arrivée enfoncé & accablé des fiesches des Parthes, il servit de tesmoignage pour prouver que Lucullus n'avoit pas tant vaincu par faulte de sens, ou lascheté de cuer de ses ennemis, que par sa propre hardiesse & son bon entendement : mais cela se verra cy après.

LXXIV. Au demourant Lucullus estant retourné à Rome, y trouva premierement son frere Marcus accusé par un Gaius Memmius de ce qu'il avoit administré en l'office de quæsteur du temps & par le commandement de Sylla, dont il fut par sentence des juges absous à pur & à plein : mais Memmius en ayant despit tourna son courroux encontre luy mesme, irritant le peuple, & luy donnant à entendre que Lucullus avoit retenu & desrobbé beaucoup de richesses qui devoient venir à la chose publique, & que pour mieulx faire ses besongnes, il avoit tiré ceste guerre en longueur : au moyen dequoy il leur suadoit de luy refuser tout à plat l'honneur du triumphe : & fut Lucullus en grand danger d'en estre frustré totalement : mais les plus gens de bien de la ville, & qui avoyent le plus d'autorité, se meslerent parmi les lignées quand

ce vint à le faire passer par les voix du peuple, & feirent tant par leurs prieres, & par leur instance & pourfuite, qu'à la fin, à toute peine, le peuple luy permet d'entrer en la ville en triumphe.

LXXV. Si feit Lucullus une entrée triumpnale, laquelle ne fut point terrible ny ennuyeuse pour la longue fuite de la monstre, ny pour la multitude des choses qui y fussent portées, comme quelques autres capitaines avoyent fait : car il feit orner & parer le parc des lices, que lon appelle à Rome Circus Flaminius, des armes des ennemis, qui estoient en fort grand nombre, & des machines & engins de baterie du roy, qui fut chose plaissante à voir, & en la monstre y eut quelque nombre de ses hommes d'armes armez à hault appareil, & dix chariots de guerre armez de faulx, qui passerent, & soixante des principaux amis & capitaines des deux roys, qui furent menez par la ville prisonniers : & y furent aussi trainnées cent & dix galeres toutes armées par les proues de forts esperons d'airain, & une statue de Mithridates toute d'or de six piedz de hault, avec un riche pavois convert de pierres precieuses : oultre tout cela y avoit vingt taudis tout chargez & pleins de vaisselle d'argent, & trente & deux autres chargez aussi de vases & de harnois d'or : & d'or

d'or monnoyé aussi, que des hommes portoyent : après lesquels suyvoyent huit mulers portans des lits d'or, & cinquante & six autres qui portoyent l'argent fondu en masse, & cent & sept qui portoyent l'argent monnoyé, lequel pouvoit monter à la somme de ¹deux millions sept cents mille drachmes : & se porroyent davantage des registres où estoit escripte par articles la somme d'argent qu'il avoit paravant delivrée à Pompeius, pour la guerre contre les coursaïres, & aux questeurs & tresoriers generaux ; pour mettre aux coffres de l'espargne de la chose publique : & puis en un article à part, qu'il avoit baillé ²neuf cents cinquante drachmes à chasque homme de guerre pour teste.

LXXVI. Après la monstre de ce triumphe finie, il feit un festin general, auquel il festoya toute la ville, & les villages d'alenviron que les Romains appellent Vicos. Et depuis il repudia sa femme Clodia pour son impudicité & son mauvais gouvernement, & espousa Servilia sœur de Caton : mais il ne gaigna gueres au change, & ne rencontra pas mieux en ce second mariage qu'au premier : car excepté qu'elle n'avoit point

¹ Deux cents soixante & dix mille escus. Amyot. 2,100,937 livres 10 s. de notre monnoie.

² Quatre vingts quinze escus, Amyot. 736 liv. 14 s. 4 den. de notre monnoie.

le mauvais bruit d'avoir esté pollue & incestée par ses propres freres, elle estoit au demourant aussi deshoneste, impudique & dissoluë comme la premiere : & toutefois il se contraignit à l'endurer pour quelque temps, à cause de la reverence qu'il portoit à son frere : mais à la fin il s'en lassa, & la repudia comme l'autre.

LXXVII. Au reste ayant donné merveilleuse esperance de foy au senat, lequel pensoit bien avoir recouvré en luy un personnage pour servir de contrepoids, & faire teste à la tyrannie de Pompeius, & pour defendre à l'encontre du peuple l'autorité de la noblesse & du senat, attendu qu'il avoit acquis par ses haults faicts grande autorité & grande reputation, on fut tout esbahy qu'il delaisa & quitta soudainement toute entremise du gouvernement des affaires de la chose publique, soit ou pource qu'il veist qu'elle avoit desja pris coup, & qu'il estoit trop mal aisé de la retenir qu'elle n'allast en precipice : ou bien, comme disent les autres, pour autant que se voyant comblé d'honneur, il delibera de se reposer desormais, & de mener la plus doulee & la plus aisée vie qu'il pourroit, après avoir passé tant de peines & de travaux, dont la fin n'avoir esté gueres heureuse. En quoy les uns sont bien de son opinion, & approuvent ceste grande mutation en ce qu'il ne fait pas comme Marius,

aussi ne luy en prit il pas comme à luy : car Marius après les belles victoires qu'il avoit rapportées des Cimbres, & tant de beaux & haults faicts d'armes qu'il avoit à son grand honneur executez, ne se voulut pas retirer, &, par maniere de dire, consacrer comme admirable pour une si grande gloire : mais par une insatiable cupidité de gloire & effrenée convoitise de dominer, il s'alla attacher sur son vieil aage à de jeunes hommes en brouillis de gouvernement, qui le jetterent à faire des violences estranges, & luy en firent souffrir encore de plus inhumaines. Aussi eust Ciceron (ce disent ilz) vieilly plus heureusement, si après avoir esteinct la conjuration de Catilina, il se fust retiré en repos : & semblablement Scipion, si ayant adjousté la prise de la ville de Numance à celle de Carthage, il se fust voulu reposer : pour autant, disent ilz, qu'il y a une certaine revolution & prefixion de temps, oultre lequel l'homme sage ne se doit plus entremettre des affaires de la chose publique, ne plus ne moins, que passée la fleur de l'aage & la vigueur du corps, l'homme n'est plus idoine à la joustte, ny à la lucte & autres telz exercices de la personne.

LXXVIII. Mais au contraire Crassus & Pompeius se mocquoient de Lucullus, de ce qu'il se laissoit ainsi aller aux delices & à la volupré,

comme si le vivre voluptueusement & délicieusement ne fust pas plus mal seant à ceulx de son aage, que le commander à une armée, ou le gouverner les affaires d'une chose publique. Et quant à moy, en lisant la vie de Lucullus il m'est proprement advis que je lis quelque ancienne comedie, de laquelle le commencement est laborieux, & la fin joyeuse : car aussi y trouvez vous à l'entrée de beaux faicts d'armes en guerre & de gouvernement en paix : mais à l'issue, ce ne sont que festins, banquets, & peu s'en fault qu'il n'y ait mesme des mommeries, des danses aux torches, & tous autres telz jeux que font les jeunes gens : car je mets en ligne de compte de delices ses edifices sumptueux, ses belles allées à se promener, ses estuves, & encore plus, ses tableaux & peintures, & ses statues, & la curiosité grande qu'il avoit de telz arts, & de telz ouvrages qu'il amassoit de tous costez à gros frais & grands despens, abusant excessivement à cela de la richesse plantureuse & ample qu'il avoit acquise es charges & guerres qu'il avoit maniées : tellement qu'aujourd'hui que la superfluité a pris depuis si grand accroissement, encore compte lon les jardins que fait faire Lucullus entre les plus sumptueux & plus délicieux qu'ayent les empereurs. Et pourtant Tubero le philosophe stoïque ayant veu les superbes ouvrages qu'il faisoit faire au-

près de Naples le long de la marine, là où il y avoit des montagnes percées à jour, & suspendues à voultres, & de grands fossez cavez à force, pour faire passer & courir la mer à l'entour de ses maisons, & y nourrir du poisson, & des logis qu'il faisoit fonder & bastir dedans la mer mesme, il l'appella Xerxem Togatum¹, comme s'il eust voulu dire, le Xerxes Romain : pource que jadis Xerxes fait ainsi fendre le mont d'Atho, & y caver un canal pour passer ses navires.

LXXIX. Il avoit bien aussi d'autres lieux de plaissance dedans le territoire de Rome auprès de Tusculum, où il y avoit de grandes salles & galeries ouvertes à jour de tous costez, dont on pouvoit voir au loing tout à l'environ. Pompeius y estant allé quelquefois le voir, le reprit, disant qu'il avoit bien devisé & accoustré son logis pour l'esté, mais que pour l'hyver il estoit inhabitable. Lucullus s'en prit à rire, & luy respondit, « Estimes tu donques que j'aye moins » de sens & d'entendement, que n'ont les cigognes & les grues, & que je ne sache bien selon » les saisons, changer de demourance & de maisons » ? Une autre fois il y eut quelque prêteur Romain, lequel faisant faire des jeux pour donner passetemps au peuple, luy demanda à prester des

¹ La robe étoit la robe des Romains.

manteaux de pourpre pour accoustrer les joueurs. Lucullus luy respondit qu'il feroit regarder s'il en avoit, & qu'il les luy presteroit : puis le lendemain luy demanda de combien il en avoit affaire, & l'autre luy respondit qu'il en auroit assez de cent. Lucullus adonc luy repliqua, qu'il luy en fourniroit de ¹ deux cents s'il en avoit affaire. Et pourtant le poëte Horace faisant ce compte y adjouste une belle exclamation contre la superfluité, disant que lon estime la maison petite & non riche, là où il n'y a des meubles beaucoup plus qu'il n'en fault, & là où ce qui est caché, & que le maître ne sçait pas, n'est plus que ce qui est en evidence.

LXXX. Il y avoit aussi de la vanité en sa despenſe de table ordinaire, non seulement en ce que les liëts ès quelz on mangeoit, estoient couverts de riches couvertures de pourpre, & qu'il estoit servy en vaisselle d'or & d'argent enrichis de pierres precieuses, & qu'il y avoit ordinairement quelques danses, musiques, fatces, ou autres telz passetemps, mais aussi en ce que lon servoit tousjours de toutes sortes de viandes exquisement accoustrées, & d'ouvrages de four, confitures & issues de table curieusement labourees & apprestées, par où il se rendoit admirable à gens de petit entendement & de basse condi-

¹ Horace dit cinq mille. *Amyot. Epist. L. I, ep. 6, v. 43.*

tion seulement. Pourtant fut Pompeius bien estimé d'une parole qu'il dit un jour qu'il estoit malade, & que le medecin luy avoit ordonné qu'il mangeast d'une grive : car comme ses serviteurs luy dissent qu'il seroit malaisé d'en recouvrer, lors qu'il estoit la saison de l'esté, sinon chez Lucullus, là où lon en nourrissoit tout le long de l'an, il ne voulut pas que lon en allast demander, ains dit à son medecin, « Comment, si doncques Lucullus n'estoit voluptueux, Pompeius ne sçauroit il vivre » ? & commanda que lon luy apprestast quelque autre chose de celles que lon recouvroit facilement.

LXXXI. Caton estoit son amy & son allié, toutefois il haïssoit si fort sa maniere de vivre & sa despense ordinaire, que comme un jour quelque jeune homme en plein senat prononceast une longue & ennuyeuse harengue, hors de saison & de propos, rouchant la simplicité du vivre, la sobrieté & temperance, Caton ne le pouvant plus endurer, se leva en pieds & luy dit, « Ne cesseras tu d'aujourd'hui de nous prescher, toy qui es riche comme un Crassus, qui vis comme un Lucullus, & parles comme un Caton ? Les autres advouent bien que cela fut ainsi dit, mais que ce ne fut pas Caton qui le dit : toutefois il est tout evident par les dicts memorables que lon a recueillis de Lucullus, que non seulement

il prenoit plaisir à ceste maniere de vivre opul-
 lentement, mais encore qu'il en faisoit gloire.
 Car à ce propos on racompte, qu'il festoya par
 plusieurs jours en sa maison quelques person-
 nages Grecs, qui estoient venus de la Grece à
 Rome, & qu'eulx comme hommes nourriz à
 la sobriété & simplicité grecque, après y avoir
 esté quelques fois, eurent honte, & refuse-
 rent d'y aller plus, quand depuis on les en alla
 semondre, ctuidans que ce fust pour l'amour d'eulx,
 que ceste grande despense se feist. Dequoy Lu-
 cullus estant adverty, leur dit, « Ne laissez pas,
 » seigneurs, de me venir voir pour cela : car il est
 » bien vrai qu'il se fait quelque chose d'avantage
 » que mon ordinaire pour l'honneur de vous :
 » mais je veux bien que vous sachez que la plus
 » part s'en fait pour l'amour de Lucullus. Une
 autre fois qu'il souppoit tout seul, ses gens n'a-
 voyent appresté qu'une table & moyennement à
 soupper, il s'en courroucea, & feit appeller celuy
 de ses serviteurs qui avoit charge de cela, le-
 quel luy dit, « Pourautant, seigneur, que tu
 » n'as envoyé semondre personne, j'ay pensé qu'il
 » ne falloit ja faire grand appareil pour le soup-
 » per : comment, luy repliqua il, ne sçavois tu
 » pas que Lucullus devoit aujourdhuy soupper
 » chez Lucullus » ?

LXXXII. Brief, c'estoit chose si cogneue de-

dans la ville de Rome, que lon ne parloit que de la sumptuosité & magnificence de la maison de Lucullus. Au moyen dequoy Ciceron & Pompeius le voulans esprouver, s'adresserent un jour à luy sur la place, le voyans de loisir : car l'un estoit bien de ses plus grands & plus familiers amis : & l'autre, encore qu'ilz eussent eu quelque different ensemble pour les affaires de leurs guerres, ne laissoit pas neantmoins de le hanter, & parler amiablement l'un à l'autre. Ciceron donques après l'avoir salué, luy demanda s'il feroit content que lon l'allast voir. « Le plus » du monde, respondit il, & vous prie bien » fort d'y venir ». « Nous voulons donques, dit » adonc Ciceron, Pompeius & moy soupper au- » jourdhuy avec toy, sous condition que tu » ne feras rien apprestre pour nous, oultre ton » ordinaire ». Lucullus leur respondit qu'ilz feroient trop mal traittez, & qu'il valoit mieulx attendre au lendemain. Ce qu'ilz ne voulurent point faire, ny seulement luy permettre qu'il parlât à ses serviteurs, de peur qu'il ne leur commandât d'apprestre quelque chose davantage que pour luy seul : toutefois à sa requeste, ilz luy permeirent de dire seulement tout hault en leur presence à l'un de ses serviteurs, qu'il soupperoit ce soir là en Apollo : car ainsi s'appelloit l'une des plus sumptueuses

& plus magnifiques salles de son logis : & les trompa finement par ce seul mot là , sans qu'ilz s'en advisassent , pource que chacune salle avoit un taux prefix & certain de la despenſe qui s'y devoit faire à chaque fois que lon y souppoit , ſes meubles propres & toute l'ordonnance du ſervice, de ſorte que quand ſes ſerviteurs avoyent entendu en quelle ſalle il vouloit ſoupper , ilz ſçavoyent auſſi toſt combien il falloit deſpendre à ce ſoupper , & quel ordre il y falloit tenir. Or avoit il accouſtumé de deſpendre quand le feſtin ſe faiſoit en ceſte ſalle d'Apollo cinquante mille ¹ drachmes d'argent , & y fut ce jour là le ſoupper appreſté à ce prix , tellement que Pompeius ſ'eſmerveilla grandement comme il eſtoit poſſible qu'un ſoupper de ſi exceſſive deſpenſe euſt eſté ſi promptement & ſi ſoudainement appareillé.

LXXXIII. En telles choſes donques uſoit Lucullus diſſoluément & oultrageuſement de ſa ri cheſſe , comme d'un inſtrument véritablement ſerf & barbare. Mais auſſi eſtoit ce une honeſte & louable deſpenſe celle qu'il faiſoit à recouvrer & faire accouſtrer des livres : car il en aſſembla une grande quantité , & de fort bien eſcripts , deſquelz l'uſage luy eſtoit encore plus honorable

¹ Cinq mille eſcus. *Amyot.* 38,771 livres 5 ſols de notre monnoie.

que la possession , pource que ses librairies estoient tousjours ouvertes à tous venans, & laissoit on entrer les Grecs sans refuser la porte à pas un , dedans les galeries , portiques & autres lieux propres à disputer , qui sont à l'entour , là où les hommes doctes & studieux se trouvoient ordinairement , & y passoyent bien souvent tout le jour à conferer ensemble , comme en une hostellerie des muses , estans bien aises quand ilz se pouvoient despestrer de leurs autres affaires pour s'y en aller. Luy mesme aussi souventefois se mesloit parmy eulx dedans ces galeries , prenant plaisir de communiquer avec eulx , & si aidoit à ceulx qui avoyent des affaires à les despescher de tout ce qu'ilz luy requeroient. Brief , sa maison estoit une retraite & un recours pour tous ceulx qui venoyent de la Grece à Rome.

LXXXIV. Il aimoit toutes sortes de philosophie , & n'en rejettoit pas une secte : mais il estima tousjours dès son commencement , & eut en plus grande recommandation la secte academique , non celle que lon nomme la nouvelle , combien qu'elle fust lors en grande vogue pour les œuvres de Carneades, que Philo faisoit valoir , mais bien l'ancienne , laquelle avoit lors pour défenseur le philosophe Antiochus natif de la ville d'Ascalon , homme eloquent & disert , que Lu-

cullus met toute peine de gagner, & l'avoir en sa maison pour amy familier, à fin de l'opposer aux auditeurs & adherents de Philon, desquelz estoit Ciceron, qui a composé un très beau livre contre ceste secte de l'ancienne academie, auquel il introduit Lucullus soustenant l'opinion des vieux academiques, qui maintenoyent que l'homme peult certainement sçavoir & comprendre quelque chose, & appelloit cela Catalepsin, & luy soustient le contraire. Le livre est intitulé Lucullus : car ilz estoient, comme nous avons desja dit ailleurs, fort bons & grands amis, & rendoyent à une mesme fin au gouvernement de la chose publique : pource que Lucullus ne s'estoit pas tant retiré des affaires qu'il ne s'en voulust plus mesler aucunement, ny plus en ouir parler, ains seulement ceda & quitta de bonne heure à Marcus Crassus & à Caton, l'ambition & la contention de vouloir estre le premier, & d'avoir le plus d'autorité, comme chose qui n'estoit ne sans danger, ny sans hazard de recevoir de grandes indignitez.

LXXXV. Et ces deux personnages là estoient ceulx dont le senat se couvroit, & qu'il pouloit en avant contre la trop grande puissance de Pompeius, que lon avoit pour suspecte, depuis que Lucullus eut refusé ce premier degré là de credit & d'autorité : mais au demourant il se trou-

voit sur la place aux jugemens & aux assemblées du peuple, pour faire plaisir à ses amis quand ilz l'en requeroient : & alloit aussi au senat quand il estoit question de rompre le coup à quelque menée, & faire recevoir un rebut à quelque ambitieuse pratique de Pompeius : car il renversa toutes les ordonnances & constitutions qu'il avoit faictes, après avoir desconfit les roys, Mithridates & Tigranes, & empescha à l'aide de Caton une distribution & departement de deniers, qu'il avoit escript que lon feist à ses gens de guerre : tellement que Pompeius eut recours à l'amitié, ou pour parler plus rondement, à la conspiration & conjuration de Crassus & de César, avec le support desquelz il emplit toute Rome d'armes & de soudards, & fit par force passer & ratifier au peuple ce qu'il voulut, après avoir chassé violemment Lucullus & Caton de la place.

LXXXVI. Dequoy les gens de bien & d'honneur estans courroucez, & trouvant fort mauvais que lon eust fait un si grand outrage à deux telz personnages, les adherants de Pompeius subornerent un Brutien¹, qu'ilz disoyent avoir esté surpris en aguet, comme il espioit Pompeius poud le tuer. Surquoy ledict Brutien estant interrogé au senat, nomma quelques

¹ Cicero l'appelle Lucius Vellius, mais il peut estre qu'il estoit Brutien de nation. Amyot.

autres , & devant le peuple Lucullus , disant que c'estoit luy qui l'avoit attitré pour occire Pompeius : mais personne ny adjousta foy : car on appercent bien sur le champ que c'estoyent eulx mesmes qui l'avoient aposté & suborné pour accuser faulusement Lucullus & les autres adversaires de Pompeius : ce qui fut encore plus clairement adveré quelques jours après , quand on jetta le corps de ce Brutien mort emmy la rue hors de la prison , qu'ilz disoyent estre mort de luy mesme par maladie : mais les marques toutes evidentes du cordeau , dont ilz l'avoient estranglé , & des coups qu'ilz luy avoyent baillez , monstroyent tout clairement , que c'estoyent eulx mesmes , qui après l'avoir suborné , l'avoient ainsi tué.

LXXXVII. Cela fut cause que Lucullus se retira encore plus des affaires de la chose publique : & quand encore il veit que lon eut chassé si meschamment Ciceron en exil , & que lon trouva moyen d'esloigner Caton , sous couleur de l'envoyer avecques charge en l'isle de Cypre , alors il se lascha du tout. Aucuns escrivent qu'un peu devant sa mort l'entendement luy varia , s'affoiblissant par l'aage petit à petit : mais Cornelius Nepos dit , que ce ne fut point par vieillesse ny par maladie qu'il se tourna , mais par poison que luy donna l'un de ses serfs affranchis , qui

avoit nom Callisthenes , lequel luy bailla , non
 à mauvaise intention , mais à celle fin que son
 maistre l'aimast davantage , pensant que ce
 poison eust force de faire aimer , & il luy
 troubla le sens tellement , que luy encore
 vivant , son frere Marcus , comme son cura-
 teur , eut l'administration de ses biens. Ce
 neantmoins quand il vint à mourir , encore fut
 il autant plaint & regretté de tout le peuple ,
 comme s'il fust mort en la plus grande vogue
 de son credit , & en sa plus grande prospérité :
 car tout le peuple accourut au convoi pour
 honorer ses funeraillles , & fut le corps porté
 sur la place par les plus nobles jeunes hommes
 de la ville , voulant le peuple à toute force l'in-
 humer dedans le champ de Mars , ainsi comme
 ilz y avoyent inhumé Sylla : mais pour autant
 que personne n'y avoit pensé , & que les ap-
 prests des choses y nécessaires n'eussent pas esté
 faciles à faire , son frere supplia le peuple de
 se contenter que ses funeraillles luy fussent
 faittes en une siene terre qu'il avoit près la
 ville de Tusculum , là où sa sepulture luy estoit
 preparée , & ne vescu pas luy mesme gueres
 de temps après. Car tout ainsi que Lucullus en
 aage & en honneurs ne l'avoit gueres laissé
 derriere , aussi ne feir il pas à la mort : & son
 frere qui l'avoit tousjours fort aimé , ne luy
 peut longuement survivre.

LA COMPARAISON

DE LUCULLUS AVEC CIMON.

ET est, à mon advis, l'un des principaux poincts, pour lesquels à bon droit on peult reputer Lucullus bienheureux, d'estre mort au temps qu'il mourut, avant que voir la mutation de la chose publique, que les fatales destinées bastissoient desja par seditions & guerres civiles entre les Romains, & qu'il deceda en son païs estant desja bien en branle de la perdre, mais jouissant toutefois encore de sa liberté : & est aussi l'une des semblances qu'il a plus conformes avec Cimon, lequel mourut, les Grecs estans en la vigueur de leur concorde, & non encore en trouble & en combustion les uns contre les autres : vray est que ce fut en son camp, & en estat de capitaine general de son païs, non pas retiré chez soy comme las ny oiseux en sa maison, ny comme s'estant proposé pour le but & le loyer de ses armes, de ses victoires & de ses triumphes, une vie voluptueuse en banquets & festins, suyvant ce que Platon en se mocquant reprent & blasme sagement en Orpheus, lequel promet à ceulx qui auront bien

bien vescu en ceste vie , pour recompense de leur vertu , une yvresse perpetuelle en l'autre monde. Bien est-ce une très honeste consolation & contentement d'esprit à un personnage affoibly de vieillesse , & que l'aage contrainct de se retirer du maniement des affaires , tant de la paix que de la guerre , que passer son temps doucement en repos & tranquillité à l'estude des lettres , où il y ait delectation conjointe avec honeste contemplation : mais de terminer ses actions vertueuses , & les referer à la volupté comme à leur dernier but , & au surplus vieillir en voluptez & en delices , solennifiant tout le reste de sa vie la feste de Venus , après avoir conduit des guerres , & commandé à des armées , cela ne me semble point digne de l'honeste academie , ny bien seant à un suyvant la doctrine de l'ancien Xenocrates : mais plus tost convenable à un homme penchant & se laissant aller en la discipline d'Epicurus.

II. Si est chose bien esmerveillable en tous deux , que la jeunesse de l'un ait esté reprehensible & vicieuse , & de l'autre , au contraire , honeste & vertueuse : mais meilleur est celuy qui se va changeant en mieulx , & fait plus à louer la nature , en laquelle le vice vieillit & la vertu vient en vigueur , que celle où le contraire se fait. Davantage ilz se sont tous

deux enrichiz par mesmes moyens , mais ilz n'ont pas tous deux usé semblablement de leurs richesses : car il n'y auroit point de propos de vouloir comparer la fabrique de la muraille qui regarde vers le midy dedans le chasteau d'Athenes , laquelle fut bastie de l'argent que Cimon apporta à Athenes , avec les chambres delicieuses , & les logis hault elevez pour voir de loing , & environnez de canaux d'eau tout à l'entour , que Lucullus feit edifier auprès de Naples des despouilles des Barbares ; ny pareillement aussi ne fait à comparer la table de Cimon , qui estoit sobre & simple , mais ouverte à tout le monde , à celle de Lucullus , qui estoit sumptueuse & sentoit son fatrape : pource que celle là à peu de frais nourrissoit tous les jours beaucoup de personnes , & ceste cy estoit excessive en despense pour nourrir peu d'hommes en superfluité de delices. Si ce n'est que l'on vueille dire , que le temps a peu estre cause de ceste diversité : car on ne sçait si Cimon eut eu loisir de se retirer des affaires & des armées en vieillesse paisible , loing de guerres & de toute entremise du gouvernement de la chose publique , eust point mené une vie encore plus sumptueuse & plus dissoluë & abandonnée à toute volupté : pource que de sa nature il aimoit le vin , les festes , les jeux , & si estoit subject aux femmes , comme

nous avons dit : mais les prosperitez & heureux succès des affaires apportent des plaisirs aux hommes ambitieux de nature & nez à manier de grandes choses , qui leur font oublier les appetits des autres voluptez. Et pourtant si Lucullus fust mort en l'aage qu'il manioit les armes , & qu'il commandoit à des armées , il n'y auroit homme , tant fust il curieux ou subtil à rechercher & reprendre les fautes d'autrui , qui peust trouver un tout seul point à blâmer en luy : voilà quant à leur maniere de vivre.

III. Au demourant , quant aux affaires de la guerre , il est certain qu'ilz ont esté l'un & l'autre très excellents capitaines , tant par mer que par terre. Mais comme ès jeux de prix & exercices de la personne , que lon fait par la Grece , ceux qui en un mesme jour gaignent le prix de la lutte & de l'escrime des poings , sont nommez par une estrange coustume , non vaincûeurs , mais victoires¹ , pour plus leur faire d'honneur : aussi me semble il que Cimon ayant en un mesme jour couronné la Grece de deux trophées , pour deux batailles gaignées , l'une par mer , & l'autre par terre , merite d'avoir quelque preference par dessus les autres capitaines. Qui plus est , Lucullus receut de sa chose publique l'autorité de commander qu'il

¹ Voyez les Observations.

eut, & Cimon la donna à la siene. Lucullus trouua son païs ja commandant aux peuples alliez & confederez, à l'aide desquelz il desfeit ses ennemis : & Cimon, au contraire, trouua son païs marchant soubz l'enseigne d'autrui, & se porta de sorte par sa vertu, qu'il le fait presider à ses alliez, & triompher de ses ennemis, contraignant les Perses de luy ceder par force la domination de la mer, & suadant aux Lacedæmoniens de volontairement s'en deporter.

IV. Et si la plus grande partie que sçauroit auoir un excellent capitaine, est se faire tellement aimer de ses souldards, qu'ilz prennent plaisir à luy obeïr, Lucullus fut mesprisé de ses gens, & Cimon fut estimé & admiré des alliez mesmes. Celuy là fut abandonné par ses gens propres : cestuy cy fut suyvy par les estrangers mesmes : car les alliez se joignirent à luy. Celuy là revint en son païs delaisié de ceulx avec qui il en estoit party : cestuy cy retourna commandant à ceulx avec lesquelz il auoit esté envoyé pour obeïr à autrui, & ayant fait tout à un coup trois grandes choses & fort difficiles à faire pour son païs, c'est à sçauoir, paix avec les ennemis, principaulté sur les alliez, & bienveillance avec les Lacedæmoniens. Tous deux entreprirent de ruiner de grands empires, & de conquerir toute l'Asie, & ne peurent ny

L'un ny l'autre conduire leur entreprise à chef ; l'un pour l'inconvenient de la mort qui le surprit tant seulement , car il mourut estant capitaine en chef , & estans ses affaires en bon train : mais l'autre on ne le sçauroit de tout poinct excuser qu'il n'y ait eu en luy quelque faute de n'avoir pas sçeu , ou n'avoir pas voulu satisfaire aux plaintes & doleances de ses gens , dont ilz conceurent une si grande & si aigre malvueillance à l'encontre de luy.

V. Toutefois lon pourroit aussi dire que ce defect luy est à l'aventure commun avec Cimon , lequel fut souvent mis en justice par ses citoyens , qui finablement le bannirent de son païs pour l'espace de dix ans , à fin que de dix ans , comme dit Platon , ilz n'entendissent sa voix : car , à dire la verité , peu souvent advient que les natures graves des gens de bien plaissent à la multitude , ny soyent agreables à une commune , pourautant que s'efforceans ordinairement de la redresser quand elle se tord , elle leur fait desplaisir , ne plus ne moins que font les bendes & ligatures des medecins & chirurgiens : car encore que ce soit pour remettre en leur lieu naturel les jointes des membres denouez & deboitez , elles font neantmoins grande douleur au patient : pourtant n'en fault il à l'aventure donner la coulpe ny à l'un ny à l'autre.

VI. Au reste Lucullus porta bien plus avant les armes que ne feit Cimon : car ce fut le premier capitaine Romain , qui avec armée passa le mont de Taurus & la riviere de Tigris. Il prit & brusta devant les yeux presque des roys mesmes , les villes royales de l'Asie , Tigranocerta , Cabira , Sinope & Nyfibis , & penetra du costé de Septentrion jusques à la riviere de Phasis , du costé du Levant jusques à la Medie , & du costé du Midy jusques à la mer rouge & aux royaumes de l'Arabie , soubmettant tout à l'empire Romain , & ayant desfait toutes les forces de ces deux puissans roys , ne laissa rien à leur prendre que leurs personnes seulement , qui s'enfouirent cacher en des deserts infinis & forests inaccessibles , comme bestes sauvages : à quoy lon peult evidemment cognoistre la difference qu'il y a entre les effects de l'un & de l'autre , par ce que les Persez , comme s'ilz n'eussent receu aucune perte ny dommage de Cimon , se trouverent incontinent après en bataille contre les Grecs , & desfeirent la plus grande partie de leur armée en Égypte ; là où Mithridates & Tigranes après les victoires de Lucullus ne feirent oncques puis beau faict : car l'un se sentant ja du tout affoibly & rompu par les premieres batailles , ne oza jamais monstrier à Pompeius une seule fois son armée hors du

fort de son camp , ains s'enfuit au royaume du Bosphore , là où il mourut : & Tigranes s'alla luy mesme prosterner en terre tout nud & sans armes devant Pompeius , & s'ostant le diademe d'alentour de la teste le jetta à ses piedz , non point le flattant pour les victoires par luy gagnées , mais pour celles dont Lucullus avoit ja triomphé : au moyen dequoy il se teint quitte à bon marché , & se reputa bien heureux quand Pompeius luy rendre seulement la marque & le siltre de roy , comme luy ayans esté ostez au paravant. Parquoy plus grand capitaine , comme meilleur lucteur , doibt estre réputé celuy qui laisse son adversaire plus debilité à qui doibt combattre après luy.

VII. Davantage Cimon trouva la puissance du roy de Perse toute harassée , & la fierté des Perses ravallée par plusieurs grosses desfaites , où Themistocles , Pausanias & Leorychides les avoyent batus , & leur allant encore donner une recharge , il luy fut aisé de vaincre les corps de ceulx qui avoyent desja les cueurs vaincus : là où Lucullus assaillit Tigranes lors qu'il n'avoit encore jamais esté batu , ains avoit le cueur élevé & hault pour plusieurs grosses batailles qu'il avoit gagnées , & grandes conquestes qu'il avoit faites. Et quant à la multitude des ennemis , il n'y a point de comparaison entre ceulx que

desfeit Cimon, & ceulx qui se trouverent en bataille contre Lucullus, tellement qu'à tout peser & comprendre il seroit malaisé à decider, lequel des deux a esté plus grand homme, attendu mesmement qu'il semble que les dieux ont esté favorables à l'un & à l'autre, advertissant l'un de ce qu'il avoit à faire, & l'autre de ce dont il se devoit garder. Ainsi appert il par ce tesmoignage mesme des dieux, qu'ilz ont tous deux esté gens de bien, & que tous deux ont eu une nature divine.

S O M M A I R E

DE LA VIE DE NICIAS.

CRITIQUE de l'historien Timée. II. Plan que Plutarque s'est proposé dans cette narration. III. Caractère de Nicias, comment il parvient en crédit. IV. Magnificence & libéralité de Nicias. V. Il donne la liberté à un de ses esclaves. VI. Il conduit en pompe à Délos le chœur envoyé par la ville d'Athènes, & fait de grands présens à Apollon. VII. Nicias superstitieux & timide. VIII. Politique de Nicias pour se garantir contre les Sycophantes. IX. Comment il étoit secondé par un nommé Hiéron. X. Nicias ne se trouve compromis dans aucun des échecs que la ville d'Athènes éprouve. XI. Divers succès de Nicias. XII. Reproche que Cléon lui fait au sujet de l'île Sphactérie. XIII. Cléon est nommé général pour cette expédition, & la termine heureusement. XIV. Plaisanteries contre Nicias à ce sujet. XV. Nicias s'entremet pour rétablir la paix entre Athènes & Lacédémone. XVI. Honneur que cette paix fait à Nicias. XVII. Il persuade aux Athéniens & aux Lacédémoniens d'ajouter aux articles de la paix une ligue offensive & défensive. XVIII. Menées d'Alcibiade pour rompre la paix. XIX. Nicias va à Lacédémone sans succès. La

guerre recommence. XX. Inquiétudes de Nicias & d'Alcibiade par rapport à l'Ostracisme. XXI. Ils se réunissent, & font bannir Hyperbolus. XXII. Efforts inutiles de Nicias contre le décret de l'expédition de Sicile. Il est nommé général avec Alcibiade & Lamachus. XXIII. Divers présages qui ne détournent point les Athéniens de leur projet. XXIV. Meton & Socrate conjecturent la funeste issue de cette entreprise. XXV. Mollesse déplacée de Nicias après avoir reçu le commandement. XXVI. Les Athéniens se rangent en bataille devant le port de Syracuse. XXVII. Nicias tombe dans le mépris par la manière dont il conduit les opérations de la guerre. XXVIII. Faux avis par lequel Nicias trompe les Syracusains. XXIX. Il s'empare du port de Syracuse. XXX. Lenteur de Nicias. Il passe l'hiver à Naxe. XXXI. Il enferme presque entièrement Syracuse. XXXII. Lamachus est tué. XXXIII. Gylippe arrive en Sicile. XXXIV. Il est reçu à Syracuse. XXXV. Gylippe bat les Athéniens. XXXVI. Nicias bat la flotte des Syracusains. XXXVII. Ceux-ci se représentent au combat. XXXVIII. Les Athéniens sont battus. Démosthène arrive avec une flotte nouvelle. XXXIX. Echec que reçoit Démosthène. XL. Il conseille de se retirer. Nicias s'y oppose. XLI. Nicias prend le parti de la retraite. XLII. Réflexions sur l'éclipse de lune qui survint en ce moment. XLIII. Elle empêche

Nicias de partir. XLIV. Il se dispose au combat. XLV. Il est battu. XLVI. Ruse d'Hermocrate pour empêcher Nicias de partir pendant la nuit. XLVII. Les Syracusains s'emparent de tous les passages. XLVIII. Constance & fermeté de Nicias. Démosthène est pris. XLIX. Nicias est réduit à l'extrémité. L. Il se rend. LI. Les Syracusains font mourir Nicias & Démosthène. LII. Plusieurs des prisonniers Athéniens doivent leur salut aux vers d'Euripide qui plaisoient fort aux Siciliens. LIII. Comment la nouvelle de cet événement fut portée à Athènes.

Depuis l'an 465 à peu près, jusqu'à l'an 413 avant Jesus-Christ.

N I C I A S.

POURCE qu'il me semble qu'avec bonne raison j'ay assorty Nicias avec Crassus, & comparé les calamitez qui advindrent à l'un contre les Parthes, à celles qui arriverent à l'autre en la Sicile, je veux bien m'excuser envers ceulx qui prendront ces miens escripts en leurs mains pour les lire, les advertissant qu'ilz n'estiment pas qu'en exposant ces choses que Thucydides a descrites si disertement, si vivement, & avec tant de mouvemens d'affections, se montrant en cest endroit si eloquent, qu'il ne l'est nulle part ailleurs tant, & n'a laissé esperance de le pouvoir imiter, j'aye voulu faire comme l'historien Timæus, lequel esperant surmonter Thucydides en vivacité d'eloquence, & faire trouver Philistus ignorant & du tout fascheux & impertinent, se va jetter en son histoire à vouloir deschiffrer les batailles tant de mer que de terre, & les haren-gues que l'un & l'autre ont le plus elegamment escrites, là où, ne luy desplaist, il n'approche d'eulx, non plus que feroit un homme de pied d'un coche de Lydie, comme dit Pindarus, & se fait luy mesme cognoistre homme de mauvaise grace, & de peu de jugement en cela, ou, comme dit Diphilus,

Gras & souillé du suif de la Sicile.

Et si se laisse en beaucoup de lieux couler ès fontaines de Xenarchus, comme là où il dit, qu'il estime que c'estoit un mauvais presage pour les Atheniens, que le capitaine Nicias, ayant le nom derivé de ce mot Nice, qui signifie victoire, contredist à l'entreprise de la Sicile : & que par la mutilation des Hermes, c'est à dire, des images de Mercure, les dieux les advertissoient, qu'en ceste guerre là ilz devoient recevoir & souffrir beaucoup de maux par le capitaine des Syracusains, qui avoit nom Hermocrates filz de Hermon : & davantage qu'il estoit vraysemblable que Hercules portast faveur aux Syracusains, à cause de la deesse Proserpine, en la protection de qui est la ville de Syracuse, pour recompense de ce qu'elle luy bailla le chien des enfers Cerberus : & au contraire qu'il vouloit mal aux Atheniens, pource qu'ilz defendoyent les Egestains, lesquels estoient descendus des Troyens, ses mortelz ennemis, à cause que pour la foy faulcée, & pour le tort que luy tenoit le roy Laomedon, il destruisit leur ville : mais à l'aventure avoir il aussi bon jugement à escrire toutes ces galanteries là, comme à reprendre le style de Philistus, ou à injurier Platon & Aristote.

II. Quant à moy, il m'est advis que généralement toute ceste contention & ambitieuse jalousie

de tascher à dire ou escrire mieulx que les autres, est chose basse, & qui sent son escholier disputatif : mais quand encore elle s'adresse à vouloir combattre ce qui est si excellent que lon ne le peult imiter, alors me semble elle une folie privée de tout sentiment. Parquoy m'estant du tout impossible de passer ou omettre quelques faicts, que Thucydides & Philistus ont descrits, mesmement ceulx par qui on peult mieulx cognoistre l'humeur & le naturel de Nicias caché dessoubs plusieurs grands accidents, je passeray legèrement par dessus, en m'y arrestant seulement autant que la necessité m'y contraindra, pour ne me faire estimer homme du tout paresseux & negligent. Au demourant je me suis estudié de recueillir des choses qui ne sont pas communes à tout le monde, que d'autres ont par cy par là escrites, ou que j'ay retirées de quelques antiquailles, ou de quelques anciens registres, dont j'ay tissé une narration qui ne sera point, ce me semble, inutile, ains servira beaucoup à cognoistre les meurs & la nature du personnage.

III. Tout premierement donques, on peult dire de Nicias ce que Aristote a escrit, c'est qu'il y a eu trois citoyens à Athenes fort gens de bien, & qui ont aimé le peuple d'une charité & affection paternelle, Nicias filz de Niceratus,

Thucydides filz de Milesius, & Theramenes filz d'Agnon, mais moins ce dernier que les deux autres, pource qu'il a esté autrefois picqué & moqué comme estranger venu de l'isle de Ceos, joint aussi qu'il n'estoit pas ferme ny constant en une resolution au gouvernement de la chose publique, ains tenoit tantost un party, & tantost un autre, à l'occasion de quoy il fut surnommé Cothurnus, qui est une sorte de brodequin dont ufoient anciennement les joueurs de tragœdies, qui convient à l'un & à l'autre pied : & des deux autres, Thucydides qui estoit plus ancien, fit beaucoup de bons actes en faveur des gens de bien & d'honneur à l'encontre de Pericles, qui cherchoit de complaire à la commune : & Nicias qui estoit plus jeune, fut bien en quelque estime du vivant mesme de Pericles, tellement qu'il fut capitaine avec luy, & eut d'autres charges publiques sans luy par plusieurs fois : mais depuis que Pericles fut mort, il fut incontinent poulcé au premier lieu de credit & d'autorité par le port & faveur des hommes riches & personnes de qualité principalement, qui en feirent comme un rempart à l'encontre de la meschanceté, audace & temerité de Cleon, combien qu'il eust aussi la bonne grace du peuple, qui aida semblablement à l'avancer : car il est bien vray que ce Cleon pouvoit beaucoup, à

cause qu'il flattoit le commun populaire, le traitant ne plus ne moins qu'un vieillard, & luy donnant tousjours quelque moyen de gagner : mais neantmoins ceulx mesmes à qui il s'estudioit de complaire & de gratifier, cognoissans son avarice, son insolence effrontée & sa temerité, poulsoyent en avant Nicias, pource que sa gravité n'estoit point trop austere ny fascheuse, ains estoit meslée d'une maniere de crainte, qu'il sembloit qu'il redoubtast la presence du peuple, ce qui rendoit la commune encore mieux affectonnée envers luy : car estant homme de sa nature craintif & deffiant, il cachoit ceste couardise en la guerre par la bonne fortune, qui le favorisa tousjours egale-ment en toutes les entreprises où il fut capitaine. Et au demourant celle craintive façon de faire qu'il avoit en la ville, & qu'il redoubtoit si fort les calumniateurs, estoit trouvée populaire, & luy acqueroit la bienvueillance de la commune : par le moyen de laquelle il entroit de plus en plus avant en autorité, à cause que le commun populaire craint ordinairement ceulx qui le mesprisent, & avance ceulx qui le craignent, pource que le plus d'honneur que sçauroyent faire les grands au menu peuple, est de monstrier qu'ilz ne le mesprisent point.

IV. Or quand à Pericles, pource qu'il manioit toute la chose publique par une vraye vertu,

&c

& par la force de son eloquence, il n'avoit que faire de mine composée, ny d'aucun artifice populaire pour gagner la bonne grace du peuple : mais Nicias ayant faulte de cela & abondance de biens, alloit par le moyen d'iceulx acquerant la bonne grace de la multitude : & là où Cleon par une facilité de s'accommoder à tout, & une maniere de plaifanterie entretenoit les Atheniens en secondant toutes leurs vouldentez, luy ne se sentant pas propre pour luy faire teste par semblables moyens, s'alloit coulant en la bonne grace de la commune par liberalitez, despenses à faire jouer des jeux publiquement, & autres telles magnificences, surpassant en sumptuosité de frais, & en bonne grace de telz esbatemens, tous ceulx qui avoyent esté devant luy, & qui estoient avec de son temps. Il y a encore jusques aujourd'huy en estre quelques uns des dons qu'il a consacrez aux dieux, comme une image de Pallas, qui est au chasteau d'Athenes, ayant perdu sa doreure, & un petit temple qui est dedans celuy de Bacchus, au des-sous des vases à trois piedz, que donnent les entrepreneurs quand ilz ont gagné le prix ès jeux : car il emporta par plusieurs fois le prix ès jeux, qu'il desfrayoit, & jamais n'y fut vaincu.

V. Lon compte à ce propos, que en certains jeux qu'il faisoit une fois faire à ses despens, il se presenta sur l'eschaffault des joueurs devant

le peuple un de ses serviteurs habillé en forme de Bacchus. Il estoit fort beau de visage, de fort belle taille, & n'avoit point encore de barbe. Les Atheniens prirent si grand plaisir à le voir en cest accoustrement, qu'ilz furent longuement à battre des mains en signe de joye, ce que voyant Nicias, se dressa en piedz, & dit tout hault qu'il estimoit que ce seroit peu religieusement fait à luy, de laisser en servitude un corps d'homme, qui publiquement auroit esté trouvé ressemblant à un dieu, & sur l'heure donna liberté à ce jeune esclave. Lon fait aussi mention de quelques actes de magnificence & de devotion tout ensemble, qu'il feit en l'isle de Delos, en laquelle les danſes que les villes Grecques y envoyoyent pour chanter des hymnes en l'honneur d'Apollo, souloyent au paravant y arriver tumultuairement sans ordre : pource que le peuple qui accouroit incontinent en foule au devant, les faisoit soudainement chanter sans garder ordonnance quelconque, à cause qu'ilz descendoyent de la navire à la haste en confusion, laissoient leurs habits, & prenoient ceulx qu'ilz devoient porter à la procession, & mettoient leurs chapeaux de fleurs sur leurs testes tout en un mesme instant.

VI. Mais luy au contraire, quand il fut commis à y conduire la danſe d'Athenes, alla pre-

mierement descendre en l'isle de Renia, qui est tout joignant celle de Delos, avec ses danseurs, ses hosties pour sacrifier, & tout le reste de son équipage, portant quant & soy un pont qu'il avoit fait faire à Athenes à la mesure du canal, qui est entre l'une & l'autre isle, orné de peintures, doreures, de festons & chapeaux de triumphe, & de tapisserie fort exquisement : & la nuit le feit dresser sur le canal, qui n'est pas large, puis le matin au point du jour fait passer toute sa danse chantant par dessus, & conduisit toute ceste procession accoustrée magnifiquement, jusques au temple d'Apollo : & après le sacrifice, le festin & les jeux de prix qu'il y fait faire, il y donna un beau grand palmier de cuyvre, dont il fait offrande à Apollo, & y achepta une possession de mille ecus¹, qu'il consacra pareillement au dieu patron de l'isle, & ordonna que le revenu d'icelle seroit tous les ans employé par les Deliens, à faire un sacrifice & un festin publique, auquel ilz feroient prieres à leur dieu pour la bonne santé & prosperité de Nicias : car ainsi le fait il escrire & engraver dessus une coulonne qu'il laissa en Delos, comme gardienne de son offrande & de sa fondation. Depuis ce palmier estant rompu par les vents, tomba dessus la grande statue qu'avoient donnée les Naxiens, & la renversa par terre.

¹ Grec, 10,000 drachmes, 7982 liv. 5 s. de notre monnoie.

VII. Or est il bien vray, qu'en ce faict là y a beaucoup de pompe, de monstre & d'ambition populaire : mais toutefois qui considerera au demourant les meurs & le naturel du personnage, on pourra croire qu'il le fait premiere-ment & principalement par zele de devotion, & secondement pour en donner quelque plaisir & passetemps au peuple : car comme tesmoigne Thucydides, il estoit de ceulx qui reverent avec une treneur les dieux, & qui du tout sont adonnez à la religion. Et trouve lon par escript en l'un des dialogues de Pasiphoon, que tous les jours il sacrifioit aux dieux, & tenoit un devin ordinaire en sa maison, donnant à entendre que c'estoit pour adviser avec luy, ce qui devoit advenir ès affaires de la chose publique : mais à la verité, c'estoit pour enquerir de ses affaires propres, mesmement de ses mines d'argent : car il en avoit plusieurs grandes au quartier de Laurion, ¹ qui luy rendoyent bien du profit : mais aussi les fouilloit on avec grand peril, & y falloit entretenir grand nombre d'esclaves à y besongner continuellement. Aussi estoit la plus part de son bien en argent comptant, au moyen de quoy, il avoit tousjours force demandeurs après luy,

¹ C'est un dème ou bourg de l'Attique auprès de la montagne du même nom, à la pointe sud-est de l'Attique, près du promontoire Sunium.

ausquelz il donnoit : car il ne donnoit pas moins à ceulx qui pouvoient mal faire , qu'à ceulx qui meritoient d'avoir du bien , & qui estoient dignes de se sentir de sa liberalité : de sorte que sa timidité estoit un revenu & une rente aux meschans ; aussi bien que sa liberalité l'estoit aux gens de bien , dequoy lon peut tirer preuve & tesmoignage des anciens poëtes comiques : car Teleclides * parlant de quelque calumniateur en un passage, dit ainsi :

Onc ne voulut Charicles luy donner
Dix escus seuls, pour ne le blasonner
D'estre l'aîné des enfans de sa mere,
Premier issu hors de sa gibeciere :
Et Nicias luy en donna quarante.
Mais pourquoy c'est, combien que je me vante
De le sçavoir, je n'en diray ja rien :
Je l'aime, & croy qu'il est homme de bien.

Et celuy duquel Eupolis se mocque en sa comédie, qui est intitulée Marycas, amenant en jeu un pauvre bon homme simple, luy demande :

L'E CALUMNIATEUR.

Combien de temps y a il que tu n'as
Esté parlant avecques Nicias ?

LE BON HOMME.

Je ne l'ay pas seulement veu en face,
Sinon l'autre hyer, je le vy sur la place.

* Athénien, poëte comique, contemporain de Périclès & d'Aristophane.

LE CALUMNIATEUR.

Ja l'avoir veu cest homme me confesse :
 Mais veu que luy le cognoit, pourquoy est ce
 Que seulement il l'a veu en passant,
 Si trahison il ne nous va brassant ?
 O mes amis, ouir je vous ay fait,
 Comme j'ay pris Nicias sur le faict.

L'AUTHEUR.

O insensé, cuideriez vous surprendre
 Un si preudhomme en faict qu'on peult reprendre ?

Et Cleon menaçant en la comédie d'Aristophanes, intitulée les Chevaliers, dit ces paroles :

Les harangueurs à la gorge prendray,
 Et Nicias estonné je rendray.

Phrynicus * mesme donne en passant à entendre
 qu'il estoit ainsi paoureux & facile à effroyer,
 quand il dit en parlant de quelque autre :

Bon citoyen estoit il, non point bas
 Ne vil de cuer comme va Nicias.

VIII. Estant donques de sa nature ainsi craintif,
 & ayant peur de donner quelque occasion aux
 harengueurs de le calumnier, il se resserroit jus-
 ques là, qu'il n'osoit ny boire ny manger avec
 personne de la ville, ny ne s'osoit trouver ès

* Phrynichus, poëte comique qui florissoit dans la quatre-vingt-
 sixieme olympiade.

compagnies pour deviser & pour passer le temps, ains fuyoit tous telz esbatemens & plaisirs entierement : car quand il estoit en office il ne bougeoit du palais à despescher affaires, depuis le matin jusques à la nuit, & s'en alloit le dernier du conseil, y arrivant tousjours le premier. Et quand il n'avoit rien à faire en public, alors estoit il de difficile accès, & ne pouvoit on parler à luy, pource qu'il se tenoit renfermé dedans sa maison : & quelques uns de ses amis parloyent à ceulx qui venoyent à sa porte, les prians de l'excuser, disans qu'il estoit encore lors empesché pour les affaires de la chose publique. Celuy qui plus luy aidoit à jouer ce mistere sans parler, & qui plus le mettoit en reputation de ceste grandeur & gravité, estoit un Hieron, lequel avoit esté nourry en la maison de Nicias, & que luy mesme avoit instruié ès lettres, & en la musique. Il se disoit estre filz d'un Dionysius qui fut surnommé Chalcus, duquel on treuve encores aujourd'huy quelques œuvres poëtiques, & qui estant capitaine d'une troupe de gens que lon envoyoit pour peupler en Italie, y fonda la ville de Thuries.

IX. Cest Hieron donques le servoit & secon-
doit à enquerir secrettement ce qu'il vouloit
sçavoir des devins, & alloit semant ces propos
parmy le peuple, « Que Nicias menoit une mise-

» rable & trop laborieuse vie pour le soing qu'il
 » avoit de la chose publique, jusques là, qu'en
 » se lavant es estuves, ou en beuvant & man-
 » geant à table, il avoit tousjours l'esprit tendu
 » à quelque affaire de la ville, laissant les siens
 » propres pour penser aux publiques, de sorte
 » qu'à peine commençoit il à dormir quand
 » les autres biens souvent achevoient leur pre-
 » mier somme, dont sa personne en valoit beau-
 » coup pis, oultre ce qu'il en devenoit rebours
 » & malgracieux à ceulx qui paravant estoient
 » ses familiers amis : en maniere, ce disoit il,
 » qu'il les va perdant avec ses biens, pour s'estre
 » entremis du gouvernement de la chose publi-
 » que, là où les autres s'enrichissent & acquierent
 » des amis par le credit qu'ilz ont d'estre es-
 » coutez du peuple, en se donnant du bon temps,
 » & ne se faisant que joner des affaires publi-
 » ques qu'ilz ont entre leurs mains ». A la verité
 aussi estoit la vie de Nicias telle, qu'il pouvoit
 veritablement dire ce que le roy Agamemnon
 dit de soymesme en la tragœdie de Euripides,
 qui se nomme Iphigenie en Aulide :

De l'apparence en grandeur nous vivons,
 Mais en effect au peuple nous servons.

X. Et voyant que le peuple se servoit bien
 en quelques choses de l'experience de ceulx qui

estoyent eloquents, ou qui avoyent plus grand sens que les autres : mais neantmoins qu'il se deffioit tousjours de leur suffisance, & s'en donnoit de garde, leur abaissant le courage & diminuant leur autorité, comme il apparoissoit par la condamnation de Pericles, & par le bannissement de Damon, & par la deffiance qu'ilz eurent d'Antiphon Rhamnusiens, & plus encore par ce qu'ilz feirent à Paches, celuy qui prit l'isle de Lesbos, lequel estant mis en justice pour rendre compte de sa charge en plein jugement, desguainna son espée & s'en tua luy mesme publiquement devant tout le monde. Ce considéré il taschoit à éviter les charges qui estoyent ou trop difficiles, ou trop petites, & là où il en acceptoit quelque une, son principal regard estoit tousjours de ne rien hazarder & aller seurement en besongne : au moyen de quoy la plus part des affaires qu'il prenoit en main luy succedoyent heureusement, comme lon peult penser : mais toutefois il n'en attribuoit rien à sa sagesse ny à sa suffisance & vertu, ains cedit le tout à la fortune, & recouroit tousjours aux dieux estant content de diminuer sa gloire pour obvier à l'envie. Ce que les evenemens des choses qui passerent en ce temps là nous tesmoignent : par ce que la ville d'Athenes ayant receu de son temps plusieurs grandes & lourdes secousses, il

n'en eurent aucunement part à pas une¹ d'icelles, car les Atheniens furent lors desfaicts une fois en Thrace par les Chalcidiens, mais ce fut soubz la conduite de Calliades & de Xenophon, qui estoient capitaines: & la perte qu'ilz feirent en Ætolie fut soubz la charge de Demosthenes: auprès de Delion, ville de la Bœoe, ilz perdirent mille hommes en une desfaite, où estoit chef Hippocrates. Et quant à la peste, on en donnoit la plus part de la coulpe à Pericles, qui retira & enferma dedans les murailles de la ville le peuple des champs à cause de la guerre, là où pour la mutation des lieux & du changement de leur maniere accoustumée de vivre, ilz tumberent en pestilente maladie.

XI. Mais de tout cela on n'en imputoit chose quelconque à Nicias: & au contraire estant capitaine il prit l'isle de Cythera² estant en assiette fort propre pour endommager le païs de la Laconie, & dont les habitans estoient Lacedæmoniens: il reconquit aussi plusieurs places qui s'estoient rebellées en la Thrace, & les remeit en l'obeïssance d'Athenes, & ayant enserré les Megariens dedans leurs murailles, il prit d'arrivée

¹ Jusqu'à l'affaire de Sicile, où on verra dans la suite qu'il périt misérablement avec la principale partie des forces d'Athènes.

² Petite île près du promontoire Malée, au sud-est du Péloponèse.

l'isle de Minoa: & au partir de là, bien tost après il prit aussi le port de Nifée: & faisant descente sur le país des Corinthiens, il desfeit ceulx qui se presenterent en bataille devant luy, & en occit un bon nombre, & entre autres le capitaine Lycophon. Mais en ceste rencontre il luy advint d'oublier à inhumer deux de ses gens qui y estoient morts, dont on n'avoit peu trouver les corps en recueillant les autres: mais si tost qu'il en fut adverty, il feit arrester toute la flotte, & envoya devers les ennemis un herault demander congé d'enlever ces deux corps: combien que par l'usage de la guerre ceulx qui envoyoyent demander congé d'enlever les morts pour les inhumer, quittassent la victoire, de sorte qu'il ne leur estoit pas puis après loisible de dresser un trophée pour marque de victoire: pource qu'il sembloit que ceulx qui les avoyent en leur puissance fussent victorieux: & ne se pouvoit dire que ceulx qui les demandoient de grace, les eussent en leur puissance, autrement ilz ne les eussent pas requis: toutefois il aimia mieux quitter l'honneur de la victoire, que de laisser deux de ses citoyens morts en campagne sans donner sepulture à leurs corps: puis après avoir couru & pillé toute la coste de la Laconie, & desfait en bataille quelques Lacedaemoniens qui se trouverent devant luy en campagne;

il prit la ville de Thyræa que tenoyent alors des Æginetes, lesquelz il emmena prisonniers à Athenes.

XII. Et comme les Peloponesiens eussent mis fus de grosses armées tant par mer que par terre, pour aller devant le fort de Pyle, que le capitaine Demosthenes avoit fortifié, la bataille donnée par mer, il advint qu'il demoura dedans l'isle de Sphaëterie ¹ quatre cents naturelz citoyens de Sparte : parquoy les Atheniens estimerent que ce seroit un grand exploit à eulx, comme certainement il estoit, que de les prendre vifz : mais le siege en estoit mal aisé, pource que c'estoit en lieu où il y avoit faulte d'eau au cueur d'esté, & qu'il falloit faire un grand circuit pour y porter des vivres en leur camp, ce qui seroit puis après l'hyver venu bien dangereux, & presque totalement impossible. Au moyen dequoy ilz estoient bien marris, & se repentoyent fort d'avoir renvoyé l'ambassade des Lacedæmoniens qui estoit venue devers eulx pour traiter d'apointement, & l'avoient renvoyée sans rien faire à l'instance de Cleon, qui y resista principalement pour faire desplaisir à Nicias, lequel estoit son ennemy, & sollicitoit fort affectueusement ce que demandoyent les Lacedæmoniens : & pour

¹ Petite ile près des côtes de la Messénie, au sud-ouest du Péloponèse, un peu au-dessus du promontoire Coryphasium.

* ceste cause ce Cleon persuada aux Atheniens qu'ilz refusassent l'offre de paix & d'appointement qu'ilz estoient venus presenter : mais depuis quand le peuple vit que ce siege alloit en longueur , & que leur camp y souffroit de griefves necessitez , il commença à se courroucer contre Cleon , lequel en rejetta toute la coulpe sur Nicias , disant que par sa couardise & lâcheté il laisseroit eschapper ces assiegez , & que si luy eust esté capitaine ilz n'eussent pas duré si longuement. A donc se prirent les Atheniens à luy dire tout hault , « Et que n'y vas tu donc toymesme encore » maintenant pour les prendre » ? Et Nicias mesme se dressant en piedz dit hault & clair , que volontiers il luy cedoit toute la charge de ceste entreprise de Pyle , & qu'il levast tant de gens qu'il voudroit pour y aller & faire de faict quelque bon service à la chose publique , non pas se vanter avec audacieuses paroles , où il n'y avoit point de danger.

XIII. Cleon du commencement se tiroit arriere , se trouvant un peu estonné , pource qu'il ne se fust jamais doubté qu'on l'eust pris au mot de si près : toutefois à la fin voyant que le peuple l'en pressoit , & que Nicias crioit après luy , son ambition s'excita & enflamma , de maniere que non seulement il accepta la charge de capitaine , mais specifica un terme ,

que dedans vingt jours après qu'il feroit arrivé sur les lieux, ou il feroit mourir tous ces assiegez, ou il les ameneroit prisonniers à Athenes. Ce que les Atheniens oyans, eurent plus d'envie de rire à bon esciant, que de le croire : car aussi avoyent ilz bien autrement accoustumé de prendre sa folie & fureur en jeu, & se rire de sa temerité. Comme lon compte qu'un jour d'assemblée publique qu'il devoit harenguer, le peuple assis dès le matin l'attendit longuement, & qu'à la fin il s'y vint presenter bien tard, ayant sur sa teste un chapeau de fleurs, où il pria l'assistance de vouloir différer ceste assemblée jusques au lendemain : « Pource, dit » il, que je suis aujourd'hui empesché à festoyer » quelques miens amis estrangers qui me sont » venus voir, & en ay fait un sacrifice aux dieux. Le peuple ne s'en fait que rire, & se levant s'en alla : toutefois il eut adonc la fortune propice, & se porta si bien en ceste charge après Demosthenes, que dedans le terme du temps qu'il avoit prefix, il prit tous les assiegez, exceptez ceulx qui furent tuez en combatant, & leur ayant fait quitter les armes les amena prisonniers à Athenes.

XIV. Cela fut une grande honte à Nicias, pource qu'il ne fut pas pris comme un rendre où jetter ses armes, mais fut jugé encore pis,

& fut tenu pour une plus ignominieuse lâcheté, d'avoir ainsi volontairement quitté à son ennemy, à faulte de cueur, la charge de faire un si beau & si grand exploit, en se deposant luy-mesme de l'honneur de capitaine : aussi s'en moque bien de rechef Aristophanes en la comédie des Oiseaux, disant,

De sommeiller il n'est heure en effect,
Ny retifver comme Nicias fait.

Et en un autre passage de la comédie des Laboureurs, où il dit :

Je veux des champs laboureur devenir.

Qui te defend de t'y aller tenir ?

Vous : car je donne au public & presente

Cent escus d'or, pourveu que l'on m'exempte

De tout office & jurisdiction.

Nous acceptons l'offre & condition :

Car avec ceux qui par Nicias ont

Esté payez, deux cents tout droit ce sont.

Mais qui pis est, en ce faisant il porta grand dommage à la chose publique, laissant monter Cleon en tel credit & telle reputation : car depuis cela il chargea une si grande audace & si grande presumption, qu'on ne le peut plus tenir, ce qui fut cause de plusieurs maux à la ville, dont Nicias luy-mesme se sentit autant ou plus que nul autre. Ce fut luy entre autres

choses qui osta toute l'honesteté & toute la reverence que lon gardoit au paravant aux harangues publiques en preschant le peuple : car il commença le premier à y crier à pleine teste , & à y frapper avec la main sur sa cuisse en ouvrant sa robbe par devant , & à courir çà & là par la tribune en parlant , dont puis après proceda l'effrenée licence & la nonchalance de toute honesteté , en laquelle tumberent les orateurs & entremetteurs des affaires , qui fut à la fin cause de la totale ruine.

XV. Ja commenceoit Alcibiades en ce temps là à venir en avant , & à se mesler des affaires , qui n'estoit pas ainsi entierement corrompu ny simplement meschant , ains , comme lon dit de la terre d'Ægypte , que pour sa fertilité

Elle produit drogues medicinales

Tout peste melle, autant bonnes que males.

Aussi la nature d'Alcibiades estant grande & forte en l'une & en l'autre partie , donna commencement à beaucoup de nouvelletez , dont il advint que Nicias encores après qu'il fut delivré de Cleon , ne peut pas remettre la ville d'Athenes en paix & en tranquillité : ains ayant ja commencé d'acheminer les affaires à port de salut , il fut de rechef rejeté en pleine guerre par la vehemence & impetuosité de l'ambition

l'ambition d'Alcibiades. Ce qui advint en ceste maniere : Ceux qui plus empeschoyent le repos & la paix universelle de la Grece , estoient Cleon d'un costé & Brasidas ¹ de l'autre , pource que la guerre couvroit la meschanceté de l'un , & honoroit la vertu de l'autre , donnant à l'un moyen & matiere de commettre beaucoup de malheuretez , & à l'autre de faire plusieurs beaux & glorieux faicts d'armes. Ces deux donques estans morts tous deux ensemble en une bataille qui fut donnée près d'Amphipolis ² , incontinent Nicias trouvant ceulx de Sparte , qui de long temps ne desiroient rien plus que la paix , & les Atheniens qui n'estoyent plus si chauds à la guerre , ains les uns & les autres , par maniere de dire , las & recreus , & baissans d'eulx mesmes les mains , il alla cherchant les moyens de faire , que ces deux citez retournassent en amitié l'une avec l'autre , & que tous les autres Grecs semblablement fussent delivrez des maux de la guerre , à fin que de lors en avant ilz peussent vivre en vraye & certaine felicité. Si eut incontinent favorables à son desseing tous les riches , tous les vieux , & toute la multitude des laboureurs. Et en parlant

¹ Fameux capitaine Spartiate.

² Dans la Thrace sur le fleuve Strymon, la troisieme année de la quatre-vingt-neuvieme olympiade, sous l'archontat d'Alcée.

encore particulièrement à plusieurs des autres , avoit tant fait par vives raisons qu'il les avoit rendus plus refroidis à chercher la guerre : au moyen dequoy , donnant bonne esperance à ceulx de Sparte , que les choses estoient bien disposées à la paix , s'ilz y vouloyent entendre , les Spartiates luy adjousterent foy , tant pource qu'ilz l'avoient trouvé par tout ailleurs homme doux & debonnaire , comme aussi pource qu'il avoit eu soing de faire traiter gracieusement & humainement les prisonniers qui avoient esté pris auprès du fort de Pyle , & leur avoit rendu la misere de leur prison plus aisée à supporter.

XVI. Or avoyent ilz ja fait entre eulx une trefve pour un an , durant lequel recommenceans de rechef à hanter les uns avec les autres , & à gouter les plaisirs de la paix & de la seureté de pouvoir librement aller voir ses hostes & amis estrangers , ilz commenceoyent à souhaitter fort une vie tranquille , reposée & paisible , là où lon ne souillast plus ses mains de sang humain , & prenoient grand plaisir à ouïr en dansant chanter de telles chansons ,

Au rastelier ma lance soit couchée ,
La toïle y soit de l'arraigne attachée.

Et se souvenoyent aussi volontiers & avec joye

de celuy qui disoit , qu'en la paix le son des trompettes n'esveille point ceulx qui dorment , mais le chant des coqs : & au contraire , ilz mauldissoient & rejettoient ceulx qui disoyent estre predestiné , que la guerre dureroit trois fois neuf ans : & ainsi venans à parlementer de toutes choses ensemble , ilz feirent la paix² universelle : tellement que la pluspart des hommes estima qu'ilz estoient seurement arrivez à la fin extreme de tous leurs maux & ne parloyent plus d'autre personne que de Nicias ; disans que c'estoit un personnage aimé des dieux , qui pour sa devotion envers eulx , luy avoyent fait ceste grace , que le plus beau & le plus grand bien qui peust advenir au monde , estoit appelé de son nom : pource que à la verité il n'y avoit celuy qui n'estimast que ceste paix estoit certainement l'œuvre de Nicias , ne plus ne moins que la guerre avoir esté l'œuvre de Pericles , lequel pour causes bien legeres persuada aux Grecs de se precipiter en griefves calamitez : & Nicias au contraire les avoit induits à vouloir devenir amis , en oubliant les griefs maux qu'ilz avoyent receuz les uns des autres en la guerre passée : de sorte que jusques aujourdhuy , ce traité là s'appelle Nicium , comme qui diroit la paix de Nicias.

² La troisieme année de la quatre-vingt-neuvieme olympiade , sur la fin de l'archonte d'Alcés.

XVII. Si furent les articles de la paix arrestez; qu'ilz rendroyent reciproquement les villes, terres & places qu'ilz avoyent prises durant la guerre les uns sur les autres, & les prisonniers aussi: & que ceulx là commenceroient à rendre, ausquelz il escheroit par le fort de devoit commencer les premiers. Et escrit Theophrastus qu'il achepta à beaux deniers comprans, le fort, à fin que les Lacedæmoniens commenceassent les premiers à rendre. Mais comme les Corinthiens & les Bœotiens estans mal conrens de cest appointment, taschassent par plaintes & doléances qu'ilz mettoient en avant, de ressusciter la guerre de nouveau, Nicias persuada aux Atheniens & aux Lacedæmoniens, d'adjouster de renfort à leur paix, alliance & ligue offensive & défensive pour un plus seur lien, à fin qu'ilz en fussent plus asseurez les uns des autres, & plus redoutables à ceulx qui se voudroyent soulever ou rebeller contre eux.

XVIII. Ces choses se faisoient contre la volonté d'Alcibiades, lequel oultre ce qu'il estoit mal né à la paix, vouloit encore grand mal aux Lacedæmoniens à cause qu'ilz s'adressoient à Nicias, dont ilz avoyent bonne opinion, & ne faisoient compte de luy, ains le mesprisoient. A l'occasion dequoy il avoit bien essayé dès le commencement, d'empescher ceste paix.

& n'avoit peu rien faire. Mais peu de temps après, sentant que les Atheniens n'estoyent pas si contents de ceulx de Lacedæmone, comme ilz estoyent au paravant, & qu'ilz estimoyent qu'ilz leur faisoient tort en ce qu'ilz avoyent de nouveau fait alliance sans eulx avec les Bœotiens, & ne rendoyent point les villes de Panaacte ¹ en son entier & d'Amphipolis selon qu'ilz estoyent tenus de faire par le traitté de la paix, adonc il se meit à amplifier & aggreger leurs plaintes, & à irriter & aigrir le peuple sur chascune d'icelles : & finalement ayant fait venir une ambassade de ceulx d'Argos à Athenes, il mena si bien la pratique, que les Atheniens feirent ligue offensive & defensiva avec eulx. Mais sur ces entrefaites arriverent aussi à Athenes d'autres ambassadeurs de Lacedæmone, avec plein pouvoir d'accorder de tous differents, lesquelz ayant premierement parlé au senat, proposerent toutes choses honestes & raisonnables. Parquoy Alcibiades craignant, s'ilz proposoyent ces choses mesmes devant le peuple, qu'ilz ne le tirassent à ce qu'ilz vouloyent, il abusa ces pauvres ambassadeurs par une telle tromperie : car il leur promet & jura de leur aider à obtenir tout ce qu'ilz preten-
doient, pourveu qu'ilz ne montraissent ny ne

¹ Ville de l'Attique, limitrophe entre l'Attique & la Bœotie.

confessaient point avoir tout pouvoir de leur seigneurie, leur donnant à entendre que cela estoit le plus expedient moyen pour parvenir à leurs fins. Les ambassadeurs le creurent, & se tournerent devers luy en se departant d'avec Nicias. Parquoy Alcibiades les amena en pleine assemblée de conseil de ville devant le peuple, là où il leur demanda publiquement hault & clair devant tout le monde, s'ilz avoyent libre puissance & plein pouvoir de traiter & accorder de toutes choses : ilz luy respondirent tout hault que non, & adonc se changeant contre leur esperance, il commença à appeller ceulx du senat à tesmoins s'ilz avoyent pas en plein senat dit du contraire, & conseilla au peuple de ne se fier point & n'adjouster foy quelconque à personnes qui estoient si manifestement convaincus de mensonge, & qui sur une mesme matiere disoyent tantost d'un & tantost d'autre. Il ne fault pas demander si les ambassadeurs se trouverent bien estonnez : car Nicias mesme ne sceut que dire à cela, tant il se trouva esbahy, confus & surpris d'ennuy pour une chose si peu esperée : & en fut le peuple si emeu, qu'il fut entredeux de faire sur l'heure mesme venir les ambassadeurs d'Argos pour conclurre la ligue avec eulx : mais il survint là dessus un tremblement de terre qui servit à Nicias &

rompit celle assemblée. Et le lendemain s'estant de rechef assemblé le conseil, à peine peut il tant faire & tant dire, que le peuple voulust tenir en surseance la conclusion de la ligue avec les Argiens, jusques à ce que luy eust esté un tour ambassadeur devers les Lacedæmoniens, promettant que toutes choses iroyent bien en ce faisant.

XIX. Arrivé qu'il fut à Sparte, on le recueillit & honora comme personnage d'honneur, & qu'ilz estimoyent bien affectionné envers eulx : mais au demourant il ne peut rien faire, ains se trouvant vaincu par ceulx qui favorisoyent aux Bœotiens, s'en retourna à Athenes comme il en estoit party, là où il ne fut pas seulement mal venu & pis estimé, mais en danger de sa personne, pour le courroux du peuple, qui à son instance & à sa persuasion avoit rendu de telz personnages prisonniers, & en si grand nombre, pource que les prisonniers que lon avoit amenez de Pyle, estoient tous des premieres maisons de Sparte, & avoyent leurs parents & amis tous les principaux personnages de la ville : toutefois le peuple à la fin ne luy en feit autre rudesse, sinon qu'il eleut Alcibiades pour capitaine, & feit alliance avec les Eliens & les Mantiniens, qui s'estoyent rebellez contre les Lacedæmoniens, & avec les

Argiens¹ aussi, & envoyèrent des brigands à Pyle pour endommager le païs de la Laconie. Pour lesquelles occasions ilz retomberent de rechef en la guerre.

XX. Or ainsi comme le different & la querelle d'entre Alcibiades & Nicias estoit en sa plus grande force, escheut le temps de l'Ostracisme, c'est à dire d'un bannissement qui se faisoit à certains intervalles de temps, par lequel le peuple bannissoit pour dix ans celuy des citoyens qui luy sembloit le plus suspect pour son credit, ou autrement plus envié pour ses richesses. Si se trouverent adonc ces deux personages en grand esmoy, & en non moindre danger, s'asseurans bien que l'un d'eulx deux ne faudroit pas à estre relegué par ce prochain bannissement: pource que le peuple haïssoit la vie d'Alcibiades, & redoubtoit sa hardiesse, ainsi comme nous avons plus amplement déclaré en sa vie: & quant à Nicias, ses richesses le rendoyent envié, & trouvoit on sa maniere de vivre trop estrange, d'estre ainsi mal accointable, & si peu populaire comme il estoit, le tenans à trop grande gravité: joint aussi qu'il leur estoit encores odieux, pource que ja en plusieurs occurrences il avoit formellement contrevenu à ce que le

¹ La quatrieme année de la quatre-vingt-neuvieme olympiade, avant J. C. 420.

peuple desiroit , & l'avoit contraint malgré son vouloir de revenir à ce qui luy estoit utile. Brief , à parler rondement , il y avoit là dessus un combar entre les jeunes qui demandoient la guerre , & les vieux qui ne vouloyent que la paix , desirans les uns chasser Nicias , & les autres Alcibiades : mais

Où discord regne en quelconque cité,
Le plus meschant a lieu d'autorité.

Comme il advint alors : car le peuple d'Athenes estant divisé en deux partialitez , donna lieu d'autorité à quelques uns des plus audacieux & des plus vicieux qui fussent en toute la ville , entre lesquelz estoit un Hyperbolus du bourg de Perithus ¹ , homme qui n'avoit aucune puissance ny aucune valeur , pour laquelle il deust estre hardy , mais qui pour estre audacieux & temeraire vint en credit & en quelque puissance , faisant deshonneur à son país pour l'honneur du credit qu'il y avoit.

XXI. Cestuy donques pensant estre bien loing du danger de ce bannissement , comme celuy qui sçavoit bien , que pour ses merites il estoit plus digne d'estre mis aux ceps , que non

¹ Bourg de l'Attique , près des montagnes qui touchent la Béotie. Il fut peuplé par des Theffaliens que les Athéniens y placèrent , & prit son nom de Pirithoüs.

pas au renc des gens d'honneur , & se promettant que quand l'un de ces deux personnages seroit banny, luy demoureroit chef de l'autre part à l'encontre de son adversaire qui demoureroit, monstroit ouvertement qu'il estoit bien aise de leur dissension & alloit irritant le peuple à l'encontre de l'un & de l'autre : parquoy Nicias & Alcibiades cognoissans sa mauvaistié, après avoir parlé secrettement ensemble, joignirent leurs deux parts en un, & les ayans unies se trouverent les plus forts, de sorte que ny l'un ny l'autre d'eulx ne fut banny, ains en feirent tumber le sort sur Hyperbolus mesme : ce qui sur l'heure donna matiere de risée & de plaisir au peuple, mais depuis ilz en furent bien marriz, pource qu'il leur sembla que c'estoit aviler l'ordonnance de ce bannissement, que de l'employer en un homme qui n'en estoit pas digne, estimans que c'estoit quelque honneur, que d'estre ainsi chastié, ou pour mieulx dire, que ce bannissement là estoit un chastie-ment pour un Thucydides, un Aristides & autres telz personnages : mais pour un Hyperbolus¹, que ce luy estoit trop d'honneur, &

¹ Nous avons déjà parlé de lui. Il étoit fils d'un esclave public, avoit été ouvrier en lampes, & ouvrier fripon. Banni d'Athènes, il se retira à Samos. Après sa mort son corps fut mis dans un sac, & jeté dans la mer. Schol. Aristoph. in *Vesp.* v. 1001.

occasion de se glorifier , que pour sa meschanceté il avoit la mesme correction que lon donnoit aux plus gens de bien pour leur grandeur : ce que mesme le poëte comique Platon ¹ dit en un passage ,

Quoy que ses meurs ayent en verité,
Cela & pis justement merité :
Tant est que luy , personne de si vile
Condition , & de race servile,
N'en estoit point digne : car inventé
Pour telles gens n'a l'Ostracisme esté.

Aussi n'y en eut il onques puis pas un qui fust banny de ceste sorte de bannissement , ains fut Hyperbolus le dernier de tous comme Hipparchus Cholargien ² avoit esté le premier , pource qu'il estoit parent du tyran. Mais bien est la fortune chose , sur laquelle on ne sçauroit asseoir jugement , ny la comprendre par discours de raison : car si Nicias se fust exposé franchement au hazard de ce bannissement contre Alcibiades ; il fust advenu l'un des deux , ou qu'il fust demouré en la ville ayant chassé son adversaire s'il eust vaincu , ou bien qu'il fust sorty avant que tumber ès extremes miseres & calamitez , ou il tumba depuis , & luy fust demourée la

¹ Voyez les Observations.

² Cholargus est un bourg ou dème de l'Attique , près du Pirée & de la riviere de Cephise.

reputation d'avoir esté un très sage capitaine, s'il eust esté en ce combat vaincu. Je n'ignore pas toutefois que Theophrastus escrit, que Hyperbolus fut banny par le moyen de la dissention qui estoit entre Pharax & Alcibiades, non pas Nicias : mais la plus part des autres historiens le mettent ainsi que j'ay dit.

XXII. Estans donques venus à Athenes les Ambassadeurs des Egestains & des Leontins¹, pour suader aux Atheniens d'entreprendre la conquête de la Sicile, Nicias fut vaincu par l'astuce & l'ambition d'Alcibiades, lequel avant qu'il fust tenu aucune assemblée de conseil sur ce faict, avoit desja prevenu la commune par vaine esperance qu'il leur avoit donnée, & corrompu leur jugement par faulses raisons qu'il leur avoit alleguées, tellement que les jeunes gens ès lieux où ilz se reduisoient ensemble pour s'esbatre aux exercices de la personne, & les vieillards ès boutiques des artisans, ou ès niches & demironds, ès quelz ilz se trouvoient assis ensemble pour deviser, ne faisoient autre chose que trasser en terre la forme de la Sicile, en discourant entre eulx de la nature de la mer d'icelle, & comptans les ports & les lieux qui regardent devers l'Afrique, pource qu'ilz ne faisoient pas leur compte que la Sicile deust

¹ Peuples de la Sicile, alors en dissension avec Syracuse.

estre le prix & le but de ceste guerre, ains plus tost le fourreau de leurs armes, là où ilz feroient leur amas, pour de là aller faire la guerre contre les Carthaginois, & conquerront toute l'Afrique, & consequemment toute la mer d'icelle jusques aux colonnes de Hercules. Comme donques ilz eussent tous si fort à cueur ceste guerre, Nicias qui y contredisoit, ne trouvoit guerres de gens ny d'hommes de qualité qui en cela le secondaissent : pource que les riches craignans qu'il ne fust advis au peuple, qu'ilz le feissent pour éviter les charges, & fourir la despense qu'il leur conviendrait faire, ne disoient mot, quoy qu'ilz n'en fussent pas contents : mais luy pour cela ne se faignoît, ny ne se lassoit point de conseiller & prescher tousjours au contraire, ains encore après que la resolution de faire l'entreprise eut esté arrestée, & luy élu le premier capitaine avec Alcibiades & Lamachus, pour l'exécuter ; en la prochaine assemblée de ville qui se teint, il se leva de rechef & tascha encore à en destourner le peuple, avec toutes les protestations qu'il luy fut possible, jusques à charger & accuser Alcibiades, pour sa propre ambition, & pour son particulier profit, il jectoit la chose publique en une si dangereuse & si loingtaine guerre : mais tout cela ne servit de rien, ains plus tost en sembla.

il plus idoine que nul autre à ceste charge pour son experience, joinct aussi que lon estima, que les choses seroyent bien plus seurement conduittes, quand sa craintifve provoyance seroit meslée avec la hardiessé d'Alcibiades & la douleur de Lamachus, ce qui confirma davantage l'election : puis il y eut un des orateurs nommé Demostratus, qui plus incitoit les Atheniens à l'entreprise de ce voyage, qui se dressant en pieds dit qu'il seroit bien cesser Nicias de plus leur alleguer des subterfuges & excuses, & meit en avant un decret, que le peuple donnast plein pouvoir aux capitaines eleuz, de conseiller, & executer tout ce que bon leur sembleroit, tant ça que là, & persuada au peuple de le passer & autoriser.

XXIII. Toutefois on dit que les presbtres alleguoyent beaucoup de choses qui estoient pour empescher l'entreprise, mais Alcibiades ayant aussi d'autres devins attiltrez, alleguoit semblablement des oracles anciens qui disoyent qu'il devoit advenir de la Sicile une très grande gloire aux Atheniens, & appostoit aussi quelques pelerins qui affermoient venir tout freschement de l'oracle de Jupiter Hammon, dont ilz apportoyent un oracle, par lequel il estoit porté, que ceux d'Athenes prendroyent tous les Syracusains. Qui plus est, s'il y avoit aucuns

qui sceussent des signes & presages à ce contraires , ilz les raisoyent de peur qu'il ne semblast que par affection ilz s'entremissent de mal pronostiquer , veu que les signes mesmes qui estoient tous evidents & notoires ne les divertissoient pas , comme fut le tronçonnement & la mutilation des Hermes & images de Mercure , qui en une nuit se trouverent toutes mutilées , exceptée une seule que lon appelloit l'Herme de Andocides , qui fut jadis donnée & consacrée par la lignée Ægeide , & estoit assise droit devant la maison d'un citoyen qui s'appelloit Andocides. Davantage le cās qui advint près l'autel des douze dieux : car il y eut un homme qui estant soudainement sauté dessus , & après avoir tournoyé tout à l'entour , se couppa luy mesme sa nature avec une pierre : & au temple de la ville de Delphes , il y avoit une petite image de Minerve d'or , assise dessus un palmier de cuivre , que la ville d'Athenes y avoit donné des despouilles gaignées sur les Medois. Il y eut par plusieurs jours des corbeaux qui s'allans percher dessus , ne cefferent de le becquetter , & rongerent tant le fruit qui estoit d'or qu'ilz le feirent tumber , mais ceulx d'Athenes disoyent que c'estoyent les Delphiens gaignez par les Syracusains , qui avoyent sainct & controuvé cela. Il y eut aussi une prophetie qui leur

de l'advertir des choses à advenir , luy revela que ce voyage se faisoit à la ruine de la ville d'Athenes , ce que luy mesme compra à ses plus familiers amis , par la bouche desquelz il alla jusques aux oreilles de la plus grande partie du peuple : & si y en eut beaucoup , à qui la rencontre des jours , ès quelz ilz feirent leur embarquement , affoiblit fort le courage : car ce fut justement ès jours que les femmes celebroyent la feste du trespas d'Adonis , & y avoit en plusieurs endroits de la ville des images d'hommes morts , que lon portoit en terre ; & des femmes après qui lamentoient & en menoyent le dueil , de sorte que ceulx qui adjoustent aucunement foy à telz presages , disoyent que cela leur desplaisoit fort , & qu'ilz craignoient que cela ne signifiait que l'equipage de ceste armée , qui estoit si magnifique & si florissante , ne vint en sa fleur mesme incontinent à se fener.

XXV. Or quant à Nicias , d'avoir bien tousjours contredit à l'entreprise pendant que lon en deliberoit , & de ne s'estre jamais élevé de vaine esperance , ny esblouy de l'honneur d'une si honorable charge jusques à en changer d'opinion , c'estoit fait en homme de bien , constant & sage : mais quant il eut veu que ny par remonstrances il n'avoit jamais peu destourner

le peuple d'entreprendre ceste guerre, ne prieres se faire exempter de la charge de capitaine, ains que le peuple malgré luy vouloit qu'il fust l'un des chefs de ceste armée, alors n'estoit il plus faison de craindre tant, ny de tant reculer, ny de tourner si souvent la teste, comme un enfant, pour regarder de dessus sa galere derriere luy, en repetant souvent, & souvent redisant que raison n'avoit point eu de lieu en la conclusion de ceste entreprise : car cela n'estoit que descourager ses compagnons, & faire reboucher la premiere poincte de toute leur expedition : là où il falloit promptement courir sus aux ennemis, & en mettant vivement la main à l'œuvre, esprouver la fortune : mais il feit tout au rebours : car comme Lamachus fust d'advis que d'arrivée on allast droit devant Syracuse, & que lon leur donnast la bataille au plus près que lon pourroit de leurs murailles, & que d'autre costé Alcibiades fust d'opinion, que premierement on taschast à gagner les villes qui estoient de l'alliance des Syracusains, & après les avoir fait rebeller, alors s'en aller contre eulx, Nicias au contraire dit en conseil, qu'il luy sembloit qu'ilz devoient tout bellement aller recognoissans à l'entour les costes de la Sicile, pour faire voir leurs galeres & les armes, & puis s'en retourner tout court à Athenes, en

laissant seulement quelque petit nombre de leurs gens aux Egestains pour leur aider à se defendre : ce qui dès le commencement attiedit fort l'ardeur de bien faire & rompit le courage aux gens de guerre.

XXVI. Et peu de temps après ayans les Atheniens renvoyé querir Alcibiades pour luy faire son procès , Nicias demourant capitaine avec un autre en apparence , mais en puissance & autorité estant seul chef de toute l'armée , il ne cessa jamais de dilayer & restifver en tournoyant çà & là , & perdant le temps à consulter , tant que la vigueur de l'esperance de ses gens s'en alla languissant : & au contraire la frayeur que les ennemis avoyent eue de prime face en voyant une si puissante armée , s'alla peu à peu escoulant. Toutefois estant encore Alcibiades en l'armée , devant qu'il fust mandé d'Athenes , ilz allerent avec soixante galeres devant Syracuse , dont il teindrent les cinquante en bataille hors du port , & envoyerent les dix au dedans du port pour descouvrir : lesquelles approchantes de la ville , feirent crier à haulte voix par un herault , qu'ilz estoient illec venus pour remettre les Leontins en leurs terres & maisons , & prirent une navire des ennemis , dedans laquelle entre autres choses se trouverent des tables , où estoient par ordre escripts les noms

de tous les habitans de Syracuse par leurs generations & lignées. Ces tables se gardoyent assez loing de la ville dedans le temple de Jupiter Olympien , mais lors on les avoit envoyé querir , pour sçavoir le nombre des gens de service & d'aage pour porter les armes. Ces tables ayans esté surprises par les Atheniens & portées aux chefs de l'armée , les devins voyant ceste longue liste de noms , le prirent en mauvaise part , craignans que ce ne fust l'accomplissement de la prophetie qui leur promettoit , que les Atheniens devoient une fois prendre tous les Syracusains : tourefois lon dit que ceste prophetie fut accomplie par un autre exploit , lors que Callippus Athenien ayant occis Dion ¹ , se saisit de la ville de Syracuse.

XXVII. Mais depuis qu'Alcibiades fut party de l'armée , toute l'autorité & puissance de commander demoura entiere à Nicias : pource que Lamachus estoit bien homme courageux , droitturier & vaillant de sa personne , ne s'espargnant aucunement au besoing , mais au demourant si pauvre & si simple , qu'à toutes les fois qu'il avoit esté eleu capitaine , en rendant raison de ce qui estoit passé par ses mains , il avoit tousjours mis en ligne de compte un peu

¹ La troisieme année de la cent sixieme olympiade , avant J. C. 354 ans.

d'argent pour luy avoir une robbe & des pantoufles : & à l'opposite l'autorité & la reputation de Nicias estoit plus grande, tant pour autres causes, que pour ses richesses, & pour la gloire de beaucoup de belles choses qu'il avoit faites auparavant. Au quel propos lon compte que quelque autre fois qu'il estoit un des capitaines, se trouvant au palais de la seigneurie à Athenes avec ses compagnons en conseil, pour deliberer de quelque affaire, il dit à Sophocles le poëte qui en estoit, qu'il parlaist & dist son opinion le premier, comme celuy qui estoit le plus vieil de la compagnie. Sophocles luy respondit : « Je » suis le plus ancien voirement, mais tu es le » plus venerable, & celuy à qui lon a plus de » respect ». Aussi lors tenant Lamachus deffous luy, encore qu'il fust plus homme de guerre & meilleur capitaine que luy; en usant froidement des forces qu'il avoit entre mains, & dilayant tousjours, & s'en allant roder autour de la Sicile le plus loing qu'il pouvoit des ennemis, il leur donna premierement temps & loisir de s'asseurer : & puis allant mettre le siege devant Hybla, qui n'estoit qu'une meschante petite ville, & s'en estant levé sans la prendre, il en tumba en si grand mespris, que lon ne fait plus compte de luy. A la fin il se

tout bagage , il falloit qu'ilz s'en vinssent à certain jour qu'il leur assigna , devers Catagne avec toute leur puissance , pource que les Atheniens estoient la pluspart du temps dedans la ville , en laquelle y avoit des naturelz citoyens , qui favorisans aux affaires de Syracuse avoyent delibéré , si tost qu'ilz sentiroient les Syracusains approcher , de se saisir des portes de la ville , & en mesme temps de mettre le feu dedans les vaisseaux des Atheniens , & qu'il y en avoit ja grand nombre de ceulx de la ville qui estoient de ceste intelligence , & qui n'attendoient autre chose que le jour & l'heure de leur venue.

XXIX. Cela fut la plus grande habilité de guerre que feit Nicias en tout le temps qu'il fut dedans la Sicile : car il feit par ceste ruse sortir les ennemis aux champs avec toute leur puissance , de maniere qu'ilz laisserent leur ville toute vuide , & ce pendant luy partant de Catagne avec toute sa flotte , se saisit tout à son aise du port de Syracuse , & choisit un endroit à planter son camp , auquel les ennemis ne le pouvoient endommager , de ce dont ilz estoient les plus forts , & luy leur pouvoit sans empeschement courir sus , avec ce en quoy il se confioit le plus : & comme les Syracusains retournez tout court de Catagne luy presentassent la bataille , tout joignant les murailles de

leur ville, il sortit en campagne aussi & les desfeit. Il est vray qu'il ne mourut pas beaucoup d'ennemis sur le champ, pource que leurs gens de cheval empescherent la poursuite : mais en faisant rompre & briser les ponts qui sont sur la riviere, il donna matiere à Hermocrates de se mocquer de luy : car en reconfortant & asseurant les Syracusains, il leur dit que Nicias estoit bien digne de mocquerie, en ce qu'il faisoit tout ce qu'il pouvoit pour ne combattre point, comme s'il ne fust pas expressement venu d'Athenes à Syracuse pour combattre. Ce neantmoins il meit les Syracusains en grande peur & en grand effroy : car au lieu qu'ilz avoyent quinze capitaines, ilz n'en eleurent que trois seulement ; ausquelz le peuple promet par serment qu'il leur laisseroit plein pouvoir & entiere puissance de commander & ordonner de toutes choses.

XXX. Le temple de Jupiter Olympien estoit assez près du camp des Atheniens, dont ilz avoyent fort bonne envie de se saisir, pource qu'il estoit plein de riches joyaux & offrandes d'or & d'argent, qui autrefois y avoyent esté données : mais Nicias dilaya & differa tant d'y aller tout expressement, que les Syracusains y envoyèrent bonne garnison pour le tenir en seure garde, discourant en luy mesme que si ses gens venoyent à prendre & piller ce temple, la chose publique

ne s'en sentiroit du gaing aucunement, & luy ce pendant soustiendrait toute la coulpe du sacrilege. Et au demourant ne s'estant en chose du monde servy de sa victoire, dont le bruit estoit incontinent couru par toute la Sicile, peu de jours après il s'en retourna en la ville de Naxe¹ là où il passa son hyver, consumant beaucoup de vivres avec une si grosse armée que celle qu'il avoit, & faisant bien peu d'effect avec quelques Siciliens qui se rendoyent à luy : & ce pendant les Syracusains reprenans cueur s'en retournerent de rechef à Catagne, là où ilz pillerent & gasterent tout le plat païs, & bruslerent le camp que y avoyent accoustré les Atheniens. A raison de quoy tout le monde blasmoit fort Nicias, lequel par trop attendre, differer & vouloir faire les choses trop seurement, laissoit eschapper les occasions de faire plusieurs beaux & bons effects : car quand il vouloit mettre la main à l'œuvre, il y besongnoit de sorte, que personne n'eust sceu reprendre ses actions, pource qu'il entretenoit bien, & depuis qu'il estoit une fois en train, il executoit diligemment : mais il estoit lent à se resouldre, & couard à entreprendre.

XXXI. Quand donques il commença à re-

¹ Naxe ou Naxos, depuis appelée Tauromenium, sur la côte orientale de la Sicile, près de Catane. Il ne faut pas la confondre avec Naxos, l'une des îles Cyclades, à l'orient de Délos.

muer son armée pour retourner devant Syracuse, il la conduisit si dextrement, avec telle diligence & telle seureté tout ensemble, qu'il fut arrivé par mer à Thapse¹, & descendu en terre, & eut surpris le fort d'Epipoles, avant que les Syracusains en sceussent rien, ne y peussent mettre remede : car estant l'esslite des Syracusains sortie sur luy pour le cuider empescher, il les desfeir, & en prit trois cents prisonniers, & meit en rouverte leurs gens de cheval, que lon estoit paravant invincibles. Mais ce qui plus estoitonna les Syracusains, & sembla plus esmerveillable aux autres Grecs, fut, qu'en peu de temps il enferma d'une ceinture de murailles toute la ville de Syracuse, qui n'estoit pas de moindre estendue que celle d'Athenes, & plus malaisée à environner à cause de l'inegalité du pais bossu, & aussi à cause de la mer qui en bat les murailles, avec ce qu'il y avoit des murets tout encontre, & neantmoins il s'en fallut bien peu que tout malade qu'il estoit d'une cholique pierreuse, il ne conduisist un tel ouvrage à fin, & est raisonnable d'attribuer ce default de ce qu'il ne fut pas entierement parachevé, à celle maladie, qui fait que je m'esmerveille grandement de la diligence & sollicitude du capitaine, & de la prouesse & gentillesse des soudards, laquelle

¹ Près de Syracuse sur la même côte orientale.

appert par les belles choses qu'ilz feirent. Car Euripides après leur desfaitte & totale desconfiture, en feit une deploration funebre en vers, là où il dit ainſi :

Syracufains par huit fois ilz desfeirent,
Tant que les dieux point de tort ne leur feirent.

Mais on trouvera que ceux de Syracuse ne furent pas deffaits huit fois ſeulement par eulx, ains encore davantage, juſques à ce que veritablement il y eut quelque reſiſtence des dieux & de la fortune, qui ſe banderent contre eulx, lors qu'ilz eſtoient elevez au plus hault de leur puiſſance.

XXXII. Or ſe trouvoit Nicias en perſonne à la plus part des affaires, forçant l'indispoſition de ſon corps. Mais un jour ſa maladie s'eſtant rengregée, il fut contraint de demourer couché dedans ſon camp avec peu de ſes ſerviteurs : & ce pendant Lamachus ayant ſeul la charge de l'armée, combattoit contre les Syracufains, leſquelz tiroient une muraille depuis leur ville juſques à l'enceinte, dont les Atheniens les vouloyent enfermer, pour empescher qu'ilz ne la peuſſent continuer tout à l'entour. Et pource que les Atheniens eſtoient les plus forts en la pluſpart de ces eſcarmouches, ilz pourſuyvoyent bien ſouvent leurs ennemis fuyans aſſez inconfiderée-

ment , comme il advint un jour que Lamachus poulfa si avant, qu'il se trouva seul à soutenir une troupe de gens de cheval de ceulx de la ville , devant lesquelz marchoit le premier Callistrates homme courageux & gentil compagnon de sa personne , qui desfia au combat d'homme à homme Lamachus. Lamachus l'attendit & fut bleccé le premier , mais il ne laissa pas d'assener aussi Callicrates si au vif, qu'ilz tumberent tous deux ensemble morts sur la place : parquoy les Syracusains se trouvant en cest endroit là les plus forts, enleverent son corps & l'emporterent hors de là , mais quand & quand ilz s'en coururent à bride abbatue devers le fort du camp des Atheniens, là où estoit Nicias malade sans gardes ny defense quelconque, & neantmoins il ne laissa pas de se lever hastivement du liét , & voyant le danger où il estoit , commanda à quelques siens domestiques qu'ilz meissent le feu dedans du bois que lon avoit apporté devant les tranchées du camp pour faire quelques machines & engins de batterie , & dedans les engins qui y estoient desja tous faits & tous dressez. Cela arresta les Syracusains, sauva Nicias, & ensemble le fort du camp où estoit tout l'argent & toutes les hardes des Atheniens : pource que les Syracusains voyans de loing , entre eulx & le fort, une si grande flamme qui s'enlevoit en

l'air, s'en retournerent tout court vers la ville.

XXXIII. Ces choses ainsi advenues, Nicias se trouva seul capitaine, en grande esperance neantmoins de faire quelque chose de bon, si que plusieurs villes de la Sicile se tournoyent desja de son costé, & arrivoyent en son camp navires chargez de bled de tous costez, se rengant chascun devers luy, pource que ses affaires se portoyent bien, de sorte que ceulx de Syracuse commenceoyent desja à luy faire porter parolles d'appointement, n'esperans pas de pouvoir defendre la ville contre luy. Gylippus mesme capitaine Lacedæmonien qui venoit à leur secours, ayant entendu par le chemin comme la ville de Syracuse estoit enfermée tout à l'entour, & comme elle se trouvoit fort à destroit, poursuyvit son voyage, non plus en esperance de pouvoir defendre la Sicile, cuidant qu'elle fust desja toute entre les mains des Atheniens, mais en intention de secourir à tout le moins les villes de l'Italie s'il luy estoit possible : pource que le bruit courroit desja par tout, que les Atheniens avoyent tout gaigné, & qu'ilz avoyent un capitaine invincible : autant pour sa prudence, que pour la faveur que fortune luy faisoit. Nicias mesme s'estant contre son naturel assuré pour la prosperité qu'il voyoit en ses affaires, & principalement pour les rapports qu'on luy faisoit de Syracuse, & les

nouvelles qu'il en avoit par ceux mesmes de dedans, qui venoyent secrettement ou envoyoyent devers luy, se persuadant qu'il auroit la ville dedans peu de jours par composition, ne se soucia point d'empescher l'arrivée de Gylippus, ny ne meit point gens au guet pour le garder de descendre en la Sicile : aussi y descendit il sans qu'il en sceust rien avec un bateau de passage, tant on le mesprisoit & en faisoit on peu de compte. Estant descendu bien loing de Syracuse, il commença à mettre force gens de guerre ensemble, avant que les Syracusains mesmes sceussent qu'il fust arrivé, ne qu'ilz attendissent sa venue, tellement que lon avoit desja indit l'assemblée de conseil pour deliberer des articles & capitulations, sous lesquelles on accorderoit avec Nicias, & y en eut quelques uns qui dirent que lon se devoit haster de passer l'appointement devant que la closture fust entierement parachevée, à cause qu'il en restoit bien peu à parfaire, & estoit la matiere pour l'achever toute preste & portée sur le lieu.

XXXIV. Mais à l'instant mesme du peril arriva en la ville Gongylus qui venoit de Corinthe avec une galere, à l'aborder duquel estant incontinent tout le peuple, comme lon peut penser, accouru à l'entour de luy, il leur declara que Gylippus arriveroit bien tost, & qu'il venoit après

luy d'autres galeres à leur secours : ce que les Syracusains ne creurent point encore fermement, jusques à ce qu'il arriva un messager exprès despesché par Gylippus mesme, qui leur commanda de sa part qu'ilz fortiffent en armes au devant de luy. Alors reprenans courage ilz s'allerent incontinent tous armer : & Gylippus ne fut pas plus tost arrivé devant Syracuse, qu'il renga tout chaudement ses gens en bataille pour aller assaillir les Atheniens : lesquelz Nicias aussi de son costé ayant disposez en ordonnance pour combattre, comme ilz estoient les uns devant les autres, Gylippus à la veüe des Atheniens posa ses armes en terre, & leur envoya denoncer par un herault, qu'il leur permettoit de s'en pouvoir aller vies & bagues sauves hors de la Sicile. Aufquelles paroles Nicias ne daigna faire response : mais il y eut quelques uns des soudards, qui en se moquant demanderent au herault, si pour la venue d'une cappette & d'un baston de Lacedæmone, les Syracusains se sentoient si fortifiez qu'ilz en deussent avoir les Atheniens en mespris, lesquelz nagueres avoient tenu aux fers en leurs prisons trois cents Lacedæmoniens beaucoup plus robustes & plus chevelus que n'estoit Gylippus, & les avoient rendus à leurs citoyens. Aussi escrit Timæus que les Siciliens mesmes ne faisoient aucun compte de Gylippus, ny lors, ny depuis avec :

depuis, pource qu'ilz descouvrirent sa lasche con-
voitise & son avarice : & lors, pource qu'ilz le
veirent ainsi vestu simplement d'une meschante
cappe, & portant les cheveux fort longs, dont
ilz se mocquerent. Et toutefois luy mesme dit
après, que si tost qu'il fut comparu en la Sicile,
plusieurs de tous costez s'allèrent rengier de grande
affection autour de luy, ne plus ne moins que
font les oiseaux à l'entour de la chevesche : le-
quel propos me semble plus vray semblable que
le premier : car ilz s'amalloyent autour de luy,
pource qu'ilz voyoyent en ceste cappe & en ce
baston les marques & la dignité de la ville &
seigneurie de Sparte. Aussi dit bien Thucydides,
que ce fut luy seul qui feit tout : & autant en
dit Philistus mesme, qui estoit Syracusain, & qui
veit à l'œil comme toutes choses passerent.

XXXV. Toutefois en ceste premiere rencontre
les Atheniens eurent du meilleur, & tuerent
quelque nombre des Syracusains, entre lesquelz
fut Gongylus Corinthien : mais le lendemain
Gylippus donna bien à cognoistre, combien vault
la siffisance & experience d'un sage capitaine :
car avec les mesmes armes, les mesmes hommes,
mesmes chevaux, & aux mesmes lieux, en chan-
geant seulement l'ordonnance de sa bataille, il
desfeit les Atheniens : & les ayant chassez battant
jusques dedans leur camp, meit les Syracusains

en

en besongne à bastir des mesmes pierres & de la mesme matiere que les Atheniehs avoyent apportées pour achever leur closture, des murailles à travers, pour couper l'autre, & engarder qu'elle ne se peust joindre ny continuer, de sorte que ce qu'ilz en avoyent fait jusques là ne leur servoit plus de rien. Cela fait, les Syracusains ayans repris courage, commencerent à armer galeres, & avec leurs gens de cheval & leurs valets courans çà & là par la campagne, y surprirent beaucoup de prisonniers : & Gylippus d'un autre costé s'en alla en personne par les villes de la Sicile preschant & sollicitant les habitans, qui tous luy obeïssoyent fort volontiers, & prenoient les armes à sa suscitation.

XXXVI. Ce que voyant Nicias retumba de rechef en ses premieres façons de faire, & considerant la mutation de ses affaires, recommencea à perdre courage : car il escrivit incontinent aux Atheniens qu'ilz envoyassent une autre armée en la Sicile, ou plus tost qu'ilz rappellassent celle qui desja y estoit, & comment que ce fust qu'ilz luy donnassent congé, & le deschargeassent de l'estat de capitaine, attendu sa maladie. Les Atheniens avoyent bien esté entre deux dès auparavant qu'il escriviſt d'y envoyer un renfort, mais l'envie que les principaux de la ville portoyent à la grande prosperité de Nicias, y avoit tousjours fait sourdre

quelque retardement, jusques alors qu'ilz resolurent d'y en envoyer en diligence. Si devoit Demosthenes incontinent après l'hyver partir avec une grosse flotte de vaisseaux : mais l'hyver mesme Eurymedon y alla devant, qui luy porta del'argent, & la nouvelle comme le peuple luy avoit eleu pour compagnons, aucuns de ceulx qui estoient tous portez sur le lieu, Euthydemus & Menander. Mais sur ces entrefaites Nicias estant assailly par les ennemis en surprise, tant par mer que par terre tout en un mesme temps, encore qu'il eust du commencement moins de galeres en nombre que ses ennemis, si en brisa il & meit à fond plusieurs des leurs : mais aussi du costé de la terre, il ne peut pas secourir ses gens à temps, pource que Gylippus de primsfault luy surprit un fort qui s'appelloit Plemmyrion, dedans lequel on avoit retiré l'equippage de plusieurs galeres & bonne somme d'argent comptant, qui fut tout perdu, & si y eut bon nombre d'hommes tuez, & beaucoup de prisonniers aussi, & qui estoit encore de plus grande consequence, il ostoit à Nicias l'aisance de faire venir seurement vivres par la mer en son camp : car pendant que les Atheniens tenoyent ce fort, il leur estoit facile avec toute seureté de conduire vivres en leur camp estans couverts de ce fort, mais depuis qu'ilz l'eurent perdu, il leur fut bien mal aisé :

car il falloit qu'ilz combattissent tousjours contre les ennemis, qui estoient à l'ancre devant ledit fort.

XXXVII. Davantage il fut advis aux Syracusains, que leur armée de mer n'avoit pas esté desfaite, tant pource que les ennemis fussent plus forts, que pource que leurs gens les avoyent poursuyvis en desordre : au moyen dequoy ilz voulurent une autre fois essayer la fortune en meilleur ordre & meilleur équippage que devant : mais Nicias ne vouloit aucunement que lon retournaist au combat, disant que ce seroit grande folie à eulx, attendu qu'il leur venoit une si grosse flotte de vaisseaux, que Demosthenes amenoit de renfort, avec une armée fresche, de vouloir par une temerité se haster de combatre avec moindre nombre de vaisseaux equippez maigrement. Au contraire, Menander & Euthydemus de nouveau promeus à l'estat de capitaine, estoient poulsez d'ambition & de jalousie contre les deux autres capitaines, desirans prevenir Demosthenes en faisant quelque chose de beau avant qu'il arrivast, & surmonter par mesme moyen les faicts de Nicias : mais la couverture qu'ilz prenoient pour masquer leur ambition, estoit la reputation de la ville d'Athènes, laquelle s'en alloit, ce disoyent ilz, de tout poinct aneantie & perdue, s'ilz monstroient avoit

crainte des Syracufains qui les provoquoient au combat.

XXXVIII. Ainsi forcerent ilz Nicias de venir à la bataille, en laquelle ilz furent batus & desfaits par le bon conseil d'un pilote Corinthien qui se nommoit Ariston, de sorte que toute la poincte gauche de leur bataille, ainsi que le décrit Thucydides, fut entierement desconfite, & y perdirent grand nombre de leurs gens. Au moyen dequoy Nicias se trouvoit en grande destresse, considerant d'un costé combien il avoit enduré de travail, pendant qu'il avoit esté seul en chef capitaine, & d'autre costé, comment quand on luy avoit baillé des compagnons, ilz luy avoyent fait commettre une lourde faulte : mais sur le point qu'il estoit en ce desespoir, on va descouvrir au dessus du port Demosthenes avec sa flotte équipée & armée bravement, & pour bien estonner les ennemis : car il y avoit soixante & treize galeres, sur lesquelles estoient embarquez cinq mille hommes de pied tous armez, & d'archers, tireurs de fondes & autres gens de traict non moins de trois mille, les galeres parées de beaux harnois & de force enseignes, de grand nombre de clairons, de haultbois, & de tous autres ornemens de marine, le tout accoustré pompeusement & triumpamment pour donner plus de frayeur aux

ennemis. Si fault penser que les Syracusains se trouverent de rechef en grand esmoy, cuidans qu'ilz se travailloyent en vain, & se consumoyent pour neant, attendu qu'ilz ne voyoyent aucune apparence de pouvoir estre delivrez de leurs maulx : au contraire Nicias fut bien resjouy de l'arrivée d'un si gros renfort, mais la joye qu'il en eut ne luy dura gueres : car si tost qu'il commença à communiquer des affaires avec Demosthenes, il trouva qu'il vouloit que lon allast tout chaudement assaillir les Syracusains, & que lon hazardast tout le plus tost qu'on pourroit, à fin de prendre vistement la ville de Syracuse, & puis s'en retourner aussi tost au país. Ceste soudainereté sembla fort estrange à Nicias, & redoubra fort ceste hardiesse si estourdie : si le pria de ne vouloir rien faire temerairement, ny à la desesperée, luy remonstrant que tirer les choses en longueur faisoit pour eux contre leurs ennemis, lesquels n'avoient plus d'argent, & par ce moyen viendroyent bien tost à estre abandonnez de leurs alliez, & s'ilz venoyent à estre encore un coup à destroit de vivres, ilz retourneroyent bien tost devers luy pour chercher appointement, comme ilz avoyent desja fait au paravant : car il y avoit plusieurs dedans Syracuse qui avoyent secrette intelligence avec Nicias, & l'advertissoient qu'il devoit demourer, pource

que les Syracusains se trouvoient travaillez & lassez de ceste guerre, & se faschoyent fort de Gylippus, de manière que si la disette de vivres venoit à s'y augmenter un peu davantage, ilz se rendroient de tout poinct.

XXXIX. Nicias deduisant ces remonstrances ; partie en paroles couvertes, & partie en retenant à dire ne les voulant pas declarer publiquement, feit imaginer à ses compagnons, que c'estoit belle couardise qui luy faisoit tenir ces propos là, & qu'il retournoit encore à ses premières longueurs, remises & delais, pour vouloit avoir les choses toutes asseurées, par lesquelles façons de faire il avoit dès le commencement laissé perdre la vigueur de son armée, à faulte d'avoir vivement de premiere abordée couru sus aux ennemis, & avoir restifvé jusques à ce que la premiere ardeur de ses gens fust toute refroidie, & luy venu en mespris de ses ennemis : au moyen dequoy les autres se rengerent à l'opinion de Demosthenes, à laquelle Nicias malgré luy se laissa conduire aussi à toute peine. Parquoy Demosthenes la nuit mesme prenant les gens de pied s'en alla assaillir le fort d'Epipoles¹, là où avant que les ennemis eussent rien senty de sa venue, il en tua les uns sur la place, & tourna en fuite ceulx qui se voulurent mettre

¹ Voyez les Observations.

en defense : mais il ne se contenta pas de cela ; ains passa oultre jusques à ce qu'il vint à rencontrer les Bœotiens, lesquels furent les premiers qui se rallierent ensemble , & s'en coururent les picques baissées contre les Atheniens d'une si grande fureur , & avec si haults cris , qu'ilz renverserent les premiers sur la place , dequoy tout le reste de leur armée se trouva en grand trouble , & en entra en grand effroy , pource que les premiers fuyans desja s'alloyent jeter à travers ceulx qui chassoyent encore , & ceulx qui descendoient de la motte d'Epipoles , & courroyent contrebas , venoyent à rencontrer de front ceulx qui fuyoyent arriere tous espetdus , & s'entreheurtoyent , cuidans que ce fussent ceulx qu'ilz chassoyent , tellement qu'ilz faisoient à leurs gens propres ce qu'ilz eussent peu faire pour le pis à leurs ennemis. Car ceste confusion de se trouver ainsi pêle melle , les uns parmy les autres , accompagnée d'effroy & de faulte de s'entreconnoistre : joint & aussi qu'ilz ne pouvoient pas voir certainement , à cause que c'estoit de nuict , laquelle n'estoit ne si obscure que lon ne veist du tout rien , ne si claire que lon peust asseurement discerner à l'œil ce qui se presentoit : mesmement que la lune estoit ja fort basse , & qu'encore si peu de clarté qu'elle rendoit estoit offusquée de tant d'armes & de tant d'hommes qui

alloyent & venoyent , & ne suffisoit pas pour s'entrerecognoistre les uns les autres , de sorte que la peur qu'ilz avoyent de l'ennemy les faisoit deffier mesme de l'any : toutes ces choses ensemble mettoient les Atheniens en grandes perplexitez , & les faisoient tumber en griefz inconveniens. Et si y avoit davantage , qu'ilz avoyent la lune au dos , au moyen dequoy leur ombre venoit à tumber devant eulx , qui cachoit la multitude & la lueur de leurs harnois : & au contraire, la reverberation des rayons de la lune , qui donnoit contre les boucliers de leurs ennemis les faisoit sembler estre en beaucoup plus grand nombre , & bien mieux armez qu'ilz n'estoyent. Finablement les ennemis les pressans vivement & de près de tous costez , depuis qu'ilz eurent une fois commencé à tirer le pied arriere , ilz se meirent à fouir à val de rouverte , & furent les uns tuez par les ennemis qu'ilz avoyent à leur dos , les autres par entre eulx mesmes , les autres en tumbant du hault en bas des rochers : & d'autres encore , qui s'estoyent escartez fuyans à l'adventure parmy les champs , le lendemain au matin furent atrapez & mis à l'espee par les gens de cheval de Syracuse : tellement qu'en fin de compte il en demoura deux mille de morts sur la place , & y en eut bien peu de ceux qui se sauverent de vistesse , qui rapportassent leurs armes.

XL. Parquoy Nicias qui s'estoit tousjours bien doubté qu'il en adviendrait tout autant, alloit accusant & blasmant la temerité de Demosthenes : & luy s'en defendant comme il pouvoit, estoit d'avis qu'au premier jour ilz remontassent sur leurs vaisseaux pour s'en retourner au païs, disant qu'il ne se falloit plus attendre qu'il leur vinst d'autre renfort, & qu'avec ce qu'ilz avoyent, ilz n'estoyent pas forts assez pour leurs ennemis : outre ce, que quand ilz seroyent assez forts, encore seroyent ilz contraints de se remuer ou s'en fouir du lieu où ilz estoyent campez, ayans bien ouy dire de tout temps qu'il estoit dangereux & pestilent pour un camp, & lors voyans manifestement qu'il leur estoit maladif & mortel, mesmement en la saison où ilz estoyent, environ le commencement de l'Automne, car il y avoit desja beaucoup de leurs gens malades, & tous universellement desgoustez & failliz de cuer. Nicias oyait mal volontiers parler d'un tel par-
tement, non qu'il ne craignist les Syracusains, mais pource qu'il redoubtoit encore plus les Atheniens, leurs calumnies & leurs jugemens. Au moyen dequoy il dit au conseil qu'il ne voyoit point qu'il y eust encore d'inconvenient à demourer là, mais quand bien il y en auroit, qu'il aimoit mieulx que les ennemis le feissent mourir, que non pas ses propres citoyens : estant en cela

de contraire opinion à celle que depuis eut Léon Byzantin, quand il dit à ses citoyens : « J'aime » mieux mourir par vous , que avec vous ». Et au demourant quant au lieu où ilz devroyent remuer leur camp , qu'ilz auroyent tout loisir d'en delibérer plus amplement.

XLI. Quand Nicias eut dit ceste opinion au conseil, Demosthenes qui en sa premiere n'avoit pas esté heureux , ne se oza formaliser à l'encontre : & les autres estimans que Nicias ne s'opiniastroit point ainsi fermement à contredire au partement, qu'il ne se fiasst en quelque chose qu'il entendoit de dedans la ville , s'y accorderent aussi : mais quand on sceut qu'il estoit venu un nouveau secours aux Syracusains , & que lon veit que la peste se prenoit de plus en plus en leur camp , alors Nicias mesme fut d'avis que lon devoit partir , & feit on sçavoir aux souldards qu'ilz se teinsent tous prestz pour s'embarquer. Ce neantmoins quand toutes choses furent prestes pour faire voile , sans que les ennemis en eussent rien apperceu , comme de chose dont ilz ne se fussent jamais doubtez , la lune va eclipser & perdre subitement sa lumiere la nuit : ce qui apporta une grande frayeur à Nicias & à ses semblables , qui par ignorance & superstition redoubtoyent telles apparences.

XLII. Car quant à l'eclipse & obscurcissement

du soleil qui se fait tousjours en la conjunction de la lune , le commun peuple presque de ce temps là en avoit desja cognoissance , & entendoient aucunement que cela se fait par le corps de la lune : mais l'eclipse de la lune mesme , que c'est quelle rencontre qui l'obscurcit ainsi , & comment estant au plein elle vient tout soudain à perdre sa clarté & se muer en toutes sortes de couleurs , cela n'estoit pas facile à comprendre , & le trouvoient fort estrange , tenans pour tout certain que c'estoit signe de quelques grands malheurs , dont les dieux menaçoient les humains. Car Anaxagoras le premier qui a escrit le plus certainement & le plus hardiment de l'illumination & de l'obscurcissement de la lune , n'estoit pas alors ancien , ny son invention encore divulguée , ains estoit tenue secrette & cogneuë de peu de gens , qui ne l'ozoyent communiquer qu'avec crainte à ceulx desquelz ils se floyent fort bien , à cause que le peuple ne pouvoit lors endurer les philosophes traitans des causes naturelles , que lon appelloit alors Meteorolesches , comme qui diroit , disputans des choses superieures qui se font au ciel ou en l'air , estant advis à la commune qu'ilz attribuoient ce qui appartenoit aux dieux seulz à certaines causes naturelles & irraisonnables , & à des puissances qui font leurs operations non

par providence ne discours de raison volontaire , ains par force & contrainte naturelle : à raison dequoy Protagoras en fut banny d'Athenes , Anaxagoras en fut mis en prison , dont Pericles eut bien affaire à le retirer , & Socrates encore qu'il ne se meslast aucunement de celle partie de la philosophie , neantmoins en fut condamné à mort pour la philosophie : & bien tard depuis la doctrine de Platon venant à estre publiquement receüe , tant pour la bonté de sa vie , comme aussi pource qu'il soubmettoit la necessité des causes naturelles à la puissance divine , comme à un plus excellent principe & à une cause plus puissante , osta la mauvaise opinion que la commune avoit de toutes telles disputes , & donna cours & entrée publique aux sciences mathématiques. Et pourtant l'un de ses disciples & familiers Dion , estant survenue une eclipse de lune à l'instant mesme qu'il levoit les ancres au partir de Zacynthe , pour aller faire la guerre au tyran Dionysius , sans autrement s'en estonner ny troubler , ne laissa pas de faire voile , & arrivé qu'il fut à Syracuse en dechassa le tyran.

XLIII. Mais encore advint il lors de malheur à Nicias , qu'il n'avoit plus de bon & expérimenté devin : car celuy qu'il souloit avoir , qui luy ostoit beaucoup de sa superstition , nommé Stilbides , estoit mort un peu au para-

vant : car ce presage d'eclipse de lune , comme dit Philochorus ¹ , n'estoit point mauvais pour gens qui vouloyent fouir , ains au contraire leur estoit fort bon : « Pource , dit il , que les » choses que lon fait en crainte veulent estre » cachées , & leur est la lumiere ennemie ». Mais encore sans cela , on n'avoit accoustumé de se tenir quoy & se contregarder , que trois jours seulement, entelz accidents de la lune & du soleil ainsi , comme Autoclides mesme le prescrit au livre qu'il a fait de telles expositions : là où Nicias meit lors en avant qu'il falloit attendre toute une autre revolution du cours entier de la lune , comme s'il ne l'eust pas veüe toute pure & nette incontinent qu'elle eut passé l'espace de l'air umbragé & obscurcy par l'ombre de la terre : mais toutes autres choses presque oubliées & delaissées , Nicias se meit à sacrifier aux dieux jusques à ce que les ennemis revindrent assieger par terre leurs forts & tout leur camp , & par mer saisir & occuper tout le port , estans non seulement les hommes qui portoyent armes embarquez sur les galeres , mais aussi jusques aux jeunes enfans sur des bateaux de pescheurs & autres legeres barques , avec lesquelles ilz s'approchoyent des Atheniens , & leur disoyent

¹ Historien qui florissoit du tems des rois d'Egypte Ptolémée Philopator & Epiyhane son successeur.

villanie pour les attirer au combat , entre lesquels il y en eut un de bonne & noble maison nommé Heraclides , lequel s'estant jetté avec son bateau plus avant que les autres , fut près d'estre surpris par une galere d'Athenes qui luy vogua à l'encontre : ce que craignant Pollichus son oncle , se tira en avant avec dix galeres de Syracuse , dont il estoit capitaine , pour le secourir. Les autres galeres craignans semblablement que ce Pollichus n'eust mal , se tirerent pareillement en avant , de maniere qu'il s'attacha une grosse bataille navale que les Syracusains gaignerent , & occirent le capitaine Eurymedon & plusieurs autres : ce qui effroya tellement les souldards Atheniens , qu'ilz commencerent à crier qu'il n'y avoit plus ordre de demourer là , & qu'il se falloit retirer par terre , pource qu'après la bataille gaignée les Syracusains avoyent incontinent bouché l'entrée du port.

XLIV. Nicias ne peut condescendre à une telle retraite , pource qu'il disoit que ce seroit trop grande honte d'abandonner leurs galeres & autres vaisseaux à l'ennemy , veu qu'il n'y en avoit pas gueres moins de deux cents : ains fust d'avis que lon armaist cent dix galeres des plus vaillans hommes de pied & des meilleures gens de traict qui fussent en l'armée , pource que les autres galeres n'avoyent plus de rames :

& le demourant de l'armée Nicias le rengea au long du rivage de la mer sur le port, abandonnant leur grand camp & leurs murailles qui prenoient jusques au temple de Hercules : au moyen dequoy les Syracusains, qui jusques à ce jour là n'avoient peu faire les sacrifices accoustumez à Hercules, y envoyerent adonc leurs presbtres & leurs capitaines, qui les y feirent. Estans donques ja les combatans embarquez sur les galeres, les devins s'en vindrent annoncer aux Syracusains, que les signes des sacrifices leur promettoient certainement une très glorieuse victoire, pourveu qu'ilz ne fussent point les premiers à assaillir, & qu'ilz ne feissent que se defendre, pour autant que Hercules estoit ainsi venu au dessus de toutes ses entreprises en se defendant quand on le venoit assaillir.

XLV. En ceste bonne esperance voguerent les Syracusains en avant, & y eut une bataille de mer la plus rude & la plus aspre qui eust point encore esté en toute ceste guerre, laquelle ne donna pas moins de passion ny moins de travail & de destresse à ceulx qui regardoyent de dessus le rivage, qu'à ceulx mesmes qui combatoyent : pour ce qu'ilz voyoyent entierement tout le faict du combat, où il y eut en peu d'heure beaucoup de changemens, la plus part

contraires à ce que lon en attendoit : car les Atheniens se feirent autant de mal à eulx mesmes par l'ordonnance qu'ilz teindrent au combat , & par l'equippage de leurs vaisseaux , comme leurs ennemis leur en feirent , à cause qu'ilz avoyent rengé toutes leurs galeres ensemble en une flotte continuée , & si estoient fort pesantes d'elles mesmes & fort chargées : là où celles des ennemis estoient fort legeres & venoyent les unes d'un costé , les autres d'un autre , & ceulx qui estoient dessus leur jetoient des pierres , dont le coup est aussi dangereux d'un endroit comme de l'autre : là où les Atheniens ne tiroient que dards , flesches & traicts , dont le branlement des vaisseaux rordoit & empeschoit le droit fil , de maniere qu'ilz n'assenoyent pas tous de poincte : ce que Ariston pilote Corinthien avoit enseigné aux Syracusains , & luy mesme y fut tué en combattant vaillamment lors que les Syracusains estoient desja vaincueurs.

XLVI. Ainsi les Atheniens estans tournez en fuite avec grand meurtre & grande desconfiture de leurs gens , le moyen d'eulx enfouyr par mer leur fut de tout poinct retrenché , & voyans d'autre costé qu'il estoit bien difficile qu'ilz se peussent sauver par terre , ilz furent si effroyez ; & si descouragez , qu'ilz ne faisoient plus de
resistance

resistance aux ennemis qui venoyent tout auprès d'eulx tirer & emmener leurs vaisseaux , ny n'envoyoyent demander congé d'enlever leurs morts pour les ensepvelir , y ayant encore plus de pitié d'abandonner les malades & les blecez , qu'à non inhumer les trespassez. Ce que voyans devant leurs yeux , encore se reputoyent ilz eulx mesmes plus miserables & plus malheureux , pensans bien qu'aussi arriveroyent ilz à mesme fin comme eulx , mais ce seroit avec plus de miseres & plus de maux. Et comme ilz eussent resolu de partir la nuit , Gylippus voyant que les Syracusains s'estoyent par toute la ville mis à sacrifier aux dieux , & à faire bonne chere , tant pour l'aïse de la victoire , comme pour la feste de Hercules , estima qu'il seroit bien malaisé de leur persuader , ny de les contraindre de prendre soudainement les armes pour courir sus aux ennemis qui s'en alloient. Mais Hermocrates s'advisa de luy mesme de jouer d'une telle ruse à Nicias : Il envoya quelqu'un de ses familiers vers luy , l'ayant embouché de dire , qu'il venoit de la part de ceulx , qui durant la guerre au paravant luy souloyent donner de secrets advertissemens , lesquelz luy mandoyent qu'il se gardast bien de se mettre en chemin celle nuit , s'il ne vouloit donner dedans les embusches que les Syracusains leur avoyent dressées ,

ayans envoyé devant saisir tous les destroits & passages par où il falloit qu'ilz passassent.

XLVII. Nicias abusé par ceste malice , ne faillit pas de demourer toute celle nuit , comme s'il eust eu peur de ne tumber pas dedans les rets & les aguets des ennemis , lesquelz le lendemain dès le poinct du jour gaignerent les devants , occuperent les destroits des chemins , boucherent les passages des rivières , & rompirent les ponts , puis aux prochaines campagnes ouvertes meirent leurs gens de cheval en bataille , de sorte que les Atheniens n'avoient plus endroit aucun , par où ilz peussent eschapper ny aller en avant sans combattre : toutefois à la fin après avoir attendu encore tout ce jour là & la nuit ensuyvant , ilz se meirent en chemin avec grands cris , pleurs & lamentations , comme si c'eust esté leur naturel país , & non terre d'ennemis , dont ilz se fussent partis , & ce tant pour la faulte & necessité qu'ilz avoient de toutes choses necessaires à la vie de l'homme , que pour le regret qu'ilz sentoient d'abandonner leurs parents & amis blecez ou malades , qui ne pouvoient suyvre la troupe , & aussi pource qu'ilz attendoyent encore pis que ce qu'ilz voyoyent present devant leurs yeux.

XLVIII. Mais de toutes les choses pitoyables à voir qui fussent en ce camp là , encore n'y en

avoit il point de si miserable, ne qui feist tant de compassion, que la personne propre de Nicias, lequel estant affligé de sa maladie, maigre & desfait, estoit encore indignement reduit à extreme disette de tous refreschissemens necessaires au corps de l'homme lors qu'il en avoit plus de besoing, à cause de l'indisposition de sa personne : & neantmoins tout malade qu'il estoit, encore faisoit & supportoit il beaucoup de choses que les bien sains travaillent beaucoup à faire & à endurer, donnant evidemment à cognoistre à un chascun, que ce n'estoit pas tant pour son regard, ne pour envie qu'il eust de sauver sa personne, qu'il supportoit tous ces travaux, que pour le regard & pour l'amour d'eulx, qu'il n'abandonnoit encore point l'esperance. Car là où les autres se mettoient à plorer & à lamenter, de peur & de douleur qu'ilz avoyent, luy si d'aventure il estoit aucunefois contrainct de ce faire, monstroient que c'estoit pour la consideration qui luy venoit en l'entendement du deshonneur & de la honte où estoit ressorty ce voyage, au lieu de l'honneur & de la gloire qu'ilz avoyent esperé en devoir rapporter : mais si le voir en telle misere incitoit les regardans à pitié, encore y estoit on plus emeu quant on venoit à rememorer ce qu'il avoit tousjours dit & presché en ses harengues

pour rompre ce voyage , & destourner le peuple de ceste entreprise : car alors jugeoit on plus asseurement qu'il ne meritoit pas tant de maux. Mais , qui plus est , cela leur faisoit encore perdre toute esperance de l'aide des dieux , quand ilz venoyent à discourir en eulx mesmes qu'un personnage si devot , qui jamais n'avoit rien espargné qui feist à l'honneur & au service des dieux , ne trouvoit la fortune de rien meilleure ne plus douce en son endroit , que les plus meschans & plus vicieux hommes qui fussent en toute l'armée. Ce neantmoins encore s'efforçoit il par bon visage , par une parole ferme , & par caresses qu'il faisoit à tout le monde , de donner à cognoistre qu'il ne tumboit point soubz le faix , ny ne se rendoit point au malheur : & tout le long du chemin l'espace de huit jours durant , quoy qu'il fust à tout heure continuellement chargé , harassé & blecé , il mainteint tousjours la troupe qu'il conduisoit en son entier , jusques à ce que Demosthenes avec tout ce qu'il menoit de gens de guerre , fut pris prisonnier en un village qui s'appelloit Polyzelios¹, où il estoit demouré derriere , & avoit esté enveloppé par les ennemis en combatant , & quand il se veit enveloppé il desgaina son espée ;

¹ Un peu au-delà du fleuve Cacyparis en descendant de Syracuse au midi.

& s'en donna luy mesme dedans le corps : mais il n'en mourut pas pourtant , à cause qu'il fut incontinent environné des ennemis , qui le faifirent au corps.

XLIX. Les Syracusains coururent aussi tost après Nicias , qui luy en porterent la nouvelle : & pource qu'il ne les en croyoit pas , il y envoya quelques uns de ses gens de cheval , qui luy rapportèrent que veritablement toute celle partie de leur armée estoit prise : parquoy il requit adonc à Gylippus , qu'ilz voulussent entendre à quelque appointment , comme de laisser aller les Atheniens à sauveré hors de la Sicile , en prenant deux telz ostages qu'ilz voudroyent ; pour la seurété du remboursement de tous les deniers que les Syracusains auroient despendus en ceste guerre , qu'il leur promettoit faire payer. A quoy les Syracusains ne voulurent point entendre , ains usans de fieres menaces en courroux , & luy difans villanie , le rechargerent plus asprement que jamais , estant ja destitué de toute sorte de vivres : & neantmoins encore sousteint il toute celle nuit , & marcha tout le jour ensuyvant quoy qu'il fust continuellement chargé de loing à coups de trait , jusques à ce qu'il arriva à la riviere de Asinarus ¹ , dedans

¹ Un peu au-dessous de Polyzelium en tirant vers le midi. Cette position est décidée par ce que dit Thucydide , qu'après avoir passé

laquelle les ennemis poulserent à force une partie de ses gens , & les autres mourans de soif s'y jetterent d'eulx mesmes pour cuider boire , & là fut le plus grand & le plus cruel meurtre de ces pauvres gens , qui en beuvant estoient tuez , jusques à ce que Nicias se jettant aux piedz de Gylippus , luy dit : « Puis que les dieux » vous ont donné la victoire , ayez pitié , non » ja de moy , qui par ces calamitez ay acquis » gloire & renom immortel , mais de ces autres » Atheniens , en vous ramenant en memoire que » les fortunes de la guerre sont communes , & » que les Atheniens en ont usé doucement & » modereement envers vous , toutes & quantes » fois que la fortune leur a esté favorable à l'en- » contre de vous ».

L. Gylippus oyant ces paroles de Nicias , & le regardant au visage , en eut pitié , pource qu'il sçavoit bien qu'il avoit favorisé aux Lacedæmoniens , au dernier appointment , & si estimoit que ce luy seroit une grande gloire s'il emmenoit prisonniers les deux capitaines de ses ennemis : pourtant receut il à mercy Nicias , & le reconforta , commandant au reste que lon prist aussi les autres prisonniers : mais son

le fleuve Anapus , les Athéniens changerent de route & traverserent le fleuve Cacyparis , pour descendre vers la mer du côté de Gela & de Camarine , L. VII.

commandement fut tard entendu de chascun , tellement qu'il y en eut beaucoup plus de tuez que de pris , combien que les particuliers soldards en sauverent plusieurs à la desrobée. Au demourant , ayans assemblé en une troupe ceulx qui publiquement furent pris , ilz les despouillerent de leurs armes , desquelles ilz accoustrent en guise de trophées les plus beaux arbres qui fussent au long de la rivièrè. Puis se mettans des chapeaux de triumphe sur leurs testes , & ayans paré leurs chevaux triumpamment , & au contraire tondu ceulx de leurs ennemis , s'en retournerent victorieux en la ville de Syracuse , estans venus au dessus de la plus fameuse guerre que les Grecs eussent point encore eue les uns contre les autres , & en ayans rapporté la plus parfaite & plus accomplie victoire qui scauroit estre , & ce par vive force de prouesse & de vertu.

LI. Si fut à leur retour tenue une assemblée des Syracusains & de leurs alliez , en laquelle l'un des orateurs & entremetteurs du gouvernement , meit en avant premierement que la journée , en laquelle ilz avoyent pris Nicias , fust de lors en avant festée solennellement à jamais , sans qu'il fust loisible d'y faire autre œuvre que sacrifier aux dieux , & que la feste fust appellée Asinarie du nom de la rivièrè , sur

laquelle avoit esté la desfaitte : ce jour fut le vingt & sixieme du mois de Juillet : Et quant aux prisonniers , que les alliez des Atheniens & leurs valets fussent publiquement venduz à l'encan : mais que les naturelz Atheniens de condition libre , & leurs confederez du païs de la Sicile , fussent retenus captifz dedans les prisons des carrieres , exceptez les capitaines que lon feroit mourir. Les Syracusains approuverent ceste sentence : & comme le capitaine Hermocrates leur cuidast remonstrer , que l'user humainement de leur victoire , leur feroit plus honorable que la victoire mesme , il fut rabroué fort tumultueusement : mais , qui plus est ; comme Gylippus leur demandast les capitaines pour les mener vifs aux Lacedæmoniens , non seulement il en fut refusé , ains en fut par eulx villainement injurié , tant ilz estoient ja devenus fiers en leur prosperité , avec ce que durant la guerre mesme ilz s'estoyent faschez de luy , ne pouvans supporter son austerité & sa severité de commander à la Laconienne : encore dit Timæus davantage , qu'ilz l'accusoient d'avarice & de larcin qui luy estoit un vice hereditaire. Pource que Cleandrides son pere ayant esté attainct & convaincu de concussion , en avoit esté banny de Sparte , & luy mesme depuis ayant soubstraict

trente talents de mille¹, que Lyfander envoyoit par luy à Sparte, & les ayant cachez deffous la couverture de fa maison, en fut defcouvert, & contrainct de s'enfouir fort ignominieusement en exil, comme nous l'avons plus amplement déclaré en la vie de Lyfander. Si escrit Timæus, que Nicias & Demosthenes ne furent pas lapidez par les Syracusains, comme disent Thucydides & Philistus, ains qu'ilz se desfeirent eulx mesmes pour l'avertissement que leur envoya faire Hermocrates, avant que l'assemblée du peuple fust rompue, par un de ses gens, que les gardes laisserent entrer en la prison : mais que les corps en furent bien jettez & exposez, à qui les voulut voir, à l'entrée de la geole.

LII. J'entends que jusques aujourdhuy en un temple de Syracuse on monstre un bouclier, que lon dit estre celui de Nicias, couvert par dessus d'or & de pourpre fort joliment tissus & meslez ensemble : & quant au reste des prisonniers Atheniens, la plus part mourut de maladie & de mauvais traitement dedans ceste geole des carrieres, où ilz n'avoient pour leur vivre que environ deux escuellées d'orge, & une d'eau par jour : vray est qu'il y en eut beaucoup de defrobez, qui furent vendus comme esclaves, & beaucoup

¹ Dixhuit mille escus de six cents mille. *Amyot*. 140,062 livres de 4,668,750 de notre monnoie.

aussi que lon ne cogneut pas, qui eschapperent pour valets, & furent aussi vendus pour serfz : mais à ceulx là on leur imprima sur le front la figure & marque d'un cheval, & s'en trouva qui oultre la servitude endurent encore ceste peine là, ausquelz leur humble patience & honesteté fut profitable : car où ilz furent en peu de temps affranchiz, ou s'ilz demourerent serfz, furent aimez & bien traittez de leurs maistres. Il y en eut mesme quelques uns que lon sauva pour l'amour d'Euripides : car les Siciliens ont plus aimé la poésie de ce poëte que nulz autres Grecs du cueur de la Grece, de sorte que quand il en venoit quelques uns qui en apportoyent des monstres & des eschantillons seulement, ilz prenoient plaisir à les apprendre par cueur, & se les entredonnoient les uns aux autres à grande joye. Au moyen dequoy, lon dit que plusieurs de ceulx qui peurent eschapper de celle captivité & retourner à Athenes, alloient saluer & remercier affectueusement Euripides, luy comptans les uns comme ilz avoyent esté delivrez de servitude pour avoir enseigné ce qu'ilz avoyent retenu en memoire de ses œuvres, les autres comme après la bataille s'estans sauvez de viffesse en allant vagabonds çà & là parmy les champs, ilz avoyent trouvé qui leur donnoit à boire & à manger pour chanter de ses carmes : dequoy il ne se

fault pas esbahir, attendu que lon compte qu'il y eut une fois quelque navire de la ville de Caunus², laquelle estant chassée & pourfuyvie par des fustes de courfaires, se cuida sauver dedans leurs ports, & que du commencement ilz ne voulurent pas la laisser entrer, ains la rechasserent: mais que puis après ilz demanderent à ceulx qui estoient dedans s'ilz sçavoyent point quelques chansons d'Euripides: ilz respondirent que ouy, & adonc ilz leur permirent d'entrer, & les receurent.

LIII. La nouvelle de ceste miserable desconfiture ne fut pas creuë de prime face quand elle fut entendue à Athenes: car ce fut un estrangier, lequel estant descendu au port de Piræe s'alla seoir & reposer comme lon fait en la boutique d'un barbier, & pensant que ce fust chose ja toute notoire & cogneue à Athenes se prit à en deviser. Le barbier luy ayant ouy compter, devant que d'autres la peussent aussi entendre, s'en courut tant qu'il peut en la ville, & s'adressant aux magistrats & gouverneurs sema ceste nouvelle par toute la place. Les officiers sur l'heure mesme feirent signifier une assemblée de ville, là où ilz menerent le barbier, lequel interrogué de qui il tenoit ceste nouvelle, ne sceut

² Ville de la Pérée, canton de la Carie, vis-à-vis l'île de Rhodes, soumis par les Rhodiens dès la plus haute antiquité.

jamais rien dire de clair ny de certain, de maniere qu'il fut tenu pour un forger de nouvelles, qui mettoit pour neant en trouble & en frayeur la ville : si fut attaché & lié à la rouë où lon gehennoit les criminelz, & y fut tourmenté longuement, jusques à ce qu'il arriva des gens qui en apportèrent certaines nouvelles, & compterent par le menu comment tout le malheur estoit advenu. Ainsi ne cuida lon jamais croire qu'il fust advenu à Nicias, ce que luy mesme avoit souventefois predit qui luy adviendroit.

S O M M A I R E

DE LA VIE DE CRASSUS.

*N*AISSANCE, éducation, tempérance, avarice de Crassus. II. Enorme richesse de Crassus; comment il l'acquiert. III. Estime de Crassus pour l'opulence. IV. La maison de Crassus ouverte à tout le monde. V. Application de Crassus à l'étude de l'éloquence. VI. Son affabilité. VII. Marius & Cinna font mourir le pere & le frere de Crassus, qui s'enfuit en Espagne. VIII. Maniere dont il est reçu & traité par Vibius. IX. Il prend parti avec Sylla. X. Services qu'il lui rend. XI. Crédit de Crassus; maniere dont il l'obtint. XII. Il se rend caution de César pour une très grande somme. XIII. Comment Crassus maintient son crédit entre César & Pompée. XIV. Commencement de la guerre de Spartacus. XV. Clodius est battu. XVI. Divers avantages remportés par Spartacus. XVII. Crassus est chargé de cette guerre. XVIII. Son lieutenant Mummius est battu par Spartacus. XIX. Crassus enferme Spartacus dans la presqu'île de Rhégium. XX. Il remporte sur lui une victoire sanglante. XXI. Spartacus bat un détachement de l'armée de Crassus. XXII. Dernier combat où Spartacus est tué. XXIII. Crassus est nommé consul avec Pompée. XXIV. Il ne fait

rien pendant sa censure. XXV. Crassus soupçonné d'avoir eu part à la conjuration de Catilina. XXVI. Union de César, Pompée & Crassus, funeste à la république. XXVII. Plan des trois associés pour asservir la république. XXVIII. Pompée & Crassus briguent de nouveau le consulat. XXIX. Ils se font élire par des voies de violence. XXX. Vanité des projets & des discours de Crassus. XXXI. Efforts inutiles du tribun Areius pour empêcher Crassus de marcher à la guerre contre les Parthes. XXXII. Crassus se met en route. XXXIII. Premiers succès de Crassus ; il hiverne en Syrie. XXXIV. Reproches de l'avarice qu'il y montre. XXXV. Députation des Parthes à Crassus. XXXVI. Nouvelles effrayantes apportées à Crassus par ses soldats échappés aux ennemis en Mésopotamie. XXXVII. Il persiste dans son dessein, malgré les représentations. XXXVIII. Présages malheureux. XXXIX. Crassus marche en avant. XL. Conseils infidieux donnés à Crassus par Ariamnès. XLI. Eloge de Suréna. XLII. Message d'Artabaxe à Crassus ; bon conseil qu'il lui donne. Réponse de Crassus. XLIII. Il range son armée en ordre de bataille. XLIV. Il fait marcher au combat. XLV. La bataille s'engage. XLVI. Manière dont les Parthes combattoient. XLVII. Crassus détache son fils pour chasser les ennemis. XLVIII. Mauvais succès de cette attaque. XLIX. Mort de Publius Crassus. Toute sa troupe est taillée en pièces. L. Exhortation

de Marcus Crassus à son armée. LI. La nuit sépare les combattans. LII. Consternation de Crassus. LIII. Les Romains se retirent dans la ville de Carres. LIV. Varguntinus, lieutenant de Crassus, est défait dans la route avec sa troupe par les Parthes. LV. Ruse de Suréna pour découvrir si Crassus étoit à Carres. LVI. Crassus prend pour guide de sa retraite Andromachus, qui le trahit. LVII. Suréna fait proposer un pourparler à Crassus. LVIII. Il y va malgré lui, forcé par son armée. LIX. Il est tué. LX. Le reste de l'armée périt presque tout entier. LXI. Plusieurs rois Parthes nés de courtisannes Milésiennes. LXII. La tête de Crassus portée au roi Hyrodès. LXIII. Comment la mort de Crassus fut vengée dans la suite.

Depuis l'an de Rome 637 environ, jusqu'à l'an 701, avant Jesus-Christ 53.

Comparaison de Crassus avec Nicias.

MARCUS CRASSUS.

MARCUS Crassus estoit filz d'un pere qui avoit esté censeur & avoit eu l'honneur du triumphe : mais il fut nourry en une petite maison avec deux autres siens freres , qui tous deux furent mariez du vivant mesme de leurs pere & mere , & mangeoyent tous ensemble à une mesme table , ce qui semble avoir esté cause principale , pour laquelle en son vivre ordinaire il fut homme réglé & bien ordonné , & estant l'un de ces deux freres decédé , il espousa sa femme ^r de laquelle il eut des enfans : car quant aux femmes il a toute sa vie esté autant reformé que nul autre Romain de son temps , combien que depuis estant sur son aage , il fut accusé d'avoir eu affaire avec une des religieuses de la deesse Vesta nommée Licinia , & fut le delateur qui en accusa Licinia un nommé Plotinus : mais la cause de l'en faire souspeçonner , fut , qu'elle avoit un beau jardin & lieu de plaissance , joignant les fauxbourgs de la ville , que Crassus desiroit avoir à bon marché , & pour ceste occasion estoit tousjours après à luy faire la cour , ce qui le fit tumber en ceste suspicion : ainsi ayant semblé

‡ Voyez les Observations.

aux

aux juges que ce n'estoit qu'avarice qui luy faisoit faire, il fut absous à pur & à plein de l'inceste dont il estoit mescreu, & ne laissa jamais en paix la religieuse qu'il n'eust eu sa possession. Si disent les Romains, qu'il n'y avoit que ce seul vice d'avarice en Crassus, lequel offusquoit plusieurs belles vertus qui estoient en luy : mais quant à moy, il me semble que ce vice n'y estoit pas seul, mais que y estant le plus fort, il cachoit & effaçoit les autres.

II. Or pour monstrier la grande convoitise d'avoir qui dominoit en luy, on allegue deux principaux argumens : l'un est la maniere & le moyen dont il usa pour acquerir, & l'autre la grandeur de ses biens : car à son commencement il ne pouvoit pas avoir vaillant plus de trois cents talents ¹. Et durant le temps qu'il s'entremet des affaires de la chose publique, il offrit à Hercules la dixme de tous ses biens entierement, & fit un festin public à tout le peuple Romain, & si donna à chasque citoyen Romain autant de bled qu'il luy en falloit pour vivre trois mois : & neantmoins quand il partit pour aller faire la guerre aux Parthes, luy mesme voulant sçavoir combien montoit tout son avoir, trouva qu'il arrivoit à la somme de sept mille

¹ Cent quatre vingts mille escus. Amyot. 1,400,625 livres de notre monnoie.

cent talents¹ : mais s'il est loisible de dire injure en escrivant la verité , je dis qu'il amassa la plus part de celle grande richesse du feu & du sang, faisant des calamitez publiques son plus grand revenu. Car Sylla ayant pris la ville de Rome vendit publiquement au plus offrant les biens de ceulx qu'il faisoit mourir, les reputant & appellant son butin, voulant que plusieurs des plus grands & plus puissans de la ville fussent entachez de ce peché comme luy, & en ceste subhastation Crassus ne se lassa onques de prendre en don, ny d'acheter de luy.

III. Davantage voyant que les plus ordinaires & plus coustumieres pestes des edifices de Rome estoient le feu & les ruines des maisons, pour la pesanteur & la multitude des estages bastis l'un sur l'autre, il achetoit des serfs qui estoient massons, charpentiers, architectes, & en avoit bien jusques au nombre de cinq cents : puis quand le feu d'aventure se mettoit en quelque maison, il venoit acheter la maison mesme qui brusloit, & celles qui estoient auprès, que les propriétaires luy abandonnoient à bien vil prix pour le danger evident qu'ilz y voyoyent, tellement que par succession de temps une grande partie des maisons de la ville de Rome veint à estre

¹ Quatre millions deux cents soixante mille escus. *Amyot*, 33, 148, 125 livres de notre monnoie.

à luy : mais combien qu'il eust tant d'esclaves ouvriers de bastir, si ne edifia il jamais que la maison seule où il se tenoit, disant que ceulx qui aimoyent à bastir se destruisoyent & des-faisoyent eulx mesmes, sans que personne les combatist : & combien qu'il eust plusieurs mines d'argent, beaucoup de bonnes terres laboutables, & grand nombre de gens qui les labouroient, toutefois cela n'estoit encore rien au prix de ce que luy valoyent ses esclaves & ses serfs, tant il en avoit grand nombre, & de si excellens, comme des lecteurs, des escrivains, orfevres, argentiers, receveurs, maistres d'hostel, escuyers trenchans, & autres telz officiers de table, prenant bien la peine de leur assister quand ilz apptenoyent, voite de les dresser & enseigner luy mesme, & brief estimant que le plus grand soing que doyve avoir un maistre bon mesnager, soit de bien faite instruire ses esclaves, comme estans les utilz & instrumens vifz du mesnage. En quoy il n'avoit pas mauvaise opinion, au moins s'il le pensoit ainsi comme il le disoit, qu'il fault administrer & manier toute autre chose par ses serviteurs, & ses serviteurs par soy mesmes : car nous voyons que l'att du mesnage, entant qu'elle concerne le gouvernement des choses qui n'ont point de vie ou de raison, est basse, tendant au gaing seulement : mais en tant qu'elle

concerne le gouvernement des hommes, elle tient ne sçay quoy de la science politique, qui est de sçavoir bien regir une chose publique : mais comme il avoit bonne opinion en cela, aussi l'avoit il mauvaise en cecy, qu'il n'estimoit ny n'appelloit point homme riche celuy, qui ne pouvoit ² de son bien soudoyer & entretenir une armée : pource que la guerre, ainsi que souloit dire le roy Archidamus, ne se fait point avec un prix arresté de despense : au moyen dequoy il fault aussi que la richesse suffisante pour la soutenir, ne soit point limitée. Et en cela il estoit bien esloigné de l'opinion de Marius, lequel ayant distribué à chascun pour teste quatorze arpens de terre, entendant qu'il y en avoit aucuns qui ne s'en contentoient pas & en demandoient davantage, il leur fait réponse : « Ja dieu ne » plaise qu'il y ait Romain qui estime peu de » terre, ce qui est suffisant pour le nourrir ».

IV. Toutefois encore estoit Crassus honeste envers les estrangers : car sa maison estoit ouverte à tous, & si prestoit de l'argent à ses amis sans leur en demander profit : mais aussi tost que le terme qu'il leur avoit prefix estoit passé, il le redemandoit precisement & rigoureusement, de sorte que sa gratuité estoit bien souvent plus fascheuse, que s'il en eust demandé beaucoup.

² Cicero met, de son revenu. *Amyot.*

d'usure. Il est vray que sa table, quand il convioit quelqu'un à manger chez luy, estoit assez simple, & commune en traitement, sans superfluité quelconque : mais la netteté dont il estoit servy, & le bon recueil qu'il faisoit aux personnes, estoit plus agreable que s'il eust esté plus opulently & plantureusement servy.

V. Quant à l'estude des lettres, il s'exercita principalement à l'eloquence, mesmement à celle qui est utile pour parler en public, de sorte qu'il devint un des mieux difans qui fust à Rome de son temps, surmontant par soing, labeur & diligence ceulx qui de nature y avoyent plus d'apritude que luy : car lon dit qu'il n'eut jamais si petite ne si legere cause en main, qu'il n'y vinst tousjours préparé & ayant estudié pour la plaider : & bien souvent que Pompeius ou Cæsar, & Ciceron mesme faignoient & doubtoient de se lever pour parler, luy ne failloit jamais d'achever de defendre quelque matiere que ce fust, s'il en estoit requis : à l'occasion dequoy il en estoit plus universellement agreable, comme personnage serviable, soigneux de faire plaisir, & secourable.

VI. Aussi estoit sa courtoisie fort agreable en ce qu'il saluoit, caressoit & embrassoit gracieusement tout le monde : car il ne rencontroit pas un homme qui le saluast en allant par la ville, tant fust il petit & de basse condition, qu'il ne

le refaluaſt par ſon nom. On dit auſſi qu'il eſtoit fort verſé ès hiſtoires, & ſi eſtudia un petit en la philoſophie, meſmement en celle d'Ariſtote, que luy liſoit un Alexander, homme qui monſtra bien qu'il eſtoit de doulce & patiente nature par la frequentation qu'il eut avec Crassus: car il ſeroit mal aisé de dire s'il eſtoit plus pauvre quand il commencea à le hanter, qu'après qu'il l'eut bien longuement hanté. C'eſtoit celuy de tous ſes amis, ſans lequel il n'alloit jamais ſur les champs : & quand il y alloit, il luy preſtoit un chapeau pour s'en couvrir par le chemin, mais auſſi toſt qu'ilz eſtoient de retour, il le luy redemandoit. O grande patience d'homme ! Veux meſmement que la philoſophie dont il faiſoit profeſſion¹, le pauvre ſouffrant ne mettoit point la pauvreté entre les choſes indifferentes. Mais quant à cela, nous en parlerons cy après.

VII. Eſtans doncques Cinna & Marius les plus forts, & reprenans leur chemin devers la ville de Rome, chaſcun ſe doubta bien incontinent, qu'ilz n'y venoyent pour bien quelconque de la choſe publique, ains evidemment à la mort & ruine des plus gens de bien qui fuſſent en la ville, comme auſſi y furent tuez tous ceulx qui y furent trouvez, entre leſquelz eſtoient le

¹ Cette phraſe eſt très-obſcure; mais le texte eſt peut-être auſſi inintelligible.

pere & le frere de Crassus, & luy qui estoit encore lors fort jeune, se sauva du danger present de leur arrivée. Mais au reste, sentant qu'ilz avoyent des gens au guet de toutes parts pour le surprendre, & que les tyrans le faisoient chercher par tout, il prit pour sa compagnie trois de ses amis, & dix serviteurs seulement, avec lesquels il s'enfouit, à la plus extreme diligence qui luy fut possible, en Hespagne, là où il avoit autrefois esté avec son pere, lors qu'il la gouvernoit comme præteur, & y avoit acquis des amis: toutefois y trouvant tout le monde effroyé, & redoubtant la cruauté de Marius, comme s'il eust esté à leurs portes, il ne s'osa descouvrir à personne: ains se jetta aux champs, & s'alla cacher dedans une grande caverne, qui estoit au long de la mer, en une possession d'un nommé Vibius Paciacus, & envoya l'un de ses serviteurs devers ce Vibius, pour sonder quelle volonté il auroit envers luy, avec ce que les vivres commençoient desja à luy faillir. Vibius entendant comme il s'estoit sauvé, en fut bien aise, & s'estant informé du nombre des personnes qu'il avoit avec luy, & du lieu où il s'estoit retiré, il ne l'alla pas voir luy mesme, ains appella un sien esclave son receveur qui luy gouvernoit ceste terre, & le menant auprès, luy commanda qu'il eust à apprester tous les jours à soupper,

& le porter tout cuit auprès du rocher, soubz lequel estoit la caverne, sans mot dire, ny curieusement enquerir ny chercher que c'estoit, autrement qu'il le feroit mourir : mais que là où il feroit fidelement ce qu'il luy ordonnoit, il luy promettoit liberté. Or est ceste caverne le long de la coste non gueres loing de la mer, & y a deux rochers, qui venans à se joindre & à la couvrir par dessus, reçoivent au dedans un peu de vent doux & gracieux, & trouve long quand on y est entré une haulteur merveilleuse; & en la largeur du dedans plusieurs caveaux de grande capacité qui entrent l'un dedans l'autre; & si n'y a point faulte de lumiere ny d'eau : car il y a une fontaine de fort bonne eau, qui coule au long du rocher, & les naturelles fendasses, mesmement à l'endroit où les rochers se viennent à joindre, recevant la clarté du dehors, la transmettent au dedans, de maniere que de jour il y fait clair, & si n'y degoutte point, ains y est l'air pur & sec à cause de l'espeisseur de la roche, laquelle envoie toute l'humidité qu'elle rend en la fontaine courante.

VIII. Se tenant doncques Crassus en ce lieu là, le receveur de Vibius luy portoit tous les jours ce qui luy faisoit besoing pour son vivre, ne voyant point ceulx à qui il le portoit, ny ne les cognoissant nullement, & au contraire

estant bien veu d'eulx qui sçavoyent & observoyent l'heure , à laquelle il avoit accoustumé de venir apporter leur provision : si ne leur aprestoist pas seulement autant à manger qu'il leur en falloit necessairement pour vivre , ains plantureusement pour faire bonne chere , pource que Vibius s'estoit deliberé de faire tout le meilleur traitement qui luy seroit possible à Crassus , jusques à s'adviser qu'il estoit fort jeune , & qu'il luy falloit donner quelque moyen de prendre les plaisirs que requeroit son aage : pource que de luy fournir & subministrer ses necessitez seulement , cela luy sembloit office & traitement d'homme qui le secouroit plustost par contrainte que de cueur & d'affection. Si prit deux belles jeunes garces qu'il mena quand & luy sur ce rivage de la mer , & quand il fut près de la caverne , leur monstra par où il falloit monter , & leur dit qu'elles y entraissent hardiment. Crassus de prime face , quand il apperceut ces garces eut peur d'estre descouvert , si leur demanda qui elles estoient , & qu'elles alloient cherchant : elles qui avoyent esté embouchées par Vibius , respondirent qu'elles cherchoient leur maistre , lequel estoit caché là dedans. Adonc cogneut bien Crassus , que c'estoit un jeu de Vibius qui luy ufoit de cette courtoisie : si les feit entrer , & les y teint avec luy tant comme il y fut , fai-

fant par elles entendre à Vibius ce qu'il vouloit. Fenestella escrit qu'il en avoit veu l'une qui estoit desja vieille, & qu'il luy avoit souventes fois ouy raconter cela de grande affection.

IX. Finablement Crassus après avoir demouré huit mois ainsi caché dedans celle caverne, soudain qu'il entendit la mort de Cinna, en sortit : & si tost qu'il se fut donné à cognoistre, il accourut bon nombre de gens de guerre à l'entour de luy, dont il en choisit deux mille cinq cents, avec lesquels il passa par plusieurs villes, & en facagea une nommée Malaca, ainsi que plusieurs escrivent, mais luy le nioit, & contestoit fort & ferme à l'encontre de ceulx qui le disoyent. Depuis ayant fait provision de vaisseaux, il passa en Afrique devers Metellus Pius, homme de grande reputation, & qui avoit ja assemblé une assez grosse armée : mais il n'y demoura pas long temps, ains estant entré en quelque different avec luy, se retira devers Sylla, qui le receut & luy fit autant d'honneur qu'à nul autre qui fust autour de luy. Mais Sylla depuis qu'il fut repassé en Italie, voulant employer tous les jeunes hommes de bonne maison qu'il avoit en sa compagnie, donna diverses charges aux uns & aux autres, & envoya Crassus en la contrée des Marse pour y lever des gens de guerre. Crassus luy demanda des gens pour sa garde, à cause qu'il

luy falloit passer par auprès de quelques places que les ennemis tenoyent. Sylla luy respondit en cholere, & avec un accent de courroux, « Je » te donne pour gardes ton pere, ton frere, » tes parents & amis, qui ont esté meschamment & malheureusement tuez, dont je pour- » suis à main armée la vengeance sur les meur- » triers qui les ont occis ».

X. Crassus se sentant atteint au vif, & picqué de ceste parole, se partit incontinent, & passant hardiment à travers les ennemis, assembla bonne troupe de gens, & tousjours depuis se monstra prompt à Sylla, & affectionné en tous ses affaires. Et de là dit on que commença premierement l'estrif & la jalouzie d'honneur qui estoit entre luy & Pompeius, lequel estant plus jeune que luy, & né d'un pere mal-nommé dedans Rome, & que le peuple avoit haï autant qu'il feist onques homme, neantmoins devint incontinent illustre par sa vertu, & se rendit grand par les belles choses qu'il feist adonc : tellement que Sylla luy faisoit des honneurs, qu'il porroit bien peu souvent aux plus vieux & à ceulx qui estoient egaux à luy, comme de se lever au devant de luy quand il arrivoit, decouvrir sa teste, l'appeller Imperator, qui est à dire, capitaine general : ce qui aguisoit & enflammoit fort Crassus, encore que lon ne luy feist

point de tort de preferer Pompeius à luy, à cause qu'il n'avoit point encore lors d'experience de la guerre : & aussi que ces deux vices qui estoient nez avec luy, la chicheté & l'avarice, gastoyent tout ce qu'il y avoit de beau & de bon en ses faicts : car au sac de la ville de Tuder ^x qu'il prit, il destourna la pluspart du butin qu'il ferra pour luy, dont il fut accusé envers Sylla. Toutefois en la dernière bataille de toute ceste guerre civile, qui fut la plus grande & la plus dangereuse de toutes, devant Rome mesme, la poincte où estoit Sylla fut repoussée & défaite : mais Crassus qui conduisoit la poincte droite vainquit & chassa les ennemis jusques à bien avant en la nuit, & envoya devers Sylla luy porter nouvelles de sa victoire, & luy demander des vivres pour ses gens. A l'opposite aussi encourut il grande infamie ès confiscations & subhastations des biens de ceulx qui estoient proscripts, achetant de grandes richesses à bien petit prix, ou les demandant en don. Encore dit on qu'au païs des Brutiens il en confisqua un de sa propre autorité, que Sylla n'avoit point commandé, pour avoir ses biens : dequoy Sylla ayant esté adverty, ne se voulut onques puis servir de luy, en aucun affaire publique.

XI. Si est bien estrange chose que combien

^x Le grec ajoute : dans l'Ombrie.

qu'il fust un très grand flatteur pour se couler en la bonne grace de quiconque il vouloit , il estoit neantmoins aisé à prendre luy mesme , & à se laisser gagner à quiconque l'eust entrepris , par artifice de flatterie : & dit on qu'il avoit encore cela de propre & particulier en luy, que combien qu'il fust le plus avaricieux homme du monde , il blasmoit & haïssoit neantmoins le plus asprement qu'il est possible ceulx qui le ressembloyent. Mais la gloire que Pompeius alloit tous les jours acquerant ès charges de la guerre luy faschoit fort , & ce qu'il eut l'honneur du triumphe avant que d'estre senateur & que les Romains l'appelloient communement Pompeius Magnus ; c'est à dire le grand : car comme un jour en sa presence quelqu'un voyant venir Pompeius dist ; voicy Pompeius le grand , Crassus en se mocquant luy demanda , « Et combien a il de hault » ? toutefois n'esperant pas se pouvoir égaler à luy en faicts d'armes , il se donna aux affaires de ville , & par diligence & assiduité d'advocasser , defendre en jugement les accusez , prester argent à ceulx qui en avoyent affaire , assister & favoriser à ceulx qui briguoyent quelque office ou demandoient quelque autre chose au peuple , il acquit à la fin autorité & reputation pareille à celle que Pompeius avoit acquise par plusieurs grands exploits d'armes , & leur advenoit une

chose peculiere à eulx deux : car la renommée & la puissance de Pompeius estoit plus grande à Rome lors qu'il en estoit absent , & au contraire , quand il estoit present , Crassus l'emportoit bien souvent par dessus luy , à cause d'une certaine gravité & grandeur que Pompeius maintenoit en sa maniere de vivre , fuyant l'estre souvent veu du peuple , & se gardant de hanter es lieux publiques , & s'entremettant de parler pour bien peu de gens , & encore mal volontiers , à fin de garder sa faveur & son credit tout entier pour l'employer pour soy mesme , quand il en avoit besoing : là ou au contraire l'assiduité de Crassus estoit utile à plusieurs , pource qu'il estoit ordinairement en la place , & donnoit facile accès à tous ceulx qui se vouloyent aider de luy , estant continuellement en l'exercice de telz offices , s'ingerant de faire plaisir à tout le monde , tellement que par celle privauté & facilité il venoit à surmonter en grace la gravité & majesté de Pompeius.

XII. Mais quant à la dignité de la personne , au beau parler & à la grace du visage , tout cela estoit , à ce que lon dit , egal en tous deux : toutefois ceste jalouzie ne transporta jamais Crassus , jusques à une malvueillance & inimitié ouverte : car il estoit bien marry de voir honorer Pompeius & Cæsar plus que luy , mais

cette ambitieuse passion ne fut jamais en luy accompagnée d'une rancune ny d'une malignité de nature, combien que Cæsar ayant une fois esté surpris par les coursaïres en Asie, & estant par eulx detenu prisonnier s'escria tout hault : « O quel plaisir tu auras, Crassus, quand tu » entendras ma prison » ! Ce nonobstant ilz furent depuis cela bons amis, comme il appert par ce que Cæsar estant une fois prest à partir pour s'en aller præteur en Hespagne, ses creanciers le vindrent tous à un coup assaillir, & pource qu'il n'avoit pas dequoy leur fatisfaire arresterent tout son equippage : mais Crassus ne l'abandonna point à ce besoing, ains le delivra en respondant pour luy de la somme de huit cents trente talents¹.

XIII. Brief estant la ville de Rome divisée en trois ligues, celle de Pompeius, celle de Cæsar, & celle de Crassus : car quant à Caton sa reputation, & l'estime que lon avoit de sa preudhommie, estoit plus grande que son credit ny sa puissance, & estoit sa vertu plus admirée que suyvy : les plus graves & les plus sages se rengeoyent du costé de Pompeius : mais les plus volages & plus prompts à entreprendre toutes choses temerairement, suyvoyent les esperances

¹ Quatre cents quatre vingts dixhuit mille escus. *Amyot.* 3,875,062 livres 10 sous de notre monnoie.

de César. Crassus nageant au milieu , se servoit de tous les deux , & changeant souvent de party en l'administration de la chose publique, n'estoit ny constant amy, ny dangereux & mortel ennemy , ains se departoit aiseement & d'amitié , & d'inimitié , là où il voyoit son profit , de forte que bien souvent on le voyoit en petite distance de temps louer & blasmer , defendre & accuser de mesmes loix & de mesmes hommes : & procedoit autant son credit de la crainte que lon avoit de luy , que de bonne affection qu'on luy portast , comme on le peut juger , par ce qu'un Sicinnius qui travailla fort tous les gouverneurs & entremetteurs des affaires de la chose publique en son temps , respondit quelquefois à un qui luy demandoit , pourquoy il ne s'attachoit point à Crassus , ains le laissoit en paix , veu qu'il harassoit tous les autres : « Pource, dit il , qu'il a du foin à la corne » : car la coustume estoit à Rome quand il y avoit un bœuf subject à frapper de la corne , qu'on luy entortilloit du foin à l'entour , à fin que lon s'en donnast de garde.

XIV. Au demourant, le soublevement des gladiateurs , que quelques uns appellent la guerre de Spartacus , & les courses & pilleries qu'ilz feirent par l'Italie , prit son commencement par une telle occasion : Il y avoit en la ville

ville de Capoue un nommé Lentulus Batiatus, qui faisoit mestier de nourrir & entretenir grand nombre de ces escrimeurs à oultrance, que les Romains appellent gladiateurs, dont la plus part estoit de Gaulois & de Thraciens, lesquelz estoient derenus enfermez non pour aucune forfaiture qu'ilz eussent commise, ains seulement pour l'iniquité de leur maistre qui les avoit acheptez, & les contraignoit par force de combattre les uns contre les autres à oultrance : si y en eut deux cents qui delibererent entre eulx de s'enfuir : mais leur conspiration ayant esté descouverte, avant que leur maistre y donnast ordre, il y en eut soixante & dixhuit qui allerent en une rostisserie, où ilz faisièrent des broches, des coupperets & cousteaux de cuisine, & se jetterent hors de la ville à tout : par le chemin ilz rencontrerent d'adventure des chariots chargez d'armes dont ont accoustumé de combattre les gladiateurs, que lon portoit de Capoue en quelque autre ville : ilz les pillerent à force & s'en armerent, puis occuperent un lieu fort d'affiette, & eleurent d'entre eulx trois capitaines, dont le premier fut Spartacus homme natif du país de la Thrace, de la nation de ceulx qui vont errans avec leurs trouppeaux de bestes par le país, sans jamais s'arrester fermes en un lieu. Il avoit non seulement le cuer

grand , & la force du corps auffi , mais estoit en prudence & en douceur & bonté de nature meilleur que ne portoit la fortune où il estoit tombé , & plus approchant de l'humanité & du bon entendement des Grecs , que ne font costumierement ceulx de sa nation. Lon dit que la premiere fois qu'il fut amené pour vendre comme esclave à Rome , ainsi qu'il dormoit , il apparut un serpent entortillé à l'entour de son visage : ce que voyant sa femme , qui estoit de la mesme nation que luy , mais devineresse & inspirée de l'esprit prophetique de Bacchus , predict que ce signe luy pronostiquoit qu'il parviendroit quelque jour à une grande & redoutable puissance , laquelle se termineroit en heureuse issue. Ceste femme estoit encore avec luy , & le suyvit quand il s'enfouit : si repoulserent premierement quelques gens qui sortirent de Capoue sur eulx pour les cuider reprendre , & leur ayans osté leurs armes de foudards , furent bien aises de les changer à ceulx de gladiateurs , qu'ilz jetterent , comme estans barbares & deshonestes

XV. Depuis fut envoyé contre eulx un prateur Romain nommé Clodius , avec trois mille hommes , qui les assiegea dedans leur fort , lequel estoit une motte où il n'y avoit qu'une bien aspre & estroite montée que Clodius

gardoit , & le demourant tout à l'entour n'estoit que haults rochers , droits & coupez , & au dessus y avoit grande quantité de vigne sauvage , de laquelle les assiegez couperent les plus longs & plus forts serments , & en feirent comme des eschelles de cordes , si roides & si longues , qu'estans attachées au hault elles touchoyent jusques au bas de la plaine , & avec cela descendirent tous seurement , excepté un qui demoura au hault pour leur jeter leurs armes après eulx , & quand il les leur eut toutes jettées , il se sauva luy mesme aussi le dernier. Les Romains ne se doubtoient point de cela , au moyen dequoy les assiegez ayans environné le circuit de la motte les allerent assaillir par derriere , & les effroyerent si fort de ceste soudaine surprise , qu'ilz se meirent tous à fouir , de maniere que leur camp fut pris. Adonc plusieurs bouviers & bergers qui gardoyent les bestes là au long , se joignirent à ces fugitifz , tous hommes dispos de leurs personnes , & prompts à la main , dont ilz en armerent les uns , & se servirent des autres comme d'avant coureurs pour aller decouvrir.

XVI. A l'occasion dequoy fut despesché à Rome un autre capitaine , Publius Varinus , pour les aller desfaire , duquel ilz desfeirent

en bataille premierement un lieutenant qui avoit nom Furius , avec deux mille hommes , & depuis encore en desfeirent un autre nommé Cossinius , que lon luy avoit baillé pour conseiller & pour compaignon , avec grosse puissance : car Spartacus ayant espié qu'il se baignoit en un lieu qui s'appelle Salines , faillit de bien peu à le surprendre , & eut ce capitaine beaucoup d'affaire à se sauver de vistesse : mais au moins luy faist Spartacus sur l'heure tout son bagage , & puis le poursuyvant chaudement à la trace , prit tout son camp entierement avec grande occision & meurtre de ses gens , entre lesquelz y mourut Cossinius : & ayant semblablement batu en plusieurs rencontres le prateur mesme en chef , & finalement luy ayant pris les fergens qui portoyent les haches devant luy , & son cheval propre , il estoit ja devenu si puissant que chascun le redoubtoit : & neantmoins luy mesurant sagement ses forces , & ne s'attendant point qu'il peust venir au dessus de la puissance des Romains , achemina son armée devers les Alpes , estant d'avis que le meilleur seroit quand ilz auroient passé les monts , que chascun se retirast en son país , les uns en la Gaule , & les autres en la Thrace : mais ses gens se confians en leur multitude , & se promettans de grandes choses , ne luy voulurent point en

tela obeir, ains se remeirent à courir & piller toute l'Italie.

XVII. Parquoy le senat en estant en peine, non ja pour la honte ny pour l'indignité seulement que leurs gens fussent ainsi desfaits par des esclaves soublevez, ains pour la crainte & pour le danger où en estoit toute l'Italie, y envoya tous les deux consuls ensemble, comme à l'une des plus difficiles & plus perilleuses guerres qui leur eust peu advenir. Gellius donques l'un des consuls chargeant en surprise au desprouveu une troupe d'Allemands, qui par arrogance & mespris s'estoyent separez & escartez du camp de Spartacus, les meit tous à l'espée, & Lentulus son compaignon avec de grosses & puissantes armées environna de tous costez Spartacus, lequel s'approcha de ses lieutenans qui les conduisoient, & leur donna la bataille, où ilz furent desfaits, & perdirent leur bagage entierement. Parquoy tirant oultre son chemin devers les Alpes, Cassius le præteur, & gouverneur de la Gaule d'alentour du Po, luy alla au devant avec une armée de dix mille combatans. Il y eut une grosse bataille, où il fut desfait : & ayant perdu beaucoup de ses gens, à grande peine se peut il sauver luy mesme de viffesse : ce que le senat entendant fut fort malcontent des consuls, & leur mandant qu'ilz ne se mes-

lassent plus de ceste guerre, en donna toute la charge à Crassus, lequel fut suyvy en ce voyage de plusieurs nobles jeunes hommes de bonne maison, tant pour sa reputation, que pour la bonne affection qu'ilz luy portoyent.

XVIII. Si alla Crassus planter son camp en la Romagne, pour attendre de pied ferme Spartacus, qui y addressoit son chemin. Et envoya Mummius l'un de ses lieutenans avec deux legions faire un autre long circuit pour envelopper l'ennemy par derriere, luy enjoignant de le suyvre tousjours à la trace : & sur tout luy defendant bien expressement de le combattre ny escarmoucher aucunement : mais nonobstant toutes ces defenses, incontinent que Mummius se veit en esperance de pouvoir faire quelque chose, il luy donna la bataille, en laquelle il fut luy mesme desfait, & y perdit beaucoup de ses gens, & beaucoup y en eut qui se sauverent à la fuite, ayans seulement perdu leurs armes : à raison dequoy Crassus se courroucea grièvement à luy, & recueillant les fuyans leur donna d'autres armes : mais il leur demanda pleges qui les cautionnassent de les mieux garder à l'advenir, qu'ilz n'avoient fait les premieres : & de cinq cents qui avoyent esté aux premiers rens, & qui avoyent les premiers commencé à foudrir, il les departit en cinquante dixaines,

de chascune desquelles il en feit mourir un sur lequel le sort tumba, ramenant en usage ceste ancienne façon Romaine de punir les lâches soldards, qui de long temps n'avoit esté pratiquée : car c'est une maniere de mort qui porte avec soy grande ignominie, & se faisant publiquement devant tout le camp, donne grande horreur & grande frayeur à ceulx qui voyent faire ceste punition.

XIX. Crassus donques ayant ainsi chastié ses gens, les mena droit contre Spartacus, lequel se retiroit tousjours arriere, tant que par le país des Lucaniens il arriva à la coste de la mer, là où il trouva au destroit du Far de Messine quelques vaisseaux de coursaïres Ciliciens : si luy prit envie de passer en la Sicile. Et y ayant jetté deux mille hommes, y ressuscita¹ encore la guerre des esclaves, qui ne faisoit gueres que d'y estre assopie, & y falloit bien peu d'emorche pour la rallumer : mais ces coursaïres luy ayans promis de le servir à son passage, & ayans pris sur cela des presens de luy, le tromperent & s'en allerent au loing. Parquoy se tirant de rechef arriere de la marine, il alla asseoir son camp dedans la demie isle des Regiens, là où Crassus le venant trouver, & voyant que la nature du lieu luy enseignoit ce qu'il avoit à faire, il se meit à vouloir fermer de murailles

¹ Voyez les Observations.

l'encouleure de ceste demie isle , tant pour garder ses gens d'estre oisifz , comme pour oster à ses ennemis le moyen de recouvrer vivres. C'estoit un ouvrage long & difficile , mais neantmoins il le paracheva contre l'opinion de tout le monde , en bien peu de temps , & feit tirer une trenchée depuis un costé de la mer jusques à l'autre , à travers ceste encouleure qui duroit bien quinze lieuës de long , & avoit ceste trenchée de largeur quinze pieds , & autant de profondeur : & au dessus de la trenchée feit bastir une muraille haulte & forte à merveilles , dequoy Spartacus ne faisoit point de compte & s'en mocquoit du commencement : mais quand son pillage luy commença à faillir , & que voulant aller au loing pour recouvrer vivres , il se trouva enfermé de celle muraille , & n'y ayant plus rien à prendre ny à manger en tout le pourpris de la demie isle , il espia une nuit fort rude qu'il negeoit & faisoit un fort grand vent , durant laquelle il feit combler un endroit de la trenchée non gueres large avec force terre , pierres & branches d'arbres , par où il passa la tierce partie de son armée. Si eut peur Crassus de prime face , qu'il ne prist à Spartacus une soudaine vouldté de tirer droit à Rome : mais il se rassura bien tost de ceste peur quand il sceut qu'il y avoit debat entre

eulx, & qu'une grosse troupe s'estant mutinée contre Spartacus estoit allée camper à part sur un lac de la Lucanie, duquel on dit que l'eau se change par intervalles de temps, & devient douce, & puis après si salée que lon n'en peult boire. Crassus les allant charger, les chassa bien de dessus le lac, mais il n'en peut pas tuer grand nombre, ny les pourfuyvre gueres loing, pource que Spartacus y arriva soudainement avec son armée qui arresta sa poursuite.

XX. Or avoit paravant Crassus escrit au senat qu'il falloit r'appeller Lucullus de la Thrace, & Pompeius d'Hespagne, dont il se repentoit alors, & se hastoit le plus qu'il pouvoit de mettre fin à ceste guerre premier que ceulx là arrivassent; sçachant bien que lon attribuerait toute la gloire de l'avoir achevée à celui d'eulx qui arriveroit, & luy viendrait au secours, non pas à luy: parquoy il se resolut d'affaillir premierement ceulx qui s'estoyent mutinez, & qui s'estoyent logez à part, desquelz estoyent les capitaines un nommé Caius Cannicius, & un autre nommé Castus. Si envoya devant six mille hommes de pied pour saisir une motte, leur enjoignant de faire tout ce qu'ilz pourroyent pour n'estre point apperceuz ny descouverts des ennemis: ce qu'ilz tascherent bien à faire, couvrans leurs morions & armets le mieux qu'ilz pouvoient: mais

nonobstant ilz furent appectuez par deux femmes qui faisoient quelques sacrifices à l'escart pour leurs ennemis , & furent en très grand danger d'estre tous perdus, n'eust esté que Crassus qui survint tout à poinct à leur secours, donna aux ennemis la plus aspre bataille qui eust point encore esté donnée en toute celle guerre : car il y fut occis douze mille trois cents hommes sur le champ, desquelz il ne s'en trouva jamais que deux blecez par derriere, & tous les autres moururent en la place qui leur avoit esté ordonnée pour leur reng en combatant vaillamment.

XXI. Après ceste desfaitte Spartacus se retira vers les montagnes de Petelie, là où Quintus l'un des lieutenans de Crassus, & Scrofa son tresorier, le suyvirent en l'escarmouchant toujours par le chemin sur la cueüe : mais à la fin un jour il tourna visage tout à un coup, & meit les Romains qui le harasloyent en rouverte, là où le tresorier mesme fut grievement blecé, & eut on beaucoup d'affaire à le sauver. Cest avantage qu'ilz eurent alors sur les Romains, fut cause de la ruine finale de Spartacus, pource que ses gens qui estoient la plus part esclaves fugitifs, en monterent en si grand orgueil, & en prirent telle audace, qu'ilz ne voulurent plus reculer à combattre, ny n'obeïrent plus à leurs

capitaines , ains comme ilz estoient ja par chemin les environnerent avec leurs armes , & leur dirent qu'il falloit , voulessent ou non , qu'ilz retournassent tout court , & les remenaissent par la Lucanie contre les Romains , qui estoit tout ce que Crassus demandoit , pource qu'il avoit nouvelles , que ja Pompeius approchoit , & y avoit plusieurs à Rome qui parloient & briguoyent pour luy , disans que la victoire finale de ceste guerre luy estoit deuë , & que si tost qu'il seroit arrivé sur les lieux il la decideroit par une seule bataille.

XXII. A ceste cause Crassus cherchant à combattre , & se logeant le plus près qu'il pouvoit des ennemis , faisoit un jour tirer une trenchée , laquelle les fugitifs voulurent empescher , & vindrent en grande furie charger sur ceulx qui y besongnoient : l'escarmouche s'eschauffa , & survenoit tousjours gens de renfort tant d'une part que d'autre , si que Spartacus à la fin voyant qu'il estoit contraint renga toutes ses forces aux champs en bataille. Quoy fait , on luy amena son cheval , sur lequel il devoit combattre , & desguainnant son espée il le tua à la veuë de tous ses gens , en disant , « Si je suis desfait » en ceste bataille , je n'en auray plus que faire : » & si je demeure victorieux , j'en auray assez » de beaux & de bons des ennemis à mon com-

» mandement. Puis cela fait se jetta à travers la presse des Romains pour cuider approcher & joindre de près Crassus , mais il n'y peut advenir , & tua de sa main deux centeniers Romains qui luy feirent teste. Finablement tous ceulx qu'il avoit autour de luy s'en fouirent , & luy demoura ferme jusques à ce qu'estant environné de tous costez , en combatant vaillamment, il fut mis en pieces. Mais combien que Crassus eust fort bien usé de sa fortune , & fait tout le devoir de bon capitaine , & de vaillant homme , en exposant sa personne aux dangers , si ne peut il faire que l'honneur de l'achevement de celle guerre ne vinst encore à Pompeius , pource que ceulx qui eschapperent de ceste derniere bataille tumberent entre ses mains , & les acheva de desfaire , tellement qu'il escrivit au senat que Crassus avoit bien desfait les fugitifs en bataille rangée , mais que luy avoit couppé toutes les racines de ceste guerre. Pompeius donques eut entrée triumpnale dedans Rome pour avoir vaincu Sertorius , & reconquis l'Hespagne : mais. quant à Crassus , il ne demanda pas seulement le grand triumphe , & si estima lon encore qu'il faisoit indignement & peu magnanimement de triumpher du petit triumphe à pied , que les Latins appellent Ovatio , pour avoir desfait des serfs fugitifz. Et quant à ce moindre triumphe , d'où il a esté nommé

Ovatio, & en quoy il est différent du grand triumphe, nous en avons ailleurs suffisamment escrit, en la vie de Marcellus.

XXIII. Après cela Pompeius estant dès lors appelé au consulat, Crassus encore qu'il eust esperance d'estre eleu consul quant & luy, ne desdaigna pas néanmoins de le requérir qu'il luy voulust aider. Pompeius en prit la charge bien volontiers, pource qu'il desiroit comment que ce fust, avoir rousjours Crassus obligé de quelque plaisir à luy : si luy favorisa fort affectueusement, jusques à dire publiquement en pleine assemblée de ville, qu'il ne sçauoit pas moins de gré au peuple de luy donner Crassus pour compagnon au consulat, que de le faire luy mesme consul : toutefois ilz ne continuerent pas en ceste benevolence quand ilz furent instalez en leur estat, ains eurent tousjours debat ensemble, & furent contrairés presque en toutes choses : de maniere que pour l'occasion de ce discord, ilz passerent tout leur consulat sans y rien faire qui soit digne de memoire, sinon que Crassus feit un grand sacrifice à Hercules, & un festin general au peuple Romain de mille tables, & distribua à chasque citoyen Romain du bled pour vivre trois mois. Mais sur la fin de leur consulat, ainsi comme ilz tenoyent assemblée de ville, il y eut un nommé Ona-

rius² Aurelius, homme peu cogneu, chevalier Romain toutefois, mais au demourant ne se meslant point des affaires, & se tenant la plus part du temps aux champs, lequel montant en la tribune aux harengues racompta au peuple une vision qu'il disoit avoir eue en dormant : « Car » Jupiter (dit il) m'estant ceste nuit apparu, » m'a commandé de vous dire publiquement que » vous ne souffriez point Crassus & Pompeius » se deposer de leur consulat, que premierement » ilz ne se soyent reconciliez ensemble ». Il n'eut pas plus tost achevé ceste parolle, que le peuple leur commanda qu'ilz feissent appointment : à quoy Pompeius ne respondit point, ains se teint tout coy sans bouger ny parler : mais Crassus luy toucha le premier en la main, & se tournant devers le peuple, dit tout hault, « Je ne fais » rien de lasche ny indigne de moy, seigneurs » Romains, si je recherche le premier l'amitié & » bonne grace de Pompeius, attendu que vous » mesmes l'avez surnommé grand avant qu'il eust » encore aucun poil de barbe, & que vous luy » avez decerné l'honneur du triumphe premier » qu'il fust du senat ».

XXIV. Voila tout ce qui fut fait de notable durant le consulat de Crassus : mais sa censure fut de tout poinct inutile, & se passa sans

² Il est ailleurs en la Vie de Pompeius nommé Caius. Amyot.

er
le
us
en
ne
lar
n,
que
ius
ant
ant
ole
: a
int
fus
ant
fais
urs
: de
ous
out
lay
ant

re-
re-
ans






Vous mêmes l'avez surnommé le Grand.

T. V. Fig. 38.

San Diego, 1811.

J. N. P. 1811.



y faire chose quelconque : car il ne s'y feit ny reveuë du senat, ny monstre des chevaliers, ny denombrement du peuple & estimation des biens d'un chascun, combien qu'il eust pour compaignon le plus doux & le plus traittable homme qui fust pour lors dedans Rome : mais on dit que dès le commencement Crassus ayant voulu faire un acte violent & inique, qui estoit de rendre l'Ægypte province tributaire aux Romains, Catulus luy resista vertueusement, & que de là s'estant meu different entre eulx, ilz quitterent l'un & l'autre volontairement leur estat.

XXV. Quant à la conjuration de Catilina, qui fut de grande consequence & près de ruiner & destruire la ville de Rome, Crassus en fut bien aucunement soupçonné, & y eut un des complices d'icelle qui le nomma comme en estant, mais on ne luy adjousta point de foy : & Ciceron même en quelque siene oraison en attache assez evidemment la suspicion à Crassus & à Cæsar, mais ceste oraison n'a esté publiée que depuis la mort de l'un & de l'autre : & en celle qu'il feit pour rendre compte des actes de son consulat, il dit que Crassus une nuit alla devers luy, & luy porta une lettre missive faisant mention de Catilina, comme luy confirmant que la conjuration dont on faisoit enqueste, estoit toute certaine. Tant y a que tousjours depuis Crassus

en voulut mal à Cicéron : mais ce qui le garda que tout ouvertement il n'en cherchast les moyens de luy nuire pour s'en venger, fut son filz Publius Crassus, lequel estant homme studieux, & qui aimoit les lettres, ne bougeoit des costez de Cicéron, de sorte que quand on luy voulut faire son procès, il changea de robbe comme luy, & en feit aussi changer aux autres jeunes hommes de bonne maison, & finalement feit tant par prieres envers son pere qu'il le reconcilia avec luy.

XXVI. Au demourant Cæsar estant de retour de son gouvernement se preparoit pour demander le consulat, & voyant que Pompeius & Crassus estoient de rechef retumbez en dissension l'un contre l'autre, ne vouloit pas en priant l'un de luy aider à sa brigue, encourir l'inimitié de l'autre, ny n'esperoit pas aussi sans le port de l'un ou de l'autre pouvoir obtenir ce qu'il pretendoit : à raison dequoy il se meit à moyener accord entre eulx, en leur remonstrant souvent & leur discourant, que taschans à se ruiner l'un l'autre, ilz venoyent à augmenter le credit & l'autorité d'un Cicéron, d'un Catulus & d'un Caton, lesquels n'auroient point de pouvoir s'ilz se vouloyent entr'entendre, en joignant ensemble leurs ligues & leurs parts, pour d'une force & d'un consentement commun manier toute la chose

choſe publique à leur voutunté. Ce que Cæſar leur ayant perſuadé, & les ayant reconciliez enſemble, vint par ce moyen à joindre & compoſer de leurs trois ligueſ une force inexpugnable & invincible, qui depuis ruina le peuple & le ſenat Romain : pource qu'il ne les rendit pas plus grands qu'ilz n'eſtoient au paravant, l'un par le moyen de l'autre, mais ſe feit ſoymeſme très grand par le moyen d'eulx deux : car ſi toſt qu'ilz l'eurent pris à favoriſer, il fut incontinent eleu conſul ſans difficulté quelconque, & s'eſtant bien porté en ſon conſulat, luy feirent au bout decerner de groſſes armées, & luy meirent en main les Gaules : ce qui fut, par manière de dire, le mettre avec leurs propres mains dedans la forterreſſe qui tiendrait la ville en ſubjection, eſperans qu'ilz butineroient entre eulx deux le demourant, quand ilz luy auroient procuré & fait decerner un tel gouvernement.

XXVII. Or quant à Pompeius ce qui luy feit faire ceſte faulte, ne fut autre choſe que ſon exceſſive ambition : mais quant à Crassus, outre ſon vice ancien & ordinaire d'avarice, il y ajouta encore une convoitiſe nouvelle de triumphes & de victoires, pour la jalouzie que ſusciterent en luy les haults faiçts d'armes de Cæſar, à fin que luy eſtant ſuperieur en toutes autres choſes, il ne luy fuſt inferieur en celle là ſeule, ny

jamais ne le lascha ceste ambitieuse passion , qu'elle ne l'eust conduit à une mort ignominieuse conjointe avec perte & calamité publique. Pource que Cæsar estant descendu de sa province de Gaule jusques en la ville de Luques , plusieurs Romains y allerent le voir , & entre autres Pompeius & Crassus , lesquelz ayans communiqué en secret avec luy , conclurent de mettre à bon esciant la main à l'œuvre pour tenir sous eulx toute la puissance de l'empire Romain , & ce moyenant que Cæsar retiendrait les forces qu'il avoit entre mains , & que Crassus & Pompeius prendroyent d'autres provinces & d'autres armées aussi : pour à quoy parvenir il n'y avoit qu'un seul moyen , qui estoit que Pompeius & Crassus briguassent un second consulat , à quoy Cæsar leur devoit aider en escrivant aux amis qu'il avoit dedans Rome , & y envoyant bon nombre de ses souldards qui se trouveroyent au jour de l'election.

XXVIII. Pour cest effect Pompeius & Crassus s'en retournerent à Rome , où ilz furent incontinent soupçonnez de ceste pratique , & courut le bruit assez commun par toute la ville , que ceste entreveue de Luques ne s'estoit point faite à aucune intention bonne , tellement que Marcellinus & Domitius demanderent en plein senat à Pompeius s'il prochasseroit le consulat , & il

leur respondit, que à l'aventure le prochasseroit il, & à l'aventure aussi que non : & la mesme demande luy estant de réchef repliquée, il respondit qu'il le prochasseroit pour les bons, & non pas pour les meschans. Ces réponses furent trouvées presumptueuses & fieres : mais Crassus respondit plus modestement ; que s'il voyoit qu'il fust expedient pour la chose publique, il le prochasseroit, sinon, qu'il ne le prochasseroit point, de maniere que sur ces paroles aucuns prirent la hardiesse de le prochasser, comme Domitius entre les autres : mais depuis quand ilz se furent ouvertement declarez poursuyvans, tous les autres par crainte se deporterent de leur poursuite, excepté Domitius que Caton pria, prescha & enhorra tant, comme son parent & son amy, qu'il le feit persister en son esperance, luy remontrant que cela estoit combattre pour la defense de la libetté, pource que ce n'estoit pas au consulat que Crassus & Pompeius aspiroyent, ains à une domination tyrannique, & que ce n'estoit point poursuite d'un magistrat ce qu'ilz faisoient, ains un violent ravissement de provinces telles qu'ilz voudroyent, & d'armées qu'ilz pretendoient se faire bailler par ce moyen.

XXIX. Caton criant tout hault ces propos, & aussi les croyant fermement, poulsa, par maniere de dire, Domitius à force jusques sur

la place, là où plusieurs gens de bien se joignirent à eulx, pource qu'ilz s'esmerveilloient quel besoing il estoit que ces deux personages poursuyvissent un second consular, & pourquoy ilz briguoyent de l'avoir de rechef ensemble & non avec d'autres, veu qu'il y en avoit tant qui n'estoyent point indignes d'estre compagnons ny de l'un ny de l'autre en ce magistrat. A ceste cause Pompeius craignant de ne pouvoir parvenir à son entente, n'espargna point de faire les plus deshonestes & plus violentes choses du monde : car entre plusieurs autres, le jour de l'election, ainsi comme Domitius accompagné de ses amis alloit bien matin, avant l'aube du jour, au lieu où elle se devoit faire, le serviteur qui portoit une torche devant luy fut occis, par gens qu'il avoit mis en embusche pour le tuer, & plusieurs de sa compagnie blecez, du nombre desquelz fut Caton, & les ayans tous mis en fuite, les reindrent assiegez & enfermez dedans une maison, jusques à ce qu'ilz furent eleuz tous deux ensemble consulz : & peu de temps après ayans faisy de rechef la tribune aux harengues avec armes, chassé Caton hors de la place, & fait occire quelques uns des contredifans qui ne voulurent pas fouir, ilz prolongerent à César son gouvernement des Gaules pour autres cinq ans, & pour eulx se feirent decreter par les voix du

peuple, les provinces de la Syrie & des Hespagnes : & depuis quand ilz vindrent à les tirer au fort entré eulx deux, la Syrie escheut à Crassus, & les Hespagnes à Pompeius.

XXX. Ceste adventure du fort fut agreable à chascun, pource que d'un costé le peuple ne vouloit pas que Pompeius esloignast de guerres loing la ville de Rome, & luy mesme estant amoureux de sa femme, estoit bien aise d'avoir occasion de s'en tenir près, en demourant le plus du temps en sa maison. Mais sur tous, Crassus incontinent que ce sort de la Syrie luy fut escheut, feit tant de demonstrations, que lon cogneut evidemment qu'il le tenoit pour le plus grand heur qui luy fust onques advenu, tellement qu'il ne se pouvoit pas tenir, qu'en grande compagnie, & entre des estrangers, il ne luy en eschappast quelque parole : mais en privé & entre ses familiers & amis, il dit tant de folles & vaines vanteries, que un jeune homme à peine en eust dit davantage : ce qui estoit & contre son aage & contre sa nature, ayant esté tout le reste de sa vie aussi reservé, & aussi peu vanteur qu'il est possible d'estre : mais lors s'estant elevé follement, & devoyé de son bon naturel, il ne fichtoit pas les bornes de son esperance à la conquête de la Syrie ny des Parthes, ains se promettant qu'il feroit voir que tout ce qu'avoit

fait Lucullus à l'encontre de Tigranes, & Pompeius à l'encontre de Mithridates, n'estoyent que jeux d'enfans, par maniere de dire, il estendoit l'esperance de ses conquestes jusques à la Bactriene, jusques aux Indes, & jusques à la grande mer Oceane du costé du soleil levant, combien que au decret qui en fut passé par le peuple, il ne soit fait aucune mention de la guerre contre les Parthes : mais tout le monde sçavoit bien que Crassus en brusloit de desir, tellement que Cæsar mesme luy en escrivit de la Gaule, luy louant sa deliberation, & l'enhortant de la poursuivre.

XXXI. Mais pourant que l'un des tribuns du peuple nommé Ateius, estoit tout resolu de s'opposer à son parlement, ayant plusieurs autres de mesme deliberation, lesquels trouvoyent fort mauvais que lon allast ainsi volontairement de guayeré de cuer, commencer la guerre à des peuples qui n'avoient aucunement irrité ny offensé les Romains, ains estoyent leurs amis & leurs alliez, Crassus craignant ceste conspiration requit Pompeius de luy vouloir assister, & l'accompagner jusques au dehors de la ville, à cause qu'il avoit grande autorité, & estoit fort reveré de la commune, ainsi qu'il apparut alors : car combien qu'il y eust grand nombre de peuple assemblé tout expressement pour empescher ce

partement de Crassus, & crier après luy, ce neantmoins quand ilz veirent Pompeius marcher devant luy avec un regard doux, & une face riante, ilz furent tous appaisez, & s'ouvrirent d'eulx mesmes pour les laisser passer, sans leur môt dire. Il est bien vray que le tribun Ateius se meit au devant d'eulx, & à haulte voix defendit à Crassus qu'il n'eust à bouger de la ville, avec grandes protestations s'il faisoit au contraire: & voyant que pour sa defense il ne laissoit pas d'aller son chemin, il commanda à l'un de ses sergens qu'il luy meist la main sur le collet pour l'arrester, ce que les autres tribuns n'ayant voulu permettre, l'officier lascha Crassus: & donc Ateius s'en courant vers la porte de la ville, meit une chaufferette pleine de feu ardent tout au milieu de la rue. Puis quand Crassus fut à l'endroit, jetta dedans quelques parfums, & fit dessus quelques aspersions en prononçant certaines maledictions & imprecations espouvantables & horribles, & invocant des dieux, dont les noms sont estranges & terribles: si disent les Romains que ces maledictions là sont bien anciennes, mais tenues secrètes, pource qu'elles ont telle efficace, que celuy qui en est une fois maudict, ne peut jamais eschapper, ny aussi celuy qui en use, il ne luy en prent jamais bien: à raison dequoy

peu de gens en usent, & non jamais que ce ne soit pour quelque grande occasion.

XXXII. A ceste cause reprenoit on grandement Ateius d'avoir prononcé telles imprecations, & essayé de si effroyables ceremonies, qui retournoyent au dommage de la chose publique, veu que c'estoit pour l'amour d'elle qu'il vouloit maudite Crassus, lequel ayant poursuivy son chemin arriva à Brundisium, que les tourmentes de l'hyver n'estoyent pas encores appaisées, mais pour cela il ne laissa pas de faire voile : aussi perdit il plusieurs vaisseaux, & neantmoins avec le reste de son armée se meit en chemin par terre à travers le royaume de la Galatie, là où il trouva le roy Dejotarus ¹ qui estoit fort vieil, & neantmoins bastissoit une nouvelle ville : si luy dit en se moquant, « Il me semble, sire »
 » roy, que tu commences bien tard à bastir,
 » de t'y estre mis à la dernière heure du jour ». Ce roy des Galates luy respondit sur le champ, « Aussi n'es tu pas toy mesme party gueres matin,
 » à ce que je voy, seigneur capitaine, pour aller
 » faire la guerre aux Parthes ». Car Crassus avoit ja passé soixante ans, & si le monstroit son visage encore plus vieil qu'il n'estoit.

¹ Celui pour qui Cicéron prononça devant César le discours que nous avons parmi ses ouvrages.

XXXIII. Au reste estant arrivé sur les lieux, les affaires du commencement luy succederent selon son esperance : car il bastit facilement un pont sur la riviere d'Euphrates, & passa sans inconvenient son armée par dessus : puis entrant en la Mesopotamie, y receut plusieurs villes, qui volontairement se rendirent à luy : toutefois il y en eut une, de laquelle estoit tyran un Apollonius, ou cent de ses souldards ayans esté tuez, il y mena toute son armée, & l'ayant prise à force, saccagea tous les biens, & vendit les personnes à l'encan. Les Grecs appelloient ceste ville Zenodotia, pour la prise de laquelle il souffrit que ses gens l'appellassent Imperator; c'est à dire, souverain capitaine : ce qui luy tourna à honte, & en fut estimé homme de bas & petit cueur, ayant peu d'esperance de grandes & haultes choses, puis qu'il faisoit cas d'un si petit exploit : puis ayant logé en garnison par les villes qui s'estoyent rendues à luy, jusques au nombre de sept mille hommes de pied, & environ mille chevaux, il s'en retourna en arriere passer son hyver au pais de la Syrie : là où son filz l'alla trouver, venant des Gaules d'avec Jules Cæsar, qui l'avoit honoré des prix d'honneur que les capitaines Romains ont accoustumé de donner aux gens de bien, & qui ont fait leur devoir en la guerre, & si amenoit à son pere mille hommes d'armes, tous gens d'élite.

XXXIV. Cela me semble avoir esté la premiere faulte, que commeit Crassus après l'entreprise de ceste guerre, qui fut la plus grande de toutes : pource qu'il falloit qu'il poulast oultre d'une tire, & qu'il donnast jusques en Babylone & en Seleucie, citez de tous temps ennemies des Parthes : & au contraire pour avoir differé, il donna temps & loisir à ses ennemis de se prouvoir & preparer. Davantage on blasme aussi grandement les occupations ausquelles il vacqua pendant qu'il fut de sejour en la Syrie, comme tenans plus du marchand que du capitaine : car il n'employa point ce temps à revoir son armée, ny à la faire exercer aux armes, ains à compter le revenu des villes, & demoura plusieurs jours à sommer aux poids & à la balance le tresor d'or & d'argent qui estoit au temple de la deesse de Hierapolis. Qui pis est, il envoyoit denoncer aux peuples, princes & villes, qu'ilz eussent à luy fournir certain nombre de gens de guerre, & puis les en dispensoit en prenant argent d'eulx : ce qui luy donna très mauvais bruit, & le feit venir en grand mespris de tout le monde.

XXXV. Le premier presage de son malheur luy vint de ceste deesse de Hierapolis, laquelle aucuns estiment estre Venus : les autres disent que c'est Juno : les autres veulent que ce soit la nature & la cause premiere qui donne les com-

mencemens d'humeur aux choses qui viennent en estre, & celle qui a enseigné aux hommes la source dont procedent tous biens. Car ainsi comme ilz sortoyent de son temple, le jeune Crassus tomba le premier sur la face, & luy mesme après rebucha sur son filz : & comme ja il faisoit assembler les garnisons des lieux où elles avoyent hyverné pour marcher en campagne, il arriva devers luy des ambassadeurs de la part du roy des Parthes ¹ Arsaces, qui luy exposerent leur charge en peu de paroles, disans que si ceste armée estoit envoyée par les Romains pour guerroyer leur maistre, il ne vouloit aucune paix ny amitié avec eulx, ains entendoit leur faire guerre mortelle à toute oultrance : mais s'il estoit ainsi, comme il avoit ouy dire, que Crassus contre la volonté de ses citoyens, par une convoitise particuliere de faire son profit, fust venu de gayeré de cueur, commencer la guerre aux Parthes, & occuper leur país, qu'en ce cas là Arsaces se porteroit plus modereement pour la pitié qu'il avoit de la vieillesse de Crassus, & qu'il se contenteroit de laisser aller vies & bagues sauves les gens de guerre Romains, qu'il esti-

¹ Ce nom d'Arsaces, ou Arsacides, estoit commun à tous les rois des Parthes. *Amya*. On va voir en effet que le roi des Parthes à cette époque s'appelloit Hyrodès, selon Plutarque, Orodès, selon Appien & Dion Cassius.

moit estre plus tost dedans ses villes en prison; qu'en garnison. A cela respondit Crassus bravement, qu'il leur feroit response dedans la cité de Seleucie, dequoy le plus ancien des ambassadeurs, qui avoit nom Vagises, se prit à rire, & luy montrant la paulme de sa main, luy dit, « Plustost naistroit du poil dedans ce creux de » ma main, Crassus, que tu voyes la cité de » Seleucie ». Ainsi se partirent ces ambassadeurs, & s'en retournerent devers le roy Hyrodes, luy denoncer qu'il ne falloist penser qu'à la guerre.

XXXVI. Sur ces entrefaites aucuns des gens de guerre que lon avoit laissez en garnison dedans les villes de la Mesopotamie, s'en estans sauvez avec grand danger, & par grand'aventure, apporterent à Crassus des nouvelles qui meritoient bien que lon y pensast soigneusement, ayans veu à l'œil le grand nombre de combatans qu'il y avoit au camp de l'ennemy, & leur maniere de combatre en quelques assaults qu'ilz avoyent donnez ausdittes villes : & comme il advient ordinairement à ceulx qui sont eschappez de quelque danger, faisans les choses encore plus espouvantables & plus dangereuses qu'elles n'estoyent, ilz alloyent comptant, que c'estoit chose impossible de se sauver de vistesse devant eulx quand ilz poursuivoient, ny de les atteindre

quand ilz fuyoyent, & qu'ilz avoyent des sortes de fiesches qui voloyent plus viste que la veuë, & qui perceoyent tout ce qu'elles rencontroyent avant que lon peust voir celuy qui les deslaschoit. Au demourant quant aux armes dont usoyent leurs gens de cheval, que les offensives estoyent telles, qu'il n'y avoit harnois, quel qu'il fust, qu'elles ne faullassent, & les defensives trempées de sorte, qu'il n'y avoit effort auquel elles ne resistassent.

XXXVII. Les soudards Romains oyans ces nouvelles rabbatoyent fort de leur audace, pource qu'ilz s'estoyent au paravant promis, que les Parthes ne differoyent en rien d'avec les Armeniens & les Cappadociens, que Lucullus avoit tant batus & tant pillez qu'il s'en estoit lassé, & avoyent ja fait leur compte, que toute la plus grande difficulté qu'ilz auroyent en toute ceste guerre, seroit la longueur du chemin qu'il leur conviendrait faire, & le travail de poursuyvre & chasser gens qui ne les attendroyent point: & lors tout au rebours de leur esperance, ilz entendoient qu'il leur faudroit venir aux mains & combattre à bon esciant: au moyen dequoy quelques uns de ceulx mesmes qui avoyent charge & autorité en l'ost, entre lesquelz fut Cassius le questeur & superintendant des finances, furent d'avis que Crassus se devoit arrester là tout court,

pour remettre de rechef l'entreprise totale en deliberation du conseil, à sçavoir, si l'on devoit tirer oultre, ou quoy. Les devins mesmes donnoient couvertement à entendre à demy, que les dieux en tous leurs sacrifices monstroyent de malheureux presages, & mal aisez à pacifier : mais Crassus ne leur presta point l'oreille, ny à eulx, ny à autres quelconques, sinon à ceulx qui luy conseilloyent de se haster, mais ce qui plus l'assura & l'encouragea, fut Artabazes le roy de l'Armenie, lequel vint devers luy en son camp avec six mille chevaux, qui n'estoyent seulement que la cornette & la garde du roy : car il en promettoit autres dix mille tous armez à blanc & bardez, avec trente mille hommes de pied qu'il entretenoit à sa soude ordinaire, consultant à Crassus qu'il entraist dedans le pais des Parthes par le costé de l'Armenie, pourautant que non seulement son camp auroit foison de vivres qu'il luy fourniroit de ses pais, mais aussi pour autant qu'il marcheroit en seureté, ayant au devant de luy un pais de montagnes & pais bossu, mal aisé à gens de cheval, qui estoit la seule force des Parthes. Crassus le remercia assez froidement de sa bonne volonté, & de l'offre d'un si beau & si magnifique secours : mais il luy dit qu'il prendroit son chemin par la Mesopotamie, là où il avoit laissé beaucoup & de bons

hommes de guerre Romains , & à tant se departit ce roy Armenien.

XXXVIII. Mais ainsi comme Crassus passoit son armée par dessus le pont qu'il avoit fait dresser sur la riviere d'Euphrates, il se leva tout à l'entour d'estranges & horribles tonnerres, avec esclairs continuelz qui donnoient droit dedans les yeux de ses gens : davantage il fundit une nuée noire, dont il sortit un impetueux tourbillon de vent, avec une foudre ardente dessus son pont, qui en rompit & brisa une grande partie, & tomba deux coups de foudre dedans le lieu où son camp devoit aller loger. Qui plus est l'un de ses grands chevaux estant accoustré magnifiquement, prit son mors aux dents, & avec celui qui le chevauchoit, s'alla jeter dedans la riviere, où il se noya, de sorte que lon ne le reveit oncques puis : & dit on que la premiere aigle, quand on la cuida enlever pour faire marcher le camp, se retourna d'elle mesme en arriere. Oultre ce, il advint que quand on distribua les vivres aux souldards, après qu'ilz eurent tous passé le pont, la premiere chose qu'on leur donna, furent du sel & des¹ lentilles, que les Romains estiment signes de deuil & presage de mort : pource que lon en sert es funerailles des trespassez. Après tout cela, ainsi que Crassus

¹ Autres lisent *μύζα* qui signifie de la tourte. *Amyor.*

mesme harenguoit & preschoit les souldards, il luy eschappa une parole qui troubla grandement toute l'armée : car il leur dit qu'il faisoit expressement rompre le pont qu'il avoit basti sur la riviere, à fin qu'il ne retournast pas un d'eulx : & là où s'estant apperceu que ceste parole inconsiderement ditte, avoit esté mal prise, il la devoit reprendre & exposer comme il l'entendoit, veu que ses gens en estoient estonnez, il n'en feit compte, tant il fut opiniastre. Finablement il feit le sacrifice accoustumé pour la purgation de son armée, & comme le devin luy tendist les entrailles de l'hostie qui avoit esté immolée, elles luy tumberent des mains, dequoy voyant que tous les assistens estoient faschez & troublez, il se prit à rire en disant : « Voilà que » c'est de vieillesse, mais toutefois vous verrez » que les armes ne me tumberont ja des poings ».

XXXIX. Cela fait il commença de marcher en païs le long de la riviere ¹, avec sept legions de gens de pied, & peu moins de quatre mille chevaulx, & presque autant de gens de traict armez à la legere : si luy vindrent aucuns de ses avantcoureurs qui venoyent de descouvrir le païs, faire rapport, qu'il ne paroissoit homme quelconque en toute la campagne : mais

¹ Dion Cassius nous apprend que c'étoit l'Euphrate, p. 82, édit. R. Steph. 1548, in-fol. gr.

que

que bien avoyent ilz trouvé la trace de grand nombre de chevaux, qui sembloient s'en estre retournez en arriere, dont Crassus le premier reprit bonne esperance, & ses gens aussi, qui commencerent à en desestimer les Parthes, tenans pour tout assésuré, qu'ilz ne viendroyent point au combat. Toutefois Cassius au contraire luy remonstroit tousjours, qu'il luy sembloit meilleur qu'il refreschist un peu son armée en quelques unes des villes où il tenoit garnison, jusques à ce qu'il entendist quelque chose certaine des ennemis, ou bien qu'il tirast droit à la cité de Seleucie le long de la riviere, laquelle luy donneroit moyen de faire conduire vivres aisement par bateaux, qui suyvroient tousjours son camp, & si les garderoit que les ennemis ne les peussent environner par derriere, tellement que ne les pouvans assaillir que par devant, ilz n'auroient point davantage sur eulx.

XL. Ainsi comme Crassus estoit après à consulter & deliberer sur cela, il vint à luy un capitaine d'Arabes nommé Ariamnes¹, homme fin & cauteleux, qui fut le principal & le plus grand de tous les malheurs, que la fortune assembla lors en un mesme temps, pour faire

¹ Appien le nomme Acbarus. Amyot. *Libr. de Bell. Parth.* p. 229, Edit. Amstel. 1670, in-8°. Dion Cassius le nomme Augarus, L. XL, p. 82.

trebucher Crassus en miserable ruine : car il y avoit quelques uns de ceulx qui paravant avoyent esté en ces païs là à la guerre, soubz Pompeius, qui le cognoissoyent bien, & sçachans que Pompeius luy avoit fait quelques plaisirs, cuidoyent que pour cela il fust demouré bien affectionné envers les Romains : mais il avoit esté lors pratiqué & attilré par les capitaines du roy des Parthes, avec lesquelz il avoit intelligence, pour abuser Crassus, & tascher à le tirer le plus arriere qu'il pourroit de la riviere & du païs bossu, pour le jetter en païs de campagne infinie, où lon le peust envelopper de tous costez avec la chevalerie : car ilz ne vouloyent rien moins qu'aller chocquer de front les Romains à coups de main. Ce Barbare donques estant venu devers Crassus, commença à hault-louer Pompeius comme son bienfaicteur (car il estoit avec tout le reste un beau parleur) & magnifiant l'armée de Crassus, le reprenoit de ce qu'il alloit ainsi tirant les choses en longueur, en dilayant & consumant le temps à faire ses preparatifs, comme s'il eust besoing d'armes, & non de pieds & de mains assez habiles & vistes, contre des ennemis, qui de long temps ne pensoyent à autre chose qu'à prendre les plus cheres personnes, & plus precieux meubles qu'ilz eussent, pour s'en fouir à tout ès deserts de la

Scythie, ou de l'Hyrkanie. « Mais encore si vous » pensiez, disoit il, avoir à les combattre, la » raison voudroit que vous vous hastissiez de les » aller donques trouver, avant que leur roy eust » mis toutes ses forcès ensemble : car pour le » present vous n'avez en teste que Surena & Sil- » laces deux de ses lieutenans, qu'il a jettez au » devant de vous pour vous amuser, & engarder » que vous ne le poursuiviez : mais quant à luy, » il ne comparoïstra point ».

XLI. Tout cela estoit fauls, pource que Hyrodes¹ ayant dès le commencement divisé ses forces en deux, luy avec une partie alloit destruisant le royaume d'Arménie pour se venger du roy Artabazes, & avoit envoyé Surena à l'encontre des Romains, non qu'il le feïst à mon advis, par maniere de mespris, comme quelques uns ont voulu dire, pource qu'il n'est pas vray-semblable qu'il desdaignast de se trouver en bataille contre Crassus, qui estoit l'un des principaux hommes de la ville de Rome, & qu'il trouvast plus honorable d'aller faire la guerre à Artabazes en Armenie, ains me semble qu'il le faisoit expressement pour éviter le plus apparent danger, se tenant ce pendant au loing, où il peust à seureté regarder & attendre ce qui en adviendroit, & qu'il envoya devant Surena pour tenter

¹ Voyez la note sur le chap. xxxv.

la fortune du combat , & aussi pour divertir les Romains : car Surena n'estoit point homme de basse ou petite qualité , ains le second des Parthes après le roy , tant en noblesse , qu'en richesse & en reputation : mais en vaillance , suffisance & experience au faict des armes , le premier personnage qui fust de son temps entre les Parthes , & au demourant en grandeur & beaulté de corps , ne cedant à nul autre. Quand il marchoit par les champs avec son train seulement , il avoit bien tousjours mille chameaux à porter son bagage , & menoit deux cents chariots de concubines , & d'hommes d'armes armez de toutes pieces , mille , & d'autres armez à la legere encore davantage , de sorte qu'il faisoit en tout de ses subjects & vassaux plus de dix mille chevaux. Il avoit par succession hereditaire de ses ancestres le privilege de mettre le premier le bandeau royal ou diademe à l'entour de la teste du roy quand il estoit déclaré roy , & si avoit outre cela remis le roy Hyrodes , qui re-
gnoit pour lors , en son royaume , duquel il avoit esté dechassé , & luy avoit conquis la grande cité de Seleucie , ayant esté le premier qui avoit monté sur les murailles , & ayant renversé de sa propre main ceulx qui les defendoyent. Et combien qu'il n'eust pas encore pour lors trente ans , si estoit il tenu pour homme très sage , de

bon sens & de bon conseil , qui furent les moyens par lesquels il desfeit Crassus , lequel par son audace & son oultrecuidance du commencement , & depuis par la crainte & l'espouventement ou le reduisirent ses malheurs, se rendit facile à surprendre , & exposé à tous aguets.

XLII. Parquoy le Barbare luy ayant lors fait croire tout ce qu'il voulut , en l'essoignant de la riviere le mena par travers de la plaine , là où du commencement ilz eurent le chemin assez beau , mais puis après fort mauvais , pource qu'ilz entrerent en des sablons où leurs pieds enfondroyent bien avant , & en des campagnes rases , où il n'y avoit , ny arbres , ny eaux quelconques , & dont lon ne veoit fin ne borne aucune que lon peust discerner à l'œil , de forte que non seulement la soif & la malaissance du chemin travailloit les Romains , mais aussi le desconfort de leur veü , qui n'avoit à quoy s'arrester , les descourageoit , à cause qu'ilz ne voyoyent ny près , ny loing , ny arbre , ny riviere ou ruisseau , ny coustau de montagne , ny herbe ou plante verdoyante , ains à parler proprement une mer infinie d'arenes desertes de tous costez de leur camp. Cela commença à les faire doubter qu'ilz estoient trahis : mais quand avec cela il leur vint nouvelles de Artabazes , qui manda qu'il estoit detenu en son país par la grosse

guerre que Hyrodes luy faisoit, à l'occasion de laquelle il ne pouvoit envoyer le secours qu'il avoit promis : mais qu'il conseilloit à Crassus de tourner son chemin vers Armenie, à fin que leurs forces joinctes ensemble ilz combattissent le roy Hyrodes : sinon à tout le moins qu'il fust adverty de marcher tousjours, & se camper en pais bossu, fuyant les plaines & lieux où la chevalerie se peust aider, & s'approchant tousjours des montagnes. A cela Crassus par sa folie ne voulut rien rescrire, ains respondit de bouche seulement en cholere, que pour lors il n'avoit pas loisir d'entendre au faict des Armeniens : mais que puis après il iroit en Armenie pour se venger de la trahison que Artabazes luy faisoit. Si fut Cassius de rechef fort courroucé de ceste response : mais pource qu'il voyoit que Crassus ne prenoit pas en bonne part ce qu'il luy en disoit, il ne luy en voulut plus rien remonstrer : mais tirant à part ce capitaine d'Arabes, Ariamnes, le tenfa aigrement en luy disant : « O mal-
 » heureux & meschant que tu es, quel maling
 » esprit t'a amené vers nous, & par quelz char-
 » mes & forcelleries as tu si bien sceu enchanter
 » Crassus, que tu luy ayes persuadé de venir
 » jeter son armée en cest abyfme de desert ;
 » & prendre ce chemin qui mieulx est conve-
 » nable à un Arabe capitaine de larrons, qu'à

« un capitaine general du peuple Romain » ?
 Le Barbare estant homme cault & malicieux,
 parlant tout doux le reconfortoit, & le prioit
 d'avoir encore un peu de patience, & en allant
 & venant au lon des bendes, faisant semblant
 d'aider aux souldards, leur disoit par maniere
 de risée, « Je croy, compagnons, que vous
 » cuidez cheminer par la campagne de Naples,
 » & voudriez bien trouver les beaux ruisseaux
 » & fresches fontaines, les petits bocages, les
 » baings naturelz, & les bonnes hostelleries qui
 » sont à l'entour, pour vous refreschir, & ne
 » vous souvenez pas que vous traversez les de-
 » ferts des confins de l'Arabie & de l'Assyrie ».

XLIII. Voilà comment ce Barbare alloit
 entretenant les Romains pour un temps : mais
 depuis avant qu'il fust notoirement descouvert
 pour traistre, il deslogea de bonne heure, route-
 fois encore fut ce du sceu & consentement de
 Crassus, auquel il donna à entendre qu'il iroit
 brasser quelque trouble & tumulte au camp des
 ennemis. Lon dit que ce jour là Crassus sortit
 de sa tente avec une robe noire, non point
 rouge, comme est la coustume des capiraines
 Romains : toutefois s'en estant advisé, il la
 changea incontinent : & dit on plus, que ceulx
 qui portoyent les enseignes eurent beaucoup affaire
 à en arracher les bastons, tant ilz estoient fichez

avant en terre, quand il fallut partir : dequoy Crassus se mocquant, les hastoit encores d'aller, contraignant les gens de pied de marcher aussi tost comme la gendarmerie, jusques à ce qu'il retourna quelque peu des coureurs que lon avoit envoyez devant pour descouvrir, lesquelz rapporterent que tous leurs autres compagnons avoyent esté desfaicts par les ennemis, & que eulx avoyent eu beaucoup d'affaire à se sauver de leurs mains, & qu'ilz s'en venoyent en grand nombre, bien deliberez de leur donner la bataille. Ceste nouvelle estonna tout le camp : mais Crassus s'en trouva encore plus estonné que nul autre : si commença à renger ses gens en bataille, n'ayant pas le sens bien rassis de haste & d'effroy qu'il avoit : si feit ses rens clairs du commencement, regeant les soudards en quarré assez loing l'un de l'autre, à fin d'occuper le plus qu'il pourroit de la plaine, pour engarder que les ennemis ne le peussent envelopper, suyvant l'advis & le conseil de Cassius, & departir ce qu'il avoit de gens de cheval sur les deux ailes : mais depuis il changea d'opinion & estroiffit la bataille de ses gens de pied en forme de brique plus longue que large, faisant front & montrant visage de toutes parts : car il y avoit douze cohortes en file à chasque costé, & au long de chasque cohorte une compagnie de gens de

cheval , à fin qu'il n'y eust aucun endroit qui n'eust le secours de la chevalerie tout prest , & que de tous costez sa bataille en fust également remparée : puis en donna une poincte à conduire à Cassius , l'autre à son filz Publius Crassus , & luy se meit au milieu , en laquelle ordonnance ilz marcherent tant qu'ilz arriverent à un ruisseau nommé Ballissus , qui n'est pas grand , & où il n'y a pas beaucoup d'eau , mais qui vint neantmoins bien à poinct aux souldards pour la grande soif & les grandes chaleurs qu'ilz avoyent endurées par chemin si penible , où ilz n'avoyent point trouvé d'eau.

XLIV. Si furent la plus part des capitaines d'opinion que lon devoit là camper & y passer la nuit , à fin de pouvoir ce pendant recognoistre les ennemis le plus que lon pourroit , & sçavoir quel nombre de combatans ilz estoyent , & en quel equippage , pour le lendemain au matin les aller trouver : mais Crassus se laissant aller à l'instance que luy faisoient son filz & les hommes d'armes qu'il avoit amenez avec quant & luy , qui le pressoyent de faire marcher l'armée , & sans delay aller charger l'ennemy , il commanda que ceulx qui voudroyent repaistre repeussent tout debout sans bouger de leurs rens : puis tout soudain avant que ce mandement peust estre allé par tout , commanda de rechef que lon marchast , non

point le petit pas ny à reposées, comme il fault faire quand on va donner une bataille, ains viste & roide, jusques à ce que lon apperceut les ennemis, qui de prime face ne semblèrent pas aux Romains estre en si grand nombre, n'en si brave equippage comme ilz avoyent estimé : car quant à la multitude, Surena l'avoit expressement couverte de quelques troupes qu'il avoit jettées devant, & pour cacher la splendeur de leurs harnois leur avoit fait jeter des habillemens & des peaux de bestes par dessus leurs armes. Mais quand ilz furent près les uns des autres, & que le signe de choquer fut levé en l'air, premierement ilz remplirent toute la campagne d'un bruit espouvantable & terrible à ouir, pource que les Parthes ne s'incitent pas à combattre par le son des cornets ny des trompettes & clairons, ains ont de gros taburins de cuir creux par dedans, à l'entour desquelz ilz attachent des sonnettes & autres quinquaiilleries de leton, puis sonnent avec cela de plusieurs costez tout ensemble, dont il en sort un bruit sourd, qui semble proprement meslé du rugissement de quelque beste sauvage & du son effroyable du tonnerre, entendans très bien que l'ouye est celuy de tous les sentimens, qui plus promptement & plus vivement emeut l'ame & les passions d'icelle, & plus soudainement fait sortir l'homme hors de soy.

XLV. Estans donques ja les cueurs des Romains effroyez de ce son là , les Parthes tout à un coup jetterent à bas les couvertures qu'ilz avoyent mises par dessus leurs harnois , & adonc se monstrent ilz flamboyans avec leurs armets & cuiraces de fer Margien bien forby , qui estincelle & reluit comme feu , & leurs chevaux semblablement bardez de bardes de fer & de cuyvre , mesmement le capitaine en chef de toute leur armée , Surena , qui estoit le plus bel homme & le plus grand de tout son ost , & estimé aussi hardy & aussi vaillant de sa personne qu'il y en eust point , encore que la delicateſſe de sa beaulté qui tenoit un peu de l'effeminé , ne promeist pas une telle fermeté de courage , pource qu'il se fardoit le visage , & portoit les cheveux mespartis en greve à la guise des Medois , combien que les autres Parthes laissaſſent encore croistre leurs cheveux à la mode des Tartares , sans les agencer ny peigner aucunement , pour en estre plus effroyables à voir à leurs ennemis. Si avoyent du commencement proposé de charger les Romains avec leurs bourdons , pour essayer de fendre & ouvrir leurs premiers rens : mais quand ilz veirent de près la profondeur de leur bataille si bien serrée , & où les hommes estoient plantez si fermes & de pied coy , ilz reculerent arriere : & là où il

sembloit qu'ilz se voulussent escarter, desbender & mettre en rouverte, on fut tout esbahy que lon apperceut au contraire qu'ilz le faisoient pour envelopper leurs ennemis de toutes partz. Si commanda Crassus à ses gens de traict & armez à la legere, qu'ilz feissent une faillie sur eulx, ce qu'ilz feirent : mais ilz n'allerent pas gueres loing, car ilz furent soudain accueilliz & enferrez de tant de coups de flesches, qu'ilz furent contrains de se rejeter de rechef sous le couvert de leurs gens armez : ce qui fut le commencement du trouble & de l'effroy, quand les Romains veirent la violence & la faulcée grande que faisoient ces coups de flesches des ennemis, qui rompoient leurs armes, & perçoient tout ce qu'ilz rencontroyent, autant le dur que le tendre.

XLVI. Adonc les Parthes se tenans un peu arriere, commencerent à descoucher de loing tous ensemble de tous costez, sans viser à point nommé, pour autant que la bataille des Romains estoit si pressée, & leurs rens si ferrez, que quand ilz eussent voulu, ilz n'eussent sceu faillir à en assener quelqu'un : si donnoient de merveilleux coups de sagettes avec leurs arcs, qui estoient grands & forts, & qui par la grandeur de leur tour, quand on les enfonceoit à point, chassoyent la fleche avec une roideur & impe-

tuosité merveilleuse. Au moyen dequoy les Romains se trouvoyent desja en mauvais termes : car s'ilz demouroient en leurs rens , ilz y estoyent grievement navrez , & s'ilz en cuidoient sortir pour aller joindre de près & choquer l'ennemy , ilz trouvoyent qu'ilz ne luy pouvoient non plus faire de dommage , & en recevoient tout autant : pource que au pris qu'ilz approchoient , les Parthes s'en fuyoyent , & si ne laissoient pas de tirer tousjours en fuyant : car ilz le sçavent faire mieulx que gens du monde , après les Scythes : & est bon sens à eulx , pour autant qu'en se sauvant de vifesse , ilz combattent tousjours : & par ainsi osteut l'infamie à leur fuite.

XLVII. Si soubsteindrent toutefois les Romains , & endurerent tant qu'ilz eurent esperance que les Parthes , après avoir despesché toutes leurs flesches , cesseroient de combattre , ou bien viendroyent aux coups de main : mais quand ilz entendirent qu'il y avoit un grand nombre de chameaux tous chargez de flesches , là où les premiers qui avoyent tiré , faisans le tour en alloient prendre de nouvelles ; adonc Crassus voyant qu'ilz n'en auroient jamais le bout , commença à perdre le courage , & envoya devers son filz , mandant qu'il s'efforceast de joindre & charger les ennemis , avant que par

eux ilz fussent enveloppez de toutes parts : car c'estoit de son costé principalement , que l'une des poinctes de la bataille des ennemis s'approchoit le plus près , & le chevaloit pour l'environner par derriere. Parquoy le jeune Crassus prenant avec soy treize cents chevaulx , dont les mille estoient de ceulx que César avoit envoyez , & cinq cents hommes de traict , avec huit enseignes de gens de pied portans boucliers les plus prochaines de l'endroit où il estoit , s'eslargit un petit en tournoyant pour aller chocquer ceulx qui le chevaloyent , lesquels le voyans venir , soit ou qu'ilz se fussent rencontrez en un maretz , comme aucuns disent , ou plus tost que malicieusement ilz usassent de ceste ruse , pour attirer ce jeune homme le plus loing qu'ilz pourroyent de son pere tournerent bride & se meirent en fuitte : quoy voyant le jeune Crassus s'escria tout hault , Ilz ne nous attendront pas , & picqua à bride abbatue après , aussi feirent quand & luy Cenforinus & Megabacchus ¹ , l'un sénateur Romain &

¹ Des sçavans demandent quel nom Romain est caché sous ce nom de Megabacchus , qui n'est sûrement pas Romain. Je n'en fais rien , mais je sais qu'Appien l'appelle aussi Megabacchus , & je ne crois pas qu'il soit nécessaire que ce fut un Romain , puisqu'indépendamment des amis que les Romains avoient dans cette partie de l'Asie , César avoit envoyé à Crassus mille Gaulois , parmi lesquels il pouvoit bien y avoir quelque jeune homme de distinction qui portât ce nom.

homme eloquent , l'autre hardy homme , fort & vaillant de sa personne , tous deux familiers amis de Crassus , & presque de son aage. Ainsi estans les gens de cheval de celle troupe attirés à la poursuite , ceux de pied ne voulurent pas non plus demourer derriere , ny monstrier qu'ils eussent moins de courage , ny moins de joye ou d'esperance : car ilz cuidoyent bien avoir ja tout vaincu , & ne faire plus que chasser , jusques à ce , que quand ilz se furent bien esloignez , ilz apperceurent la tromperie : pource que ceux qui faisoient semblant de fouir devant eulx , tournerent visage tout court , & d'autres encore en plus grand nombre leur vindrent courir sus ; si s'arrestèrent de pied quoy aussi , pensans que les ennemis voyans qu'ilz estoient ainsi peu de gens , les viendroyent charger à coups de main : mais ilz leur meirent au devant une teste de leurs hommes d'armes bardez & armez de toutes pieces , & espendirent leurs chevaux legers çà & là à l'entour d'eulx , sans tenir ordonnance : lesquels en chevauchant & voltigeant parmy la plaine , remuerent les monceaux de sable jusques au fond , dont il se leva en l'air une poussiere si merueilleuse , que les Romains ne se pouvoient pas à peine entrevoir ny parler ensemble : ains estans serrez en peu de lieu , & s'entrepressans les uns les autres , estoient navrez à coups de

fleſches , & mouroyent d'une mort qui n'eſtoit point aiſée ny foudaine , ains crioyent d'angoiſſe pour la deſtreſſe de douleur qu'ilz ſentoient , & en ſe tourmentant & tournant deſſus le ſable , rompoyent les fleſches dedans leurs playes : puis en taſchant à arracher à force les pointes barbelées , qui avoyent penetré au dedans de leurs corps bien avant , à travers les veines & les nerfs , ilz venoyent à deſchirer leurs playes davantage , & conſequemment à ſe perdre & affoler eulx meſmes : ſi y en avoit beaucoup qui mouroyent en ce martyre , & ceulx qui ne mouroyent pas demouroyent inutiles à ſe defendre.

XLVIII. Et comme Publius Crassus les priaſt & enhortaſt de donner dedans les hommes d'armes bardez , ilz luy monſtroient leurs mains couſues à coups de fleſches avec leurs pavois , & leurs piedz ſemblablement percez de part en part , & attachez à la terre : de ſorte qu'ilz n'euffent ſceu ny ſ'enfouir , ny ſe defendre. Parquoy luy meſme encourageant ſes gens de cheval , les alla chocquer avec eulx , & les chargea bien vigoureuſement , mais c'eſtoit avec trop de deſavantage , tant à offeſſer , qu'à ſe defendre : pource que luy & ſes gens frappoyent avec des javelines foibles & legeres ſur de fortes cuiraces de bon acier ou de gros cuir : & au contraire

contraire les Parthes avec forts & puissans bourdons chargeoyent dessus les Gaulois, qui avoyent les corps nuds, ou fort legerement armez. C'estoyent ceulx ausquelz le jeune Crassus se fioit le plus, comme ceulx avec lesquelz il faisoit de merueilleuses prouësses : car ilz empoignoyent à belles mains les bourdons des Parthes, & les embrassans corps à corps, les jettoient de dessus leurs chevaux en terre là où ilz demouroient tous estendus sans se pouvoit remuer pour la pesanteur de leurs armes, & plusieurs y en avoit qui laissoient leurs chevaux, & se jettoient sous les ventres de ceulx des ennemis qu'ilz perceoyent à coups d'espée. Les chevaux de la douleur bondissoient en l'air, & foulans aux piedz leurs maistres & leurs ennemis pello mesle rumboient morts en la place. Et si y avoit davantage, que la chaleur & la soif travailloit fort les Gaulois, qui n'avoyent point accoustumé d'endurer ny l'une ny l'autre : & y demoura aussi la plus grande partie de leurs chevaux ; qui en courant de toute leur puissance contre les hommes d'armes des Parthes s'enfermoient eulx mesmes des poinctes de leurs bourdons. Si furent à la fin contraincts de se retirer devers leurs gens de pied, ayans au milieu d'eulx Publius Crassus qui se trouvoit desja fort mal des playes qu'il avoit receües. Et voyans assez près d'eulx une

motte d'arenas un peu relevée, tirerent celle part, où ilz attacherent leurs chevaux au milieu, & enclouirent le pourpris de la motte avec une haye qu'ilz feirent de leurs targes & pavois, cuidans par ce moyen se couvrir & defendre mieulx des Barbares, mais il leur en advint tout au contraire : pource qu'en pais uny & plain, ceulx des premiers reings couvrent aucunement ceulx de derriere, mais là ceulx de derriere se trouvant tousjours plus hault que ceulx de devant, pour la nature de la motte qui se relevoit au milieu, ilz ne pouvoient aucunement eschapper, ains estoient tous atteints également autant les uns que les autres, regretans leur misere & malheur, de ce qu'il leur falloit ainsi pauvrement mourir sans avoir moyen de faire sentir leur valeur à leurs ennemis.

XLIX. Or y avoit il lors avec Publius Crassus deux Grecs de ceulx qui habitent en celle marche, en une ville appelée Carres, & se nommoit l'un Hieronymus, & l'autre Nicomachus: ceulx là conseillèrent à Publius Crassus qu'il essayast de se desrober avec eulx, & s'enfuir en une ville nommée Ischnes, qui n'estoit pas loing de là, & tenoit le party des Romains: mais il leur respondit, qu'il n'estoit point de si cruelle mort au monde, que pour crainte d'icelle il voulust abandonner ceulx qui mouroyent pour l'amour

de luy. Cela dit, il leur conseilla qu'ilz advinsent à eulx sauver, & les embrassant leur donna congé : & luy ne se pouvant aider de la main qu'il avoit percée d'un coup de fiesche, commanda à son escuyer qu'il luy donnast de l'espée à travers le corps, luy présentant le flanc. On dit que Censorinus en fit tout autant : mais Megabacchus se tua luy mesme de sa propre main, & aussi feirent les plus gens de bien qui fussent en la troupe : & quant aux autres qui demourerent, les Parthes montans contremont la motte les percerent en combatant avec leurs lances & bourdons, & n'y en eut point plus de cinq cents de pris prisonniers. Cela fait, ilz couperent la teste à Publius Crassus, & s'en retournerent aussi tost contre le pere, lequel estoit lors en tel estat : après qu'il eut commandé à son filz qu'il chargeast les ennemis, & qu'il y eut quelqu'un qui luy rapporta qu'il les avoit rompus, & qu'il les chassoit bien loing, joinct qu'il apperceut que ceulx qui estoient demourez en leur grosse bataille, ne le pressoyent pas si vivement comme ilz faisoient au paravant, à cause que une bonne partie estoit couruë après les autres, il commença à reprendre un peu de courage, & tenant ses gens serrez, les retira le mieux qu'il peût au long d'un coustau, esperant toujours que son filz ne demoureroit gueres à

retourner de la chasse. Mais Publius se voyant en danger, avoit envoyé plusieurs messagers devers son pere, pour le luy faire entendre, dont la plus part tumba ès mains des Barbares, qui les desfeirent : & les derniers estans eschappez à grande peine, luy apportèrent nouvelle comme son filz estoit perdu, si promptement il n'estoit secouru, & encore avec une grosse puissance.

L. Ces nouvelles ouyes, Crassus se trouva en grande destresse de deux diverses passions : l'une de la crainte, se voyant en danger de perdre tout, & l'autre de desir qui le tiroit à vouloir aller secourir son filz : de sorte qu'il ne voyoit plus rien en ses affaires, avec la lumiere de raison : si se resolut il à la fin de mener toutes ses forces, pour tascher à le secourir : mais sur ces entrefaites, arriverent les ennemis, retournans de sa desconfiture, avec un bruit & un cry de victoire, plus espouventable que jamais : & ouit on incontinent tout à l'entout bruire & tonner un grand nombre de tabourins. Si s'attendoient bien les Romains d'avoir tout incontinent une autre alarme : mais ceulx qui portoyent la teste de Publius fichée au bout d'une lance, s'approchans près d'eulx, la leur monstroyent, en leur demandant par une maniere d'oultrageuse mocquerie, s'ilz cognoissoient la maison dont il estoit, & qui estoient ses parents :

pource qu'il n'est pas vray-semblable (disoyent
 ilz) que un si gentil & si vaillant jeune homme
 soit filz d'un si lasche & si couard pere, comme
 est Crassus. Ceste veüe abbatit & feit perdre le
 courage aux Romains, plus que nul autre danger
 qu'ilz eussent encore essayé en toute la bataille:
 car elle ne leur enflamma point un courroux en
 leurs cueurs, qui les aiguillonast à en vouloir
 faire la vengeance, comme il estoit convenable:
 ains leur engendra un tremblement & une frayeur,
 qui les amortit de tout poinct: combien que
 Crassus se monstraist plus vertueux en cest acci-
 dent, qu'il n'avoit encore fait en toute celle
 guerre: car chevauchant au long des bendes,
 il alloit criant tout hault, « C'est à moi seul,
 » mes amis, c'est à moy seul, que touche le
 » dueil & la douleur de ceste perte: mais la
 » grandeur de la fortune & de la gloire de Rome
 » demeure invincible en son entier, tant comme
 » vous serez sur voz pieds: toutefois si vous avez
 » aucune compassion de moy, pour m'avoir veu
 » perdre un si vaillant & si vertueux filz, je vous
 » supplie que vous la vueillez monstrier, en la
 » convertissant en ire contre voz ennemis: faittes
 » leur cher achepter la joye qu'ilz en ont receüe:
 » prenez vengeance de leur cruauté, & ne vous
 » estonnez point pour malheur qui me soit ad-
 » venu: car il est besoing que ceulx qui aspirent à

» choses grandes, supportent aussi aucune fois quel-
 » que perte. Lucullus n'a pas desfait Tigranes ,
 » ny Scipion Antiochus, sans qu'il leur ait cousté
 » du sang. Noz predecesseurs perdirent jadis mille
 » navires à plusieurs fois, avant qu'ilz eussent as-
 » seuré la conqueste de la Sicile, & plusieurs
 » armées & capitaines generaux en Italie, pour
 » la perte desquelz ilz n'ont pas laissé depuis
 » à venir au dessus de ceulx, qui les avoyent
 » auparavant desfaicts: car l'empire de Rome n'est
 » point venu en celle grandeur de puissance,
 » où il se treuve maintenant, par heur & faveur
 » de la fortune, ains par patience ès travaux;
 » & constance ès adversitez, sans jamais succom-
 » ber ny se rendre aux dangers ».

LI. Crassus faisant ces remonstrances aux sou-
 dards pour les encourager à bien faire, n'apper-
 cevoit point qu'ilz s'en esmeussent davantage,
 ains au contraire, ayant commandé que lon criaist
 le cry de la bataille, il cogneut adonc clairement
 qu'ilz estoient espris de frayeur, pource que la
 clameur que jetta son armée fut foible, basse
 & inegale, comme non procedente de tous egale-
 ment. Là où à l'opposite, celle des Barbares fut
 grande, forte & brave. Puis quand se vint à
 mettre la main à l'œuvre, les archers à cheval
 des Parthes enveloppans les Romains sur les ailes;
 leur tirerent en flanc une infinité de flesches;

mais les hommes d'armes leur donnans de front avec leurs gros bourdons, les contraignirent de soy serrer en peu de lieu; exceptez quelques uns qui plustost que d'estre tuez à coups de flesches, prirent la hardiesse de se jeter à la desesperée à travers eulx, où ilz ne leur pouvoient pas faire grand dommage, & estoient bien tost abbatus morts à grands coups de leurs grosses lances, qu'ilz leur passoyent de part en part à travers le corps fer & bois & tout, avec si grande roideur que bien souvent ilz en enfiloyent deux à la fois. Après qu'ilz eurent ainsi combatu quelque temps, la nuit survint qui les feit retirer, disans qu'ilz vouloyent bien ottroyer celle nuit de respit à Crassus, à fin qu'il eust loisir de lamenter & plorer la mort de son filz, si ce n'estoit que provoyant plus sagement à son affaire, il aimast mieulx pour son salut s'en venir volontairement devers le roy Arsaces, que d'attendre qu'on luy menast par force.

LI. Ainsi les Parthes se logeans près des Romains, estoient en grande esperance de les desfaire le lendemain: & au rebours les Romains eurent une très mauvaise nuit, ne faisans compte ny d'ensepvelir les morts, ny de penser les blecez, qui trespasloyent en grande destresse de douleurs: ains lamentoit un chascun sa miserable fortune, pource qu'il leur estoit bien advis, qu'il ne s'en

fauveroit pas un, s'ilz demouroient là jusques au lendemain : & d'autre costé, s'ilz se vouloyent mettre la nuit en chemin à travers celle grande plaine infinie, leurs blecez les mettoient en grande peine : car s'ilz faisoient compte de les emporter quand & eulx, cela retardoit beaucoup leur fuite : & s'ilz les laissoient, par leurs cris & clameurs ilz advertiroient les ennemis de leur parrement. Et combien que tous estimassent Crassus estre cause principale de leur calamité, encorés neantmoins desiroient ilz voir sa face, & entendre sa parole : mais luy s'estoit retiré à part, sans lumière, gisant la teste affalée, de peur de voir personne, servant à la commune d'exemple de l'instabilité & variété de fortune, mais aux hommes sages & de bon jugement, d'instruction pour cognoistre les effets de mauvais conseil, & de folle ambition, laquelle l'avoit tant aveuglé, qu'il ne se pouvoit contenter de preceder tant de millions d'hommes, ains s'estimoit, par manière de dire, estre le dernier de tous, & que tout luy defailloit, pourautant que lon le tenoit inferior & moindre que deux autres seulement.

LIII. Si le voulurent pourtant faire lever Octavius l'un de ses lieutenans, & Cassius, & se firent en devoir de le reconforter : mais à la fin le voyans si affligé de douleur que plus n'en

pouvoit, eulx mesmes appellerent les chefs des bandes & les centeniers, avec lesquelz ilz teindrent conseil, où il fut resolu qu'il ne falloit aucunement là demourer. Si feirent de leur autorité partir l'armée, sans trompette & sans bruit du commencement : mais tantost après les navrez & malades qui ne pouvoient suyvre le camp, sentans que lon les abandonnoit, se prirent à escrier & se tourmenter de telle sorte, qu'ilz meirent tout le camp en grand trouble & en grand defarroy, & l'emplirent de cris, pleurs & lamentations, tellement que les premiers deslogez qui marchoyent devant, en entrèrent en effroy, cuydans que ce fussent desja les ennemis qui les revinssent assaillir. Ainsi en tournant sourent visage & se regeant en bataille, ou en chargeant sur des bestes de voirure les navrez qu'ilz emmenoyent, ou bien en les deschargeant, ilz demourerent en chemin, exceptez trois cents chevaulx, qui arriverent environ la minuiet à la ville de Carres. Ignatius, qui les conduisoit, appella en langage latin les gardes faisant le guer sur la muraille, & eulx luy ayans respondu, il leur donna charge de dire à Coponius qui en estoit gouverneur, que Crassus avoit eu une grosse bataille contre les Parthes, sans leur dire autre chose, ny leur declarer qui il estoit, & cheyaucha tant qu'il arriva au pont que Crassus avoit

fait faire : par ce moyen se sauva il & ceulx de sa troupe, mais aussi fut il grievement blâmé d'avoir abandonné son capitaine : toutefois encore servit à Crassus ceste parole qu'il jetta ainsi aux gardes pour faire entendre à Coponius, lequel estimant que ceste grande haste, & ce propos si court & si confus qu'il avoit ainsi dit en passant, estoit signe qu'il n'avoit rien de bon à leur dire, commanda incontinent à ses souldards qu'ilz prissent leurs armes, & si tost qu'il entendit que Crassus s'estoit mis en chemin pour retourner, il luy alla au devant & le conduisit luy & son armée en la ville.

LIV. Or avoyent bien les Parthes apperceu le deslogement des Romains, & neantmoins ne les avoyent pas voulu poursuyvre la nuit : mais le lendemain au matin entrans dedans le camp dont ilz estoyent partis, occirent tous ceulx que lon y avoit laissez, qui n'estoyent pas moins de quatre mille personnes, & en prirent à course de cheval plusieurs qu'ilz trouverent esgarez & errans çà & là parmy les champs, entre lesquelz il y eut un des lieutenans de Crassus nommé Barguntinus¹, qui escarta hors de l'armée quatre enseignes toutes entieres qu'il estoit encore nuit, & ayant failly le chemin se retira dessus une

¹ Dans Appien Barguntius, c'est-à-dire, Varguntius, selon notre façon d'écrire.

motte, là où les Parthes l'allerent assieger & le desfeirent, quoy qu'il se defendist vaillamment, luy & toute sa troupe entierement, exceptez vingt hommes, qui tenans leurs espées nues au poings, se jetterent la teste baissée à travers eulx, de laquelle hardiesse ilz furent si esbahis qu'ilz s'ouvrirent devant eulx, & les laisserent aller le pas vers la ville de Carres.

LV. Sur ces entrefaites vint une faulse nouvelle à Surena, que Crassus avec les principaux personnages de son ost s'en estoit fouy, & que la multitude qui s'estoit coulée dedans la ville de Carres, estoit de gens ramassez de toutes pieces, où il n'y avoit pas un seul homme de qualité: parquoy Surena pensant avoir perdu le couronnement de sa victoire, & toutefois en estant encore en doubte, mais en voulant sçavoir la verité certaine, à fin que ou il s'arrestast à assieger la ville de Carres, où qu'il allast après Crassus, envoya un de ses truchemens près les murailles de la ville, luy commandant qu'il appellast Crassus, ou Cassius, & qu'il leur dist que Surena vouloit parlementer avec eulx. Le truchement fit ce qui luy estoit commandé, & fut rapporté à Crassus, qui accepta la semonce: & peu après arriverent du camp des Barbares quelques soudards Arabes, qui cognoissoyent bien de veüe Crassus & Cassius, les ayans tous deux

veus par plusieurs fois en leur camp avant la bataille. Ces Arabes voyans Cassius dessus les murailles luy dirent que Surena estoit content de faire appointment avec eulx, & de les laisser aller à sauve-té, comme bons amis de son maistre, pourveu qu'ilz quittassent au roy des Parthes la Mesopotamie, & qu'il leur sembloit que cela estoit expedient pour l'une & pour l'autre partie, plus tost que de venir à l'extreme necessité. Cassius trouva l'ouverture d'appointment bonne, & leur dit, qu'il falloit doncques assigner jour. & lieu, auquel Crassus & Surena se trouveroyent ensemble pour en parler. Les Arabes respondirent qu'ilz le feroient, & à tant se departirent.

LVI. Cela entendu Surena fut fort aise de les avoir en lieu où il les peust assieger : si mena le lendemain toute son armée devant la ville, où les Parthes dirent mille outrages & injures aux Romains, leur disans qu'il falloit qu'ilz leur livrassent Crassus & Cassius pieds & poings liez, s'ilz vouloyent avoir aucune grace ou appointment. Les Romains furent fort desplaisans de ceste tromperie, & dirent à Crassus qu'il ne se falloit plus attendre à la longue & vaine esperance du secours des Armeniens, ains furent tous d'opinion de la fuite : mais qu'il ne falloit pas que personne des Carreniens en sceust rien, jusques à l'heure du partement : & neantmoins

Crassus le dit luy mesme au plus desloyal & plus infidele qui fust en toute la ville nommé Andromachus, qu'il avoit encore choisi pour sa guide. Ce traistre Andromachus feit entendre de poinct en poinct toute la resolution des Romains à leurs ennemis : mais pour autant que ce n'est point la coustume des Parthes de jamais combattre la nuit, & qu'il estoit malaisé de les y attirer, & que de l'autre costé Crassus se paroit la nuit, Andromachus eut peur que les Romains ne gaignassent tant de chemin devant, que les Parthes ne les peussent pas r'atteindre puis après. Si les conduisit malicieusement tantost par un chemin, & tantost par un autre, & finalement les alla jeter à travers un marest profond, par un chemin où il y avoit force grands fossez, & où il falloit faire plusieurs touts & retours à grande peine pour en sortir, tellement qu'il y eut quelques uns de l'armée, qui commencerent à se doubter que ce n'estoit point à bonne fin que cest Andromachus les faisoit ainsi tourner & virer, & ne le voulurent plus suyvre, ains s'en retourna Cassius entre autres devers la ville de Carres, dont ilz estoient partis, & comme ses guides qui estoient Arabes luy conseillassent qu'il y demourast jusques à ce que la lune eust passé le signe du Scorpion, il leur respondit : « Mais je crains encore plus celuy du Sagittaire :

& prit son chemin le plus tost qu'il peut avec cinq cents hommes de cheval vers l'Assyrie. Il y en eut d'autres qui ayans des guides fideles gaignerent un pais de montagnes qui s'appelle Sinnaca, & se retirerent en lieu de seureté avant la poincte du jour, & pouvoyent ceulx là estre environ cinq mille hommes que conduisoit Octavius un homme de bien.

LVII. Mais le jour surprit Crassus comme il estoit encore en ces malaisez chemins, dedans les marets où le traistre Andromachus l'avoit expressement conduit, & avoit avec luy quatre enseignes de gens de pied, portans boucliers, & bien peu de gens de cheval, & cinq sergens qui portoyent les hafches & verges devant luy, avec lesquelz à grande peine & grand travail il regaigna le droit chemin, que les ennemis estoient desja à sa cueüe, & ne s'en falloit plus qu'environ trois quarts de lieuë qu'il ne fust rejoinct à Octavius. Si gaigna de viffesse une motte, laquelle n'estoit pas si roide pour gens de cheval ne si forte comme les autres monts qui s'appellent Sinnaques, au dessoubz desquelz elle est, & se va conjoindre à eulx par un long dos de coustau qui passe à travers la plaine, tellement que Octavius voyoit tout clairement le danges auquel estoit Crassus. Si y courut d'amont luy mesme le premier avec peu de ses gens qui le

fuyvirent du commencement : mais puis après les autres, difans qu'ilz feroient bien lasches s'ilz demouroient derriere, y coururent tout auffi, & d'arrivée chargerent les Parthes fi vivement qu'ilz les feirent retirer arriere de celle motte, & enfermans Crassus au milieu d'eulx le couvrirent tout à l'entour avec leurs boucliers, difans magnanimement, que jamais fefche des Parthes ne toucheroit à la perfonne de leur capitaine ; que premier ilz ne les euffent tous tuez les uns après les autres, & qu'ilz combattroyent jufques au dernier fouspir pour le defendre : parquoy Surena voyant que les Parthes alloient ja plus froidement en befongne qu'ilz ne fouloyent, & que fi la nuit les furprenoit, & que les Romains peuffent gagner les haultes montagnes, il feroit puis après impossible de les avoir, il pensa d'abuser Crassus par une telle ruze : il feit foubz main lascher quelques prifonniers, devant lefquelz il avoit expreffement fait tenir de tels propos : que le roy des Parthes ne vouloit point avoir une guerre immortelle à l'encontre des Romains, & qu'au contraire, il defiroit pluftoft acquerir leur amitié par quelque grace notable qu'il leur feroit, comme en traittant Crassus humainement. Suyvant lefquelz propos il feit r'appeller fes gens du combar, & s'approchant luy mefme en perfonne avec les principaux hommes de son oft

tout pacifiquement, son arc desbendé, il tendit la main droite, & appella Crassus pour parler d'appointement avec luy, disant, que si les Romains avoyent essayé les forces & la prouesse de son roy, ce avoit esté malgré luy, pource qu'il n'avoit peu moins faire que de soy defendre : mais qu'il desiroit lors de franche volonté leur faire cognoistre sa bonté, clemence & humanité, par ce qu'il estoit content de faire paix avec eux & les laisser aller où bon leur sembleroit à sauveré.

LVIII. Tous les autres Romains ouirent fort volontiers ces paroles de Surena; & en furent très aises : mais Crassus qui souventefois s'estoit trouvé circonvenu par leurs ruses & tromperies, joint que lors il ne voyoit point qu'il y eust d'occasion apparente, pour laquelle ilz deussent estre ainsi soudainement changez, n'y vouloit point prester l'oreille; & s'en conseilloit avec ses amis : mais les soudards se prirent à crier à l'encontre de luy, qu'il y devoit aller, jusques à l'injurie; & luy dirent outrageuses parolles, qu'il les vouloit bien exposer eulx à la boucherie; & que luy n'avoit pas la hardiesse de descendre pour aller seulement parler aux ennemis tous desarmez. Crassus essaya premierement à les appaiser par prieres, en leur remonstrant, que s'ilz vouloyent avoir encore patience pour ce peu qu'il restoit
du

du jour, quand la nuit seroit venue, ilz se pourroyent tout à leur aise retirer en sauve-té dedans les montagnes & lieux aspres, où les ennemis ne les pourroyent suyvre : & en leur montrant le chemin au doigt, les pria de ne vouloir point perdre le courage ny l'esperance de leur salut, attendu qu'ilz en estoient si prochains. Mais à la fin voyant qu'ilz se mutinoient, & qu'en faisant bruire leurs armes ilz le menaçoient s'il n'y alloit, adonc craignant qu'ilz ne l'outrageassent de fait, il se prit à marcher devers l'ennemy ; & en se retournant dit seulement ces paroles :

« Toy, Octavius, & toy, Petronius, & vous
 » autres, seigneurs Romains, qui avez charge
 » en ceste armée, vous voyez comment lon me
 » contraint, en despit de moy, d'aller où je
 » vois, & estes bons tesmoins, comme lon me
 » force honteusement & violement : toutefois
 » je vous supplie si vous eschappez de ce danger,
 » que vous disiez par tout où vous vous trouverez,
 » que Crassus est mort, non pour avoir esté rendu
 » & livré par ses citoyens entre les mains des
 » Barbares, comme je suis, mais pour avoir esté
 » abuzé & deceu par ses ennemis ».

LIX. Octavius ne voulut pas demourer sur la motte, ains descendit quand & luy : mais Crassus renvoya ses sergens qui le suyvoient aussi. Les premiers de la part des Barbares qui luy

vindrent au devant, furent deux à demy Grecs, lesquelz descendans de cheval luy feirent la reverence, & le saluans en langage Grec luy dirent, qu'il envoyast devant quelques uns de ses gens, ausquelz Surena monstreroit, que luy & ceulx de sa suite venoyent sans armes. A quoy Crassus leur respondit, que s'il eust fait estat aucun, ou compte de sa vie, il ne se seroit jamais venu mettre entre leurs mains : toutefois il envoya devant deux freres, appelez Rosciens, pour sçavoir avec quel nombre de gens, & à quelle intencion ilz se trouveroyent ensemble. Ces deux freres ne furent pas plus tost devers Surena, qu'il les feit retenir, & luy ce pendant avec tous les principaulx personages de son armée continua son chemin à cheval : puis quand il fut auprès de Crassus, « Comment, dit il, qu'est-ce » à dire cela : un capitaine general du peuple » Romain est à pied, & nous sommes à cheval. Et quand & quand commanda à ses gens que lon luy amenast promptement une monture. Crassus luy respondit, qu'en cela ny l'un ny l'autre d'eulx ne faisoit faulte de suyvre la coustume de son país, quand il est question de se trouver ensemble pour parlementer d'appointement. Alors luy repliqua Surena, que quant à l'appointement il estoit ja bien tout fait entre le roy Hyrodes & les Romains, mais qu'il falloit aller jusques

à la riviere, pour en reduire & mettre les articles par escript, pource que vous autres Romains ne vous souvenez gueres bien des capitulations que vous avez accordées. En disant ces paroles il luy tendit la main droite : & comme Crassus voulut envoyer querir un cheval, Surena luy dit, Il n'en est point de besoing, car le roy te fait present de cestuy cy : & aussi tost luy en fut amené un avec un harnois doré, sur lequel les escuyers le monterent incontinent, & se meirent à la cueuë, en le batant pour le faire aller plus viste. Ce que voyant Octavius, meit premier la main sur la bride du cheval, & après le luy Petronius capitaine de mille hommes de pied, puis tous les autres consequemment se meirent à l'entour, pour l'arrester, & oster par force d'auprès de Crassus ceulx qui le pressoyent deçà & delà, si commencerent à s'entrepoulser les uns les autres en courroux premierement, puis vindrent jusques à s'entrefrapper. Et adonc Octavius desguainnant son espée, en tua le palfrenier de l'un de ces seigneurs Barbares, un autre vint par derriere qui tua Octavius. Petronius n'avoit point de pavois, & ayant receu un coup sur sa cuirace, se jetta de son cheval à bas sans estre blecé, & d'un autre costé vint un Parthe nommé Pomaxethres, qui occit Crassus¹ : toute-

¹ L'an de Rome 701, avant J. C. 53.

fois il y en a qui disent que ce fut un autre qui le tua, mais que celui là luy couppa la teste & la main après qu'il fut tumbé mort à terre.

LX. Toutefois ces choses se disent plus tost par conjecture que par certaine science : car quant à ceulx qui y estoient, les uns furent ruez sur le champ en combatant à l'entour de Crassus : les autres se sauverent incontinent de vistesse dessus la motte. Les Parthes les suyvirent, & leur dirent que Crassus avoit payé la peine qu'il avoit meritée : mais au demourant, que Surena mandoit aux autres qu'ilz descendissent à seureté. Ce que les uns feirent, & se rendirent entre les mains de leurs ennemis : les autres s'escarterent quand la nuit fut venue dont il y en eut quelques uns, mais bien peu, qui se sauverent : les autres poursuyvis & chassés par les Arabes, furent tous mis à l'espée, de maniere que lon tient, qu'il mourut en toute ceste desfaite jusques au nombre de vingt mille hommes, & y en eut dix mille pris prisonniers. Au demourant Surena envoya la teste & la main de Crassus au roy Hyrodes jusques en Armenie : & ce pendant feit courir le bruit jusques en la cité de Seleucie, qu'il amenoit Crassus vif, ayant dressé un equipage de monstre qu'il appelloit, par maniere de mocquerie, son triumphe : car il y avoit entre les prisonniers un, que lon appelloit Caius Pacia-

nus: qui resembloit fort à Crassus, auquel ilz baillerent une robbé de femme à la barbarefque, l'ayans accoustumé à respondre quand on l'appelloit Crassus, ou seigneur capitaine: si le menoyent dessus un cheval, ayant devant luy force trompettes, & des sergens montez sur des chameaux, qui portoyent devant luy des faisceaux de verges liées avec des haches, & y avoit force bourses attachées aux verges, & des testes de Romains couppees de frais attachées aux haches, & après luy marchoyent des putains courtisanes & menestrieres Seleucienes, qui alloient chantant des broquards & atteintes de mocquerie, par grande derision, sur la couardise & lascheté effeminée de Crassus.

LXI. Et quant à cela qui se faisoit ainsi publiquement, tout le monde le pouvoit voir: mais oultre cela Surena ayant fait assembler le senat de Seleucie, leur produisit les livres impudiques d'Aristides, qui sont intitulez les Milesiaques, qui n'estoit pas chose faullement supposée, car ilz avoyent esté trouvez & pris entre le bagage d'un Romain nommé Rustius: ce qui donna grande matiere à Surena de se mocquer fort oultrageusement & villainement des meurs des Romains, qu'il disoit estre si desordonnez, qu'en la guerre mesme ilz ne se pouvoyent pas contenir de faire & de lire telles villannies. Si sembla

bien adonc aux seigneurs du senat de Seleucie que *Æsope* avoit esté bien sage quand il dir , que les hommes portoyent chacun à leur col une besasse , & que dedans la poche de devant ilz mettoient les faultes d'autrui , & dedans celle de derriere les leurs propres , quand ilz consideroyent que *Surena* avoit mis en la poche de devant ce livre des dissolutions *Milesiaques* , & en celle de derriere une longue cueuë de delices & voluptez *Parthienes* , qu'il trainnoit après soy en si grand nombre des chariots pleins de concubines , que son armée ressembloit , par maniere de dire , aux viperes & aux musaraignes : pource que le devant , & ce que lon y rencontroit de premier front , estoit furieux & espouventable , à cause que ce n'estoyent que lances , javelines , arcs & chevaux : mais tout cela se finissoit puis après en une trainnée de putains , d'instrumens de musique , danses , chansons & banquets dissolus avec courtisanes toute la nuit. Je ne veux pas dire que *Rustius* ne fust bien à reprendre : mais je dis que les *Parthes* estoient eulx mesmes bien deshontez de blasmer ces livres des delices *Milesienes* : attendu qu'ilz ont eu plusieurs roys du sang royal des *Arfacides* , nez de courtisanes *Ioniques* & *Milesienes*.

LXII. Pendant que ces choses passoyent , *Hyrodes* avoit desja fait appointment & alliance avec

Artabazes le roy d'Armenie, ayant fiancé sa sœur pour femme à son filz Pacorus, & se faisoient l'un à l'autre de grands banquets & grands festins, ès quelz il se recitoit souvent des poësies grecques, pource que Hyrodes n'estoit point ignorant de la langue, & Artabazes y estoit tant exercité, que mesme il y composa quelque tragedies, quelques oraisons & quelques histoires, dont les unes sont encores en estre jusques aujourd'huy : mais le soir que la teste de Crassus fut apportée, les tables estoient desja levées, & y avoit un joueur de tragedies nommé Jason, natif de la ville de Tralles, qui recitoit de la tragedie des Bacchantes d'Euripides le passage, où il parle de l'inconvenient d'Agave, qui couppa la teste à son filz : & sur le poinct que chacun prenoit plus grand plaisir à l'ouïr, Sillaces entrant dedans la salle, après avoir fait la reverence au roy, presenta devant toute l'assistance la teste de Crassus. Ce que voyans les Parthes qui là estoient, se prirent incontinent à battre des mains, & à s'escrier de joye qu'ilz en eurent. Lors les officiers par le commandement du roy, meitent à table Sillaces : & Jason baillant son accoustrement du personnage de Pentheus, qu'il devoit jouër, à quelqu'un des danseurs, prit entre ses mains la teste de Crassus, & contrefaisant les Bacchantes esprises de fureur, commença à prononcer ces

vers, avec un geste, un chant & une voix de
personne ravie en esprit, & transportée hors de
foy :

Nous apportons à l'hostel
Un taureau, de coup mortel.
Par nous naguères attainct
Sur la montagne, & esteinct.
Heureusement fut emprise
La chasse de telle prise.

Cela pleut fort à toute la compagnie : & comme
lon chantaist consequemment les vers qui suy-
vent après, où le chorus demande & respond
alternativement :

C H Œ U R.

Qui l'a tué en veneur ?

A G A V E.

A moy en est deu l'honneur :

LXIII. Pomaxethres oyant ces paroles, se leva
soudain, car il estoit avec les autres à table, &
alla prendre la teste comme à luy appartenant
de dire ces paroles au vray, non pas au joueur
qui les avoit proferées. Le roy prit plaisir à ce
debat, & donna à Pomaxethres un present tel
que la coustume du pais le porte en tel cas ;
& à Jason la valeur de six cents escus. Voilà quelle
fut l'issue de l'entreprise & du voyage de Crassus,
qui ressemble proprement à la fin d'une tragedie.
Mais la vengeance de la cruaulté de Hyrodes,

& de la desloyauté perjure de Surena retumba en fin sur les testes de l'un & de l'autre, comme ilz avoyent bien merité : car Hyrodes feit mourir Surena pour l'envie qu'il porta à sa gloire : & Hyrodes après avoir perdu son filz Pacorus en une bataille où il fut desfait par les Romains, devint malade d'une maladie qui se tourna en hydropisie : & son second filz Phraates luy cuidant avancer ses jours, luy donna à boire du jus de l'aconite. La maladie receut le poison, de sorte qu'ilz se chasserent l'un l'autre hors du corps : à l'occasion dequoy Phraates voyant que son pere commenceoit à se mieulx porter, pour avoir plus tost fait, l'estrangla luy mesme.

LA COMPARAISON

DE CRASSUS AVEC NICIAS.

OR pour venir maintenant à la comparaison, premierement il est certain que la richesse de Nicias estoit plus justement acquise, ou moins reprehensible, que celle de Crassus : combien qu'autrement, à dire la verité, il soit bien malaisé d'approuver le gaing de ceulx qui font fouiller ès minieres des metaux : pource qu'ilz se servent ordinairement ou de meschans hommes,

ou de Barbares esclaves qu'ilz y tiennent à force , les uns enferrez , les autres languissans & mourans , pour le mauvais air de ces cavernes soubterraines sujettes à engendrer maladies , où ilz demeurent continuellement : mais encore qui compareroit ce moyen de gagner avec ceulx dont s'enrichit Crassus , en acheptant les confiscations que vendoit Sylla , ou avec celle mechanique marchandise d'achepter des maisons qui brusloyent , ou qui estoient en danger de brusler , on la trouvera plus raisonnable : car Crassus en usoit aussi publiquement & notoirement comme du labourage de terre , ou de prester argent à usure.

II. Et au reste , quant aux autres crimes que lon luy a quelquefois imputez , & qu'il nioit fort & ferme , comme qu'il prenoit de l'argent des parties pour opiner au senat en leur faveur , qu'il mettoit en avant quelque chose au dommage des alliez du peuple Romain , pour en tirer du profit , qu'il alloit flattant & caressant des femmes pour en amender , qu'il receloit & aidait à cacher des malfaiteurs , pourveu qu'il y gagnast , de tout cela jamais Nicias n'en fut seulement soupçonné : ains au contraire estoit publiquement mocqué de ce qu'il dependoit à donner aux calumniateurs pour sa timidité : qui eust esté à l'aventure chose mal-seante à un Pericles & à un Aristides , mais

necessaire à luy qui estoit né de telle sorte qu'il ne se pouvoit jamais asseurer. Dequoy l'orateur Lycurgus depuis feit gloire devant le peuple : car estant accusé de s'estre ainsi racheté de calumniateurs avec de l'argent , il dit franchement au peuple : « Je suis très aise de ce qu'ayant » si longuement manié vos affaires , il s'est trouvé » que j'ay plus tost donné , que pris ». Et quant à la despenſe aussi , celle de Nicias tenoit plus du bon bourgeois de ville : car il despendoit à dedier quelque belle image aux dieux , ou à faire jouer des jeux & passetemps publiques pour donner recreation au peuple. Mais tout l'argent qu'il employa à cela , & tout le demourant de son vaillant avec , n'estoit rien que une partie de ce que Crassus despendit au festin publique qu'il feit , où il festoya pour une fois tant de milliers d'hommes , & les nourrit encore quelque temps puis après : tellement que je m'esbahy s'il y a aucun qui ignore , que le vice ne soit une inegalité & une discordance de meurs qui se repugnent à soy-mesme , voyant des hommes qui despendent ainsi honestement ce qu'ilz ont acquis villainement.

III. Voilà quant à leurs richesses , & quant à leurs deportemens en l'administration de la chose publique , en ceulx de Nicias on ne trouvera rien de malicieusement , violemment

ny injustement fait, ny trace aucune de audace ou d'oultrecuidance, ains plus tost toute simplicité : car il fut à la bonne foy circonvenu par Alcibiades, & ne se presenta jamais à parler devant le peuple, que ce ne fust avec une crainte fort reservée : là où, au contraire, lon blasme Crassus d'avoir esté fort lasche & fort desloyal à changer facilement d'amis & d'ennemis : & luy mesme ne nioit pas qu'il ne fust violement & par force parvenu à son second consulat, ayant loué des meurtriers pour occire Caton & Domitius, & en l'assemblée qui fut tenue pour departir les gouvernemens des provinces, il y eut beaucoup d'hommes blecez, & en demoura quatre tuez dessus la place : & qui plus est, luy mesme (ce que nous avons omis en escrivant le cours de sa vie) donna de sa propre main un coup de poing sur le visage d'un Lucius Annalius, qui luy contredisoit, & l'en envoya tout ensanglanté : mais comme Crassus fut en telles choses violent & tyrannique, aussi la pusillanimité de Nicias à l'opposite, & sa trop lasche couardise en ses entremises du gouvernement, voire jusques à se soubmettre aux plus basses & plus viles personnes, est digne de très grande reprehension : là où Crassus en cest endroit se monstra certainement homme magnanime & de cuer hault

élevé, n'ayant point à combattre contre ne ſçay quelles perſonnes, telles comme eſtoient un Cleon, ou un Hyperbolus, mais ne voulant point ceder à la gloire & ſplendeur de Cæſar, ny aux trois triumphes de Pompeius, ains plus toſt egaler ſa puiffance & ſon autorité à la leur, & de faiſt ayant ſurmonté celle de Pompeius en la dignité de cenſeur.

IV. Car il fault que les grands hommes par leurs haults faiſts en l'adminiſtration des affaires publiques, ſe rendent illuſtres & non pas enviez, en amortiſſant l'envie par la grandeur de leur puiffance : mais ſi tant eſtoit que Nicias preferaſt le repos & la ſeureté de ſa perſonne à toute autre choſe, & qu'il craignit Alcibiades en la tribune aux harenques, les Lacedæmoniens au fort de Pyle, Perdiccas en la Thrace, il y avoit ſi large eſpace pour ſe repoſer en la ville d'Athènes, en ſe retirant de tout poinct du maniement des affaires, & en ſe tiſſant un beau chappellet de tranquillité à mettre ſur ſa teſte, comme diſent aucuns rhetoriciens : car quant au deſir de moyener la paix, c'eſtoit ſans point de doubte une affection divine en luy, & un acte digne d'un très grand perſonnage, d'avoir fait tout ce qui eſtoit en luy pour appaiſer la guerre : en quoy Craſſus ne ſeroit pas à comparer à luy, quand bien il auroit adjouſté à l'empire

Romain toutes les provinces qui sont jusques à la mer Caspiene, & jusques à la grande mer Oceane des Indes.

V. Mais aussi quand on a affaire à un peuple qui cognoist bien ceux qui marchent de bon pied, & qui vont le droit chemin de la vertu, & que lon s'y sent plus fort en credit & en autorité, il n'est pas convenable qu'à faulte de cueur on y laisse occuper lieu aux meschans, ny que lon y donne moyen de parvenir aux estats de la chose publique à ceux qui n'en sont pas dignes, ny qu'on permette que lon se fie à ceux de qui lon se devoit deffier, comme fait Nicias, lequel fut cause qu'un Cleon, qui paravant n'estoit rien que un effronté harengueur, & un grand criart, fut eleu capitaine. Aussi ne loue-je pas d'autre costé Craffus de ce, qu'en la guerre contre Spartacus il se hasta de luy donner la bataille avec plus de precipitation temeraire que de seureté : car son ambition le luy fait faire, pource qu'il avoit peur que Pompeius qui approchoit, ne luy ostant la gloire de ce qu'il avoit fait en tout le temps qu'avoit duré ceste guerre, ne plus ne moins que Mummius osta à Metellus la gloire de la prise de Corinthe. Mais, qui plus est, le faict de Nicias en cela est de tout poinct hors des limites de raison, & ne l'en sçauroit on excuser aucunement pource

qu'il ne ceda pas à son adverfaire l'honneur & la charge de capitaine , quand il y eut apparence de heureufe iffue , ou de non gueres grande difficulté ou danger : mais là où il fe doubta qu'il y auroit grand peril , il fe contenta de mettre fa perfonne en feureté , & ne fe foucia point au refte du public : ce que ne feit pas Themiftocles du temps de la guerre contre les Perfes : car pour empescher que un homme de peu de valeur , fol & eftourdy , eftant eleu capitaine general d'Athenes , ne fust caufe de la ruine publique , il luy donna fecrettement de l'argent pour le faire defifter de fa pourfuite : & Caton lors qu'il veit qu'il y avoit plus d'affaires & plus de danger , demanda l'office de tribun du peuple pour le bien de la chofe publique. Et au contraire , Nicias fe refervant pour aller faire la guerre contre la ville de Minoa , ou contre l'ifle de Cythære , ou contre les pauvres malheureux Meliens , s'il eftoit queftion d'aller puis près combattre contre les Lacedæmoniens , alors il quittoit & defpouilloit le manteau de capitaine , & abandonnoit à la temerité & faulte de fuffifance de Cleon , les vaiffeaux , les armes & les hommes en temps d'affaires , qui requeroient le plus fage & le mieulx experimenté capitaine que lon eust peu trouver : ce qui n'eftoit pas mettre à nonchaloir

les moyens de se faire honneur , mais estoit faillir au besoing de la defense & du salut de son païs , qui fut cause que depuis oultre son gré & sa vouldté , il fut contrainct de recevoir la charge de capitaine , pour aller faire la guerre en la Sicile aux Syracusains , à cause que le peuple estima que la raison , pour laquelle il dissuadoit si fort l'entreprise , n'estoit pas pource qu'il estimast qu'elle ne fust expediente pour la chose publique , ains que par sa paresse & lascheté de cueur , il vouloit faire perdre à son païs une belle occasion de conquerir la Sicile.

VI. Toutefois cela est un grand tesmoignage de l'opinion que lon avoit de sa preudhommie & de sa bonté , que combien qu'il haïst la guerre , & qu'il fouist les charges & les honneurs de la chose publique , jamais toutefois ses citoyens ne failloyent à l'eslire comme le plus suffisant , le mieulx entendu & le plus homme de bien de la ville. Et au contraire Crassus qui ne desiroit autre chose , ne peut jamais advenir à estre eleu capitaine general, sinon en la guerre contre les esclaves encore fut ce par necessité à faute d'autre , pource que Pompeius & Metellus & les deux Luculles estoient lors absens occupez à autres guerres , combien que au demourant il eust alors la vogue , & qu'il eust grand credit & grande autorité ,
mais ,

mais, à mon advis, que ceulx mesmes qui luy favorisoient, le tenoyent comme dit le poëte cornique,

Homme de bien par tout, fors qu'à la guerre.

Toutefois à la parfin cela ne servit de rien aux Romains, qui furent forcez par son ambition & son ardente convoitise de dominer : pource que les Atheniens envoyerent Nicias à la guerre malgré luy, mais Crassus y trainna les Romains malgré eulx, de maniere que le public tumba en calamité par l'un, & l'autre y tumba par le public, combien qu'en cela il y ait matiere de louer plus tost Nicias, que de blasmer Crassus : car l'un usant du jugement de capitaine experimenté & sage, n'espera jamais qu'ilz peussent conquerir la Sicile, & pourtant en dissuadâ tousjours l'entreprise, sans soy laisser abuser à l'esperance de ses citoyens : & l'autre ayant entrepris la guerre contre les Parthes, comme estant chose facile de les desfaire, se trouva trompé de son esperance, mais au moins aspira il à grandes choses.

VII. Et comme Julius Cæsar conqueroit à l'empire Romain les provinces de l'Occident, c'est à sçavoir les Gaules, les Allemagnes & l'Angleterre, aussi desiroit il aller devers l'Orient, & penetrer jusque à la grande mer Oceane des

Indes , en subjuguant toutes les provinces de l'Asie , à quoy Pompeius mesme aspira , & Lucullus y pretendit aussi , tous deux gens de bien , & qui se mainteindrent tousjours doucement envers tous , & neantmoins eurent la mesme intention , & se proposerent le mesme but que feit Crassus : car quand la charge de la guerre en Orient fut par decret du peuple donnée à Pompeius , le senat le trouva mauvais ; & y resista tant qu'il peut. Et comme les nouvelles fussent venues que Cæsar avoir desfait en bataille trois cents mille Allemans , Caton opinant sur ce faict au senat , fut d'advis que lon le devoir livrer entre les mains des Allemans qu'il avoit vaincus , pour en faire la punition , & en ce faisant destourner la vengeance du courroux des dieux , à cause de la paix injustement violée , sur la teste de celui seul qui en estoit violateur. Et neantmoins le peuple sans s'arrester aux remonstrances de Caton , en feit faire festes & processions publiques l'espace de quinze jours durans , en grande resjouissance par toute la ville , faisant sacrifices publiques aux dieux , pour leur rendre graces de ceste si grande victoire. Comment donques pensons nous qu'il eust esté affectionné , & combien de jours cuidons nous qu'il eust fait fester & sacrifier , si d'aventure Crassus eust escrit de

Babylone , qu'il eust esté victorieux , & qu'il eust conquis tous les Royaumes de la Médie , de la Perſide , des Hyrcaniens , de Suſe , de Baſtres , & qu'il en eust fait des provinces & gouvernemens nouveaux de l'empire Romain ?

Car ſi le droit il convient violer ,

comme dit Euripides à ceulx qui ne peuvent vivre en repos & ſe contenter du leur , il ne fault pas ſ'amuſer à petites choſes , comme à raſer un chaſteau de Scandie , ou une ville de Mende , ny à chaſſer les *Æginetes* eſtans deſja hors de leur naturel païs , & s'eſtans allez cacher , comme oiſeaux deſnichez , en un autre trou , ains faut mettre à hault prix le violement du droit : non pas legerement , & pour peu de cas meſpriſer la juſtice , comme ſi c'eſtoit choſe à quoy lon ſe deuſt peu arreſter : car ceulx qui louent l'intention d'*Alexandre* le grand au voyage des conquêtes qu'il feit en Levant , & blaſment celle de *Crassus* , ont tort de juger du commencement par les evenemens de la fin.

VIII. Au demourant quant aux executions de leurs charges , *Nicias* y feit de beaux & bons exploits : car il deſfeit les ennemis en pluſieurs batailles , & s'en fallut bien peu qu'il ne priſt la ville de *Syracuse* : & ne luy peult on attribuer

la coulpe de tous les inconveniens qui advindrent en celle guerre de la Sicile, ains en doit on accuser en partie la pestilence, & en partie aussi l'envie que luy portoyent ceulx qui estoient demourez à Athenes : là où Crassus feit tant d'erreurs, & commeit de si lourdes fautes en tout son voyage, qu'il ne donna pas loisir à la fortune de faire rien de bon pour luy : tellement, que je ne m'esbahy pas tant, comme sa folie fut vaincue par la puissance des Parthes, comme je m'emerveille, qu'elle peut vaincre la bonne fortune des Romains. Et comme ainsi soit, que tous deux sont periz par semblable malheur ; l'un en n'ayant rien obmis de ce qui appartient, à l'art de deviner les choses à advenir, & l'autre ayant desdaigné d'en rien observer, il est certainement bien difficile de discerner & juger, lequel des deux y proceda plus seurement : mais toutefois, si est la faute plus excusable que lon commet par timidité en suyvant les vieilles & receuës opinions, que non pas celle que lon commet par temerité & outrecuidance, en transgressant les loix & coustumes de tout temps establies.

IX. Quant à leur mort, celle de Crassus, est moins à blasmer : pource qu'il ne se rendit point volontairement, ny ne fut point lié ny mocqué, ains seulement se laissa aller aux,

MARCUS CRASSUS. 389

prieres de ses amis, & fut desloyalement circon-
venu par l'infidelité des ennemis : là où Nicias
soubz l'esperance de sauver honteusement &
laschement sa vie, s'estant soumis à la mercy
de ses ennemis, en rendit sa mort de tant plus
ignominieuse.

fait donner aux enfans des Espagnols. XXI. Perpenna est forcé par ses troupes d'aller se joindre à Sertorius. XXII. Comment Sertorius parvient à modérer l'ardeur des Barbares qui s'étoient réunis à lui. XXIII. Stratagème par le moyen duquel il réduit les Characitaniens, XXV. La réputation de Sertorius augmente après l'arrivée de Pompée. XXVI. Il prend & brûle la ville de Lauron en sa présence. XXVII. Il gagne une grande bataille contre Pompée. XXVIII. Comment il retrouva sa biche. XXIX. Bataille de Sertorius contre Pompée & Metellus. XXX. Il force Pompée & Metellus de se séparer. XXXI. Metellus met la tête de Sertorius à prix. XXXII. Eloge de la conduite de Sertorius. XXXIII. Son amour pour sa patrie & pour sa mere. XXXIV. Grandeur d'ame de Sertorius dans son traité avec Mithridate. XXXVII. Perpenna souleve ses amis contre Sertorius. XXXVIII. Comment ils s'y prennent pour ruiner les affaires de Sertorius. XXXIX. Conjuration de Perpenna contre Sertorius. XL. Sertorius est assassiné. XLI. Pompée fait mourir Perpenna.

Depuis l'an 620 environ , jusqu'à l'an 681 de Rome, avant Jesus-Christ 73.

S E R T O R I U S.

Ce n'est à l'aventure pas chose dont lon se doyye emerveiller, qu'en espace de temps infiny, ainsi que la fortune tourne & varie diversément, il adviene souvent par casuelle rencontre des accidens du tout semblables les uns aux autres. Car soit ou qu'il n'y air point de nombre arresté ny certain des evenemens qui peuvent escheoir, la fortune a matiere assez plantureuse & ample pour produire des effects qui s'entressemblent : ou que les cas humains soyent comprins en nombre déterminé, il est force qu'il arrive souvent des accidens entierement semblables, attendu qu'ilz se font par mesmes causes & par mesmes moyens. Mais pourautant qu'il y en a qui prennent plaisir à recueillir de telz cas fortuits, qu'ilz ont veuz ou ouïs si conformes l'un à l'autre, qu'ilz ressembtent proprement aux choses que lon fait de propos deliberé & avec raison propensée : comme, pour exemple, que de deux hommes qui ont eu nom Attys, tous deux issus de grand lieu, l'un en la Syrie & l'autre en l'Arcadie, l'un & l'autre fut occis par un sanglier : & que de deux qui eurent nom Actæon, l'un fut deschiré par ses chiens, & l'autre par ses amoureux : & que des

deux renommez Scipions, les Carthaginois furent premierement vaincus par l'un, & depuis entierement ruinez & destruits par l'autre : que la ville de Troye fut la premiere fois prise par Hercules, pour les chevaux que Laomedon luy avoit promis : la seconde fois par Agamemnon, moyenant le grand cheval de bois : & la troisieme fois par Charidemus, à l'occasion d'un cheval qui tumba dedans la porte, & engarda que les Troyens ne la peussent fermer à temps : & que de deux villes ayant le nom de deux plantes odoriferentes, *Ios*¹ & *Smyrna*², dont l'une signifie la violette, & l'autre la myrrhe, on tient que le poëte Homere nasquit en l'une, & qu'il mourut en l'autre : nous y pouvons bien encore adjouster cest exemple cy, qu'entre les capitaines anciens, les plus belliqueux, & qui ont fait de plus grandes choses par astuce & ruzede guerre inventée de bon esprit, ont esté borgnes, comme Philippus, Antigonus, Hannibal & Sertorius, dont nous escrivons à present : lequel on peult veritablement dire avoir esté plus continent vers les femmes, que Philippus, plus fidele vers ses amis, qu'Antigonus, plus humain

¹ *Ios*, l'une des îles Sporades, patrie de la mere d'Homere.

² *Smyrne*, ville d'Ionie, fondée par Tantale sous le nom de Nau-loque, & depuis appellée *Smyrne*, du nom de *Smyrné*, Amazone qui s'empara d'Ephèse. V. *Stheph. Byzant.*

vers ses ennemis, que Hannibal, & qu'il ne cedit en bonté d'entendement à nul d'eulx, mais en faveur de la fortune à tous, laquelle luy ayant esté en toutes choses plus rigoureuse & plus dure, qu'à ses ennemis¹, qui estoient tous grands personages, neantmoins il se monstra en experience egal à Metellus, en prouesse à Pompeius, & en fortune à Sylla, si bien qu'estant banny de son païs, estranger en province estrange, & commandant à une nation Barbare, il sousteint un temps la guerre contre la puissance du peuple Romain. Si m'a semblé que de tous les capitaines Grecs, il ny en avoit point que nous luy puissions plus raisonnablement apparier que Eumenes le Cardian, pource que tous deux ont bien sceu commander, tous deux ont esté & hardis & ruzez en guerre, tous deux bannis de leurs païs, tous deux capitaines d'estrangers, & tous deux violement & meschamment tuez, ayant tous deux esté occis en trahison par ceulx mesmes, avec lesquelz ilz avoyent desfait leurs ennemis.

II. La maison donques de Quintus Sertorius estoit assez noble en la ville de Nursia au païs des Sabins, mais son pere le lascia petit enfant, & fut nourry honestement dessoubz sa mere veufve, laquelle il aima & revera tousjours singuliere-

¹ Grec : qui lui ayant toujours fait plus de mal que ses ennemis déclarés.

ment. Elle se nommoit, comme lon dit, Rea. Son commencement fut qu'il s'exercita à plaider des causes assez passablement, de maniere qu'estant encore fort jeune homme, il vint à Rome en quelque credit, par le moyen de son eloquence : mais l'honneur & la reputation qu'il acquit depuis, par les prouesses qu'il feit, le convierent à tourner du tout son estude & son ambition aux armes & à la guerre. Si fut son premier apprentissage, lors que les Cimbres & les Teurons avec grosse puissance, envahirent le país de la Gaule, là où les Romains ayans esté desfaits en bataille, soubz la conduite d'un Scipion ¹, son cheval luy fut tué soubz luy, & luy blecé, & neantmoins encore traversa il le Rosne à nage, avec sa cuirace sur son dos & sa targe, rompant à force l'impetuosité de celle riviere, tant il avoit le corps fort & dispos, & bien exercité à porter le travail & la peine. La seconde fois que ces Barbares retournerent avec un nombre infiny de combatans, & avec fieres & terribles menaces, les Romains en eurent tel effroy, que lon estimoit lors bien gentil compagnon celuy, qui avoit la hardiesse de demourer en son reng, & d'obeir à son capitaine. Marius fut adonc chef de l'armée Romaine, & Sertorius entreprit d'aller recognoistre le camp

¹ Nous avons déjà averti plusieurs fois que c'est Cæpion qui fut battu l'an de Rome 649.

des ennemis. Si se vestit d'un habillement de Gaulois, & apprit les plus communs termes, dont on use en leur langage, pour parler quand on s'entrerencontre, & ainsi s'alla jetter parmy les Barbares, là où ayant partie veu à l'œil, & partie ouy dire ce qu'il desiroit plus entendre & sçavoir, il s'en retourna devers Marius, qui l'honora lors de tel loyer, comme il meritoit: & depuis en toute celle guerre, il feit tant d'actes de bon sens, & de grande hardiesse, que son capitaine l'en eut en très bonne estime, & le meit en reputation, luy commettant de ses principaux affaires.

III. Parquoy après ceste guerre des Cimbres & Teutons, il fut envoyé en Hespagne, soubz Didius¹ præteur, avec charge de mille hommes de pied, lesquelz il mena hyverner en la ville de Castulo, ès marches des Celtiberiens, là où les soudards trouvant des vivres à foison, ne faisoient autre chose que gourmander & yvronger, & commettre mille insolences, après qu'ilz estoient yvres, tant que les Barbares de la ville les en eurent en si grand mespris, qu'ilz envoyerent une nuit querir du secours de leurs plus proches voisins; les Gyriscæniens, & allans par les logis des Romains, en occirent une bonne

¹ Titus Didius, consul, fit la guerre en Espagne l'an de Rome 656.

partie. Sertorius entendant le bruit, se jeta incontinent hors de la ville, avec quelque peu de ses gens, & r'alliant ceulx qui s'eschappoyent aussi de viffesse à la file, il feit le tour du circuit de la ville, & trouvant la porte, par laquelle des Gyriscœniens estoient entrez, encore toute ouverte, se coula dedans : mais il ne feit pas comme ilz avoyent fait eulx, ains mettant bonnes gardes aux portes, & en tous les endroits de la ville, feit passer au fil de l'espée, tous ceulx qui estoient dedans, en aage de porter armes. Puis quand ilz eurent executé ceste vengeance, il leur commanda qu'ilz posassent leurs vestemens ordinairès & leurs armes, qu'ilz se vestissent & armaffent de celles des Barbares qu'ilz avoyent tuez, & qu'ilz allassent après luy, vers la ville des Gyriscœniens, dont estoient venuz ceux, qui les avoyent assaillis en surprise la nuit. Les Barbares à veoir de loing les vestemens & les armes de leurs gens, pensant certainement que ce fussent eulx, ouvrirent leurs portes, & en sortit une grande foule de peuple, pour aller au devant de leurs amis & citoyens, qu'ilz cuidoyent avoir bien fait leurs besongnes : ainsi en tuerent les Romains un grand nombre tout joignant les portes de leur ville, & les autres s'estans rendus à la mercy de Sertorius, furent par luy vendus.

IV. Depuis cest acte, Sertorius fut fort re-

nommé par toute l'Hespagne, & à son retour à Rome, fut incontinent eleu questeur ou tresorier general de la Gaule, qui est delà les monts à l'entour du Po : ce qui vint bien à propos pour les affaires de Rome, pource que lors s'emeut la guerre des peuples confederez de l'Italie, que lon appelle la guerre Marfique¹, en laquelle il eut charge & commission de lever gens de guerre, & faire forger armes : enquoy il feit si bonne diligence, & hastu tellement la besongne à comparaifon de la longueur & paresse des autres jeunes gens, qu'il en acquit la reputation d'homme d'execution, qui estoit pour faire un jour de belles & grandes choses : mais quoy qu'il fust parvenu à la dignité de capitaine, il ne laissa point pour cela de hazarder aussi hardiment sa personne, comme eust fait un simple souldard, ains feit de merveilleuses armes de sa propre main, sans s'espargner aux plus dangereuses meslées, tellement qu'à la fin il y perdit un œil qui luy fut crevé en combatant : dequoy tant s'en fault qu'il eust honte, que au contraire il s'en glorifioit ordinairement. Car les autres, disoit-il, ne portent pas tousjours quand & eulx les marques & tesmoignages de leurs prouesses, ains les laissent quelquefois à la maison, comme sont les chaines, carquans, javelines & couronnes,

¹ L'an de Rome 663.

qui leur ont esté donnez par leurs capitaines pour tesmoignage de leur vertu : mais luy portoit tousjours, en quelque lieu qu'il allast, les enseignes de sa vaillance, tellement que ceulx qui regardoyent sa perte, voyoyent aussi ensemble le tesmoignage de sa valeur. Aussi luy en feit le peuple l'honneur qui luy appartenoit : car quand il entra au theatre, il le receut avec grands batemens de mains & grandes louanges : ce qu'à peine faisoient les Romains aux plus vieux capitaines, & qui pour leurs grands services estoient les plus honorez.

V. Toutefois comme il se fust présenté à demander l'office de tribun du peuple, il en fut debouté & en decheut par les menées de Sylla qui l'empescha, dont il semble que sourdit celle vehemente haine & grande malvueillance qu'il porta tousjours depuis à Sylla : parquoy après que Marius ayant esté vaincu par Sylla, s'en fut enfouy, que Sylla fut party de l'Italie pour aller faire la guerre à Mythridates, & que des deux consulz l'un, c'est à sçavoir Octavius, maintint la part & ligue de Sylla, & Cinna l'autre consul, qui ne demandoit que choses nouvelles, r'assembla & tascha de remettre sus celle de Marius, laquelle s'en alloit aneantissant, Sertorius se rengea de son costé, pour autant mesmement qu'il voyoit que Octavius estoit homme

lent, qui ne se fioit nullement aux amis de Marius. Si y eut une cruelle rencontre qui se feit dedans la ville mesme sur la grande place, là où Octavius vainquit, & Cinna & Sertorius se sauverent à la fuitte, n'ayans pas perdu gueres moins de dix mille hommes en ceste seule def-faite : mais ilz prattiquerent & gagnerent par bons moyens les autres gens de guerre qui estoient espendus çà & là parmy l'Italie, si bien qu'en peu de temps ilz se trouverent egaulx en nombre d'hommes, & assez puissans pour combattre une autre fois Octavius.

VI. Dequoy Marius estant adverty monta incontinent sur mer, & s'en retourna de l'Afrique en Italie, & s'en vint rengier à Cinna, comme soldard privé à son capitaine & à son consul. Si furent tous les autres très bien d'advis qu'on le receust : mais Sertorius l'empescha de toute sa puissance, fust ou pource qu'il eust peur que son autorité n'en diminuast, quand Cinna auroit approché de luy un autre capitaine de plus grande dignité, ou pource qu'il redoubtast l'aspreté & la violence de Marius, qui ne pardonnoit jamais, craignant qu'il ne gastaist tout, par ce qu'il ne sçauroit pas tenir un moyen en son courroux, & qu'il ne oultrepassast les bornes de la raison, en se vengeant de ses ennemis s'il advenoit qu'ilz eussent la victoire : joint qu'il disoit qu'il ne leur restoit plus

plus gueres qu'ilz ne fussent entierement au dessus de leurs affaires, & que si une fois ilz recevoient Marius, il leur emporteroit toute la gloire & tout l'honneur d'avoir conduit ceste guerrè à chef, & que ce seroit un compagnon malaisé, & mal feable en autorité. A quoy Cinna respondit, que le discours qu'il faisoit, & les raisons qu'il alleguoit, estoient bien veritables : mais neantmoins qu'il avoit honte, & ne voyoit pas comment il peust honestement refuser ny renvoyer Marius, mesmement après l'avoir mandé & fait venir expressement pour luy commettre partie de la conduite de ceste guerre. Lors repliqua Sertorius, « Quant à moy » j'estimois que Marius fust revenu de son propre mouvement sans estre mandé, & par ainsi » regardant à ce qui me sembloit le plus expedient, je conseillois de ne le recevoir point : » mais puis qu'ainsi est que tu l'as mandé premierement, c'estoit mal fait à toy de consulter, » si tu le devois recevoir où non, puis qu'il estoit » venu à ton mandement : & es tenu de t'en servir, » pource qu'estant venu sur ta parole, l'obligation » de la foy ne te permet plus en pouvoir deliberer ne discourir ».

VII. Ainsi fut mandé Marius : & quand il fut arrivé, ilz departirent toute leur armée en trois; puis commencerent à guerroyer leurs ennemis de

tous costez, si bien qu'ilz demourerent victorieux; mais en celle victoire Cinna & Marius feirent toutes les cruautéz & inhumanitez qu'il est possible de faire, tellement que les Romains estimerent que tous les maux qu'ilz avoyent endurez tout le long de la guerre, n'estoyent que jeu au prix des calamitez & des miseres qu'ilz souffrirent depuis. Mais au contraire Sertorius ne fait jamais occire homme pour aucune malvueillance particuliere qu'il eut contre luy, ny ne fait onques outrage à personne après qu'il fut vainqueur, ains à l'opposite estoit marry des inhumanitez que Marius faisoit : & quand il pouvoit parler à part en privé avec Cinna, il l'addoucissoit le plus qu'il pouvoit, & le rendoit par ses prieres plus moderé. Finablement voyant un grand nombre de serfs, desquelz Marius s'estoit servy à faulte d'autres souldards en ceste guerre, & desquelz il ufoit encore pour ses satellites & ministres de sa cruauté tyrannique, les ayant tousjours à l'entour de sa personne comme sa garde, & permettant qu'ilz se feissent riches & opulents, en partie de ce que luy mesme leur donnoit ou leur commandoit, & en partie aussi de ce que violement ilz commettoient d'eulx mesmes sans son commandement à l'encontre de leurs maistres, en les tuant eulx, forçant leurs maistresses, & violant leurs enfans : Serto-

rius ne pouvant plus supporter telles meschancetez, les fait tous occire en leur camp, où ilz se logeoyent & retiroient ensemble, combien qu'ilz ne fussent pas moins de quatre mille hommes.

VIII. Depuis estant le vieil Marius decedé, & Cinna bien tost après ayant esté tué, le jeune Marius contre son advis & contre les loix de Rome ayant par force usurpé le consulat, & Carbo, Scipion, Norbanus ayans esté rompus & desfaits par Sylla retournant de la Grece, en partie par la faulte & lascheté de cueur des capitaines, & en partie aussi par ce qu'ilz estoient vendus & trahiz de leurs gens, considerant que sa présence ne serroit de rien aux affaires qui alloient tousjours de mal en pis, à cause que ceulx qui y avoyent plus de pouvoir, estoient ceulx qui avoyent moins de sens & moins d'entendement : & encore après tout, quand il veit que Sylla estoit venu planter son camp tout au plus près de celui de Scipion, en le caressant, & luy donnant esperance d'une bonne paix, pendant que sous main il luy subornoit & pratriquoit ses gens, & que Scipion jamais n'en voulut rien croire, combien qu'il luy predist & luy remonstra bien à certes : adonc ne pouvant plus esperer que leurs affaires se portassent jamais bien à Rome, il se partit pour aller en Hespagne,

en intention que s'il pouvoit se saisir le premier & affermer du gouvernement de celle province, ce fust à tout le moins une retraite & un refuge pour ceulx de leur ligue qui seroyent chassés & bannis de leur païs : mais par le chemin en y allant il eut le temps fort mauvais & fort rude.

IX. Et oultre cela en passant par un païs de montagnes, les Barbares habitans du lieu luy demanderent tribut & salaire pour luy donner passage par leurs tertres : dequoy ceulx qui estoient en sa compagnie se courrouceoyent à bon escient, disans que cestoit une honte & indignité trop grande qu'un proconsul du peuple Romain payast tribut à ces meschans Barbares : mais Sertorius ne se soucia point de la honte. qu'ilz disoyent que ce luy feroit, ains luy respondit, qu'il achepoit le temps, qui est la chose que doit tenir plus chere celuy qui aspire à faire de grandes choses, & contenta les Barbares avec de l'argent : puis fait si bonne diligence qu'il s'empara de l'Hespagne, laquelle il trouva florissante en nombre de peuples, mesmement de jeunes hommes en aage de porter armes : mais ayant par le passé esté si mal traitté par l'avarice, l'insolence & l'arrogance des gouverneurs, que lon y envoyoit ordinairement de Rome, qu'ilz en avoyent en haine toute maniere de gouvernement. Si rascha devant toute œuvre à acquerir

la bienveillance de tous ceulx du païs generalmente : des nobles, en hantant & conversant familièrement avec eulx : & de la commune, en leur relaschant partie de leurs tailles & sub-
sides : mais ce qui plus universellement le feit aimer de tous, fut qu'il les exempta de loger les gens de guerre, & de recevoir garnisons dedans les villes, contraignant ses gens de dresser leurs tentes, & faire leurs logis aux faulxbourgs le long des bonnes villes pour y passer l'hyver, & y faisant luy mesme le premier tendre son pavillon, & y couchant. Ce neantmoins il n'obtempera pas en toutes choses au gré ny à la volonté des Barbares pour avoir leur bonne grace : car il feit armer tous les bourgeois Romains qui se trouverent habituez en Hespagne de l'aage de pouvoir porter armes, & faisant en plusieurs endroits bastir de toutes sortes d'engins & de machines de baterie & grand nombre de galeres, conteint en office les villes soubz sa main, se monstrant doulx & humain ès affaires de paix, & redoubtable en appareil de guerre contre ses ennemis.

X. Or après qu'il fut adverty que Sylla tenoit la ville de Rome, & que la part & ligue de Marius & de Carbo estoit entierement destruite, se doubtant bien qu'il ne passeroit pas gueres de temps, que lon n'envoyast quelque

capitaine avec une grosse & puissante armée contre luy, il envoya de bonne heure occuper les pas des monts Pyrenées par Julius Salinator, qui y mena six mille hommes de pied armez. Et peu de temps après y arriva aussi de l'autre costé Caius Annius envoyé par Sylla, lequel voyant qu'il n'y avoit ordre de forcer Salinator, en lieu si avantageux, s'arresta tout court au pied de la montagne, ne sachant qu'il devoit faire : mais il y eut de male aventure un Calpurnius surnommé Lanarius, qui tua Salinator en trahison : à l'occasion dequoy ses gens abandonnerent aussi tost les cymes des montagnes, & adonc Annius y passa tout à son aise, & avec sa puissance, qui estoit grosse, repoulsa ceulx qui le voulurent empescher de tirer oultre. Parquoy Sertorius ne se sentant pas assez fort pour le combattre, se retira avec trois mille hommes dedans la ville de Carthage la neufve, là où il monta sur mer : & de là traversa en Afrique, & alla descendre en la coste des Maurusiens ; où ses gens issirent incontinent des vaisseaux pour se refreschir d'eau, s'escartans çà & là, sans autrement soy tenir sur leurs gardes : au moyen dequoy les Barbares se ruèrent sur eulx, & d'abordée en tuerent un bon nombre, tellement que Sertorius fut contraint de se r'embarquer, & reprendre la route de l'Hespagne ;

mais il n'y peut aborder , pource qu'on l'en repoulsa. Et à ceste cause se meit à cingler avec quelques fustes de courfaires Ciliciens vers l'isle de Pityeuse , où il prit terre malgré la garnison que Annius y avoit mise , laquelle il forcea : mais peu de jours après Annius y alla luy mesme avec bon nombre de vaisseaux , & cinq mille combatans dessus. Sertorius se resolut de l'attendre & de le combattre par mer , combien que ses vaisseaux fussent minces & legers , comme ceux qui estoient faits exprès pour cingler legerement , & non pas massifs pour combattre : mais le vent du Ponent se leva impetueusement , lequel haulsa la mer par telle violence , qu'il jetta une grande partie des vaisseaux de Sertorius par le travers , à cause qu'ilz estoient ainsi legers , contre les rivages pierreux , & luy avec petit nombre de vaisseaux , étant forclos de la terre par ses ennemis , & de la mer par la tourmente , fut contraint de demourer l'espace de dix jours en haulte mer à l'ancre , à combattre avec grand peril & grand travail , les vagues & les vents , qui furent tousjours ce temps durant fort impetueux : toutefois à la fin ilz s'appaiserent , & aussi tost il leva l'ancre , & alla poser en quelques petites isles desertes & sans eau , qui sont semées en celle plage. Puis au partir de là passa le destroit de Gibraltar , & tournant à main droite prit

terre en la coste de l'Hespagne , qui regarde la grande mer Oceane un peu au dessus de la bouche du fleuve de Bætis, lequel se deschargeant en l'Ocean Atlantique , donnoit anciennement le nom à ce quartier là de l'Hespagne, qui en estoit appellée l'Hespagne Bætique.

XI. Là le trouverent des mariniers nouvellement arrivez des isles de l'Ocean Atlantique; que les anciens appelloient les Isles fortunées. Ce sont deux isles près l'une de l'autre , n'y ayant qu'un petit bras de mer entre deux , & sont loing de la coste d'Afrique environ de cent vingt & cinq lieues ¹. Il y pleut bien peu souvent une pluye douce , mais ordinairement y souffle un doux & gracieux vent , qui apporte une rosée , laquelle attrempe tellement la terre quelle en est grasse & fertile , non seulement pour pouvoir produire tout ce que lon y voudroit planter & semer , mais aussi en produit d'elle-mesme , sans œuvre ne main d'homme , tant & de si bon fruit , qu'il suffit à nourrir le peuple y habitant , oisif , sans qu'il ait besoin de se donner peine ou soucy de rien. L'air y est doux & serein sans jamais offenser les corps , pource que les saisons de l'an y sont fort tempérées , & que les mutations des qualitez de l'air n'y sont jamais excessives , à cause que les

¹ Grec , dix mille stades , ce qui fait 416 lieues.

vents qui y soufflent devers la terre du costé de deçà, comme sont les vents de la Tramontaine & du Levant ¹, quand ilz viennent à sortir hors du rond de la terre habitable sont jà lassez pour la longueur de leur cours, & puis s'allans esprendre en un espace infiny d'air & de mer, ilz ont desja perdu toute leur force avant qu'ilz puissent arriver là. Et les vents qui y soufflent de devers la haulre mer, comme sont ceulx du Midy & du Ponent ², y amènent bien quelquefois de la mer de petites pluyes menues : mais le plus souvent ne font que refreschir un peu l'air d'une moiteur qui nourrit doucement toutes choses, que la terre y produit, tellement que jusques aux Barbares est cela passé en ferme & assurée creance, que là sont les champs Elysiens & le séjour des ames bienheureuses que le poëte Homere a tant célébré.

XII. Ce qu'entendant Sertorius il luy prit une merveilleuse envie de s'en aller habiter en ces isles là, pour y vivre en repos loing de tyrannie & de toutes guerres : mais si tost que les cour-faires Ciliciens, qui ne demandoient point la paix, ains ne cherchoient que quelque pillage & quelque butin, en ouyrent le vent, ilz le

¹ Grec, Borée & Apeliote. Voyez les Observations sur le troisieme volume des Morales, p. 455, chap. LXXXIV.

² Grec, Argeste & Zephyre.

laissèrent , & s'en allerent en Afrique pour remettre un Ascalius ¹ filz de Iphtha au royaume des Maurusiens ² : toutefois leur departie ne feit point perdre le cueur à Sertorius , ains delibera d'aller secourir ceulx qui faisoient la guerre à Ascalius , à fin que ce peu de gens de guerre qu'il avoit encore avec luy , voyans quelque matiere de nouvelle esperance , & moyen de s'employer , ne l'abandonnassent point estans contraincts de se desbender par la necessité. Les Maurusiens furent très aises de son arrivée , & luy meit incontinent la main à l'œuvre , & desfeit en bataille Ascalius , puis l'alla assieger dedans la ville , où il s'estoit retiré après la desfaitte de son armée : dequoy Sylla estant adverty , y envoya un nommé Paccianus avec armée pour secourir Ascalius. Sertorius luy donna la bataille , en laquelle il l'occit sur le champ , & gaigna le reste de son armée qui se rendit à luy , puis il prit la ville de Tingis , dedans laquelle Ascalius s'en estoit foy avec ses freres.

XIII. Les Libyens tienent & escrivent que Antæus est leans enterré : mais Sertorius ne pouvant croire ce qu'en comptoyent les Barbares

¹ Ascalis , comme on le trouvera écrit plus loin.

² La Mauritanie propre qui s'étendoit depuis la mer Occidentale le long de la Méditerranée. Tingis en étoit la capitale ; elle étoit située sur le détroit de Gibraltar , & donnoit son nom à la Mauritanie Tingitane , où sont aujourd'hui les royaumes de Fèz & de Maroc.

du païs, pour la grandeur de la sepulture qu'ilz en monstroyent, la feit descouvrir tout à l'entour, & ouvrir, & y ayant trouvé un corps d'homme de soixante coudées de long, à ce que lon dit, en demoura grandement esmerveillé, & après avoir immolé dessus une hostie, feit recouvrir & refermer le tumbeau : en quoy faisant il augmenta fort l'honneur que la ville portoit à la memoire d'Antæus, & confirma ce que lon en comptoit en ce païs là : car ceux de la ville de Tingis comptent que après la mort d'Antæus, sa femme qui se nommoit Tinga coucha avec Hercules, duquel elle eut un beau filz, qui fut nommé Sophax, & fut roy de celle contrée, où il fonda ceste ville, qu'il appella du nom de sa mere. Et disent encore que ce Sophax eut un filz nommé Diodorus, lequel conquist & meit en son obeïssance la plus grande partie de l'Afrique, avec une armée de Grecs Olbianiens & Myceniens, que Hercules y avoit menez, & qui s'estoyent habituez en ce quartier là. Nous avons bien voulu embrasser l'occasion qui se presentoit, de dire cela en passant, pour l'honneur de Juba, le plus gentil historien qui fut oncques de sang royal, pource que lon tient que ses ancestres sont descendus de ce Sophax & de ce Diodorus.

XIV. Sertorius donques comme victorieux

ayant tout le païs en sa main , ne fait aucun mal ny desplaisir à ceulx qui se meirent en sa mercy , & qui se fierent en luy , ains leur rendit leurs biens , leurs villes & leur gouvernement , se contentant de ce que de leur bon gré & franche voulunté ilz luy offrirent. Cela fait , il se trouva en doubte de ce qu'il devoit faire , & en quelle part il devoit tourner : mais comme il estoit en peine de s'en resoudre , arriverent devers luy des ambassadeurs que les Lusitaniens luy envoyoyent exprès pour le prier de vouloir estre leur capitaine general , pource qu'ilz avoyent necessairement besoyn de quelque personnage de grande reputation & d'experience au faict de la guerre , pour la crainte qu'ilz avoyent des Romains , & qu'ilz n'en sçavoyent point d'autre de ceste qualité , auquel ilz s'ozassent commettre ny fier qu'à luy : joint que ceulx qui avoyent vescu avec luy faisoient bien bon rapport , & louoyent grandement ses meurs & son naturel , qui estoit tel à ce que lon en trouve par escrit : On ne le voyoit gueres jamais espris ny de peur ny de joye , ains comme il estoit de nature homme sans peur au milieu du peril , aussi estoit il moderé en sa prosperité. Il ne cèdoit en hardiesse à nul capitaine de son temps pour vaillamment combattre , & de sens rassis en toutes soudaines rencontres : mais où il estoit question

de faire une surprise de bon entendement ou de sçavoir bien choisir l'avantage d'un lieu fort d'affiette pour loger ou combattre, ou de passer une riviere, ou eschapper un mauvais pas, & pour ce faire estoit besioin de grande legereté, & de jouer de quelque ruze & quelque faulse emorche aux ennemis, en temps & lieu, il en estoit ouvrier très excellent. Oultre cela, il estoit liberal & magnifique à remunerer les beaux faicts d'armes, & clement à punir les forfaitures : toutefois le meurtre qu'il commeit sur ses derniers jours ès personnes des jeunes enfans qu'il tenoit riere luy en ostage (qui fut sans point de doubte un acte de grande cruaulté, & d'un courroux qui ne peult pardonner) semble monstrier & faire foy qu'il n'estoit point clement ny humain de nature : mais que finement il le contrefaisoit quelquefois, pource que le temps & ses affaires le requeroient ainsi. Quant est à moy, je suis bien d'advis qu'il ne sçauroit advenir malheur si grief, qu'il eust le pouvoir de changer & tourner tout au contraire la vertu pure & nette, fondée en jugement de raison : mais aussi n'est il pas impossible que les bonnes vultentez & doulces natures, se sentans outragées & affligées indignement, ne puissent avec la fortune changer leurs inclinations naturelles : comme je pense qu'il advint lors à Sertorius,

lequel quand la fortune luy vint à faillir & à estre rebourse , devint sauvage & farouche , jusques à se venger cruellement de ceulx qui l'avoient trahy meschamment.

XV. Mais pour retourner au propos dont nous estions issus , Sertorius se partit d'Afrique à la semonce des Lusitaniens , qui le choisirent pour leur capitaine general , avec plein pouvoir & autorité souveraine : & arrivé qu'il y fut , leva incontinent gens de guerre , avec lesquels il reduisit en son obeïssance les peuples de l'Hespagne , qui sont les plus voisins de celle marche , dont la plus part se soumeit volontairement à son obeïssance , principalement pour le bruit qu'il avoit d'estre homme doux & humain , & oultre ce homme de faict & d'exécution : joint aussi qu'il usa de quelques habiletez & subtiles inventions pour les gagner & attirer , comme fut entre autres la ruze de sa biche , qui fut telle : Il y avoit un païsan nommé Spanus , qui se tenoit aux champs , où il rencontra un jour , par cas d'aventure , une biche qui avoit freschement fait son fan , & ayant esté lancée par des chasseurs , se trouva en son chemin , mais il ne sceut prendre la mere , & prit à la course le fan , qui estoit une petite biche de pelage¹ estrange : car elle estoit toute blanche.

¹ De peau , ou de robe extraordinaire.

Or par cas de fortune Sertorius se trouva lors en ce quartier là , qui de sa coustume estoit bien aise , quand on luy faisoit quelques telz petits presens , tant de fruiçts , que de gibbier , ou de venaison : & si faisoit bonne chere à ceulx , qui luy en apportoyent , les remunerant honnestement : si luy alla ce païsan offrir son petit bichor , dont Sertorius fut assez joyeux sur l'heure , & avec le temps il la rendit si privée & si familiere , qu'elle venoit à luy quand il l'appelloit , & le suyvoir par tout où il alloit , & ne s'effarouchoit point de voir continuellement grand nombre de soudards armez , ny d'ouïr le bruit & tumulte du camp : bien que petit à petit il tourna cela en miracle , faisant à croire aux Barbares que c'estoit un don que Diane luy avoit fait , par lequel elle luy faisoit entendre plusieurs choses à advenir , sachant bien que naturellement les Barbares sont faciles à prendre & à decevoir par superstition , avec ce qu'il les induisoit à recevoir ceste creance par un tel artifice : Quand il avoit eu quelques secrets advertissemens , que les ennemis devoient venir assaillir aucuns endroits des païs & provinces à luy sujettes , ou que lon luy avoit par surprise ou par intelligence emblé quelqu'une de ses places , il leur donnoit à entendre , que sa biche avoit la nuit en dormant parlé à luy ,

& luy avoit enjoint qu'il teinst ses gens tous prests en armes. Semblablement aussi quand il avoit eu advis, que quelqu'un de ses lieutenans avoit gaigné une bataille, ou avoit eu aucun avantage sur ses ennemis, il faisoit cacher le messager & amener sa biche en public, couronnée & couverte de bouquetz & de chappeaux de fleurs : puis disoit que c'estoit quelque bonne nouvelle qui luy devoit bien tost venir, les enhortant d'avoir bonne esperance & de se resjouir, en sacrifiant aux dieux pour leur rendre graces de ce que bien tost il auroit quelque bonne nouvelle.

XVI. Ainsi en leur imprimant ceste superstition en la teste, il les rendoit plus maniables & plus obeïssans à sa volonté, de sorte qu'ilz ne pensoient plus estre gouvernez par un homme estranger, qui avoit le sens & l'entendement plus grand que eulx, ains croyoyent fermement, que c'estoit quelque dieu qui le conduisoit : avec ce que les effects respondoient à leur opinion, pourautant qu'ilz voyoyent à l'œil sa puissance croistre, contre toute apparente raison : car avec deux mille cinq cents hommes de guerre, qu'il appelloit Romains, combien qu'il y en eust la plus part d'Africains, qui estoient passez quand & luy de l'Afrique en Hespagne, & quatre mille Lusitaniens, avec environ sept cents hommes de cheval,

cheval, il sousteint la guerre, contre quatre grands capitaines Romains, soubz la charge desquelz il y eut bien six vingts mille hommes de pied, six mille chevaux, & de gens de traict & tireurs de fondes, bien deux mille, avec un nombre infiny de villes & de païs, là où luy n'en avoit que vingt au commencement : & toutefois atout une si foible puissance, qu'il se trouva entre mains à l'entrée de ceste guerre, non seulement il conquit de grands païs, & prit plusieurs bonnes villes, mais aussi prit prisonniers aucuns des capitaines, que lon envoya contre luy : entre lesquelz il desfeit Cotta en bataille par mer, près la ville de Mellaria, & rompit aussi en bataille rengée, Fidius gouverneur de l'Hespagne Bætique, près de la riviere de Bætis, où il tua deux mille hommes Romains : & par son Quæsteur desfeit aussi Lucius Domitius, Proconsul de l'autre province d'Hespagne : & une autre fois desconfit aussi Toranius, un autre capitaine, l'un des lieutenans de Metellus, qu'il tua sur le champ, avec toute son armée : & à Metellus mesme que lon estimoit l'un des plus grands personnages au faict de la guerre, & des meilleurs capitaines que les Romains eussent pour lors, il luy donna tant de traverses, & le renga à telz termes, qu'il fallut que Lucius Lollius vinst du Languedoc pour le secourir :

& , qui plus est , que lon envoyast de Rome en diligence le grand Pompeius , avec une nouvelle armée : car Metellus ne sçavoit plus qu'il devoit faire ny de quel costé se tourner , ayant à faire à un homme hardy & aventureux , que jamais il ne pouvoit attirer à bataille rangée , ny le atraper en pleine campagne : mais qui se muoit & tournoit facilement en toutes formes , pour l'agilité & legereté de ses souldards Hespagnolz de nation , armez à la legere : là où luy avoit accoustumé¹ de combattre en journée assignée , de pied ferme sans bouger , & conduisoit une armée pesante & chargée de harnois , laquelle sçavoit très bien garder ses reings , & en combattant de pied ferme à coups de main renverser son ennemy , & luy passer sur le ventre : mais de gravir contremont les montagnes , & d'estre tousjours attachée à la cueuë de ces hommes legers comme le vent , à les chasser & poursuivre , attendu qu'ilz fuyoyent continuellement , & n'arrestoyent jamais en place , elle ne l'eust sceu faire , ny n'eust sceu endurer la faim & la soif , vivre sans cuisine , & sans feu , coucher à mesme terre , sans tentes ne pavillons , comme faisoient ceulx de Sertorius.

¹ Il y a en cest endroit deux leçons toutes deux soutenables , & selon l'autre il faudroit dire ; de mener à la guerre des citoyens Romains combatans en gens de bien. Amyot.

XVII. Joinct aussi que luy qui estoit desja bien avant sur son aage, après plusieurs grands labeurs & travaux qu'il avoit endurez en ses jeunes ans, se laissoit desja un peu aller aux voluptez & aux delices, & estoit attaché à Sertorius, qui lors se trouvoit en la fleur de son aage plein de vigoureux esprits, oultre ce que de nature il avoit le corps merveilleusement bien composé pour la force, legereté & sobriété : car il n'estoit aucunement subject à sa bouche, ny ne beuvoit jamais oultre mesure, non pas mesme quand il estoit hors d'affaires en plein repos : car il s'estoit accoustumé de jeunesse à supporter de grands travaux, faire de longues traittes, passer plusieurs jours & nuicts de reng sans dormir, manger peu, & se contenter de viandes les premieres trouvées : & quand il se trouvoit de loisir, il estoit sans cesse à cheval à chasser & courir çà & là parmy les champs : au moyen dequoy il acquit une grande experience & adresse, pour se sçavoir habilement tirer hors d'un mauvais passage quand il estoit pressé de son ennemy, & au contraire aussi de l'enclorre quand il avoit avantage sur luy, & de cognoistre par où lon pouvoit passer, & par où non. Et pourtant Metellus, qui ne cherchoit qu'à combattre, soustenoit toutes les incommoditez & toutes les pertes que souffrent ceulx qui

font vaincuz : & au contraire Sertorius , en declinant la bataille , & fuyant devant luy , avoit fur luy tous les avantages qu'ont ceulx qui chassent leurs ennemis après les avoir rompus : car il luy retrenchoit vivres de tous costez , il luy ostoit l'eau , il le gardoit de pouvoir fourrager. Quand il cuidoit marcher en pais , il l'arrestoit : quand il estoit arresté & logé , il luy donnoit tant d'alarmes , qu'il le contraignoit de desloger. S'il mettoit le siege devant quelque place , il se trouvoit luy mesme incontinent assiégré , pour la necessité de vivres en quoy Sertorius le mettoit , tellement que ses souldards n'en pouvoyent plus. Au moyen de quoy comme Sertorius desfiast au combat d'homme à homme Metellus , ilz crierent que c'estoit bien dit , & qu'il falloit qu'ilz combattissent capitaine contre capitaine , & Romain contre Romain : toutefois Metellus le refusa très bien , & les souldards s'en moquerent : mais luy ne s'en faisoit que rire , & faisoit sagement : car , comme dit Theophrastus , il fault qu'un capitaine meure en capitaine , non pas en simple souldard.

XVIII. Au demourant Metellus s'estant un jour advisé que les Langobrites ¹ , qui faisoient beaucoup de service & d'aide à Sertorius , es-

¹ Langobrige, ville de Portugal, assez près de la mer & de l'embouchure du Douro.

royent aïsez à forcer & à prendre par faulte d'eau , à cause qu'ilz n'avoient qu'un seul puis dedans leur ville , & quant aux ruisseaux & fontaines qui sont aux faulxbourgs & environs de la ville , celui qui tiendrait la ville assiegée , sans point de doubte en estoit le maistre , esperant qu'il contraindrait la ville de se rendre à luy dedans deux jours , au plus tard , il commanda à ses gens , qu'ilz prissent des vivres pour cinq jours seulement : mais Sertorius adverty de ce y donna bon ordre & promptement : car il feit emplir d'eau deux mille peaux de chevre , & promet pour chasque peau bonne somme d'argent , à qui les porteroit : ce que plusieurs Hespagnolz & plusieurs Maurusiens incontinent entreprirent : desquelz Sertorius choisissant les plus robustes & les plus dispos , les envoya par un chemin de montagne , leur enjoignant qu'en delivrant ces chevres pleines d'eau à ceulx de la ville , ilz en feissent quand & quand sortir toute la tourbe inutile , à celle fin que l'eau fournisse plus longuement à ceulx qui demouroyent pour la defense de la ville : dequoy Metellus estant adverty en fut fort fâché , pource que desja estoient presque tous consummez les vivres qu'il avoit commandé de prendre à ses gens , & à ceste cause envoya un sien lieutenant nommé Aquinus , avec six mille

hommes , au recouvrement de vivres. Sertorius en fut tantost adverty , qui luy dressa embusche à son retour dedans une vallée couverte de bois , là où il meit en aguet trois mille hommes pour luy donner sur la cueuë en sursault , pendant que luy le chargeroit de front. Ainsi le tourna il en fuitte , & tua sur le champ une partie de ses gens , & en prit l'autre : mais Aquinus le capiraine ayant perdu ses armes & son cheval , se sauva de vistesse au camp de Metellus , lequel à l'occasion de ceste rouverte fut contrainct de lever honteusement son siege , dont il fut fort moqué des Hespagnolz.

XIX. Pour telz actes estoit Sertorius merveil-
leusement aimé, estimé & honoré des Barbares,
& mesmement pource qu'il les avoit agguerriz
& instruits à la discipline Romaine, leur ostant
la façon de combatte furieuse, sauvage & bes-
tiale qu'ilz avoyent au paravant, & leur ensei-
gnant à user d'armes Romaines, à garder leurs
reins en combatant, suyvre l'enseigne, & à
prendre le signe & le mot de la bataille, de
forte qu'au lieu d'une grande troupe de bri-
guans & larrons, à quoy ilz ressembloyent au
paravant, il en feit une belle armée, bien
agguerrie & bien ordonnée. Davantage il leur
deparroit force or & argent, leur montrant à
en faire dorer leurs armets, & enrichir d'ou-

vrages leurs targes & boucliers , & à se vestir proprement de riches manteaux & de beaux hocquemons par deffoubz , leur enseignant à se tenir honestement , & leur fournissant argent pour ce faire , par où il gaignoit merueilleusement les cœurs des Barbares.

XX. Mais plus encore les obligea il , par ce qu'il feit à leurs enfans : car de tous les peuples & païs qui estoient soubz son obeïssance , il envoya querir les jeunes enfans des meilleures & plus nobles maisons , & les feit tous assembler dedans Osca ¹ bonne & grande ville , où il leur bailla des maistres pour leur enseigner les sciences & lettres , tant grecques que latines , donnant à entendre à leurs parents , que c'estoit à fin que quand ilz seroyent grands , ils en fussent plus idoines à estre employez aux affaires de la chose publique : mais à la verité c'estoyent hostages qu'il prenoit finement d'eulx pour s'asseurer de leur foy & loyauté. Si estoient les peres fort joyeux de voir leurs enfans vestus à la guise Romaine de belles robes longues brodées de pourpre tout à l'entour , aller honestement aux escholes , que Sertorius payoit leur despenfe , & que luy mesme bien souvent prenoit la peine de les examiner , pour voir comment ilz

¹ Dans un des cantons occupés par les Illegètes, appelé Vescitanie. C'est aujourd'hui la ville d'Hisca en Arragon.

avoyent profité , & qu'il faisoit des presens à ceulx qui avoyent le mieulx estudié , leur donnant certaines bagues & joyaux à pendre au col , que les Romains appellent Bullas , tellement qu'estant alors la coustume en Hespagne , que ceulx qui estoient à l'entour du prince ou du capitaine mourussent avec luy , quand il venoit à mourir , & estant celle coustume de se devouer ainsi volontairement à mourir quand & son seigneur appelée par les Barbares la Devotion , il y en avoit bien peu de leurs escuyers ou de leurs plus familiers , qui se devoassent ainsi à mourir quand & les autres capitaines : mais au contraire plusieurs milliers d'hommes suivoient ordinairement Sertorius ayans voué de perdre leurs vies quand il perdrait la siene. En tesmoignage dequoy lon dit que son armée ayant un jour esté rompue près de ne sçay quelle ville d'Hespagne , comme les ennemis le poursuyvissent asprement , les Hespagnolz n'espargnans aucunement leurs vies pour sauver la siene , l'enleverent sur leurs espaules , & le passerent par dessus eulx de main en main jusques à ce qu'ilz l'eussent mis dedans la ville : puis quand ilz l'eurent osté du danger & mis à sauté , adonc ilz entendirent à eulx sauver à la course le mieulx qu'ilz peurent.

XXI. Si n'estoit pas bien voulu des Hespagnolz

seulement , mais aussi des autres gens de guerre venuz de l'Italie : au moyen dequoy quand Perpenna Vento , qui estoit de la mesme ligue , fut arrivé en Hespagne avec grosse somme d'argent & bon nombre de gens de guerre , en intention de faire la guerre à par soy contre Metellus , les soudards s'en courroucerent à luy , & ne parloit on que de Sertorius en son camp : ce qui faisoit grand despit à Perpenna , pource qu'il estoit homme superbe & arrogant , pour la richesse & la noblesse de sa maison. Mais quand les nouvelles vindrent que Pompeius passoit desja les monts Pyrenées , les soudards prirent leurs armes , & arracherent les bastons des enseignes , qui estoient fichées en terre , crians après Perpenna , qu'il les menast à Sertorius , & le menaçans que s'il ne le faisoit , ilz le laisseroyent tout seul , & s'en iroyent trouver un capitaine , qui scauroit bien sauver & eulx & luy ensemble : de sorte que Perpenna par ce moyen fut contraint , voulust ou non , d'obtemperer à leur volonté , & de mener cinquante & trois enseignes qu'il avoit , joindre avec celles de Sertorius.

XXII. Ainsi deveint l'armée de Sertorius fort grosse & puissante : mesmement depuis que toutes les villes , qui sont au deçà de la riviere

d'Ebrus¹, se furent rendues à luy : car adonc gens de guerre accoururent de tous costez : mais c'estoit une tourbe confuse & temeraire de Barbares ramassez de toutes pieces, lesquelz n'avoient pas la patience d'attendre l'occasion, ains crioyent en grand tumulte, que lon allast chaudement charger l'ennemy : ce qui faschoit à Sertorius, & rascha premietement à les remettre & rendre capables de la raison, par remonstrances : mais quand il veit qu'ilz se mutinoient, & qu'ilz vouloyent à toute force que lon allast, comment que ce fust, assaillir les ennemis hors de temps & de saison, adonc leur lascha il la bride, & les laissa aller en telle sorte qu'il s'attendoit bien qu'ilz seroyent batus, mais aussi qu'il donneroit bien ordre qu'ilz ne seroyent pas pourtant perduz, esperant que de lors en avant ilz en seroyent plus souples à obeir à ses commandemens. Si en advint tout en la sorte qu'il avoit conjecturé, mais il alla au devant pour les recueillir, & les ramena à sauveé dedans son camp. Et pour leur oster la desffiance qu'ilz pouvoient avoir imprimée en leurs cueurs, à cause de ceste secouffe, peu de jours après ceste rouverte, il feit

¹ Autrefois appelée Ibère, qui du nord de l'Espagne coulant au sud-est, vient se jeter dans la Méditerranée vis-à-vis la plus grande des deux îles Baléares, aujourd'hui Majorque & Minorque.

assembler toute son armée , comme pour les prescher , puis fait amener au milieu de toute l'assemblée deux chevaux , l'un foible extrêmement & desja vieil , l'autre grand & fort , & qui entre autres choses avoit la cueuë fort espessë , & belle à merveilles. Derriere celuy qui estoit ainsi foible & maigre il fait mettre un beau grand homme & puissant , & derriere le fort cheval en fait mettre un autre petit & debile , qui à le voir monstroït avoir bien peu de force. Et quand il eut fait un signe qu'il leur avoit ordonné , l'homme qui estoit puissant & fort , prit à deux mains la cueuë du cheval maigre , & la tira de tout son effort , comme s'il l'eust voulu arracher : & l'autre qui estoit debile se meit à tirer poil après poil de celle du puissant cheval, Quand ce grand & puissant homme eut bien travaillé & sué en vain , pour cuider rompre ou arracher la cueuë du cheval foible , & qu'il n'eut en somme fait autre chose que appareiller à rire à ceux qui le regardoyent , & qu'au contraire l'homme foible en bien peu d'heure & sans aucune peine , eut rendu la cueuë de son grand cheval sans un seul poil : adonc Sertorius se dressant en piedz , « Voyez (dit il) mes » compagnons & amis , comment la perseverance » fait plus que la force , & comme plusieurs » choses inexpugnables à qui les cuideroit forcer

» tout à un coup , avec le temps se laissent
 » prendre quand on y va petit à petit : car la
 » continuation est invincible , par la longueur
 » de laquelle il n'est force si grande , que le
 » temps à la fin ne mine & ne consume , étant
 » le plus seur & le plus certain secours que
 » sçauroyent avoir ceulx qui en sçavent attendre
 » & choisir l'opportunité , & au contraire aussi le
 » plus dangereux ennemy que sçauroyent avoir
 » ceulx qui font les choses avec précipitation ».
 Par telles inventions que Sertorius ourdissoit
 ordinairement pour entretenir les Barbares ,
 il leur enseignoit à attendre les occasions du
 temps.

XXIII. Mais entre toutes ses ruzes de guerre ;
 celle dont il usa à l'encontre du peuple que lon
 appelle les Characitaniens , fut autant estimée que
 nulle autre. C'est un peuple qui habite delà la
 rivière du Tagus¹, & n'ont ces Characitaniens
 ne villes , ne villages pour leur ordinaire de-
 mourance : ains ont un coustau assez grand &
 haut , où il y a force cavernes & force trous
 creux & profonds dedans les rochers , qui regar-
 dent droit vers le Septentrion. Tout au long du
 pied de ce coustau y a une fondrière d'argille ,
 & une terre si tendre & si pourrie , qu'elle n'a

¹ Le grec porte : Tagonius. On ne peut rien décider , parce que ces
 Characitaniens sont une peuplade inconnue.

pas force de soustenir, quand on marche dessus : ains aussi tost que lon y touche tant soit peu, elle se rompt, & se resoult en pouldre, comme feroit de la chaux vive ou de la cendre, qui la fouleroit. Au moyen dequoy, quand ces gens avoyent doubte de quelques ennemis, ou qu'ilz avoyent ferré dedans leurs cavernes ce qu'ilz avoyent robbé & pillé sur leurs voisins, ilz ne faisoient que se tenir dedans leurs cavernes pour estre à seureté : car il estoit impossible de les y forcer. Si advint quelquefois que Sertorius s'estant esloigné de Metellus, s'en alla camper auprès du coustau ou demouroient ces Barbares, qui l'eurent en mespris, cuidans qu'il eust esté desfait par Metellus : parquoy estant irrité de cela, ou voulant monstrier qu'il ne fuyoit point, le lendemain au matin s'approcha à cheval le plus près qu'il peut du coustau, pour le recognoistre, & considerer de près la nature du lieu, & voyant qu'il n'y avoit aucunes advenues par où lon y peult entrer, il ne pouvoit autre chose faire, que se promener çà & là bien fasché, & user de menaces vaines sans effect : mais en allant & venant il s'advisa que le vent elevoit en l'air un grand poulcier de ceste terre fresse, que j'ay ditte, & le jettoit & chassoit contre les trous de ces Characitaniens, dont les bouches & ouvertures, comme nous disions naguètes, sont tournées de-

vers le Septentrion. Or le vent qui souffle de devers le Septentrion, que quelques uns appellent Cæcias¹, est celui de tous les vents, qui plus ordinairement tire en ce quartier là, s'engendrant ès plaines marefcageufes d'alentour, & ès montagnes en tout temps couvertes de neiges, mefmemment lors qu'il estoit au cueur d'esté, auquel temps il se nourrit & se renforce par les neiges & glaces feptentrionales qui fe fondent adonc, & lors halena fouefvement tout le long du jour refreschiffant les Barbares & leur bestail auffi.

XXIV. Sertorius discourant cela en foy-mefme, & entendant des habitans du païs à l'environ que cela fe faisoit ordinairement, commanda à fes gens qu'ilz amaffaffent grande quantité de ceste terre legere & cendreufe, & qu'ilz en feiffent un grand monceau droit au devant de ce couftau : dequoy les Barbares se mocquoyent avec grandes rifées du commencement, cuidans que ce fust une levée qu'il vouluft haulfer pour les aller combattre : mais nonobftant il feit continuer la befongne tout le long du jour jufques à la nuit, puis fur le soir remena fes gens en fon camp. Le lendemain à l'aube du jour il se leva premierelement un petit

¹ Voyez les Observations fur le troisieme volume des Morales, p. 455, chap. LXXXIV.

vent, qui esleva le dessus seulement, & le plus delié de celle terre pouldreuse, comme la bale quand on vanne le bled : mais à mesure que le soleil commença à se haulser, le vent de Tramontaine se renforça aussi, qui couvrit incontinent de poulcier tout le coustau. Puis là dessus arriverent les gens de Sertorius qui remuerent jusques au fond le monceau qu'ilz avoyent amassé le jour de devant, & briserent les mottes de ceste argille seche. Ceulx qui estoient à cheval manioient leurs chevaux par dessus, pour tousjours faire soudre plus grande quantité de poulcier, que le vent prenoit aussi tost qu'il estoit enlevé hors de terre, & le jettoit dedans les trous & cavernes de ces Barbares, donnant à droite ligne dedans les veuës & ouvertures d'icelles. Parquoy n'ayans autres souffiraux, ny autres issues, sinon celles dedans lesquelles le vent leur donnoit, leurs veuës furent tantost estouppées, & le dedans de leurs cavernes remply d'un air chaud & estouffé, tellement qu'ilz ne pouvoient plus, qu'à grande peine, respirer : car quand ilz cuidoyent reprendre leur haleine, cest air estouffé & le poulcier ensemble leur entroit dedans la gorge, de maniere qu'ilz eurent beaucoup à faire à durer & soustenir seulement deux jours, & au troisieme se rendirent à la discretion de Ser-

torius : ce qui ne luy augmenta pas tant ses forces , comme il luy accroût sa reputation, d'avoir ainsi bien sceu gagner par engin, ce qui estoit imprenable par force.

XXV. Or durant tout le temps qu'il feit la guerre contre Metellus seul, il eut le plus souvent avantage sur luy, pour autant que Metellus qui estoit desja vieil, & de sa nature lent & pesant, ne pouvoit pas resister à ce jeune homme hardy, qui conduisoit une armée legere, ressemblant plustost à une troupe de larrons & de brigans que non pas à un exercite de gens de guerre. Mais depuis que Pompeius eut passé les monts Pyrenées, & qu'estans campez l'un devant l'autre, Pompeius luy eut monstré toutes les ruzes de guerre, & tous les tours de bon capitaine qu'il sçavoit, & luy semblablement à Pompeius, & neanmoins que lon veit que Sertorius avoit encore le plus souvent avantage, tant à luy dresser embusches, qu'à se garder des sienes : adonc fut le bruit & le renom de Sertorius si grand, que jusques à Rome mesme il fut estimé le plus grand capitaine, & le mieux entendu au faict de la guerre, qu'autre qui fust de son temps.

XXVI. Car ce n'estoit pas peu de chose que la reputation de Pompeius, ains florissoit desja sa gloire, qui depuis s'augmenta encore davantage,
pour

pour les hautes prouesses qu'il avoit faittes soubz Sylla, lequel l'en surnomma luy mesme Pompeius Magnus, c'est à dire, le grand, & si avoit merité l'honneur du triumphe avant que la barbe luy fust venue : tellement qu'à son arrivée en Hespagne plusieurs des villes & citez qui obeïssoyent à Sertorius furent en branle de soy retourner devers luy : mais elles changerent de volonté depuis par la fortune qui advint à la ville de Lauron ² contre l'esperance de tout le monde : car comme Sertorius eust mis le siege devant, Pompeius y alla en grande diligence avec toute son armée pour le lever de là. Si y avoit tout auprès de la ville une petite motte fort commode pour y loger un camp & endommager ceulx de la ville, au moyen dequoy l'un se hastoit pour s'en emparer, & l'autre pour l'en engarder : toutesfois Sertorius y arriva le premier, qui s'en saisit, & Pompeius y arriva tantost après, qui fut bien aise de ce que la chose estoit ainsi advenue, cuidant bien tenir à ce coup là Sertorius, estant enfermé d'un costé, de la ville de Lauron, & de l'autre costé, de son armée : à l'occasion dequoy il manda à ceulx de la ville qu'ilz ne se souciaissent de rien, que de regarder à leur aise de dessus leurs murailles Sertorius qui vouloit assieger les autres, luy,

² Aujourd'hui Liria au royaume de Valence.

mesme assiegé bien à l'estroit avec son armée. Cela fut rapporté à Sertorius, qui ne s'en feit que rire, & dit qu'il enseigneroit à ce jeune disciple de Sylla (car ainsi appelloit il Pompeius par mocquerie) qu'il faut que un sage capitaine regarde plus derriere soy que devant : & en disant cela, monstra aux Lauronitains six mille hommes de pied bien armez, qu'il avoit laissez dedans le camp, dont il estoit party pour venir occuper la motte, où il estoit alors ; à fin que si Pompeius d'aventure le cuidoit venir assaillir, ilz luy donnassent sur la cueüe. Ce que Pompeius ayant trop tard apperceu, n'ozoit presenter la bataille à Sertorius, craignant d'estre envelopé par derriere, & d'autre costé avoir honte d'abandonner les Lauronitains, lesquelz à la fin il fut contrainct de voir perdre & destruire devant ses yeux, sans qu'il ozast bouger pour y penser mettre ordre : car quand les Barbares veirent qu'ilz n'avoient point d'esperance d'estre secouruz, ilz se rendirent à la mercy de Sertorius, lequel pardonna aux personnes, & les laissa toutes aller où ilz voulurent : mais il brusta toute la ville, non point par courroux ny par cruauté (car c'est le capitaine qui a le moins usé de cruauté par cholere) mais pour faire honte & clorre la bouche à ceux qui faisoient tant de cas de Pompeius, & l'avoient en si grande estime,

à fin que le bruit courust entre les Barbares que luy estant present, & presque se pouvant chauffer au feu qui brusloit une bonne ville de ses alliez devant ses yeux, jamais il n'avoit ozé ny peu leur donner secours.

XXVII. Bien est il vray que durant le cours de ceste guerre Sertorius recent aussi plusieurs pertes & dommages, mais ce fut tousjours, ou le plus souvent par la faulte de ses lieutenans : car quant à luy il se mainteint tousjours invincible, & ceux qu'il conduisoit aussi, n'estant jamais batu qu'en ses lieutenans : encore acqueroit il plus d'honneur par les ressources des batailles que ses capitaines luy perdoient, & que luy recouvroit, que n'avoient fait ses adversaires, qui les avoyent batus, comme en la journée qu'il gagna contre Pompeius près la ville de Sucron¹, & une autre fois contre Metellus & Pompeius ensemble près la ville de Tutria². Et quant à la desfaitte de Sucron, on tient qu'elle advint par l'ambition de Pompeius, qui se voulut hastier de peur que Metellus ne fust participant de l'honneur de sa victoire, & Sertorius ne demandoit autre chose qu'à le combattre avant que Metellus se joignist à luy, & pourtant luy donna la bataille sur le soir,

¹ Voyez les Observations.

² *Ibid.*

estimant que les tenebres de la nuit feroient grand destourbier à ses ennemis, & à se sauver s'ilz estoient vaincus, & à chasser s'ilz demouroient vaincueurs, à cause qu'ils estoient estrangers, & qu'ilz n'avoient pas cognoissance du país. Quand les batailles vindrent à s'entrechoquer, Sertorius ne se trouva pas du commencement à l'opposite de Pompeius, ains à l'encontre d'Afranius qui conduisoit la poincte gauche de la bataille de Pompeius, & luy estoit en la droite de la siene : mais il fut adverry que la poincte gauche de son armée, contre qui Pompeius combattoit, estoit si fort pressée, qu'elle reculoit en arriere, & ne pourroit plus gueres durer, si promptement elle n'estoit secourue : au moyen dequoy il bailla incontinent la conduite de la droite, où il estoit, à d'autres siens capitaines, & s'en courut hastivement à la gauche qu'il trouva en grand branle de fouir à val de rouverte : si rallia ceulx qui avoient desja tourné le dos, & remeit en bon ordre ceulx qui faisoient encore teste, & après les avoir encouragéz tant de sa parole que de sa presence, il alla recharger plus vivement que jamais Pompeius, qui chassoit desja pensant avoir asseurement tout gaigné, & feit un tel effort qu'il retourna toute l'armée des Romains entierement en fuite, de maniere qu'il s'en

fallut bien peu que Pompeius luy-mesme n'y fust occis sur le champ : car il y fut bien fort blecé, & se sauva par une estrange sorte, qui fut, que les Africains de Sertorius ayans pris son cheval, lequel estoit fort richement accoustré de harnois d'or & d'autres precieux ornemens, en les partissant entre eulx, & batans à qui en auroit, se le laisserent eschapper cessans de le poursuyvre. Mais Afranius ce pendant, incontinent que Sertorius fut party pour aller secourir l'autre poincte de sa bataille, tourna en fuitte ce qu'il trouva de front au devant de luy, & les mena batant jusques au dedans des trenchées de leur camp, dedans lequel il entra pesse meste avec les fuyans, & le pillà qu'il estoit desja nuit toute noire, ne sachant rien de la rouverte & desfaitte de Pompeius, ny ne pouvant retirer ses gens du pillage. Parquoy Sertorius y arrivant là dessus, & les trouvant en desarroy, en tua une grande partié : puis le lendemain matin feit encore armer ses gens, & les jetta aux champs pour presenter de rechef la bataille à Pompeius : mais depuis ayant eu nouvelles que Metellus estoit près de là, il feit sonner la retraite, & se deslogea de là où il estoit campé, disant, « Si ceste vieille ne fust venue, je vous eusse bien renvoyé ce garson à coups de verges à Rome ».

XXVIII. Si estoit fort desplaisant de ce que

E e 3

Ion ne pouvoit nulle part trouver ny recouvrer sa biche blanche : car aussi estoit il privé d'un grand artifice & d'un subtil moyen pour contenir les Barbares en devoir, mesmement lors qu'ilz avoyent plus grand besoing d'estre reconfortez : mais de bonne adventure, il y eut quelques uns de ses gens, qui s'estans esgarez la nuit, la rencontrèrent en leur chemin, & l'ayans reconnuë à sa couleur, la prirent & la luy ramenerent. Ce qu'entendant Sertorius leur promet une bonne somme d'argent, pourveu qu'ilz ne dissent jamais à personne vivante qu'ilz la luy eussent ramenée, & quand & quand la feist diligemment cacher. Peu de jouts après il sortit en public avec un visage riant, & une chere guaye comptant par tout aux principaux seigneurs & capitaines des Barbares, que les dieux en dormant luy avoyent signifié & predit, que bien tost il luy devoit advenir un grand heur : & en disant cela, monta en son siege pour donner audience & faire droit à chacun : & lors ceulx qui gardoyent la biche non gueres loing de là, la laissèrent aller secretement : & elle si tost qu'elle apperceut Sertorius, accourut incontinent à son siege à grande feste, mettant sa teste entre ses genoux, & luy touchant du musle en la main droite, comme elle avoit accoustumé de faire au paravant. Sertorius d'autre costé la caressa aussi, & luy feist

grande feste tout à propos , avec demonstration de si tendre affection que les larmes luy en venoyent , ce sembloient , aux yeux : dont les Barbares assistens demourent tous picquéz & estonnez du commencement : mais puis après quand ilz y eurent un peu pensé , ilz se prirent à battre des mains de joye qu'ilz en eurent , & le reconvoierent jusques en son logis avec grands cris de jouissance , disans & ayans ferme opinion qu'il estoit homme divin & bien voulu des dieux , dont ilz conceurent en leurs cœurs un grand contentement , & une asseurée espérance que leurs affaires iroyent tousjours de bien en mieulx.

XXIX. Une autre fois dedans le territoire des Saguntins , ayant réduit ses ennemis à extreme necessité de vivres , il fut contrainct de venir malgré luy au combat , à cause qu'ilz envoyoyent une grosse troupe de leurs gens pour fourrager le païs , & reconvrer vivres : si fut la chose bien & courageusement combatue tant d'un costé que d'autre , & y fut occis Memmius le plus vaillant capitaine que eüst Pompeius , en combattant vaillamment au plus fort de la bataille. Sertorius se sentant le plus fort suyvit sa premiere poincte , faisant tousjours grand meurtre de ceulx qui l'attendoyent ; tant qu'il penetra jusques à Metellus mesme , qui l'attendit en se defendant plus

vigoureusement que son aage ne portoit, si bien qu'il y fut blecé d'un coup de parthifane. Cela feît honte aux Romains, non seulement à ceulx qui le veirent, mais aussi à ceulx qui l'ouirent dire, & eurent vergongne d'abandonner leur capitaine : & tournans ceste vergongne en courroux contre les ennemis, ilz couvrirent Metellus avec leurs targes & escus tout à l'environ, & en le tirant hors de la presse feirent un tel effort, qu'ilz contraignirent les Hespagnolz de reculer en arriere.

XXX. Ainsi estant la chance de la victoire tournée, Sertorius pour donner moyen à ses gens rompus, de se retirer à sauveté, & loisir à un nouveau renfort qu'il faisoit venir, de s'amasser tout à leur aise, il s'en fout expressement en une ville¹ de montagne forte d'assiette, là où il feît bonne mine de bien réparer les murailles, fortifier les portes, n'ayant rien moins delibéré, que d'attendre ny soustenir le siege là dedans : car c'estoit une emorche qu'il jettoit au devant de ses ennemis, lesquels se vindrent planter & amuser devant celle ville, esperans qu'ilz la prendroyent facilement, & ce pendant laisserent à poursuivre les Barbares, qui eurent tout loisir de se retirer à leur aise en lieu de seureté, & si ne donnerent pas ordre d'empescher de s'assembler un nouveau renfort qui venoit à Sertorius, lequel avoit envoyé ses capitai-

¹ Voyez les Observations.

nes ès villes prochaines , & pais circonvoisins pour lever gens , leur ayant expressement enjoint ; que si tost qu'ilz auroient mis ensemble un nombre competent ; qu'ilz le luy envoyassent , comme ilz feirent : & luy, si tost qu'il en eut les nouvelles , fendant aisement ses ennemis , passa sans difficulté à travers eulx , & alla trouver ses gens , avec lesquels il revint tout soudain plus fort que devant harasser de rechef ses ennemis , & leur couper vivres du costé de la terre par les embusches , aguets & surprises qu'il leur faisoit à toutes heurtes , & qu'il se trouvoit habilement en tous lieux où ilz se cuidoyent adresser , pour l'agilité & legereté de son armée , & du costé de la mer par le moyen de quelques fustes de cour-faires , dont il couroit toute la coste , & tout le pais prochain du rivage de la mer : tellement que les deux capitaines siens adversaires furent contrains de s'escarter loing l'un de l'autre & s'en alla Metellus hyverner en la Gaule , & Pompeius demoura en Hespagne bien à destroit de toutes choses à faulte d'argent , pour passer l'hyver ès terres des Vacceiens ¹ , & escrivit au senat à Rome , qu'il remeneroit son armée en Italie , si promptement on ne luy envoyoit argent , & qu'il avoit ja despendu le sien en combatant

1. Entre le Durius , aujourd'hui Douro au midi , & au nord les Cantabres , maintenant les Biscayens.

journallement pour la defense de l'Italie , de sorte que lon tenoit ja pour tout asséuré à Rome, que Sertorius feroit premier en Italie que Pompeius , tant il avoit reduit à l'estroit les principaux & plus estimez capitaines de cest aage là , par son bon sens & sa bonne conduite.

XXXI. Si monstra bien Metellus combien il le redoubtoit , & combien il l'estimoit grand & redoutable ennemy : car il feit publier à son de trompe , Que si aucun Romain le pouvoit tuer , il luy donneroit cent talents ¹ en argent , & vingt mille arpens de terre , & s'il estoit banny , luy promettoit rehabilitation & restitution de tous ses biens , acheptant par trahison la mort de celuy qu'il n'esperoit plus pouvoir jamais desfaire par armes. Davantage il luy advint une fois de gaigner une bataille contre Sertorius , dont il fut si élevé , & eut tant de joye pour ceste prosperité , qu'il se feit pour cela appeller Imperator , c'est à dire , souverain capitaine , & souffrit que par les villes où il passoit , on luy en dressast des autelz & luy feist des sacrifices. Et si dit on de plus , qu'il se laissa mettre sur la teste des chappeaux de fleurs , & se festoyer en banquets dissolus ès quelz il seoit à table vestu d'une robbe triumphale , & y feist on des images

¹ Solxante mille escus. Amyot, 466,875 livres de notre monnoie.

de victoire , qui se rouloyent parmy la salle avec engins & mouvemens secrets , portans lesdites images des trophées d'or & des couronnes & chapeaux de triumphe , & des danses de beaux jeunes enfans , & de belles jeunes filles , qui chantoient des cantiques de triumphes en sa louange : en quoy veritablement il estoit digne d'estre moqué , se monstrent ainsi transporté de joye , & esblouy de vaine gloire , pour avoir une fois seulement fait retirer celuy qu'il souloit appeller le fugitif de Sylla , & le reste des bannis de Carbo.

XXXII. Et au contraire, lon peult cognoistre la magnanimité & grandeur du courage de Sertorius, premierement à ce qu'il appelloit les bannis qui s'estoyent fauvez de Rome, & retirez devers luy, Senateurs, & les tenant riere foy, les nommoit le Senat, & en faisoit les uns questeurs, les autres prateurs, ordonnant toutes choses selon les coustumes & à la guise de son país : & puis à ce que faisant la guerre avec les armes des villes d'Hespagne, & la soustenant à leurs despens, jamais neantmoins il ne leur ceda un tout seul point de l'autorité souveraine, non pas seulement de parole, ains leur bailla tousjours gouverneurs, officiers & capitaines Romains, comme celuy qui disoit tousjours, qu'il combattoit pour la liberté du peuple Romains, non pour accroistre

la puissance des Hespagnols au prejudice des Romains.

XXXIII. Car aussi à la verité, il avoit une grande devotion envers son païs, & desiroit singulierement y pouvoir estre rappelé : mais neantmoins en ses adversitez, quand ses affaires se portoyent mal, c'estoit alors qu'il se monstroit de plus grand cueur, sans donner apparence aucune à ses ennemis de courage affoibly ne ravallé : mais en ses prospéritez, quand il avoit avantage sur eux, il mandoit à Metellus & à Pompéius, qu'il estoit bien content de poser les armes, & de vivre chez soy en homme privé, moyenant qu'il fust par edict public rappelé & restitué, & qu'il aimoit mieulx estre le moindre citoyen de Rome, qu'estant banny de son païs, estre appellé empereur de tout le reste du monde. Et disoit on, que l'une des principales causes, pour lesquelles il desiroit tant estre rappelé, estoit l'amour qu'il portoit à sa mere, sous laquelle il avoit esté nourry enfant orphelin de son pere, & avoit mis toute son affection entierement en elle : de sorte que quand ses amis qu'il avoit en Hespagne, le manderent pour y venir en prendre le gouvernement & y estre leur capitaine, après y avoir esté quelque temps, ayant eu nouvelle que sa mere estoit decedée, il en sentit si grande douleur, que peu s'en fallut qu'il n'en mourust

de regret : car il demoura sept jours entiers couché par terre en plorant, sans donner le mot du guet à ses gens, & sans se laisser voir à aucun de ses amis, jusques à ce que les autres capitaines principaux & de mesme qualité que luy, vindrent à l'entour de sa tente, & l'importunerent tant par prieres & remonstrances, qu'ilz le contraignirent d'en sortir, & de se monstrier & parler aux souldards, & d'entendre à ses affaires qui estoient très bien acheminez. Pourtant ont plusieurs jugé par telz indices, que de sa nature il estoit doux & debonnaire, & que son inclination naturelle estoit d'aimer le repos & la tranquillité d'esprit & de corps : mais que pour cause necessaire il fut contraint de prendre charge de gens de guerre, ne pouvant autrement vivre en seureté, & qu'estant travaillé & poursuyvy par ses ennemis, sans pouvoir nulle part trouver lieu de repos & de seureté, il fut contraint d'avoir recours aux armes, & d'entretenir la guerre, comme une garde necessaire à la defense de sa personne.

XXXIV. Le traité mesme qu'il feit avec le roy Mithridates sentoit bien son homme de cueur hault & magnanime : car après que Mithridates ayant esté vaincu par Syllá, se fut remis sus, ne plus ne moins qu'un lucteur, qui ayant esté terrassé par son adversaire, se seroit redressé sur ses pieds pour combatre une autre fois, il en-

vahit de réchef l'Asie, lors que la renommée de Sertorius estoit desja si grande qu'elle s'estendoit par tous les climats du monde: de maniere que les marchands qui venoyent des parties de l'Occident, emplissoient les provinces de l'Orient, mesmement le royaume de Pont, des nouvelles de Sertorius, ne plus ne moins que de marchandise qu'ilz fussent allé querir & charger en pais estrange. Parquoy Mithridates fut emeu d'envoyer devers luy, estant encore plus incité à ce faire par les vaines braveries de ses mignons de cour, qui accomparoient Sertorius à Hannibal, & luy au roy Pyrrhus, & disoyent que les Romains assailliz de deux costez, ne pourroyent jamais durer ny resister à deux si excellentes natures, & si grandes puissances ensemble; quand le plus gentil capitaine du monde feroit conjoint avec le plus grand & le plus puissant roy qui fut onques. Si envoya Mithridates ses ambassadeurs jusques en Hespagne devers Sertorius, avec lettres & pouvoir de luy promettre argent & vaisseaux pour fournir à cette guerre, en recompense dequoy il demandoit que Sertorius luy rendist & luy confirmast la possession de l'Asie, laquelle il avoit cedée & quittée aux Romains par l'appointement qui avoit esté fait entre luy & Sylla.

XXXV. Sertorius assembla son conseil, qu'il appelloit le senat, pour deliberer sur cela. Si

furent tous les autres d'opinion, que lon devoit accepter les offres que presentoit Mithridates, encore bien aises, attendu que lon ne leur demandoit qu'un tiltre en l'air & un nom de choses qui n'estoyent point en leur puissance, au lieu dequoy on leur offroit realement & de fait, les choses dont ilz avoyent plus grand besoing : mais au contraire, Sertorius ne le voulut onques accorder. Bien consentoit il à Mithridates qu'il reinst la Cappadocie & la Bythynie, qui estoyent provinces accoustumées de vivre sous des roys, & sur lesquelles le peuple Romain n'avoit point de droit : mais il dit nommeement qu'il ne souffriroit jamais qu'il usurpast de rechef une province, qui par loyal tiltre, c'est à sçavoir par lay testamentaire de celuy qui en estoit juste seigneur, appartenoit au peuple Romain, & dont il auroit esté debouté en guerre à force d'armes par Fimbria, & que depuis il auroit volontairement quittée en paix par accord fait entre luy & Sylla, « Pource (disoit il) » qu'il vouloit augmenter & accroistre par ses » victoires l'empire de Rome, non pas vaincre » par le dommage & diminution d'iceluy : à » cause qu'un homme de bien doit prochasser » de vaincre avec honneur, mais non pas sauver » sa vie mesme, avec honte & deshonneur ». Ceste responce rapportée à Mithridates, le mit en grand

esbahissement : & treuve lon par escript qu'il dit adonc à ses plus privez amis, « Que nous » commandera donques Sertorius au pris, quand » il sera seant au senat dedans Rome, veu que » maintenant, qu'il est rejezté là au bout du monde » le long de l'Ocean Atlantique, il nous pres- » crit certaines bornes & confins, jusques où il » veult que nostre royaume s'estende, & nous » menace desja de la guerre, si nous attentons » aucune chose sur l'Asie » ?

XXXVI. Ce nonobstant il y eut accord passé & juré entre eulx que Mithridates retiendrait les païs de Cappadocie & de Bithynie, & que Sertorius luy envoyeroit l'un de ses capitaines avec secours de gens de guerre, & qu'en ce faisant le roy seroit tenu de luy bailler la somme de trois mille talents¹, & quarante navires de guerre : si y envoya Sertorius un de ses capitaines, qui avoit nom Marcus Marius sénateur de Rome, qui s'en estoit fouy vers luy, avec lequel Mithridates forcea quelques villes de l'Asie, & quand Marius y entroit dedans avec les sergens qui portoyent devant luy les faisceaux de verges & les haches, comme devant un proconsul du peuple Romain, Mithridates marchoit après luy, & se demettoit volontairement au second lieu, en

¹ Un million, huit cents mille escus. *Amyot.* 14,006,150 livres de notre monnaie.

luy deferant , comme à son supérieur , & Marius affranchissoit de faict aucunes des villes , & escrivant à d'autres leur annonçoit que Sertorius leur faisoit la grace de leur remettre les tailles & gabelles qu'elles payoyent , tellement que la pauvre Asie affligée par l'avarice des treforiers & fermiers du peuple Romain , & aussi par l'insolence & arrogance des gens de guerre qui y estoient en garnison , commencea à s'esblouir d'esperance de nouvelleté , & à desirer la mutation de gouvernement que lon luy proposoit.

XXXVII. Mais au contraire en Hespagne les senateurs bannis de Rome , qui estoient en l'armée de Sertorius de mesme qualité & dignité que luy , incontinent qu'ilz sentirent les affaires en estat qu'ilz se pouvoyent promettre d'estre aussi forts comme leurs adversaires , & qu'ilz n'eurent plus crainte de danger , conceurent aussi tost une envie & folle jalouzie de la puissance & de l'autorité de Sertorius , mesmement Perpenna entre autres , lequel enflé d'une vaine presumption & ambitieuse temerité pour la noblesse de sa maison , pretendoit à se faire chef de toute l'armée , & à ses fins alloit semant entre ses familiers amis de telles seditieuses & mauvaises paroles : « Quelle male destinée (disoit-il) mes amis , nous conduit tousjours de mal en pis ,

» nous qui n'avons pas voulu obeïr à Sylla, le-
» quel domine aujourd'hui toute la terre & la
» mer entierement, & avons mieux aimé quitter
» noz biens & noz maisons : & maintenant estans
» venus par deçà en esperance d'y vivre en liberté,
» nous nous soubmettons volontairement à fer-
» vitude, en nous rendant satellites de Sertorius
» pour l'asseurer & defendre en son exil, en
» recompense dequoy il nous paist de belles
» paroles, en nous appellant le senat, dont se
» moquent tous ceux qui nous entendent ainsi
» nommer, & ce pendant nous convient en-
» durer des indignitez, faire ce qu'il nous com-
» mande, & porter de la peine & du travail au-
» tant que font les Hespagnolz & les Lusitaniens
» mesmes ».

XXXVIII. Ainsi la plus part d'entre eux estans
abreuveez de ces paroles mutines, n'ozèrent pas
neantmoins se rebeller ouvertement encontre luy,
pour la crainte de son autorité : mais secrette-
ment & soubz main ilz luy gastoyent & ruinoient
ses affaires, faisans de cruelles executions des
Barbares, soubz couleur de justice, & leur fai-
sans payer de gros tributs, disans qu'ilz le fai-
soient par le commandement de Sertorius, dont
il advenoit que plusieurs villes se soublevoient
contre luy, & se rendoyent à ses ennemis, &
luy sourdoyent tous les jours de nouvelles mu-

tinations : mais ceulx qu'il y envoyoit pour appaiser les emeutes, s'y gouvernoient tellement qu'au lieu d'adoucir les mescontentemens & desobeïssances des peuples, ilz les aigrissoient davantage : & au lieu de assopir les tumultes, ilz en excitoyent encore de nouveaux : tellement que cela altera la douceur & debonnaireté, de laquelle Sertorius au paravant avoit tousjours usé, de maniere qu'il se porta cruellement envers les nobles enfans, qu'il faisoit nourrir en la ville d'Osca : car il en feit mourir les uns, & vendit les autres comme esclaves.

XXXIX. Ainsi Perpenna ayant desja plusieurs complices de sa malheureuse conjuration à l'encontre de la personne de Sertorius, y attira encore un nommé Manlius, qui avoit des principales charges en l'armée. Cest homme estoit amoureux d'un beau jeune garson, & pour luy donner à cognoistre combien il l'aimoit, luy declara un jour toute la trame de ceste conspiration, en luy disant qu'il ne feist plus compte des autres qui l'aimoyent aussi, & qu'il meist toute son affection en luy, pource que dedans peu de jours il le verroit devenir bien grand. Ce garson estant plus affectionné vers un autre qui se nommoit Aufidius, luy alla deceler tout ce que Manlius luy avoit dit, dequoy Aufidius se trouva merueilleusement esbahy, à cause qu'il

estoit aussi luy mesme l'un des conjurez : mais il ne sçavoit pas encore que Manlius en fust : & comme le garson luy nommast Perpenna, Græcinus & quelques autres que Aufidius sçavoit bien estre de la ligue, il en fut encore plus effroyé : routefois il ne fit pas semblant de rien & dit au garson que touchant cela, il n'en estoit rien, & l'admonesta de ne s'amuser plus désormais aux paroles de ce Manlius là, qui n'estoit qu'un glorieux qui se vantoit de ce qui n'estoit pas vray, & ne le faisoit que pour le decevoir. Ce neantmoins au partir de là il s'en alla droit trouver Perpenna, & luy compta comment leur entreprise estoit descouverte, luy remonstrant le grand danger qu'il y avoit s'ilz ne l'executoyent promptement : ce que les autres conjurez confesserent estre veritable, à l'occasion dequoy ilz ourdirent une telle trahison : ilz attilrerent un messager qui apporta des lettres faulses & supposées à Sertorius, par lesquelles ilz feignoyent que l'un de ses lieutenans luy avoit gagné une grosse bataille, en laquelle il avoit occis grand nombre des ennemis. Sertorius en fut fort aise, comme lon peut penser, & en fit sacrifice aux dieux, pour leur rendre graces de ceste bonne nouvelle : & adonc Perpenna voyant que l'occasion se presentoit, le convia à soupper en son logis avec ses autres familiers qui estoient là presens, tous conjurez

comme luy, & feit tant par importunité de prieres, que Sertorius luy promet.

XL. Or avoit Sertorius de tout temps accoustumé de garder une grande honefteté à la table ; fans souffrir que lon y feist ne que lon y dist aucune chose dissoluë, & avoit mesme duit ceulx qui mangeoyent ordinairement avec luy à tenir tous propos graves & de bons sens, & à faire honestement bonne chere les uns aux autres, fans aucuns jeux ne propos desordonnez. Quand ce vint donques au milieu du soupper, eulx qui ne cherchoyent que quelque occasion de querelle, commencerent à dire des paroles ordes & sales faisans semblant d'estre yvres & à faire plusieurs dissolutions honteuses & villaines tout expressement pour l'irriter. Adonc luy, fust ou pource qu'il ne peust plus endurer de voir telles villannies, ou qu'il se doubraft de leur mauvaife-voulunté par le beguoyement de leur parler entre leurs dens, & par l'irreverence non accoustumée qu'ilz monstroyent luy porter, se laissa aller à la renverse sur le liët, où il estoit à table, comme ne prenant plus d'advis à ce qu'ilz faisoient & disoient. Lors Perpenna prit une coupe pleine de vin, & faisant semblant de boire, la laissa tumber tout à son esciant. Elle feit bruit en tumbant à terre, qui estoit le signe, qu'ilz avoyent pris entre eulx, & aussi tost un Antonius, qui

estoit assis au dessus de Sertorius à la table ; luy donna un coup de dague. Sertorius ayant senty le coup s'efforcea de se lever : mais le traistre meurtrier se jetta sur son estomach , & luy teint les deux mains , de maniere qu'il fust là occis sans se pouvoir defendre , frappans tous les conjurez ensemble dessus luy.

XLI. Incontinent que ceste mort fut divulguée, la plus part des Hespagnolz envoyerent ambassadeurs devers Pompeius & Metellus , & se rendirent à eulx , & Perpenna avec ceulx qui luy demourerent , essaya de faire quelque chose , & se voulut servir des forces & de l'équipage de Sertorius : mais le tout fut à sa ruine & à sa confusion , donnant à cognoistre au monde qu'il estoit un meschant, qui ne sçavoit ny commander ny obeïr : car il s'alla attacher à Pompeius , qui l'eut incontinent miné , tant que finalement il fut pris prisonnier : & encore ne se porta il pas à ceste dernière calamité en homme vertueux & digne de commander : car pour cuider sauver sa vie , s'estant saisi des papiers de Sertorius, il fait offre à Pompeius de luy bailler entre ses mains les lettres missives de plusieurs des principaux senateurs de Rome, escriptes de leurs propres mains , par lesquelles ilz mandoyent à Sertorius qu'il menast son armée en Italie , & qu'il y trouveroit beaucoup de gens qui desi-

royent sa venue, & ne demandoient autre chose que la mutation du gouvernement. Là ne feit point Pompeius un acte de jeune homme, ains d'un cerveau meur, raffis & bien composé, delivrant par ce moyen la ville de Rome de grande peur & du danger de grandes nouvelles : car il amassa ces lettres & papiers de Sertorius en un monceau, & les brusta toutes, sans en lire une seule, ne permettre qu'autre en leust : & davantage feit incontinent mourir Perpenna pour doubte, qu'il n'en nommast quelques uns, craignant que s'il en nommoit, cela ne fust de rechef occasion de nouveaux troubles & nouvelles seditions. Quant aux autres conjurez, les uns furent depuis amenez à Pompeius, qui les feit tous mourir, & les autres s'enfouirent en Afrique, où ilz furent tous desfaicts par ceulx du païs, & n'en demoura pas un qui ne fust tué malheureusement, excepté Aufidius le concurrent en amour de Manlius : lequel ou pource que lon n'en teint compte, ou pource qu'il ne fut point recogneu, vieillit en une meschante bourgade de Barbares, pauvre, miserable & haï de tout le monde.

S O M M A I R E

DE LA VIE D'EUMENE.

NAISSANCE d'Eumène. Philippe l'attache à son service. II. Il passe au service d'Alexandre. III. Divers desagrémens qu'il éprouve de sa part. IV. Partage d'Eumène après la mort d'Alexandre. V. Il se joint à Perdiccas. VI. Perdiccas l'établit dans la Cappadoce. VII. Eumène forme un corps de cavalerie considérable. VIII. Il remporte la victoire dans un combat contre Néoptolème. IX. Il refuse la proposition qu'Antipatre lui fait d'abandonner Perdiceas pour se réunir à Cratère & à lui. X. Cratère marche contre Eumène. XI. Songe d'Eumène. XII. La bataille s'engage ; Cratère est tué. XIII. Combat singulier entre Eumène & Néoptolème ; celui-ci est tué. XIV. Eumène est condamné à mort par les Macédoniens. XV. Comment il paie la solde à ses troupes. XVI. Précaution qu'elles prennent pour mettre sa personne en sûreté. XVII. Il fait pendre un traître, qui lui avoit fait perdre une bataille. XVIII. Comment il empêche ses soldats de piller le bagage de l'armée d'Antigonus. XIX. Il se retire dans la ville de Nora. XX. Entrevue d'Eumène avec Antigonus. XXI. Siège de Nora par Antigonus. XXII. Comment Eumène

exerce dans un espace étroit les hommes & les chevaux. XXIII. Accord entre Antigonus & Eumène. XXIV. Eumène reçoit des lettres qui l'engagent à passer en Macédoine. XXV. Comment Eumène calme la jalousie d'Antigène & de Teutame. XXVI. Brigues dans l'armée d'Eumène pour le supplanter. XXVII. Comment il se met à couvert de la mauvaise volonté de ses envieux. XXVIII. Grande confiance des soldats Macédoniens dans l'habileté d'Eumène. Il gagne une bataille contre Antigonus. XXIX. Autre rencontre dans laquelle la vue de sa litiere fait retirer Antigonus. XXX. Stratagème par lequel Eumène arrête la marche d'Antigonus. XXXI. Il est nommé seul général. XXXII. Antigène & Teutame conspirent de l'assassiner. XXXIII. Eumène enfonce l'armée d'Antigonus. XXXIV. Lâcheté de Peucestas qui donne à Antigonus l'avantage de l'autre côté. XXXV. Eumène est livré à Antigonus. XXXVI. Discours d'Eumène à son armée. XXXVII. De quelle maniere Antigonus le traite. XXXVIII. Il le fait mourir de faim.

Depuis l'an 395 jusqu'à l'an 439 de Rome ;
avant Jesus-Christ 315.

Comparaison d'Eumène avec Sertorius.

E U M E N E S.

L'HISTORIEN Duris escrit, que Eumenes natif de la ville de Cardie au païs de Thrace¹, estoit filz d'un roulier, qui pour sa pauvreté se mesloit de voitures en la demy isle de Thrace, & neantmoins qu'il fut nourry & instruiât honnestement, tant aux lettres que aux exercices de la personne : mais que luy estant encore en son enfance, le roy de Macedoine Philippus passa d'aventure par la ville de Cardie, là où n'estant point pressé d'affaires il prit plaisir à voir escrimer & combattre les jeunes hommes de la ville, & lûter les enfans : entre lesquelz Eumenes se porta si bien, & le trouva Philippus si gentil, si adroit & de si bonne grace, qu'il le prit en amour, & l'emmena quand & luy : toutefois il me semble que le dire est plus vray-semblable de ceux qui escrivent, que Philippus l'avancea pour l'amitié & cognaissance qu'il avoit avec son pere, au logis duquel il logeoit.

II. Après la mort de Philippus il demoura tousjours au service du roy Alexandre son filz, où il fut trouvé homme d'aussi bon sens, & aussi loyal envers son maistre que pas un des autres :

¹ Dans la Chersonèse de Thrace, sur le bord de la Propontide.

& combien que lon l'appellast le chancelier ou premier secretaire, si est ce que le roy luy faisoit autant d'honneur comme à ses plus grands & plus familiers amis : car au voyage des Indes le roy le feit son lieutenant en une conquête , où il l'envoya capitaine en chef d'une armée , & eut le gouvernement ¹ de la province que tenoit Perdicas , quand après la mort de Hephæstion , il fut substitué en son lieu. Et pourtant comme Neoptolemus , qui estoit le premier escuyer , après la mort d'Alexandre dist au conseil des seigneurs Macedoniens , qu'il avoit savy & fery le roy avec l'escu & la lance , & que Eumenes l'avoit savy avec la plume & le papier , les seigneurs se mocquerent de luy sachans que outre les autres grands honneurs qu'avoit receuz Eumenes , le roy l'avoit bien tant voulu honorer , que de le faire son allié par mariage : car la premiere dame de qui Alexandre s'accointa en Asie , fut Barsine fille d'Artabazus , de laquelle il eut un filz qui fut nommé Hercules , & des deux sœurs d'elle il en donna l'une , appelée Apama , en mariage à Ptolomæus , & l'autre qui avoit aussi nom Barsine , à Eumenès , lors qu'il distribua à ses amis & seigneurs de sa cour , les dames Persiennes pour les espouser.

¹ Autres lisent en ce lieu, *ἡγεμονίας*, qui seroit à dire la charge de la chevalerie. *Amyot.*

III. Ce neantmoins il encourut par plusieurs fois la malegrace du roy Alexandre , & fut en quelque danger pour Hephæstion. Car comme Hephæstion eust un jour donné à la suite d'Alexandre un logis à Evius joueur de flustes , que les serviteurs d'Eumenes avoyent retenu & pris pour leur maistre , il s'en alla en grande cholere devers Alexandre , crier , avec un autre nommé Mentor , qu'il valoit mieulx jetter là les armes , & apprendre à fluster & à jouer des tragedies , puis que lon preferoit telle maniere de gens à ceulx qui portoyent le harnois sur le dos , tellement que Alexandre sur l'heure s'en courroucea comme luy , & en tensa Hephæstion : mais incontinent après ayant changé d'advis , il en sceut fort mauvais gré à Eumenes , pource qu'il luy sembla qu'il n'avoit pas tant usé d'une franchise de parler contre Hephæstion , que de braverie & d'audace envers luy. Davantage une autre fois quand Alexandre voulut envoyer Nearchus avec son armée de mer pour descouvrir les costès de l'Ocean , il ne se trouva d'aventure point d'argent en ses coffres ; il en demanda à emprunter à tous ses amis , mesmement à Eumenes entre les autres , à qui il demanda trois cens talents. Eumenes ne luy en bailla que cent , encore disoit il qu'il avoit eu grande peine à les amasser par ses receveurs. Alexandre ne luy en

dit mot, & ne voulut pas que lon prist ses cent talents : mais il commanda à quelques siens officiers qu'ilz allassent mettre le feu dedans la tente de Eumenes, le voulant convaincre de luy avoir menty en le prenant sur le faict, quand il feroit transporter son or & son argent : toutefois la tente fut toute arse & bruslée, avant que lon en peust rien transporter, au moyen dequoy Alexandre se repentit bien depuis d'y avoir fait mettre le feu, pource que toutes ses lettres & papiers y furent bruslez : mais après que le feu en fut esteinct, on y trouva d'or & d'argent fondu en masse & meslé ensemble plus de mille talents^{*}, dont toutefois Alexandre ne prit rien, &, qui plus est, manda à tous ses lieutenans, capitaines & gouverneurs de pais quelque part qu'ilz fussent, qu'ilz luy envoyassent des copies de toutes les lettres qu'ilz luy avoyent auparavant escriptes, pource que les originaux en estoient bruslez, & commanda à Eumenes de les reprendre. Depuis encore une autre fois il entra en grosse contestation & querelle à l'encontre de Hephæstion, pour quelque don qui luy avoit esté fait, & luy en dit Hephæstion plusieurs outrageuses & injurieuses paroles, & luy aussi semblablement à Hephæstion, dequoy le

^{*} Six cents mille escus. *Amyot.* 4,668,750 livres de notre monnoie.

roy pour l'heure ne luy fait point autrement pire chere : mais peu de temps après , estant Hephæstion venu à mourir , le roy se trouvant oultré de douleur & de regret pour la mort de luy qu'il avoit aimé si cherement , monstroït fort mauvais visage , & parloit aigrement à tous ceux qu'il sçavoit qui luy avoyent porté envie de son vivant , & qu'il pensoit estre bien aises de sa mort , -specialement à Eumenes sur tous les autres qui luy en estoit fort suspect : tellement que par plusieurs fois il luy ramenteut & reprocha les injures qu'il luy avoit dittes : mais luy qui estoit advisé , & sçavoit bien prendre tel visage & tel langage que le temps le requeroit , tascha de s'asseurer par le revers de ce qui l'avoit cuidé ruiner : car il s'estudia de seconder la vouldté d'Alexandre qui ne cherchoit que moyen d'honorer la memoire de Hephæstion le plus magnifiquement qui luy seroit possible , en luy trouvant nouvelles inventions d'honneurs pour plus magnifier la mort du defunct , & fournissant argent liberalement , sans rien espar- gner , pour celebrer ses fueraïlles , & pour luy faire construire une superbe sepulture.

IV. Depuis après que le roy Alexandre fut decedé , il y eut different & debat entre les gens de pied Macédoniens , & les seigneurs qui avoyent esté le plus près d'Alexandre : auquel

different Eumenes adheroit bien de faict & de volonté au party des seigneurs, mais de parole, il feit semblant de vouloir estre neutre & amy commun de toutes les deux parts, comme personne privée, disant que ce n'estoit point à faire à luy, qui estoit estranger, de s'entremettre des querelles des Macedoniens. Et comme les autres seigneurs se fussent partis de Babylone, luy demourant derriere, addoucit fort une grande partie des foudards, & les rendit plus maniables, & plus prests de s'accorder avec les seigneurs : parquoy les seigneurs & capitaines ayans depuis parlé ensemble, & composé un peu leurs premiers differents, departirent entre eulx les gouvernemens des provinces qu'ilz appelloient Satrapies auquel partage Eumenes eut la Capadocie, la Paphlagonie, & toute celle coste qui est au dessoubz de la mer Pontique, jusques à la ville de Trapezunce¹, laquelle pour lors n'estoit pas encore de l'empire de Macedoine : car Ariarathes la tenoit comme roy : mais il estoit dit que Leonatus & Antigonus l'en mettroient en possession, & l'en establiroyent gouverneur, avec une grosse & puissante armée, qui pour cest effect leur seroit baillée.

V. Toutefois depuis Antigonus ne fait compte

¹ Sur la côte méridionale du Pont-Euxin, presque à l'extrémité vers l'Orient.

de ce que Perdiccas luy en escrivit , ayant desja mis en sa teste de grandes imaginations d'embrasser tout , en mesprisant tous les autres : & Leonatus descendit jusques en la Phrygie , & entreprit le voyage de ceste conqueste pour l'amour de Eumenes : mais comme il estoit ja acheminé , Hecatæus tyran des Cardians l'alla trouver en son ost , qui le pria de vouloir plus tost aller secourir Antipater & les autres Macedoniens qui estoient assiegez dedans la ville de Lamia. Si prit envie à Leonatus de passer la mer pour s'y en aller , & tascha de le faire trouver bon à Eumenes , & de le reconcilier avec Hecatæus : car ilz n'estoyent pas bien l'un de l'autre , à cause de quelque different , que le pere de Eumenes avoit à l'encontre de cestuy Hecatæus pour le gouvernement de leur ville : car Eumenes l'avoit souventefois accusé publiquement devant le roy Alexandre , en luy mettant sus tout ouvertement , qu'il estoit un tyran , & suppliant le roy , que son plaisir fust de vouloir faire rendre la liberté aux Cardians : & pourtant comme Eumenes s'excusast d'aller faire la guerre aux Grecs , alleguant qu'il craignoit Antipater qui estoit son ennemy de long temps , & qu'il avoit peur que tant pour sa rancune envieillie , que pour gratifier à Hecatæus , il ne le voulust faire mourir , Leonatus adonc se descouvrit à luy ,

luy, & luy declara toute son intention : car il faisoit semblant de passer la mer pour aller secourir Antipater, mais à la verité c'estoit pour tascher à s'emparer du royaume de Macedoine : & là dessus luy monstra quelques lettres missives de Cleopatra, laquelle luy mandoit qu'il s'en vinst en la ville de Pella, & que là elle l'espouferoit. Quoy entendu Eumenes, fust ou pource que veritablement il redoutast Antipater, ou bien qu'il n'eust point bonne opinion de Leonatus, le voyant homme estourdy, & faisant ses choses avec une soudaine & non constante impetuosité, se départit une nuit de luy, avec ce qu'il avoit de gens qui estoient environ trois cents chevaux : & deux cents hommes de pied de ses serviteurs qu'il avoit armez, emportant quand & soy sa chevance en or, qui pouvoit monter à la somme de cinq mille talents¹, & s'enfouit avec cela devers Perdiccas, auquel il descouvrit tous les desseings & les entreprises de Leonatus, à l'occasion dequoy il eut incontinent grand credit autour de luy, & fut appelé au conseil.

VI. Et peu de temps après Perdiccas le conduisit en la Cappadocie², avec une grosse armée

¹ Trois millions d'escus. Amyot. 23,343,750 livres de notre monnoie.

² Au midi du Pont.

qu'il menoit & conduisoit luy mesme en personne. Si fut Ariarathes pris prisonnier, & Eumenes estably gouverneur du païs, les bonnes villes duquel il bailla en garde à ses amis, & les y laissa capitaines des garnisons qu'il y ordonna, mettant par tout juges, receveurs, gouverneurs & tous autres officiers telz qu'il voulut, par ce que Perdiccas ne s'en entremet aucunement : toutefois Eumenes se partit quand & luy, tant pource qu'il luy vouloit faire la cour, comme aussi pource qu'il ne vouloit point esloigner les roys. Mais Perdiccas se promettant qu'il viendroit bien à bout luy seul de l'entreprise où il alloit, & estimant que ce qu'il laissoit derriere, avoit necessairement besoing de quelque homme de faict & d'entendement, sur la foy duquel il se peust reposer de la garde de son estat, quand ilz furent en la Cilicie¹, feit retourner Eumenes soubz couleur de le renvoyer en son gouvernement, mais à la verité pour contenir en office le royaume de l'Armenie, qui confinoit au païs dont il estoit gouverneur, pour autant que Neoptolemus soubz main y faisoit quelques menées, & y brassoit quelques nouvelles. Et combien que ce Neoptolemus fust de sa nature homme hault à la main, presumptueux & aveuglé d'une folle arrogance, si s'estudia il de le

¹ Sur la côte méridionale de l'Asie, vis-à-vis l'île de Chypre.

contenir & garder de rien attenter par bonnes paroles & gracieux entretien.

VII. Et au demourant voyant que la bataille des gens de pied Macedoniens estoit devenue merueilleusement audacieuse & insolente , il feit pour une contrequatre amas de gens de cheval : & pource faire donna aux gens du pais qui pourroyent servir à cheval , affranchissement de toutes tailles & toutes contributions , & achepta grand nombre de chevaux de service , qu'il distribua à ceulx qu'il avoit autour de luy , desquelz plus il se fioit , en leur elevant & aguissant le cueur par honneurs & presens qu'il donnoit à ceulx qui faisoient bien leur devoir , & adressant leurs corps , & les endurecissant à la peine par les remuer souvent de lieu à autre , & les faire exerciter continuellement : de sorte que des seigneurs Macedoniens , les uns en demourerent estonnez , les autres plus asseurez quand ilz veirent que par ceste diligence , il avoit bien assemblé en peu de temps , jusques au nombre de six mille trois cents hommes de cheval.

VIII. Or environ ce temps Craterus & Antipater après avoir dompté les Grecs , passerent avec leur armée en Asie pour ruiner l'estat & la puissance de Perdiccas , & avoir on nouvelles que bien tost ils envahiroient la Cappadocie : parquoy

Perdiccas estant d'un autre costé empesché en la guerre qu'il avoit contre Ptolomæus , feit Eumenes capitaine general avec plein pouvoir & souveraine puissance sur tous les gens de guerre qui estoient pour son party , tant en la Cappadocie , qu'en l'Armenie , & escrivit des lettres à Neoptolemus & à Alcetas , par lesquelles il leur mandoit & commandoit qu'ilz eussent à obeïr à Eumenes , & à le laisser ordonner de toutes choses à sa volonté. Quant à Alcetas il respondit tout rondement , qu'il ne se trouveroit point à ceste guerre , pource que les Macedoniens qui estoient soubz sa charge , avoyent honte de prendre les armes contre Antipater , & non seulement ne les vouloyent point prendre contre Craterus , ains au contraire , estoient deliberez de le recevoir pour leur capitaine , tant ilz luy portoyent grande affection. Au regard de Neoptolemus , il n'avoit pas moins de volonté de faire quelque trahison , & de jouer un mauvais tour à Eumenes : car quand il fut mandé par luy , au lieu d'obeir , il ordonna ses gens en bataille contre luy pour le combattre. Et là Eumenes receut le premier fruiçt de sa provoyance & de la chevalerie qu'il avoit mise sus pour faire teste aux gens de pied Macedoniens : car estans desja les siens rompus & desfaits , il vainquit & tourna en fuitte Neoptolemus , avec ses gens de cheval ,

& gaigna tout son bagage : puis les mena en bonne ordonnance de bataille contre les Macedoniens , qui estoient escartez çà & là , à pour-suyvre & chasser ses gens de pied qu'ilz avoyent rompus , & les surprenant en ce desordre , les contraignit de poser les armes , & se rendre à luy , & oultre ce de luy prestér serment de fidelité , d'aller à la guerre par tout où il les voudroit mener.

IX. Quant à Neoptolemus , il r'allia quelque nombre des fuyans , avec lesquels il s'en alla devers Craterus & Antipater , lesquels envoyerent vers Eumenes , le prier de se vouloir tourner de leur costé , sous condition que non seulement il jouïroit des pais & provinces qui luy avoyent esté consignées en gouvernement , mais que encore luy en ajousteroit on d'autres , & d'autres forces aussi , & si deviendrait , en ce faisant , bon amy d'Antipater , au lieu que paravant il avoit tousjours esté son ennemy. A quoy Eumenes feit responce , que ayant de tout temps esté ennemy d'Antipater , il ne scauroit soudainement devenir son amy , maintenant qu'il voit qu'il traite ses amis comme il feroit ses ennemis : mais au demourant , qu'il estoit prest & appareillé de mettre en bonne paix & amitié Craterus avec Perdicas sous routes conditions egales , justes & raisonnables : au reste que s'il s'ingeroit

de luy courir fus pour luy vouloir oster le sien , il luy porteroit secours tant que l'ame luy battoit au corps , & qu'il abandonneroit plus tost sa vie que sa foy.

X. Ceste responce estant rapportée à Antipater, ilz teindrent conseil à loisir pour resouldre de ce qu'ilz avoyent à faire , & sur ces entrefaites arriva devers eulx Neoptolemus , lequel après sa rouverte s'estoit mis en chemin pour les aller trouver : si leur compta comment la bataille estoit passée , & les pria très instamment , qu'ilz le voulussent secourir tous deux ensemble , s'il estoit possible , ou pour le moins Craterus seul , pourautant qu'il estoit singulièrement aimé & désiré sur tous des gens de pied Macedoniens , de sorte que dès l'heure qu'ilz verroyent seulement son chapeau , & qu'ilz entendroyent sa voix , ilz accourroyent à grande joye se rendre à luy : car à la verité aussi avoit Craterus une grande reputation entre les Macedoniens , de sorte que depuis la mort d'Alexandre , il fut plus désiré de la commune des souldards , que nul autre capitaine , pource qu'il leur souvenoit encore , que pour l'amour d'eulx & pour les soutenir , il avoit souvent encouru la malegrace d'Alexandre , pource qu'il taschoit à le retirer & divertir de prendre les façons de faire des roys de Perse , auxquelles Alexandre se laissez

aller petit à petit , & qu'il defendoit les coutumes de la Macedoine , & les vouloir faire entretenir , là où par arrogance & par delices on commenceoit à les laisser & avoir en mespris. Pour lors donques Craterus envoya Antipater en la Cilicie , & luy avec la plus grande partie de l'armée s'en alla contre Eumenes avec Neoptolemus , en esperance de le surprendre au des-prouveu & le trouver en desfarroy , cuidant qu'il ne s'amuseroit qu'à faire bonne chere , & à se donner du bon temps , après une si recente victoire.

XI. Si fut bien à Eumenes fait en sage & vigilant capitaine , d'avoir donné si bon ordre à son affaire , qu'il fut tout à temps adverty de la venue de son ennemy , & d'avoir tenu son armée en bon equippage toute preste pour se defendre de luy : toutefois encore ne fut ce pas un tour de souvetaine maistrise au mestier de la guerre : mais d'avoir si prudemment donné ordre par tout , que non seulement ses ennemis ne sceurent rien de ce qu'il n'estoit point de besoing qu'ilz sceussent , mais aussi que ses gens mesmes eurent occis en champ de bataille Craterus , premier qu'ilz sceussent contre qui ilz avoyent à combattre , & d'avoir sceu si bien celer à ses combatans un si redoubtable adverfaire , cela me semble bien un acte singulier & un chef d'œuvre

d'un grand & excellent capitaine, pourquoy faire il usa de tel artifice : premierement il feit courir le bruit par tout son ost, que c'estoit Neoptolemus & Pigres, qui retournoient encore une autre fois contre luy, avec quelques gens de cheval ramassez de toutes pieces, de Cappadociens & de Paphlagoniens¹ : & ayant deliberé de desloger la nuit, il se trouva espris de sommeil, & en dormant eut une vision assez estrange : car il luy fut advis qu'il vit deux Alexandres, qui s'appareilloient pour combattre l'un contre l'autre, menant chascun d'eux une bataille de gens de pied ordonnez à la Macedoniene, & que quand ilz se voulurent entrecharger, la deesse Minerve vint au secours de l'un, & Cerès au secours de l'autre : si luy sembla qu'après avoit longuement combatu, celuy auquel Minerve avoit favorisé fut desfait, & que Ceres cueillit des espics de bled, dont elle feit une couronne à celuy qui estoit demouré vainqueur sur le champ. Il eut opinion que ce songe faisoit pour luy, & luy promettoit la victoire, pource qu'il combattoit pour une province fort fertile en bledz, & où il y avoit grande quantité de beaux fourmens : car elle estoit universellement par tout ensemencée, & estoit chose plaisante

¹ La Paphlagonie au nord de l'Asie sur le Pont-Euxin, entre la Bithynie vers l'occident, & le Pont à l'orient.

à l'œil , & qui bien sentoît sa longue paix , de voir les campagnes toutes couvertes de beaux bledz encor tous verds : & fut de plus en plus confirmé en sa première imagination , quand il entendit que les ennemis avoyent donné pour le mot de la bataille à leurs gens , Minerve & Alexandre : si donna aux siens , Ceres & Alexandre , leur commandant que chascun feist un chappellet d'espics de bled , & qu'ilz le meissent sur leurs testes , & qu'ilz en entortillassent des festons & liasses à l'entour de leurs bastons. Il fut plusieurs fois entre deux de déclarer à ses plus feaux capitaines contre qui ils avoyent à combattre , & de ne se fier pas en soy seulement , de taire , & tenir secrette une chose si nécessaire : toutefois à la fin il demoura en sa première resolution , & pensa que le plus seur estoit , ne commettre ce danger qu'à sa seule pensée : mais quand ce vint à ordonner sa bataille , il ne meit pas un Macedonien à l'opposite de Craterus , ains y meit deux compagnies d'hommes d'armes estrangers , que conduisoient Pharnabazus filz d'Artabazus & Phœnix le Tenedien ¹ , ausquelz il enjoignit expressement , que si tost qu'ilz verroyent devant eulx les ennemis , ilz leur courussent sus , & les chargeassent incontinent sans leur

¹ Tenedos, petite île près la côte occidentale de l'Asie, vis-à-vis l'embouchure du Simois, près de Troie.

donner loisir de parler ny de se retirer , & sans vouloir ouïr herault ny trompette qu'ilz envoyassent devers eulx , pource qu'il craignoit merveillement que les Macedoniens ne se tournassent contre luy , s'ilz recognoissoient une fois Craterus : & quant à luy il se meit en la poincte droite de sa bataille avec une troupe de trois cents hommes d'armes , qui estoient l'eslite de toute son armée , là où il devoit rencontrer de front Neoptolemus.

. XII. Après donques qu'ilz eurent passé un petit coustau qui estoit entre les deux batailles , ceulx d'Eumenes suyvens ce qui leur estoit commandé , se meirent incontinent au galop droit à l'encontre de leurs ennemis : ce que voyant Craterus s'en trouva bien estonné , maudissant & injuriant Neoptolemus qui l'avoit ainsi abuzé , luy donnant à entendre que les Macedoniens se tourneroyent de son costé aussi tost comme ilz l'appercevroyent : & neantmoins pria ceulx qui estoient à l'entour de luy , qu'ilz se monstrassent ce jour là gens de bien , & aussi tost picqua luy mesme de grande roideur droit contre ses ennemis. Si fut ce premier choc merveillement dur & aspre tant d'un costé que d'autre , & furent tantost les lances & javelines brisées & rompues , puis tout soudain desguainnerent leurs espées , & ne fait point Craterus ce jour là de

deshonneur à la memoire d'Alexandre : car il abbatit plusieurs de ses ennemis autour de luy, & repoulsa vaillamment ceulx qui se rencontrerent de front au devant de luy, & les rompit par plusieurs fois : mais à la fin il y eut un homme d'armes Thracien, qui le coustoyant luy tira un coup, dont il le jetta par terre : quand il fut abbatu, les autres passoyent oultre par dessus, mais un des capitaines d'Eumenes nommé Gorgias, le recogneut, qui meit aussi tost le pied en terre, & ordonna geus à l'entour pour le garder : mais il estoit desja bien bas, & tiroit aux traicts de la mort en grande destresse.

XIII. De l'autre costé Eumenes & Neoptolemus, qui de long temps se vouloyent mal de mort, enflammez de courroux & de rancune envieillie, se cherchoyent l'un l'autre : car aux deux premieres passées ilz ne s'estoyent peu entrerencontrer : mais à la troisieme, si tost qu'ilz se furent entrecogneuz, ilz brocherent leurs chevaux des esperons l'un contre l'autre, les espées aux poings, avec grands cris. Si se heurterent les deux coursiers de front, ne plus ne moins que si c'eussent esté deux galeres armées qui se fussent chocquées l'une l'autre : & les deux capitaines laschant les brides de leurs chevaux, avec les deux mains s'entr'accrocherent l'un à

l'autre, taschans à s'arracher les armets des testtes : & à rompre les courroyes de leurs cuiraces sur les espaules. Comme ilz estoient en ce saboulement, leurs chevaux s'enfouirent de dessoubs eulx, & eulx tumberent tous deux en terre, se tenans tousjours corps à corps comme s'ilz eussent lucté. Neoptolemus se redressa sur ses pieds le premier : mais ainsi comme il se relevoit, Eumenes luy couppa le jarret, & fut tout aussi tost debout. Neoptolemus s'appuyant sur un genouil, à cause qu'il ne se pouvoit soustenir sur l'autre jambe blecée, se defendoit d'abas le mieux qu'il pouvoit contre Eumenes, qui estoit sur ses deux pieds : mais il ne luy pouvoit donner atainte mortelle, & au contraire il en receut une dedaus la gorge, dont il cheut à la renverse tout estendu, & adonc Eumenes bouillant de courroux pour l'ancienne rancune qu'il avoit contre luy, commença à le despouiller, en luy disant des oultrages, ne se donnant pas de garde, tant il estoit emeu de cholere, que Neoptolemus avoit encore son espée, de laquelle il le blecea par dessoubz sa cuirace à l'endroit où elle joinct aux parties naturelles : mais le coup luy fit plus de peur que de mal, & n'y parut comme point, à cause que Neoptolemus n'avoit presque plus de force quand il le frappa, comme celuy qui trespassa incontinent après.

XIV. Eumenes donques ayant despouillé son corps, se trouva bien mal de sa personne, à cause qu'il avoit les bras & les cuisses toutes hachées de coups, toutefois il remonta à cheval & picqua vers l'autre poincte de la bataille, cuidant que ses ennemis teinsent encore. Si fut là adverty que Craterus estoit blecé à mort, & s'en alla en diligence là part où il gisoit, & le trouva qu'il pouloit encore, & n'avoit pas perdu toute cognoissance : parquoy il meit pied à terre, & en plorant à chaudes larmes, luy prit la main droite, detestant & mauldissant Neoptolemus, par lequel il avoit esté réduit à si piteux accessoire, & luy contrainct de se trouver en bataille contre l'un de ses plus chers amis, pour luy faire souffrir ou recevoir de luy cest extreme meschef. Eumenes gagna ceste seconde bataille dix jours après la premiere : dont il acquit une très grande reputation, pourautant qu'il avoit desconfit l'un de ses adversaires par bon sens, & l'autre par prouesse : mais cela mesme luy suscita grande envie & grande malvueillance, non seulement des ennemis, mais aussi de ceulx mesmes de sa part, quand ilz vindrent à considerer, que luy homme estranger, avec les propres armes & les propres mains des Macedoniens, avoit desfait le premier & le plus estimé capitaine d'entre eulx. Or si la fortune eust voulu que Perdiccas

eust esté plus tost adverty de la mort de Craterus, c'eust esté, sans nulle doubte, le plus grand personnage de tous les Macedoniens, mais de malheur deux jours après que Perdiccas eust esté tué par une mutination de ses gens en Ægypte, ceste nouvelle de la victoire d'Eumenes & de la mort de Craterus y arriva, dont les Macedoniens furent si courroucez contre Eumenes, que soudainement ilz le condamnerent à mourir, & fut donnée la charge de ceste vengeance à Antipater.

XV. Et comme Eumenes en passant au long du mont Ida ¹, où estoit un des haras du roy, en eust pris & emmené des cheveaux autant qu'il en voulut, & en eust envoyé une lettre patente de certification aux harassiers & escuyers qui en avoyent la charge, Antipater, à ce que lon dit, s'en prit à rire, disant par mocquerie qu'il s'esmerveilleoit de la grande provoyance d'Eumenes, & s'il esperoit qu'on luy deust rendre ou demander compte des biens du roy. Or desiroit il combatre ès grandes plaines de la Lydie, mesmement auprès de la ville capitale de Sardis, pourautant qu'il estoit le plus fort de chevalerie, & aussi qu'il desiroit faire voir à Cleopatra la puissance de son armée : toutefois à la requestre d'elle mesme, qui craignoit que Antipater ne

¹ Montagne d'Asie près de Troie.

la chargeast d'aucune chose, il passa oultre jusques en la haulte Phrygie, où il hyverna en la ville de Celænes¹ : & là Polemon, Alcetas & Docimus entrèrent ambitieusement en contestation contre luy, touchant la superintendence de l'armée, disans qu'il leur appartenoit aussi bien comme à luy d'en estre cheffz souverains : à quoy Eumenes leur respondit, « Vrayment c'est bien » ce que lon dit communement, du danger de » perdre tout on n'en parle point ». Et ayant promis aux souldards de les payer dedans trois jours, pour satisfaire à sa promesse il leur vendit les metairies, maisons fortes & les chasteaux du plat païs, avec le bestail & les personnes dont ilz estoient pleins : puis le capitaine ou chef de bande qui en avoit achepté un, les alloit prendre de force, avec les engins de baterie que leur fournissoit Eumenes : & quand ilz les avoyent pris, alors ilz departoyent à leurs gens des biens qu'ilz y trouvoyent, jusques à la concurrence de ce qui leur pouvoit estre deu de leur soulede.

XVI. Ceste invention le remeit de rechef en grace avec ses gens, tellement qu'un jour ayans esté trouvez emmy son camp quelques billets,

¹ A la source de la rivière du Marfyas & du fleuve Méandre. De ses ruines Antiochus Soter bâtit dans la suite à quelque distance sur le Méandre, la ville d'Apamée, où il transporta les habitans de Célæne.

que ses ennemis y avoyent fait semer, par lesquels ilz promettoient de grands estats, & davantage cent talents ² à qui tueroit Eumenes, les Macedoniens qui estoient sous luy en furent fort irritez, de sorte qu'ilz feirent entre eulx une ordonnance, que de là en avant il y auroit tousjours mille des plus vaillants hommes d'entre eulx, & qui auroient eu quelques charges, qui ne bougeroyent jamais d'auprès de luy, pour faire le guet autour de sa personne, & le garder la nuit à tour de rolle, les uns après les autres: à quoy tous d'un consentement s'accorderent, & leur faisoit Eumenes les mesmes honneurs que les roys de Macedoine avoyent accoustumé de faire à leurs amis, dont ilz se tenoyent pour bien honorez: car par leur concession il luy estoit permis de donner à qui bon luy sembloit des chapeaux & des manteaux de pourpre, qui estoit le plus honorable don que le roy eust sceu faire en la Macedoine.

XVII. Or est il certain que les prosperitez enflent & elevent le cueur à ceulx mesmes qui l'ont petit de leur nature, tellement qu'ilz apparoissent aucunesfois magnanimes, encore qu'ilz ne le soyent pas, quand on les voit en hault degré d'honneur ou de felicité, où la fortune

² Soixante mille escus. *Amyot.* 466,871 livres de notre monnoie.

les a colloquez : mais celuy qui veritablement est magnanime , & qui a le cueur ferme , se cognoist mieulx en adversité , quand il ne plie ny ne succumbe point aux afflictions , comme Eumenes. Car premierement ayant perdu une bataille en la contrée des Orcyniens ¹ , au país de la Capadocie , par trahison de l'un de ses gens , & estant poursuyvy , il ne donna jamais le loisir au traistre de se sauver de viffesse , & de se pouvoir retraire devers les ennemis , ains le prit & le fait pendre sur le champ : & après qu'il eut fouy un espace de temps , il tourna bride tout court , & reprenant son chemin un peu à costé , au contraire de ceulx qui le chassoyent , il les passa secrettement sans estre apperceu d'eulx , & chemina tant qu'il retourna au mesme champ où avoit esté la bataille ; là où il planta son camp , & y fait recueillir les corps de ses gens qui y estoient morts , lesquelz il brusta avec les huis , portes & fenestres de tous les bourgs & villages de là autour qu'il fait arracher , les capitaines à part , & les souldards d'un autre costé , leur faisant elever pour tombeaux de haults monceaux de terre , tellement que Antigonus , qui y revint aussi tantost après , s'esmerveilla grandement de sa hardiesse & de son assurance.

XVIII. Au partir de là il rencontra le bagage

¹ La position de ce canton est inconnue.

d'Antigonus, là où il pouvoit, sans danger ny difficulté quelconque, prendre grand nombre de prisonniers tant de serfs que de personnes franches, & gagner toutes les richesses qu'ilz avoyent amassées par tant de guerres, tant de pais & tant de villes qu'ilz avoyent pillées : mais il eut peur, si ses gens se chargeoyent de tant de butin, qu'ilz n'en fussent plus pesans, & plus empeschez & malaisez pour fourir, & aussi plus molz à supporter la peine de courir errants çà & là, mesmement par un long temps, qui estoit ce en quoy il avoit toute son esperance de venir à bout de ceste guerre, faisant son compte, que Antigonus se fascheroit à la fin de le poursuyvre si longuement à la trace, & par ce moyen qu'il se tourneroit d'un autre costé : toutefois il voyoit bien que ce luy seroit aussi chose impossible de garder les Macedoniens directement & par auctorité, de se saisir de tant de biens qui s'offroyent devant eulx en si belle prise : parquoy il leur commanda seulement qu'ilz se traittassent un peu, & qu'ilz feissent repaistre leurs chevaux premierement, & que puis après ilz iroyent incontinent destrouffer ce bagage de leurs ennemis : mais ce pendant il envoya par un secret mesfager advertir Menander qui avoit la charge de garder & conduire ce bagage, qu'il se retirast en toute diligence de la plaine & campagne unie,

au pendant d'une montagne qui estoit là auprès inaccessible à gens de cheval, & là où on ne les pourroit environner, & que là il se fortifiast, luy mandant que c'estoit pour l'amitié & familiarité qu'ilz avoyent autrefois eue ensemble, qu'il luy envoyoit faire cest advertissement. Menander entendant le danger qu'il y avoit, fait incontinent trouffer tout le bagage : & adonc Eumenes envoya tout ouvertement ses coureurs pour descouvrir, & luy venir faire le rapport, & au mesme temps fait commandement que lon s'armast, & que lon bridast les chevaux, comme s'il eut eu volonté de les mener contre les ennemis : mais sur ce poinct retournerent les coureurs, qui luy rapporterent qu'il n'y avoit ordre de prendre ny de forcer Menander, parce qu'il s'en estoit fuy en un lieu si fort de nature, qu'il estoit impossible de l'avoir. Eumenes fait semblant d'en estre bien desplaisant : mais pourtant il emmena son ost de là. Depuis Menander en fait le compte à Antigonus, & les Macedoniens qui estoient en son armée en louerent grandement Eumenes, & en furent mieulx affectionnez envers luy qu'ilz ne l'estoyent auparavant, pourcé qu'estant en sa puissance d'emmener leurs enfans comme esclaves, & violer leurs femmes, il les avoit espargnez : mais Antigonus pour leur oster ceste opinion, leur disoit, « Vous

» vous abusez, mes amis: car ce n'a point esté pour
 » l'amour de vous, ny pour vous faire plaisir, que
 » Eumenes ne s'est point saisy de voz femmes,
 » voz enfans & voz biens, ains a esté, pource qu'il
 » avoit peur de se mettre des entraves aux pieds,
 » qui le gardassent de fouir legerement ».

XIX. Au partir de là, Eumenes fuyant toujours devant Antigonus, & errant çà & là parmy les champs, conseilla luy mesme à plusieurs des souldards qu'ilz se retirassent ailleurs, fust ou pource que veritablement il eust soing de leur bien, ou pource qu'il n'en voulust pas trainner si grand nombre après luy, à cause qu'ilz estoient trop peu pour soustenir une bataille, & trop pour celer sa fuite: à la fin il se retira dedans une place forte, qui s'appelloit Nora^{*}, ès confins de la Lycaonie & de la Cappadocie, avec cinq cents chevaux, & deux cents hommes de pied bien armez: encore quand il y fut arrivé, il donna congé à tous ceulx qui luy demanderent, pource qu'ilz n'eussent sceu endurer l'incommodité du lieu qui estoit fort ferré, & la faulte de vivres & d'autres provisions necessaires, qu'il leur eust fallu supporter, (* si le siege venoit à durer longuement devant); & le leur donna liberalement avec très amiables caresses & gracieuses paroles.

* A quelques lieues de Célæne vers l'Orient.

* Ceci n'est point dans le grec.

XX. Peu de jours après Antigonus arriva devant la place, & premier que l'assiéger, luy manda qu'il veinst parler à luy en fiance. Eumenes feit responce qu'Antigonus avoit en sa compagnie plusieurs de ses amis, qui après luy pourroyent estre chefs de sa ligue : & au contraire qu'avec luy, n'y avoit pas un des seigneurs, pour lesquels il combattoit : & pourtant si Antigonus vouloit qu'il allast parler à luy, qu'il falloit donques qu'il luy baillast en ostage quelques uns de ses plus especiaux amis : & comme de rechef Antigonus insistast, en disant qu'il estoit raisonnable qu'il veinst devers luy, attendu qu'il estoit le plus grand & le plus fort, Eumenes feit responce ; « Je n'estimeray jamais homme plus grand que » moy, tant que j'auray mon espée en ma puissance ». Antigonus à la fin y envoya dedans la place son propre nepveu Ptolomæus, ainsi comme Eumenes le demandoit, & adonc il sortit de la place. Si s'entresalüerent à l'arrivée, en s'embrassant l'un l'autre bien amiablement, comme ceulx qui autrefois avoyent eü grande communication & grande familiarité ensemble : puis quand ce vint à parler de leurs affaires, ilz teindrent plusieurs propos. Eumenes ne feit onques mention ny requeste qu'on le laissast aller à sauveté, ny qu'on luy pardonnast : ains demanda qu'on luy confirmast ses gouvernemens, & que lon luy

restituast ce qui luy avoit esté donné, dont ceulx qui assisterent à ceste entreveuë furent bien esbahis, & en aimerent mieulx son gentil cueur & son asseurée hardiessé. Mais durant leur parlement les Macedoniens accouroient de toutes parts du camp, pour voir quel homme c'estoit que cestuy Eumenes, pource que depuis la mort de Craterus, il n'y eut capitaine de qui il se parlait tant entre les foudards Macedoniens, comme de Eumenes. Mais Antigonus craignant qu'ilz ne luy feissent quelque violence à sa personne, leur commanda à haulte voix qu'ilz se retirassent, & leur feit jeter des pierres pour les cuider garder d'approcher, encore fut il à la fin contraint de les faire repoulsier à force par ses gardes, & de prendre Eumenes entre ses bras, & si eut bien à faire avec tout cela de le rendre & reconduire à sauveré dedans la place.

XXI. Depuis ce parlement, Antigonus feit enclorre de murailles tout à l'entour ceste forteresse de Nora, & y laissa gens en nombre suffisant pour y continuer le siege, & avec le reste de son armée s'en partit. Cependant Eumenes demoura assiegé dedans celle place, où il y avoit foison de bledz, d'eau & de sel, & non d'autre chose qui fust bonne à manger, ny de douceur aucune dont ilz se peussent sustenter avec le pain : & neantmoins de ce qu'il avoit il entretenoit

en joyeuse chere ceulx qui estoient leans avec luy : car il les faisoit tous les uns après les autres manger à sa table , & si addoulcissoit encore celle façon de vivre d'une franche & gaye privaulté de deviser familièrement avec eulx de choses plaisantes en beuvant & mangeant : car oultré ce qu'il s'estudioit le plus qu'il pouvoit de leur monstrier face riante , il avoit naturellement le visage fort doux & fort beau , & ne sembloit point un homme de guerre , qui toute sa vie eust esté nourry aux armes & rompu des travaux de la guerre , ains se monstroit homme frais & jeune , & estoit en toutes ses parties si bien formé & si bien composé , qu'il n'estoit pas possible qu'un excellent ouvrier eust sceu mieulx garder toutes les proportions des membres , qu'elles estoient observées en luy. Son parler n'estoit point aigu ny vehement , ains estoit doux & attrayant , comme on le peult cognoistre & juger par ses lettres missives.

XXII. Or n'y avoit il rien qui plus endommageast les assiegez , que le petit espace de la place , laquelle n'avoit pas plus de demy quart de lieuë de circuit , & y estoient logez en de petites maisonnettes si ferrées , qu'ilz ne s'y pouvoyent pas à grande peine tourner , & beu-voient & mangeoyent sans point faire d'exercice , ny eulx ny leurs chevaux. Voulant donques

Eumenes leur oster non seulement celle pesanteur languissante, qui vient de ne rien faire, à ceulx mesmement qui ont accoustumé de travailler, mais aussi les tenir en halene, & les rendre dispos à pouvoir legerement prendre la fuite, si d'aventure quelque occasion s'en presentoit, il bailla aux hommes la plus longue & plus spacieuse salle qui fust leans, ayant quatorze coudées de longueur, pour eulx proumener, les instruisant qu'ilz marchassent tout bellement pour le commencement, & puis qu'ilz hastassent petit à petit leurs pas. Quant aux chevaux, il les faisoit sangler les uns après les autres sur le devant, puis avec des longes & poulions attachez aux soliveaux, les faisoit un peu soulever: tellement qu'ilz se soustenoyent sur leurs pieds de derriere, mais des pieds de devant ilz ne pouvoyent toucher en terre qu'un petit de la pinse du pied tant seulement. Quand ilz estoient ainsi suspenduz, les palefreniers venoyent par derriere les inciter, partie avec leurs cris, & partie avec des fouetz qu'ilz tenoyent en leurs mains, dont les chevaux irritez & courroucez ruoyent des pieds de derriere, & raschoyent à prendre terre avec ceulx de devant qui estoient soulevez hors de terre, de façon qu'ilz ne faisoient que la racler un peu par le dessus seulement, & n'avoient sur eulx nerf qui

ne tendist & ne travaillast par ce moyen : parquoy ilz souffloyent & escumoyent de sueur, & estoit un très bon exercice, tant pour les mettre en halene, que pour leur tenir les jambes souples pour mieux courir : puis on leur bailloit leur orge toute mondée & escorchée, à fin qu'ilz la cuississent mieulx & la digerassent plus tost.

XXIII. Ce siege avoit ja duré longuement, quand les nouvelles vindrent à Antigonus que Antipater estoit mort en Macedoine, & que le royaume estoit en grand trouble, à cause des factions & partialitez de Cassander & de Polyperchon : parquoy Antigonus qui ne mettoit point de petites imaginations en sa teste, ains embrassoit de convoitise tout l'empire entier des Macedoniens, voulut avoir Eumenes pour amy, à fin qu'il luy aidast à conduire ses desseings à effect : si luy envoya Hieronymus pour traiter de paix avec luy, & luy bailla la forme du serment qu'il vouloit qu'il jurast. Eumenes l'ayant veu, ne le voulut pas ainsi jurer, ains le corrigea, puis dit qu'il se rapportoit au jugement des Macedoniens qui là estoient, le tenans assiégué, laquelle forme des deux estoit la plus equitable, celle qu'Antigonus luy avoit fait presenter, ou celle que luy avoit corrigée : car en celle qu'Antigonus luy avoit envoyée, il faisoit un peu de mention du sang royal au commence-

ment , par une maniere d'acquit seulement : & puis en tout le reste , l'obligeoit à foy particulierement : mais Eumenes y meit en premier lieu Olympias , la mere du roy Alexandre , & les roys ses enfans après , & au demourant , juroit qu'il seroit amy des amis , & ennemy des ennemis , non d'Antigonus seulement , mais aussi des roys & d'Olympias : cè que les Macedoniens qui estoient au siege devant Nora , trouverent le plus raisonnable. Parquoy après avoir fait prester le serment & jurer à Eumenes suyvant celle forme , ilz leverent leur siege , & envoyerent devers Antigonus pour le luy faire pareillement jurer. Cela fait , Eumenes rendit aux Cappadociens leurs ostages qu'il avoit tenus quand & luy dedans Nora , & ceulx qui les vindrent querir luy baillerent en eschange des chevaux de guerre , des sommiers , des tentes & pavillons.

XXIV. Si commença à rallier ses gens qui estoient escartez çà & là depuis sa desfaitte , tellement qu'en peu de jours il eut r'amassé plus de mille hommes de cheval , avec lequels il s'enfouit , craignant encore Antigonus , & fait fagement : car non seulement il avoit contre-mandé qu'on le renfermast , & qu'on le teinst plus à destroit que jamais : mais encore escrivit il bien aigrement & en grande cholere aux Macedoniens qui avoyent accepté la correction

du ferment. Ainsi donques comme il estoit fuyant & errant par les champs il receut lettres de ceulx qui estoient en Macedoine craignans l'accroissement d'Antigonus, mesmement d'Olympias, laquelle luy mandoit qu'il s'en vinst en la Macedoine, pour avoir la tutelle & la garde du petit filz d'Alexandre, que lon taschoit à faire mourir, & en receut aussi d'autres de Polyperchon & du roy ¹ Philippus, qui luy mandoyent qu'il feist la guerre à Antigonus avec l'armée & les forces qui estoient en la Cappadocie, & que pour se rembourser de ce qu'on luy avoit osté, il prist cinq cents talents ² de l'argent du roy, qui estoit en la ville de Cyndes ³, & pour les frais de la guerre, tant comme il en auroit besoing, & quand & quand escrivirent aussi à Antigènes & à Teutamus les deux capitaines des Argyraspides, c'est à dire; des soudards aux boucliers d'argent ou argentez, qui estoient les vieilles bendes de l'armée d'Alexandre.

XXV. Ces capitaines ayans receu ces lettres feirent assez bon recueil de paroles à Eumenes,

¹ C'estoit Aridaeus fils de Philippus pere d'Alexandre, que l'on avoit surnommé Philippus. Diod. lib. 18. Amyot. T. II, p. 258.

² Trois cents mille escus. Amyot. 2,333,375 livres de notre monnoie.

³ Quinda ou Cinda, château fort de la Cilicie, un peu au-dessus d'Anchiale, qui est près de la mer & de l'embouchure du fleuve Cydnus.

& luy monstrent bon visage : mais en effect il estoit aisé à cognoistre à leurs contenancez qu'ilz en estoient envieus , pource qu'ilz s'estimoient bien tous deux dignes & suffisans pour commander à Eumenes , non pas pour le seconder : mais Eumenes s'y porta fort sagement : car quant à l'envie , il l'appaisa , en ne prenant point l'argent que lon luy avoit mandé qu'il prist pour foy , comme n'en ayant point affaire : & quand à leur ambition & presumption de ne vouloir point estre commandez par luy , combien qu'ilz ne sceussent ny commander ny obeïr , il les gaigna par une superstition qu'il leur meit en avant. C'est qu'il leur feit à croire que Alexandre s'estoit en dormant apparu à luy , & luy avoit montré un pavillon magnifiquement paré & accoustré , comme il appartient à un roy , dedans lequel pavillon y avoit un trosne royal , & luy dit que là où ilz voudroyent tenir leur conseil là dedans , il s'y trouveroit , & leur aideroit en tous leurs conseilz , & en la conduite de tous leurs affaires , pourveu qu'ilz commenceassent tousjours par luy. Il persuada aiseement cela à Antigènes & à Teutamus , lesquelz ne vouloyent point aller devers luy pour deliberer des affaires , ny luy aussi n'estimoit pas que ce fust chose digne de luy qu'on le veist aller à la porte des autres : parquoy d'un commun consentement ilz firent

incontinent dresser un beau & riche pavillon que lon appelloit le pavillon d'Alexandre, là où ilz faisoient leurs assemblées de conseil, pour deliberer des affaires de plus grande conséquence.

XXVI. Cela faict, ilz tirerent vers les hautes provinces, là où sur le chemin Peucestas qui estoit grand amy d'Eumenes s'alla joindre à eulx, & les autres satrapes avec ce qu'ilz avoyent de gens de guerre. Cela fortifia bien l'armée des nobles Macedoniens, quant au nombre d'hommes, & quant à la beaulté de leurs armes & de tout leur equipage : mais quant à leurs personnes, pour autant que depuis la mort d'Alexandre ilz n'avoient eu qui leur commandast, ilz en estoient devenus volontaires, à cause de ceste dissolue licence, & delicats en leur façon de vivre, & si avoyent oultre cela, chargé une fierté tyrannique nourrie & accreüe par les vanitez & fumées des Barbares : tellement que quand ilz se trouverent plusieurs ensemble, ilz ne se peurent endurer ny accorder les uns avec les autres, & se meirent à caresser & flatter deshonteement les vieux souldards Macedoniens en leur fournissant argent, & leur faisant des banquets & des festins de sacrifices : de maniere qu'en peu de temps ilz feirent d'un camp une taverne de intemperance & de toute dissolution, là où les seigneurs briquoient & acheptoient la faveur des gens de

guerre pour estre eleuz par eulx chef de tout l'ost , ne plus ne moins que lon fait les voix de la commune ès citez franches , où le peuple est souverain , pour estre avancé aux estats & honneurs de la chose publique.

XXVII. Si s'apperceut incontinent Eumenes ; que ces seigneurs satrapes se mesprisoyent les uns les autres , mais que tous le craignoyent , & se deffioyent de luy , & qu'il n'espioyent que quelque occasion à propos pour le tuer , parquoy pour y obvier il feist semblant d'avoir affaire d'argent , & en emprunta une bonne grosse somme , principalement de ceulx qu'il sçavoit qui le haïssoyent le plus , à fin que delà en avant ilz se fiasent en luy , & desistassent de l'espiër , pour la crainte qu'ilz auroyent de perdre l'argent qu'ilz luy auroyent presté : dont il advint une chose bien estrange : car l'avoir & l'argent d'autrui luy fut sauve-garde & assurance de sa vie , & au lieu que les autres donnent de l'argent pour s'asseurer & sauver , cestuy par en prendre meit sa vie en seureté.

XXVIII. Quant aux souldards Macedoniens , pendant qu'ilz ne sentirent point de danger d'aucuns ennemis qui les feist craindre , ilz se retiroyent devers ceux qui leur donnoyent , pour l'envie qu'ilz avoyent de se faire declarer capitaines generaux , & se trouvant le matin à leur

lever leur faisoient la cour & les accompagnoient par tout : mais quand Antigonus se fut approché & logé tout au plus près d'eux , avec une grosse & puissante armée , & que les affaires parlerent , en maniere de dire , & monstrerent au doigt qu'il falloit necessairement trouver un bon chef de guerre , alors non seulement les souldards se rengerent devers Eumenes , mais aussi tous ces satrapes , qui en temps de paix & de seureté faisoient tant des grands , luy cederent volontairement , & se soubmeirent d'eulx mesmes sans mot dire , à garder le lieu & faire ce qu'il leur voulut commander. Car comme Antigonus essayast tous moyens de passer la riviere de Pasitigris ¹ , les autres satrapes qui estoient disposez en divers lieux pour l'en engarder , ne sentirent pas seulement l'effort qu'il en feit , & n'y eut que Eumenes seul qui luy feist teste , & luy donna la bataille , où il luy tua tant de ses gens , qu'il en emplit toute la riviere , & si en prit quatre mille prisonniers.

XXIX. Mais plus evidemment encore monstrerent ces souldards des vieilles bendes une autre fois en une maladie qu'eut Eumenes , qu'elle opinion ilz avoyent de luy & des autres , c'est à sçavoir , que les autres leur sçauroyent bien

¹ Qui prend sa source vers les Portes de Suze , & traversant la Perse propre & l'Ellymaïde , va se jeter dans le golphe Persique.

tenir maison & les festoyer magnifiquement ; mais que luy seul estoit digne d'estre leur capitaine, & de commander. Car Peucestas pour leur avoir fait un grand festin au royaume de Perse , & leur avoir donné à chasque soudard un mouton pour sacrifier, esperoit avoir acquis grand credit & grande faveur entre eux : mais peu de jours après , ainsi que l'armée marchoit pour aller trouver les ennemis , Eumenes d'aventure tumba en une grosse & dangereuse maladie , à l'occasion de laquelle il se faisoit porter dedans une litriere assez loing du camp pour estre hors de bruit , à cause qu'il ne pouvoit reposer. Ilz n'eurent pas fait long chemin qu'ilz apperceurent les ennemis devant eulx , lesquels ayans passé quelques petites montagnes qui estoient entre deux , descendoient en la plaine. Quand ilz veirent sur le hault des montagnes la lueur des armes de leurs ennemis , qui flamboyoyent aux rayons du soleil , & le bon ordre qu'ilz tenoyent en marchant en bataille, les elephans avec leurs tours dessus leurs dos, & les gens d'armes avec leurs sayons de pourpre par dessus leurs harnois , qui estoit l'accoustrement qu'ilz portoyent quand ilz alloient trouver l'ennemy pour combattre : adonc les premiers s'arrestèrent tout court , & crierent que lon appellast Eumenes pour les conduire , & qu'ils ne passeroient point oultre , s'ilz ne l'avoient pour leur chef. En disant cela
ilz

ilz feirent quand & quand hault le bois , & poserent leurs pavois en terre à leurs piedz , s'entredifans les uns aux autres qu'ilz demourassent , & à leurs particuliers capitaines aussi , ausquelz ils declarerent rondement qu'ilz ne bougeroyent de là , ny ne combatroyent nullement , si Eumenes n'y estoit present pour les conduire. Dequoy Eumenes estant adverty , vint devers eux grand erre , en pressant les esclaves qui portoyent sa litiere , & la faisant ouvrir & descouvrir de costé & d'autre , tendit la main droite aux soudards , en leur donnant à entendre , qu'il estoit très joyeux de la bonne opinion qu'ilz avoyent de luy : & eulx aussi incontinent qu'ilz le veirent le saluèrent en langage Macedonien , & releverent leurs pavois , dont ilz frapperent contre leurs picques avec grands cris , difans que les ennemis vinsent quand ilz voudroyent , & qu'ilz leur donneroyent la bataille puis que leur capitaine estoit avec eulx. D'autre costé Antigonus qui avoit entendu par les prisonniers , que ses gens avoyent pris ès courses & escarmouches , que Eumenes estoit tumbé malade , & que lon le portoit dedans une litiere , tant il estoit mal disposé de sa personne , estima qu'il n'auroit pas grand affaire à desconfire tout le reste , celuy là estant malade , & pour ceste cause se hastoit le plus qu'il pouvoit de leur

donner la bataille : mais quand il fut approché de si près qu'il peut bien voir clairement l'ordonnance & la contenance de ses ennemis , qui estoient rengez en bataille si bien , qu'il n'estoit pas possible de mieulx , il en fut fort estonné , & s'arresta tout picqué un long temps , pendant lequel il apperceut de loing la littere d'Eumenes que lon portoit de l'un des bouts de la bataille à l'autre , dont il se prit à rire fort hault , ainsi comme estoit sa coustume , & se tournant devers ses amis : « C'est , dit-il , celle littere là , à mon » advis , qui nous fait la guerre , & qui nous pre- » sente la bataille » : mais en disant cela , il feît sonner la retraite , & remena ses gens en son camp.

XXX. Quand ceste peur fut un peu passée , les Macedoniens retournerent de rechef à leur façon de faire accoustumée , les satrapes à briguer & flatter les soudards , & les soudards à faire les audacieux & braves en grand mespris de leurs capitaines , tellement que quand ce vint à prendre leurs garnisons pour hyverner , ilz departirent entre eulx presque toute la province des Gabeniens ¹ , de sorte qu'il y avoit bien depuis les premiers logis jusques aux derniers soixante & deux ² lieües de distance. Ce qu'Antigonos ayant entendu , se delibera de leur aller

¹ Partie de l'Elymaïde à l'occident de Suze.

² Grec , 44.

courir sus lors qu'ilz ne se doubteroyent de rien moins. Si retourna tout court à eulx par un chemin bien plus court que celuy par où il estoit venu , mais beaucoup plus mal aisé aussi , & où il n'y avoit eau quelconque , esperant que s'il les pouvoit surprendre ainsi escartez les uns des autres , qu'il ne seroit pas aisé à leurs capitaines de les r'assembler , au moins si promptement tous ensemble : mais comme il se fust mis en chemin par ce païs aspre & desert , il y fut accueilly de si impetueux vents & de si grandes froidures , que ses gens ne peurent onques aller avant , & furent contrains de sejourner pour se pourvoir de remedes necessaires contre l'injure du temps. Les remedes estoient d'allumer force feuz , qui furent cause que leurs ennemis furent advertis de leur venue , pource que les Barbares demourans es montaignes , qui regardent devers le desert , s'esbahissant de voir si grand nombre de feuz en la plaine , envoyerent en diligence sur des chameaux faicts à la course , en advertir Peucestas qui estoit le plus prochain de la montagne , & fut si effroyé de ceste nouvelle , qu'il ne sceut qu'il devoit faire : car voyant les autres ses compagnons aussi effroyez comme luy , il se prit à fouir , attirant après luy tous ceulx qu'il trouvoit en son chemin là part où il passoit : mais Eumenes appaisa ce grand effroy , en leur

promettant qu'il arresteroit & retarderoit ceste soudaine surprise de leurs ennemis, de sorte qu'ilz arriveroyent trois jours plus tard que lon ne les attendoit : ce qu'ilz creurent. Et adonc envoya Eumenes çà & là par tout messagers aux autres capitaines, leur mandant, qu'à toute diligence ilz meissent leurs gens ensemble, & se trouvassent en certain lieu qu'il leur assigna : & ce pendant luy mesme avec quelques autres capitaines alla choisir un endroit à propos pour l'assiette d'un camp, lequel endroit se pouvoit clairement voir du hault des montagnes, qu'il falloit passer en venant de devers le desert. Si le feit fortifier de trenchées & departir par quartiers, ès quelz il feit faire force feuz, en telle distance les uns des autres, comme on les fait en un camp. Cela n'eust pas plustost esté fait, qu'Antigonus arriva au dessus des montagnes, qui apperceut de tout loing ces feuz, dont il fut fort desplaisant, pource qu'il estima que ses ennemis long temps auparavant eussent esté advertis de sa venue, & qu'ilz luy vinsent au devant : parquoy craignant qu'il ne fust contraint de venir à la bataille contre ses ennemis qui estoient frais & reposez, là où les siens estoient las & recreuz du travail & mesaise qu'ilz avoyent enduré à passer le pais desert, il se meit en chemin pour remener son armée ;

non par la courte voye , par laquelle il estoit venu , mais par le païs habité & peuplé de grosses villes & bons bourgs , à fin de refaire un peu son ost qui estoit grandement travaillé.

XXXI. Toutefois voyant que lon ne luy donnoit nulles alarmes , & que lon ne luy dressoit aucunes escarmouches , comme il se fait ordinairement quand deux armées sont si prochaines l'une de l'autre , davantage que les gens du plat païs luy disoyent qu'ilz n'avoient point veu d'autre armée que la siene , mais que là autour tout estoit plein de feuz , il se doubta bien adonc que c'estoit une ruze de guerre dont Eumenes l'avoit abuzé : si en fut tant despit , qu'il tira droit là part où il le pensoit trouver , se delibérant de n'user plus de surprise , ains de commettre tout au hazard d'une bataille rangée : mais ce pendant la plus grande & meilleure partie de l'armée s'assembla à l'entour d'Eumenes , pour la grande estime que chascun avoit de son bon sens & de sa suffisance : tellement qu'ilz voulurent & ordonnerent que luy seul comme capitaine souverain , commandast en l'armée.

XXXII. Cela despleut grandement aux deux capitaines des Argyraspides , Antigènes & Teutamus , qui en conceurent une telle envie contre luy , que dès lors ilz machinerent sa mort , & s'assemblans avec plusieurs des satrapes & des

particuliers capitaines teindrent conseil , pour sçavoir quand & comment ilz le devoient occire : mais la plus part de ceux qui eurent voix en ce conseil , furent d'advís que lon se devoit encore servir de luy pour la conduite de la bataille , mais incontinent après qu'il le falloit faire mourir : cela estant arresté , Eudamus capitaine des elephans , & un autre nommé Phædimus , s'en allerent secrettement devers Eumenes , & luy declarerent ce qui avoit esté conclud en celle assemblée contre luy , non pour aucune bonne affection qu'ilz luy portassent , ou pour aucun vouloir qu'ilz eussent de luy faire plaisir , ains seulement pour crainte de perdre l'argent qu'ilz luy avoyent presté. Eumenes les remercia fort , & les loua de leur fidelité , puis l'alla compter à ses plus feaux amis , en leur disant , « Voyez » comment je suis environné d'un troupeau de » sauvages & cruelles bestes ». Cela fait il escrivit son testament , & deschira ou meit au feu toutes les lettres missives & les papiers qu'il avoit riére luy , ne voulant point qu'après sa mort ceulx qui luy auroyent escrit quelques secrets advertissemens en souffrissent.

XXXIII. Après qu'il eut ainsi disposé de ses particuliers affaires , il meit en deliberation s'il devoit faire perdre la bataille , & en laisser la victoire aux ennemis , ou s'il s'en devoit fouir

par la Medie & l'Armenie en la Capadocie : mais il n'en arresta rien devant ses amis, ains après que le malheur où il se trouvoit luy eut donné plusieurs divers pensemens, encore se resolut il de combattre, & ordonna l'ost en bataille, preschant & priant les estrangers tant Grecs que Barbares, de faire bien leur devoir : car quant aux vieux routiers Macedoniens, tant s'en faut qu'ilz eussent besoing d'estre preschez, que au contraire ilz l'enhortoyent eux mesmes qu'il eust bon courage, disans que leurs ennemis ne les attendroyent jamais à cause que c'estoyent tous les vieux & plus experimentez souldards qui avoyent esté en toutes les conquestes du roy Philippus & de son filz Alexandre, & n'estoit point de memoire que jamais ilz eussent esté rompus ny desfaits en bataille rangée, estant la plus part d'eux aagez de soixante & dix ans, au moins n'y en avoit il point de plus jeunes que de soixante ans. A l'occasion dequoy quand ce vint qu'ilz prirent leur course pour aller chocker de plus grande roideur leurs ennemis, ilz s'escrierent tout hault parlans aux autres souldards Macedoniens qui estoyent soubz Antigonus, « O » meschans garçons, vous prenez vous à voz » peres » ? & se ruans ainsi sur eulx avec un courage enflammé de courroux, en peu d'espace desconfirent tout leur bataillon entierement, & en

fut la plus part tuée sur le champ à coups de main.

XXXIV. Si fut l'armée d'Antigonus tout à plein desconfitte en cest endroit : mais du costé où estoit la gendarmerie, il eut l'avantage par la lascheté de Peucestas qui se porta très mal en celle journée, de sorte que Antigonus gaigna tout leur bagage, moyennant le bon sens qu'il eut au plus fort du danger, joint que la nature du lieu où fut la bataille, luy servit aussi : car c'estoit une campagne rase, longue & large infiniment, qui n'estoit ny trop enfondrante, ny aussi trop ferme ny trop dure, ains couverte par le dessus d'un menu sable, ressemblant à celle escume sèche que lon voit sur la greve de la mer quand elle s'est retirée. Ce sable ainsi delié estant emeu par les courses, allées & venues de tant de milliers d'hommes & de chevaux durant le combat, avoit élevé en l'air un grand poulcier, ne plus ne moins que qui briserait & remueroit de la chaux vive, & en blanchissant l'air troubloit la veüe, de maniere que lon n'eust fceu rien voir devant soy : au moyen dequoy il fut aisé à Antigonus se saisir des hardes & du bagage de ses ennemis, sans qu'ilz en apperceussent rien.

XXXV. Ayant donques la bataille eu telle issue, Teutamus incontinent envoya devers Antigonus, le prier de leur rendre leur bagage qu'il

avoit pris & emmené dedans son camp. Antigonus fait responce, que non seulement il rendroit les biens aux Argyraspides, mais que encore en toute autre chose il les traitteroit le plus gracieusement qu'il pourroit, moyennant qu'ilz luy rendissent Eumenes entre ses mains : & alors ces Argyraspides prirent une très malheureuse & meschante resolution de le livrer vif entre les mains de ses mortelz ennemis. Si s'approcherent premierement de luy, sans monstrier aucun semblant qu'ilz voulussent mettre la main sur sa personne, ains plus tost que c'estoit pour le garder & defendre comme ilz avoyent de coustume, se plaignans les uns de leurs biens qu'ilz avoyent perdus, les autres luy disans qu'il ne se souciait point, & qu'il avoit gagné la bataille, & les autres accusans la lascheté des autres satrapes, ausquelz il avoit tenu, qu'ilz n'eussent entierement emporté la victoire : mais à la fin après l'avoir bien espié, il y en eut un qui se jetta sur luy & luy osta son espée, les autres le saisirent aussi tost au corps, & luy lierent les deux mains derriere le dos avec sa ceinture. Quoy entendant Antigonus, y envoya Nicanor pour le prendre d'entre leurs mains, & le luy amener : & lors ayant requis qu'on luy permist de parler, ainsi qu'on le menoit à travers les bandes de ces vieux souldards Macedoniens, soubz condition qu'il ne

leur feroit prieres aucunes ny requeste pour les divertir de ce qu'ilz vouloyent faire, ains leur diroit choses qui concernoyent grandement leur profit, il luy fut ottroyé.

XXXVI. Adonc estant fait silence, il monta dessus un tertre un peu relevé, là où il se prit à dire en estendant ses mains liées: « O meschans » & desloyaux hommes, les plus qui nasquirent » onques en Macedoine ! Quel triumphe, ne » quelle victoire si grande à jamais gagnée sur » vous Antigonus, qui en a tant cherché les » moyens, comme de vous mesmes vous luy » donnez maintenant, en luy livrant vostre capitaine lié & garroté entre ses mains ? Ne vous » feroit ce pas grande honte, si vous estant le » champ de bataille demouré après estre victorieux, vous quittiez seulement l'honneur de » la victoire à vostre ennemy, pour l'avarice de » retirer seulement quelques hardes que vous » auriez perdues ? Et maintenant vous ne faites » pas ceste lascheté seule, ains qui pis est, en- » voyez vostre capitaine pour la rençon de vostre » bagage. Quant à moy, quoy que lon m'em- » meine lié, je demeure neantmoins invaincu » vainqueur de mes ennemis, & vendu par ceulx » qui deüssent estre mes amis. Mais à tout le » moins, je vous requier au nom de Jupiter protecteur des armées, & en l'honneur des dieux,

» auquelz appartient la garde du serment de
» fidelité jurée, je vous supplie & conjure, que
» vous me tuez vous mesmes en ce lieu : car
» aussi bien fera ce tousjours vostre faict, quand
» je seray par main ennemie mis à mort au camp
» d'Antigonus : & si ne devez craindre qu'il en
» soit mal content : car il ne demande Eumenes
» que mort, & non pas vif. Ou si vous ne voulez
» employer vos mains à cest office, desliez m'en
» l'une des mienes seulement, elle suffira pour
» cest effect : & si d'aventure vous doubtez de
» me mettre un glaive en la main, jettez moy
» piedz & mains liées aux bestes, & en ce faisant
» je vous absouls & descharge du serment que
» vous avez presté entre mes mains, comme très
» bien & sainctement acquitez de la foy que
» vous avez jurée à vostre capitaine ».

XXXVII. Quand Eumenes eut ainsi parlé ;
tout le reste de l'armée eut grande compassion
de luy, tellement que les larmes leur en vin-
drent aux yeux : mais les Argyraspides crierent
qu'on le menast, & que lon ne s'arrestast plus
à ses beaux preschemens, & que ce n'estoit pas
mal employé, que ce meschant Cherronesien fust
puny selon qu'il l'avoit deservy, attendu qu'il avoit
ainsi travaillé les Macedoniens de guerre & de
batailles, où il n'y auroit jamais fin : mais que
bien seroit ce chose indigne, s'il falloit que les

plus vaillans hommes, que jamais eussent euz en leur service les roys Philippus & Alexandre, après tant de peines & de travaux, perdissent en leur vieillesse le gaing & la recompense d'avoir usé toute leur vie aux labeurs de la guerre, de maniere qu'ilz fussent contraints de mendier leurs vies, mesmement après que leurs femmes avoyent desja couché trois nuits avec leurs ennemis. En disant cela, ilz le menerent le plus roide qu'ilz peurent vers le camp d'Antigonus, lequel craignant que la foule du peuple qui couroit pour le voir ne le suffoquast, à cause qu'il n'estoit demouré personne au camp, y envoya dix des plus forts elephans qu'il eust, & bonne troupe d'hommes d'armes Medois & Parthiens, pour faire faire place & escarter la presse : & arrivé qu'il fut en son camp, il n'eut pas le cueur de le vouloir voir en si piteux estar, à cause qu'ilz avoyent eu par le passé amitié & familiarité ensemble : mais ceulx à qui il en avoit commis la garde luy vindrent demander comment il vouloit qu'il fust gardé, & il leur respondit, « Comme un lion ou comme un elephant », toutefois un peu après il en eut pitié, & le fait descharger de ses plus pesans fers, & luy envoya l'un de ses serviteurs domestiques pour le traiter & avoir soing de sa personne, & permit à qui vouloit de ses amis de l'aller visiter & luy porter ses necessitez. Ainsi dilaya

Antigonus par plusieurs jours à se resouldre de ce qu'il en devoit faire , escoutant tout ce qu'on luy en disoit , & qu'on luy en promettoit , pource que Nearchus le Candiot , & Demetrius son propre filz parloyent pour luy , & taschoyent de luy sauver la vie , au contraire de tous les autres seigneurs & capitaines qui estoient autour d'Antigonus , lesquelz vouloyent qu'on le feist mourir.

XXXVIII. Pendant que lon estoit en ces termes , Eumenes demanda un jour à Onomarchus qui avoit la charge de le garder , « A quoy » tient il qu'Antigonus ayant un sien ennemy » entre ses mains , ne le fait mourir promptement , ou qu'il ne le delivre magnaniment » ? Onomarchus luy respondit outrageusement , qu'il n'estoit pas temps lors de faire du hardy , & de monstrier qu'il ne craignoit point la mort , & que c'estoit en la bataille où il l'avoit deu monstrier. Eumenes luy repliqua , « Ainsi » m'aide Jupiter que je l'ay fait aussi , & si tu » ne m'en crois , demande le à ceulx qui se sont » attachez à moy : mais je n'en ay point trouvé » de plus vaillant ny de plus fort que moy ». Lors repliqua Onomarchus , « Maintenant donques » puis que tu as trouvé plus fort que toy , que n'attens tu l'heure qui luy plaira » ? Finablement quand Antigonus eut arresté de le faire mourir , il ordonna que lon ne luy baillast plus à manger :

& fut ainfi deux ou trois jours que lon le menoit à fa fin, en luy ostant le boire & le manger : mais il furvint quelques nouvelles, pour lesquelles il fallut que le camp desloyeait foudainement : à l'occafion dequoy avant que partir on envoya un homme qui l'acheva de tuer¹. Antigonus permit à fes amis d'en prendre le corps & de le brufier, puis en recueillir les cendres & les os pour les envoyer à fa femme & à fes enfans. Ayant Eumenes finy fes jours en ceste maniere, les dieux n'establirent autres commiffaires pour venger la desloyaulté des Argyrafpides & de leurs capitaines qui l'avoient trahy, que Antigonus mefme, lequel les abominant comme cruelz meurtriers, desloyaux & perjures aux hommes & aux dieux, les configna à Ibyrtius² gouverneur de la province de Arachofie³, luy donnant très exprès mandement de les perdre & mettre tous à male fin en quelque maniere que ce fust, tellement que nul d'eulx ne retournaft jamais en la Macedoine, ny ne veift la mer de la Grece.

¹ L'an de Rome 439, avant J. C. 315. Il avoit, felon Cornelius Nepos, 45 ans.

² Ce nom fe trouve écrit avec quelques différences dans les auteurs anciens.

³ Province au midi de la Bactriane, fur la rive occidentale de l'Indus.

LA COMPARAISON

D'EUMENES AVEC SERTORIUS.

C'EST ce que nous avons peu recueillir qui soit digne de memoire des faicts & gestes de Sertorius & d'Eumenes. Et pour venir à les comparer l'un avec l'autre, cela premierement leur est commun à tous deux, qu'estans estrangers en païs estrange, & bannis du leur, ilz ont tousjours, jusques à leur trespas, esté capitaines de diverses nations, & ont esté souverains capitaines de grosses & belliqueuses armées. Mais Sertorius a cela de propre, que tous ceulx de sa ligue & de son party luy cederent le premier lieu d'autorité comme au plus suffisant d'entre eulx, & à celuy qui estoit le plus digne de commander : & à Eumenes, que entre plusieurs qui estrivoyent encontre luy de la superintendence de toute l'armée, il gaigna par ses faicts le premier degré d'autorité en son ost : tellement que à l'un obeïrent ceulx qui vouloyent estre gouvernez par un homme de bien & bon capitaine, & à l'autre cederent pour le bien public, ceulx qui se sentoient foibles de suffisance pour pouvoir commander.

II. Car Sertorius estant Romain commanda aux Hespagnolz & Lusitaniens , & Eumenes qui estoit Cherronesien, aux Macedoniens : dont ceulx là estoient ja de long temps soubz l'empire Romain , & ceulx cy en ce temps là avoyent conquis & subjugué tout le monde. Davantage Sertorius estant desja en reputation grande pour estre senateur Romain , & pour avoir au paravant eu charge de gens de guerre, parvint à la dignité de capitaine general & chef souverain d'une grosse armée : là où Eumenes y vint desestimé & desdaigné pour son estat de secrétaire : & n'eut pas seulement lors qu'il commença à y pretendre moins de moyen pour y parvenir que Sertorius , mais aussi de bien plus contraires & de plus grands empeschemens pour s'accroistre & se maintenir : car plusieurs ouvertement luy furent contraires, & secrettement luy machinerent sa mort, non pas comme à Sertorius, à qui nul ne contraria du commencement, jusques à la fin que quelques uns de ses compagnons soubz main conjurerent à l'encontre de luy. Pourtant estoit ce à Sertorius fin de tous ses perilz , que vaincre ses ennemis : là où à Eumenes ses plus grands dangers luy procedoyent des victoires qu'il gaignoit sur les siens, pour la malignité de ceulx qui portoyent envie à sa gloire.

III. Quant est donques aux faicts d'armes ,
ilz

ilz sont presque tous esgaulx & pateilz : mais au demourant quant à leurs conditions, Eumenes aimoit naturellement la guerre, les débats & les querelles : & Sertorius estoit amy de paix, de douceur & de tranquillité. Car l'autre pouvant vivre en seureté avec honneur, s'il eust voulu ceder aux premiers, & se retirer des armes, aimamieulx avoir la guerre aux plus grands de Macedoine au peril de sa vie, tant qu'à la fin il y mourut aussi : & Sertorius qui ne vouloit point s'embrouiller d'affaires, fut contrainct pour la seureté de sa propre personne, de prendre les armes contre ceulx, qui ne le vouloyent pas laisser vivre en repos : car si Eumenes n'eust point esté si ambitieux & si opiniastre que de contester à l'encontre d'Antigonus du premier degré d'autorité, & qu'il se fust voulu contenter du second, Antigonus en eust esté bien aise : là où Pompeius ne voulut oncques souffrir que Sertorius peust vivre & demourer en repos. Ainsi l'un se meit volontairement à faire la guerre pour dominer, & l'autre fut malgré luy contrainct de dominer, pource qu'on luy faisoit la guerre : par où il appert que celuy là aimoit naturellement la guerre, qui preferoit la convoitise de plus grand estat que le sien, à la seureté de sa vie : & que cestuy cy estoit veritablement homme de guerre, qui

trouva moyen d'asseurer sa vie par la defense des armes.

IV. Davantage l'un fut occis, sans qu'il se doubtaſt de la trahison qu'on luy brasſoit, & l'autre attendant de jour en jour la mort que lon luy machinoit : dont cela eſt ſigne de grande debonaireté de nature en ce qu'il ne ſe deſſioit point de ceulx qu'il penſoit devoir eſtre ſes amis, & cecy de quelque faulte de ſens & de cuer, car il fut pris comme il s'en vouloit ſouir. Parquoy la mort de Sertorius ne ſeit point de deſhonneur à ſa vie, quand il ſouffrit par ſes compagnons, ce que ſes ennemis mortelz ne luy avoyent jamais peu faire ſouffrir : l'autre n'ayant ſceu ſouir à ſon malheur avant que d'eſtre pris, & ayant cherché le moyen de vivre encore en ſa priſon & captivité, ne ſeut eviter honeſtement ne ſupporter vertueuſement la mort : car en requerant & priant ſon ennemy de luy ſauver la vie, il ſoumettoit le cuer & le corps à celui, qui paravant n'avoit que le corps en ſa puiſſance.

OBSERVATIONS

SUR LA VIE DE CIMON.

CHAP. VIII, page 15. Cornelius Nepos, dans sa préface & dans la Vie de Cimon, dit formellement que Cimon avoit épousé sa sœur, & que ce mariage n'avoit fait aucun tort à sa réputation, parce que cet usage étoit permis par les loix d'Athènes. La loi permettoit en effet à un frere d'épouser sa sœur de pere, mais non pas de mere. Cimon ayant été mis en prison faute d'être en état de payer l'amende à laquelle son pere Miltiade avoit été condamné, un riche citoyen d'Athènes, nommé Callias, offrit de la payer, à condition qu'on lui donneroit Elpinice pour femme. Cimon ne pouvoit s'y résoudre, dit Cornelius Nepos; mais Elpinice déclara qu'elle ne souffriroit pas que le fils de Miltiade pérît dans les prisons publiques, quand il dépendoit d'elle de lui rendre la liberté. Ainsi elle épousa Callias; car le divorce étoit aussi permis par la loi. Voyez le Recueil des Loix Attiques, par Samuel Petit, Liv. VI, tit. 1 & tit. 3, & le Commentaire, p. 440 & 441.

CHAP. XXII, page 39. Il paroît peut-être singulier à quelqu'un, que Plutarque ayant à mettre en parallèle deux victoires de Cimon avec deux victoires antérieures des Grecs, compare la victoire remportée sur terre, avec une victoire gagnée sur mer, & celle qu'il gagna sur mer, avec celle que les Grecs avoient remportée sur terre. J'avoue que je ne puis deviner la raison de ce choix. Aussi suis-je persuadé qu'il n'est dû qu'à une transposition

de copiste, & qu'il faut lire, sur la mer dans la première partie de la phrase, & sur la terre dans la seconde.

CHAP. XXVII, p. 45. Clisthène étoit fils de Mégaclês, & par sa mere petit-fils de Clisthène, tyran de Sicyone, dont nous avons parlé dans les Observations sur le quatrième volume des Morales, p. 538, chap. xv. Il fut l'un des principaux auteurs du recouvrement de la liberté d'Athènes, chassa les Pisistratides à la fin de la seconde, & fut archonte éponyme de la troisième à la quatrième année de la soixante-septième olympiade. Car on doit se souvenir que l'année attique commençoit alors au mois gamélion (janvier), tandis que l'année olympique commençoit au mois hécatombéon (juillet); au moyen de quoi l'année d'un archonte concouroit avec deux années olympiques, & que cela dura jusqu'à la réforme introduite par Méton, qui commença avec la première année de la quatre-vingt-septième olympiade. Clisthène rétablit le bon ordre dans la république, réforma la législation, porta à dix le nombre des tribus, qui n'étoit auparavant que de quatre. C'est sur cette même année que tombe aussi l'expulsion des rois de Rome.

CHAP. XXIX, p. 49. Les esclaves des Lacédémoniens s'appelloient Hélotés, du nom d'Hélos, petite ville à l'extrémité de la Laconie, sur le bord de la mer, qu'Agis, roi de Lacédémone, ruina avant l'époque de Lycurgue, & dont il réduisit les habitans en servitude, ainsi que Strabon le raconte en son huitième livre. Long-temps après les Messéniens ayant été vaincus & réduits en esclavage, les noms d'Hélotés ou de Messéniens devinrent communs aux esclaves des deux villes.

SUR LA VIE DE LUCULLUS.

CHAP. V, p. 69. Quel est ce Ptolémée ? Palmerius prétend que c'est Aulète. Mais il ne commença à régner en Egypte que l'an de Rome 689, avant J. C. 65, long-temps après la mort de Sylla, arrivée l'an de Rome 676. Ce ne peut être Ptolémée Lathyre, qui avoit régné pour la première fois dès l'an de Rome 637, puisque Plutarque nous dit que celui dont il s'agit étoit fort jeune. C'est donc ou Alexandre II, ou Alexandre III. M. Moles Dufoul, dans les notes sur Plutarque, édit. de M. Reiske, croit que c'est Alexandre II. Mais, outre qu'il est bien peu croyable que cette négociation de Lucullus soit tombée précisément sur les dix-huit ou dix-neuf jours de son règne, il est encore trop peu vraisemblable qu'il eût refusé d'entrer en alliance avec Sylla, par qui il avoit été placé sur le trône. Cet événement ne peut donc regarder qu'Alexandre III qui lui succéda au bout de dix-neuf jours ; mais cela ne sauve pas encore toute difficulté, puisque d'après Appien on conclut qu'Alexandre II ne fut mis sur le trône d'Egypte que l'an de Rome 673, & Sylla étoit à Athènes l'an de Rome 668 ; & Fimbria dont il va être question se tua lui-même l'an de Rome 670, avant J. C. 84. Il y a donc ici une erreur de trois ou quatre ans dans les époques de cette succession, qu'il ne sera peut-être jamais possible de rectifier.

SUR LA COMPARAISON

DE LUCULLUS AVEC CIMON.

CHAP. III, p. 195. M. Dacier a confondu sur cet article le Pancratium, qui étoit le combat de la lutte & du

pugilat, tout ensemble, avec le Pentathle ou Quinquertium, qui étoit composé de cinq exercices successifs, du saut, de la course, du disque, du javelot, & de la lutte. Quant à Amyot, je ne fais pas pourquoi il a traduit : non vainqueurs, mais victoires, pour leur faire plus d'honneurs. Le grec, dit seulement victoires ; mais c'est une faute reconnue depuis long-temps. Plutarque n'a jamais pu dire qu'il fut étrange d'appeller des vainqueurs, *νίκαι*, mot qu'Amyot traduit par victoires. Il n'ignoroit pas apparemment qu'on nommoit les magistrats *ἀρχαί*, mot qui répond chez nous à magistratures. Mais la vérité est qu'il n'y a nulle trace de cette dénomination donnée aux pancratiastes, & qu'il faut lire *παρὰδοξίνας* en un seul mot, suivant la conjecture d'Henri Etienne. Alors la phrase grecque signifie qu'on étoit dans l'usage d'appeller les pancratiastes vainqueurs extraordinaires.

SUR LA VIE DE NICIAS.

CHAP. XXI, p. 235. Cet Hipparque n'étoit pas le fils du tyran Pisistrate, mais un de ses parens, comme le dit, d'accord avec Plutarque, Harpocraton, & cela d'après le témoignage d'Androtion, autorité incontestablement préférable à celle de tous les écrivains postérieurs, qui font remonter l'ostracisme jusqu'au temps de Thésée, tandis qu'Androtion, disciple d'Isocrate, qui a eu part à l'administration d'Athènes, & a écrit l'Histoire de l'Attique, assure expressément qu'Hipparque fut la première victime de l'ostracisme qui venoit d'être établi. Au surplus, Diodore de Sicile & Elien sont d'accord avec Androtion & Plutarque, sur l'époque de cette institution, qui n'étoit pas particulière à Athènes, mais un usage assez général dans les villes de la Grèce, où

le gouvernement populaire étoit établi. Voici la maniere dont on y procédoit. A certain jour marqué le peuple s'assembloit, présidé par les neuf archontes & le sénat. Chaque citoyen portoit une coquille sur laquelle il écrivoit le nom qu'il vouloit, & la jettoit dans une enceinte environnée d'une espece de grillage, dont on approchoit par dix avenues, suivant le nombre des tribus. On comptoit ensuite, & celui dont le nom se trouvoit écrit sur le plus grand nombre de coquilles, pourvu qu'il fut au moins de six mille, étoit obligé de sortir de la ville dans le terme de dix jours. Cette espece d'exil différoit du banissement prononcé par un jugement, en ce que le lieu où devoit résider le citoyen qui subissoit l'ostracisme, lui étoit désigné; que son exil finissoit au bout de dix ans, & que ses biens n'étoient point confisqués, au lieu que les autres bannis perdoient leurs biens; & que, comme ils étoient censés expatriés pour toujours, on ne leur marquoit point l'endroit où ils devoient habiter, parce qu'on ne les regardoit plus comme citoyens.

Le bourg de Chalogue, patrie de l'Hipparque dont il est ici question, est un dème de l'Attique près du Céphise, qui coule à l'occident du Pirée, & vient se jeter dans le golphe Saronique, vis-à-vis Salamine.

CHAP. XXXIX, p. 262. Syracuse fondée, suivant les marbres d'Oxford, la troisieme année de la cinquieme olympiade, par Archias de Corinthe, avoit de circuit 180 stades, c'est-à-dire, près de huit lieues, selon Strabon. C'étoit, selon Thucydide, l'étendue de l'enceinte d'Athènes. Elle étoit composée de cinq villes ou grands quartiers enfermés par un seul mur; dont l'une s'appelloit l'Ile ou Ortygie, entre les deux ports; & réunie au reste de la ville par un pont; la seconde Adradine; la troisieme Tyché

ou la Fortune, à cause d'un ancien temple de la Fortune qui y étoit; la quatrième étoit la nouvelle ville ou Néapolis; & la cinquième enfin, dont Cicéron ne parle point dans son discours contre Verrès, de *Signis*, étoit Epipoles dont il est ici question, lieu fort escarpé, situé, selon Diodore de Sicile, au nord, par rapport au reste de la ville. Ce qu'on appelle l'Hexapyle, étoit, selon Cellarius, ou une partie de Néapolis, ou une partie de ses murs, percée de six ouvertures, & qu'on pourroit par conséquent regarder comme la porte de cette nouvelle ville, défendue vraisemblablement par un château.

N. B. CHAP. VII, p. 214. On sent bien qu'il est impossible de vérifier toutes les citations de Plutarque. Aussi nous n'avons fait jusqu'ici, & nous ne nous proposons de faire désormais aucune remarque sur cet objet, à moins que la mémoire ne nous rappelle sur le champ, ou que des observations déjà faites ne nous avertissent d'une erreur. C'est ce qui nous arrive en ce moment, par rapport à ce vers d'Aristophane, qu'Amyot traduit ainsi :

Les harangueurs à la gorge prendrai,
Et Nicias étonné je rendrai.

Plutarque le met dans la bouche de Cléon. Mais c'est la fin de la réponse du marchand de boudin, que les chevaliers ont mis en opposition avec Cléon. Voyez le vers 355 jusqu'à 357 des Chevaliers.

SUR LA VIE DE CRASSUS.

CHAP. I, p. 288. Suivant les loix Romaines, les mariages ne furent défendus, à raison d'affinité, & regardés

comme incestueux, qu'entre les personnes qui étoient dans la ligne directe, ou qui se tenoient entr'eux lieu de parens & d'enfans, comme beau-pere, par rapport à sa bru ou à sa belle-fille, belle-mere, par rapport à son gendre ou à son beau-fils, *inter generum & socrum, focerum & nurum, vitricum & privignam*. A l'égard des alliés dans la ligne transversale, tels que *glos*, la femme du frere, *levir*, le frere du mari, tant que les Romains vécurent dans le Paganisme, ils crurent que cette sorte d'affinité étoit dissoute & détruite par la mort de l'un des conjoints, sur-tout s'il ne restoit point d'enfant qui lui survécût. C'est ce qui a fait dire à Cicéron que l'affinité ne pouvoir en aucune maniere être disjointe, tant qu'il vivoit des enfans qui la perpétuoient; *affinitas, liberis istius vivis divelli nullo modo poterat*. *Or. pro P. Quintio*, p. 6, T. II. D'où on doit conclure qu'elle pouvoit l'être, s'il n'y avoit point d'enfans vivans. Ce ne fut que fort tard, & par le droit nouveau que la prohibition des mariages, à raison d'affinité, s'étendit aux alliés dans la ligne transversale, par exemple, entre un frere & la veuve de son frere. La plus ancienne loi Romaine prohibitive à cet égard, est la loi 4, au code, *de incestis & inutilibus nuptiis*. Cette loi est des empereurs Valentinien, Théodose & Arcade, & conçue en ces termes: *Fratris uxorem ducendi, vel duabus sororibus conjungendi penitus licentiam summovemus, nec dissoluto, quocumque modo conjugio*. Rome étoit alors chrétienne. La même prohibition se trouve renouvelée dans la loi 8, *ibid.* qui est de Zénon, & la loi 9, qui est d'Anastase. Il semble même qu'on puisse conclurre de la loi de Zénon, que quoique les Egyptiens véussent à cette époque sous la loi du Christianisme, il n'y étoit pas encore sans exemple qu'on épousât la veuve de son frere, pourvu qu'elle fût

demeurée vierge. Voici les termes de la loi : *Licet quidam Ægyptiorum idcirco mortuorum fratrum conjuges sibi copulaverint , quod post illorum mortem mansisse virgines dicebantur , arbitrati scilicet , quod certis legum conditoribus placuit , cum corpore non convenerint , nuptias non videri re esse contractas . Et hujusmodi connubia , tunc temporis celebrata , firmata sunt : tamen præseni lege sancimus , si qua hujusmodi nuptia contracta fuerint , eas , earumque contractores , & ex his progenitos antiquarum legum tenori subjacere ; nec ad exemplum Ægyptiorum , de quibus supradictum est eas videri fuisse firmas , vel esse firmandas .* Cette note m'a été communiquée par M. Bouchaud.

CHAP. XIX , p. 311. Amyot a suivi une leçon défectueuse , contre laquelle l'autorité de Cicéron , dans le discours contre Verrès , de *Suppliciis* , suffisoit pour éviter toute erreur. L'orateur y dit en deux endroits , que non-seulement la guerre des esclaves ne se communiqua en aucune manière à la Sicile , mais qu'il n'y eut pas même apparence d'un mouvement dans l'île. T. II , p. 188 & 194. C'est donc avec raison que M. Dacier a suivi l'autre leçon des manuscrits , d'où résulte ce sens : Spartacus ayant rencontré des corsaires Ciliciens , forma le dessein de tenter la Sicile , & d'y jeter deux mille hommes , pour y ressusciter la guerre des esclaves , qui ne s'étoit point renouvelée en Sicile , dit expressément Cicéron , p. 188 , depuis celle que Manius Aquilius , consul l'an de Rome 653 , y avoit terminée en tuant de sa main , selon Diodore de Sicile , leur chef Athénion. Florus raconte ce dernier trait d'une autre manière , L. III , chap. 19. Le projet de Spartacus n'eut donc point lieu , soit par la raison que rapporte ici Plutarque , soit par les précautions que prit Crassus , comme Cicéron le dit , à l'endroit déjà cité.

SUR LA VIE DE SERTORIUS.

CHAP. XXVII, p. 435. Il n'y a rien dans le texte de Plutarque qui signifie, ni victoire de Sertorius, ni défaite de Pompée. Il y eut de côté & d'autre une partie de l'armée victorieuse, & une partie vaincue. Le camp de Sertorius fut même pris & pillé, & Pompée s'en vante dans sa lettre au sénat, conservée parmi les fragmens de Salluste : *Castra hostium apud Sucronem capta*. Il est vrai que le désordre des pillards donna occasion à Sertorius de retomber sur eux avec avantage. Mais tout cela n'établit ni victoire ni défaite décidée, comme on le voit dans la Vie de Pompée.

Cette bataille se donna auprès du fleuve Sucron, selon Plutarque dans la Vie de Pompée, & non pas de la ville de Sucron, qui étoit à l'embouchure du fleuve, & dont Tite-Live, Strabon & Pline parlent tous trois, mais qui n'est pas nommée ici dans le texte de Plutarque. Ce fleuve arrose la Castille & l'Arragon, autrefois occupés par les Celtibériens; c'est aujourd'hui le Xucar. Il n'y a point de difficulté sur cet article; mais il y en a davantage sur l'article suivant, où Amyot a encore traduit la ville de Tutria. Il n'y a point la ville dans le texte, mais seulement le nom de Tutria; & les commentateurs, qui regardent ce mot comme une faute, sont partagés sur la leçon qu'il faut y substituer; les uns veulent lire, le fleuve Durus; les autres, le fleuve Turias. Or, 1°. il est certain que Tutria fut une ville de ce canton, comme on le voit clairement dans Florus, L. III, chap. XXII, 9, qui se trompe néanmoins lorsqu'il met la prise de Valence après la mort de Sertorius, parce qu'il est clair, par la lettre de Pompée déjà citée, qu'elle lui est antérieure. Il est vrai aussi que

le combat dont parle ici Plutarque est postérieur, comme il le dit lui-même, à la bataille donnée près le fleuve Sucron. Donc ce ne peut être le même que celui du fleuve Durius ou Turias, qui fut suivi de la prise de Valence, parce que cette affaire de Valence précéda celle du Sucron, & que Pompée y combattit sans Metellus, comme Plutarque le dit dans la Vie de Pompée. La substitution du Durius ou du Turias ne peut donc avoir lieu ici. Il faut conserver le nom de la ville de Tutia.

Quant au combat antérieur, près le Durius ou le Turias, il faut d'abord observer que Valence, située sur la côte orientale d'Espagne, exclut toute idée du Durius, aujourd'hui le Douro, qui se jette dans l'Océan occidental, après avoir traversé le Portugal. Il est encore certain que Valence est à l'embouchure d'un fleuve, que Pline appelle Turius; c'est celui que nos savans appellent Turias, cette position est incontestable; mais ce fleuve est appelé, dans la lettre de Pompée, & dans le discours de Cicéron pour Balbus, le fleuve Durius. Cette légère différence d'orthographe, qui ne change rien au fond, ne mérite pas une discussion particulière, à ce qu'il me semble.

CHAP. XXX, p. 440. Il semble, d'après la ressemblance des faits rapportés dans l'épître du quarre-vingt-treizième livre de Tite-Live, que cette ville est Calaguris ou Calagurium, où Strabon dit en effet que Sertorius fut assiégé par Pompée sur la fin de cette guerre, p. 244. C'est cette ville qui fut prise après sa mort, & dont les habitans poussèrent la rage jusqu'à égorger leurs femmes & leurs enfans pour leur servir d'alimens, plutôt que de se rendre, ou de chercher au milieu des ennemis la glorieuse alternative de la mort ou de la victoire. Il y avoit

OBSERVATIONS. 525

deux villes de ce nom , l'une à la droite de l'Ibère dans le pays des Vascons , l'autre sur la gauche , à quelques lieues du fleuve , dans le canton des Illegètes. C'est de la première qu'il s'agit en cet endroit.

Fin du Tome cinquième.

T A B L E

DES VIES DES HOMMES ILLUSTRES.

T O M E I.

<u>Théée ,</u>	<u>page</u>	<u>3.</u>	} comparés 147.
<u>Romulus ,</u>		<u>75.</u>	
<u>Lycurgue ,</u>		<u>159.</u>	} comparés 305.
<u>Numa Pompilius ,</u>		<u>244.</u>	
<u>Solon ,</u>		<u>321.</u>	} comparés 447.
<u>Publicola ,</u>		<u>397.</u>	
<u>Observations ,</u>		<u>456.</u>	

T O M E I. I.

<u>Thémistocle ,</u>	<u>page</u>	<u>3.</u>	} comparés 167.
<u>Camille ,</u>		<u>75.</u>	
<u>Périclès ,</u>		<u>178.</u>	} comparés 331.
<u>Fabius Maximus ,</u>		<u>267.</u>	
<u>Alcibiade ,</u>		<u>340.</u>	} comparés 520.
<u>Coriolan ,</u>		<u>438.</u>	
<u>Observations ,</u>		<u>531.</u>	

T O M E I I I.

<u>Paul Émile ,</u>	<u>page</u>	<u>5.</u>	} comparés 174.
<u>Timoléon ,</u>		<u>97.</u>	

T A B L E.

527.

Pélopidas,	183.	} comparés 344.
Marcellus,	269.	
Aristides,	354.	} comparés 513.
Caton le Censeur,	436.	
<u>Observations,</u>	<u>528.</u>	

T O M E I V.

Philopœmen, page	3.	} comparés 116.
T. Quintius Flaminius,	61.	
Pyrrhus,	126.	} comparés 342*.
Caius Marius,	226.	
Lyfander,	357.	} comparés 534.
Sylla,	435.	
<u>Observations,</u>	<u>545.</u>	

T O M E V.

Cimon, page	5.	} comparés 192.
Lucullus,	64.	
Nicias,	204.	} comparés 377.
Marcus Crassus,	288.	
Sertorius,	392.	} comparés 511.
Eumenes,	448.	
<u>Observations,</u>	<u>515.</u>	

ALL INFORMATION CONTAINED
HEREIN IS UNCLASSIFIED
DATE 01-10-2001 BY 60322
UCBAW/STP

DECLASSIFICATION

DATE 01-10-2001 BY 60322
UCBAW/STP

